

॥ श्री ॥

श्री गोपीजनवल्लभो विजयते तराव
श्रीगुसाईजीके निजसेवक
दोसौबावन वैष्णवनकी वार्ता
पुष्टि दृढाव ग्रंथ और अनुक्रमणिकासहित

यह पुस्तक

पुष्टिमार्गीय श्रीवद्वत्-संप्रदायी वैष्णवकी
मित्य नैमित्तिक पठनार्थ

देवद-रामदासजी गुरुश्री गोकुलदासजीने
(रणहरपुस्तकालय)

डाकौर

छपवायके प्रसिद्धिकिया

सं० १९९० के फाल्गुन सुदि गोविंद द्वादशी

म्योकावेर ३ पृथ्वे

यह पुस्तक सन् १८६७ के वर्ष में आक्ट मुजब रजिस्टर कार्याके
कारने छपवायिका इका प्रसिद्धिकिया स्थापितमें है

(रणहर पुस्तकालय) छात्रोंमें बंधावेहरे पुस्तकोंका लक्ष्य !

संप्रदायी वैष्णवोपयोगी पुस्तकें

नाम.	दि.	पृ.	आ.	नाम.	दि.	पृ.	आ.
भजन मन्त्रावली गोविंदोपवीतापुष्पि	१-८			दीप्य कपल स्वेद उपपद्	...	१-०	
बृहदेहोक्त गणपदति वैष्णवोपयोगी	०-८			" " रक्त उपपद्	...	०-१२	
रत्नपद्मति. रामपद. तिक्तोत्पद.				सत्यवारावप पुन एवा नु०	...	०-२॥	
वैष्णवकावटी. गोविंदसावनी ये पांयो				जगत्संगहात्मकमुद्रमुद्रातीमापदी	...	०-२	
पुस्तकालय एक मुद्रा	...	१-०		शिवविहृष्ट शुद्ध गुणरात्री टीका	...	०-१	
गणपदति. यदाश्वरोमें	...	०-४		शुद्धगुर्वेदीयनिरालोचना. गु० टी०	...	०-०॥	
रामपद. यदाश्वरोमें	...	०-४		सम्पूर्णपावटी कल्याणी लोपपदति	...	०-२	
तिक्तोत्पद. यदाश्वरोमें	...	०-४		शिवजीवात्मकप्रहृष्टिहृष्टापी शापार्थ	...	०-०	
वैष्णवकावटी. (सर्वोपयोगी)	...	०-२		विशालसागर वृद्धावधामयी छन्द	...	१-८	
गोपारुपद. यदाश्वरोमें	...	०-२		श्रीमद्वल्लभटीकागुणवत्सवर्णटीटीका	...	२-०	
गोविंदसावनी. वैष्णवोपयोगी	...	०-४		कमलरूप टीका (वैष्णवोपयोगी)	...	१-१०	
रत्नपदति श्रीरामचन्द्रनाराय.	...	०-२		श्रीजीवात्मकप्रहृष्टिहृष्टापी	...	१-४	
गणपदति श्रीरामचन्द्रनाराय.	...	०-२		शा० टी० नृपदी वैष्णवोपयोगी	...	१-४	
रत्नपदति मधुपदति श्रीरामचन्द्रनाराय	...	०-५		रामानन्द स्वामीजी रामरक्षा और			
२ दोर्मन्त्रा एक मुद्रा.	...	०-५		रामरक्षा	...	०-१	
श्रीरामचन्द्रनारायकी.	...	०-१॥		रामरक्षाखंडी और रामरक्षा.	...	०-१	
श्रीविष्णुचन्द्रनारायकी.	...	०-१		संक्षेप दृष्टका यक्षरा	...	०-१	
वैष्णवोपयोगी एक मुद्रा हनुमानचन्द्र.	...	०-१॥		पुष्पे भूगोत्रकान्तका.	...	०-१	
मुद्रमहिला कन्यापदपुष्पकी रत्न.	...	०-१		सुवर्णवक्षस और हनुमानकीकावली	...	०-१	
मुद्रपरिवारमुद्र शाखा दीक्षा श्रीपार्थ	...	०-१		वीरक्षाकी तसवीर	...	०-१	
पारिधातकी यक्षी कथ.	...	०-१		श्री रणछोरेजीका मंदिरका नक्शा	...	०-१॥	
वसंतवसान मुद्रादीक्षायोजन	...	०-१		हनुमान चालीसा और संक्षेप गोप	...	०-१	
अष्टादशकीटन ध्यानमंदरी	...	०-१		भजन रामायण. नु० छ०	...	०-१॥	
गोपीदास वैष्णवमन्त्रे सार्थ और श्रीराजी				मरद्वीका यदा अक्षरोमें	...	०-१	
वैष्णवमन्त्रे सार्थ यक्षी मोक्षअक्षरमन्त्र				शुद्धाक्षरमन्त्रे यदाअक्षर	...	०-१	
शापार्थ पुष्टिमार्गविश्वोत्तम संप्रदायी				वैष्णव मन्त्र रत्नाकर. शापादीक्षण	...	२-०	
वैष्णवोपयोगी.	...	४-४		रामायणराम सटीक. संस्कृत	...	०-१	
मुद्रादीपक सटीक संस्कृत.	...	०-४		पुस्तक मित्रिका टिका	...		
मुद्रादीपकमुद्राकोटिअनेमुद्रावीटीका	...	०-२		वैष्णव रामदासकी गोविंददासकी			
यक्षपुराण मुद्राकोटि अने शुद्ध गुणरात्री				(रणहरपुस्तकालय) छात्रों.			

दोसोबावनवैष्णवनकेवार्ताकी अनुक्रमणिका.

अ. अं.	नाम.	पृष्ठ.	अ. अं.	नाम	पृष्ठ.
१	मोहिंदरवासी सनातन माल- णकी वार्ता	१	२०	मोघोदासभटनामराकावयकी- वार्ता	७७
	मोहिंददासकीवेदनकान्ध वार्हाकी वार्ता	१४	२१	कटहरियाकीवार्ता	७८
२	छीतस्वामीचोवेलीकीवार्ता ...	१५	२२	रूपचंदनंदावाझावारेकीवार्ता	७९
३	चतुर्भुजदासकुंभनदासकेवेडाकी वार्ता	२०	२३	वड्ढनाथदासजोनपुरवारेकी- वार्ता	८१
४	भंददासजीकीवार्ता	२८	२४	राजाठाखाकीवार्ता ...	८२
५	नामजीभाईसाठोदरानगर- कीवार्ता	३५	२५	ज्ञानचंदकीवार्ता	८३
६	कृष्णभट्टजीकीवार्ता ...	४१	२६	भईताकोठारीकीवार्ता ...	८३
७	बाबाहरिवंशजीसजीकीवार्ता	४६	२७	हरजीकोठारीकीवार्ता ...	८५
८	मुरारीदासकीवार्ता	५३	२८	मोपाठदासवसुभास्वानवारेकी वार्ता	८५
९	नारायणदासमौठदेशवालेकीवार्ता	५४	२९	माणिकचंदबोसवाठवनियाकी- वार्ता	८७
१०	कायपणिकददासजिनभिममुरा- स्वोतिनकीवार्ता	५९	३०	देवभास्वानवगाठाकेवासीकी- वार्ता	८८
११	शैवाक्षपमुरारीसजीकीवार्ता	६१	३१	मणेशभासकीवार्ता ...	८९
१२	पितापुत्रकीवार्ता	६२	३२	मधुसूदनदासकीवार्ता ...	९०
१३	कृष्णदासकापयकीवार्ता ...	६३	३३	अन्नदास (मोपाठपुरमेरहेते) तिनकीवार्ता	९१
१४	मोपाठदाससेमलशजीकीवार्ता	६४	३४	नरुचैष्णवहजोसोहारिकाकेरस्ता- मेरहेतोतिनकीवार्ता ...	९२
१५	हरिदासविनायकरतावाठेकी- वार्ता	६४	३५	पायोमुजरीआन्पोरेवरहतीतिन- कीवार्ता	९३
१६	हरिदासकीवेठिकीवार्ता ...	६९	३६	रंजनावासीकी बहुकीवार्ता	९३
१७	अलीखानपठानकीवार्ता ...	७३	३७	मोपीनाथदासग्वाठकीवार्ता	९४
१८	निहालचंदसलोडाशजीकीवार्ता	७४	३८	मोभाईपठेल मुजरातके जिनमेवर्ध-	
१९	मोघोदासजीकापुठवारेतिनकी वार्ता	७६			

सं. शी.	नाम.	पृष्ठ.	सं. शी.	नाम.	पृष्ठ.
	छिपायेकमशुचीपरितिनकीवार्ता	९५		वार्ता	११७
३९	मोपाठदासभीतरकीवार्ता	९६	५६	एकपदेकश्रीगुप्तार्थीकृष्णवाल्म	
४०	एकब्राह्मणसंभाजीकेतीरपररहे			तोनिकीवार्ता	११८
	तिनकीवार्ता	९७	५७	एकविरकवैष्णवजिननेछतानमें	
४१	(एकवैष्णवदिछीमेरहेते) जिन-			डोछझुसापोतिनकीवार्ता	१२१
	कीश्रीरामचंद्रजीनेपरीक्षाकीनी		५८	एकविरककीवार्तानाकेपावमेंडो	
	तिनकीवार्ता	९९		करतमी तिनकीवार्ता	१२२
४२	एककुण्ठवीरपदेकजिनकेठीयेंश्रीना-		५९	एकसत्रीमोहोरानकीभरतीपरसतो	
	यजीनेगाडीपडाईतिनकीवार्ता	१००		तिनकीवार्ता	१२२
४३	एकसाहुकारकेवेडाकीपहुकीवार्ता	१०१	६०	एकविरककीवार्ताजानेश्रीगुप्तार्थ	
४४	साठोद्वानामगरमुजरातकेवासीकी-			जोछुपपदेउपारेदिवायेति, वा	१२६
	वार्ता	१०३	६१	ब्राह्मणकीपुरुषदेवीकेउपासीकी	
४५	एकपेनवाकीवेडीकीवार्ता	१०४		वार्ता	१२८
४६	बावजी रजपूतकीवार्ता	१०५	६२	छण्णदासतथाईश्वरदासदोऊभाई	
४७	जनबकुंवरबाईमेवाठनेरहेनीति-			कीवार्ता	१३०
	नकीवार्ता	१०६	६३	एकसाहुकारकेवेडाकीबहुजिनको	
४८	मिरबलकीवेडीकीवार्ता	१०७		श्रीगुप्तार्थीमैम्यायकन्योति०	१३०
४९	एककुंठरीकीवार्ता	१०९	६४	हरिदाससवाससनोडीपाकी	
५०	बेलहतीतपतीतदयभाइनकी-			वार्ता	१३५
	वार्ता	११०	६५	मेननिपिमिश्रकीवार्ता	१३८
५१	मंगाबाईसत्राणीजिनमेंश्रीविष्णु-		६६	ब्राह्मणकीपुरुषपतिनकीवार्ता	१४१
	छमिरिधरेपेसीछापकेकीर्तनयन।		६७	श्यामदासविरककीवार्ता	१४४
	वेतिनकीवार्ता	११२	६८	एकवैष्णवकीवेडीकीवार्ता	१४५
५२	एकब्राम्हजिनमेंदयाप्रवैयाकुंठवैष्ण-		६९	आठवैष्णवबहोतिनकीवार्ता	१४६
	वकियोगिकीवार्ता	११३	७०	तीनतुंभापाठवैष्णवकीवार्ता	१४९
५३	दयाप्रवैयाकीवार्ता	११४	७१	एकब्राह्मणीने (देवताकोवैमानप	
५४	एककुण्ठवीरवैष्णवजीनकीपोतीके			छायो) तिनकीवार्ता	१५३
	छोदानतेंकोठगयोति० था०	११६	७२	एकछेडकोठकोइतोहोदेइसीसे	
५५	एकभाईसत्राणीजिननेश्रीठाकुर			प्रभवहीछाजेयगो तिनकीवार्ता	१५६
	जीकेमिठाईकोमेणोदियोतिनकी		७३	आसकरगराबाकीवार्ता	१५७

अ. अं.	नाम.	पृष्ठ.	अ. अं.	नाम.	पृष्ठ.
७४	दोवडाईचाचोरा (गुजरातमेरहेते) जिनकेपडनेवैष्णवमकुंजेश्री कृष्णकरीतिनकीवार्ता ...	१७५	९१	एकसंदनब्राह्मणकीवार्ता ...	२०१
७५	रामदाससंवातकेवासीकीवार्ता ...	१७८	९२	एकपटेजिननेपेतकोकधारक योतिनकीवार्ता ...	२०२
७६	तारापंदडाईकीवार्ता ...	१८०	९३	निर्मिकचनवैष्णवजिनकेश्रीठा कुरजीनेआवसरोगेतिनकी वार्ता ...	२०३
७७	एकब्राह्मणपंडितजिननेमनोईसो बहारीपीपीतिनकीवार्ता ...	१८१	९४	नानचंदनियाराजनमरमेंरहेति नकीवार्ता ...	२०५
७८	हरिदासतयामोहनदासकीवार्ता ...	१८२	९५	एकडोकरीजिननेआठवेरकाठ पाछोकेप्योतिनकीवार्ता ...	२०५
७९	एकचोरवैष्णवकीवार्ता ...	१८३	९६	एकडोकरी (राजनमरमेंरहेति) जिननेमपकाकेठिकामेंदातणध योतिनकीवार्ता ...	२०६
८०	एकदयालदासवनीपाछोभीकी वार्ता ...	१८५	९७	एकमनपदीगऔरएकताइसीकी वार्ता गुजरातकेवासीकी ...	२०८
८१	श्रीपुरुषजिननेअम्बाश्रवछोडदि योतिनकीवार्ता ...	१८६	९८	एकपटेजिनकेवेडाकुंजानमयो तिनकीवार्ता ...	२०९
८२	देवाडाईपटेजगुजरातमेंरहेति नकीवार्ता ...	१८७	९९	मावेडाकीवार्ता ...	२११
८३	एकडोकरीपानीपुनीपाछीकी वार्ता ...	१८८	१००	देवजीडाईपोरचंदरमेंरहेति ...	२११
८४	वैष्णववत्तनीयमभुरामेंरहेतेजिनके मरमहादेवजीनें यणाकोमहाद् छियोतिनकीवार्ता ...	१८९	१०१	श्रीपुरुषराजनमरवासीजिन केमाथेहस्पाकोदोपनिदूचमयो तिनकीवार्ता ...	२१२
८५	निर्मिकचनश्रीपुरुषजिननेमिछेद्र- व्यकोत्यामस्त्रियोतिनकीवा ...	१९०	१०२	दोवपटेजिनकीवार्तासुनवेकुंजेश्री माथशीपथारतेति ...	२१३
८६	पटेजवैष्णवजिनकुंजमुनाजीकेस्व रूपकोज्ञानमयोतिनकीवा ...	१९२	१०३	एकश्रोतापकादोनोनकीवा ...	२१४
८७	एकअजवासियोश्रीठाकुरजीकुंज रमानतोतिनकीवार्ता ...	१९३	१०४	एकनियोजिनकुंजदेवीनेकमाड उत्तारदीयेतिनकीवार्ता ...	२१५
८८	एकश्रीपुरुषजिनकेपीरश्रीठाकु रजीनेवडायेतिनकीवार्ता ...	१९६	१०५	एकवेस्वाजीनहुंमाचवदासजी कोलेहतेतिनकीवार्ता ...	२१७
८९	एकविरकतयाशेठआमरेमेंरहेते तिनकीवार्ता ...	१९८			
९०	परमानंददाससोनी ति०वा० -	१९९			

अ. अं.	नाम.	पृष्ठ.	अ. अं.	नाम.	पृष्ठ.
१०६	एकपठेखवैष्णवविनमेद्रातवेच केमेडफरीतीनकीवातां ...	२१८	१२५	नारायणदासबागदपभाहमकी वातां	२३९
१०७	वेपिदासऔरदामोदरदास तिनकीवातां	२१९	१२६	अमनादासदक्षिणमैरहेतेतिनकी वातां	२४०
१०८	अमनादीबानेयोपीकुवैष्णव किपोतिनकीवातां ...	२२०	१२७	एकमंगाडीकीवातां ...	२४१
१०९	अनिबाजेदेवीकीउपसिनाछो ठकेवैष्णवप्रयोतिनकीवातां	२२१	१२८	एकमाझण भासनगरमैरहेतेति वातां	२४२
११०	श्रीनाथजीकेवीनकरकीवा. २२२		१२९	भाभुरीदासमाखीकीवातां	२४२
१११	मेमजीभाईनुवावाकीवातां	२२३	१३०	धर्मदासअडीममैरहेतेतिनकी वातां	२४३
११२	हुंदासनदासछवीलदासकीवा. २२४		१३१	एकवैष्णवहताजानेयोदेकर्मकरके श्रीगुसाईजीकीपरीक्षाडीनीतिन कीवातां	२४४
११३	एकधोनीकीवातां	२२५	१३२	एकराणावूरबदेभमैरहेतेतिनकी वातां	२४६
११४	एकराजापोबोठाकुरी येवतो तिनकीवातां	२२६	१३३	शेठकोवेडाऔरदासीति०वा०	२४७
११५	एकपठेखकोवेडाऔरपटवारीकी वेडीकीवातां	२२८	१३४	रूपापोरियाकीवातां ...	२४९
११६	दोमेतठकरेतिनकिवातां ...	२२९	१३५	एकपुडुडो (भंगी) गोवर्धनगा ममैरहेतो तिनकीवातां ...	२५०
११७	राजाजोठासिहजीकीवातां	२३०	१३६	वैष्णवकुनबीजिननेनाचतपासमै योपाठदेख्योतिनकीवातां	२५२
११८	दोउविरकएकसुंयतेदुखरेको करणाणप्रयोतिनकीवातां	२३२	१३७	दारकादासजीकीवातां	२५३
११९	एकमाझणीअठेलमैरहेतेतिनकी वातां	२३३	१३८	पठान्नेकेवेडाकीवातां	२५४
१२०	हुमादासकीवातां	२३५	१३९	एकरजपुत और रजपूतकी वेडीकीवातां	२५४
१२१	चहुरविहारीकीवातां ...	२३६	१४०	विरकवैष्णवदारकातेश्रीगुसाई जीकेसंगआयेतिनकीवातां	२५६
१२२	सत्राजीजिननेआग्रहसुंयपना- मुतमुनेतिनकीवातां ...	२३७	१४१	एकविरकवैष्णव (जिननेडोकरी कोवेडाजिवायो) तिनकीवा०	२५६
१२३	भायोदासकपूरजीकीवातां	२३७			
१२४	मीपदाससज्जीकीवातां ...	२३८			

अ. अं.	नाम.	पृष्ठ.	अ. अं.	नाम.	पृष्ठ.
१४२	एकक्षत्राजी (जिनने श्रीठाकुरजीको और श्रीगुसाईंजीको एकस्वरूप खाण्यो) तिनकीवार्ता ...	२५७		अकाठमुखनिवृत्तकन्योति० वार्ता ...	२७६
१४३	आनंददाससाचोरात्राज्ञाणकी वार्ता ...	२५७	१५८	मुठानदाससजीकीवार्ता ...	२७७
१४४	एकनाथ वैष्णवकीवार्ता ...	२५८	१५९	धोधीकठावतकीवार्ता ...	२७७
१४५	भीमजीठुवेसाचोरात्राज्ञाणकी वार्ता ...	२५९	१६०	एकबनियासाठवर्षकोदोयकेशरज आयोतिनकीवार्ता ...	२७८
१४६	एकवैष्णवजिनकुंरानद्वारावैष्ण वकेस्वरूपकोज्ञानप्रयोतिनकी वार्ता ...	२६०	१६१	राजाराजीजिननेवैष्णवरात्राकुं वेदीदीनीतिनकीवार्ता ...	२८९
१४७	एकचूडोजिननेपटितनकुंपाछो कन्योतिनकीवार्ता ...	२६१	१६२	एकवैष्णवशकुनदेसकेसठतो तिनकीवार्ता ...	२८४
१४८	एकवैष्णवजिननेश्रीनाथजीको और श्रीगुसाईंजीकोस्वरूपजा ण्योतिनकीवार्ता ...	२६३	१६३	एकबाईजिनकोवेडाघोरीकरतो तिनकीवार्ता ...	२८५
१४९	सायककीवेडीकीवार्ता ...	२६३	१६४	कुमनदासजीकेवेडाकण्यदास तिनकीवार्ता ...	२८७
१५०	दोवभाईपटेठ (सोभाकुचामर बंदनछायेतिनकीवार्ता)	२६५	१६५	गोकुलभट्टऔरगोविंदभट्टकण्य भट्टजीकेवेडाति० वार्ता	२८८
१५१	किशोरीबाईकीवार्ता ...	२६६	१६६	यादवेंद्रदासआमरेमेंरेहेते तिनकी वार्ता ...	२८८
१५२	दोवभाईपटेठजिननेदेवीकृपामें हारीतिनकीवार्ता ...	२६८	१६७	मथुरानाथऔरहरजीमसदोकाई नकीवार्ता ...	२८९
१५३	एकवैष्णवजाकेशरीरमेंकोठप्रयो हतातिनकीवार्ता ...	२६९	१६८	एककाईकीवार्ता ...	२९०
१५४	मेहाधानरकीवार्ता ...	२७०	१६९	एकराजा (जिननेबाज्ञासनकुंवेदी सानेदियो) जाकीवार्ता	२९४
१५५	मोहनदासजिनकुंश्रीगुसाईंजीने मिरिराजजीकोस्वरूपकसोतिन कावार्ता ...	२७३	१७०	समुणदासतिनकीवार्ता ...	२९५
१५६	चतुर्भुजदासनाज्ञाणकीवार्ता	२७४	१७१	मन्नाठासऔरगोवर्धनदास दोकाभाईनकीवार्ता ...	२९५
१५७	विरकवैष्णवजिननेचरणाज्ञातकुं		१७२	भगवानदासभीतरियाकीवार्ता	२९७
			१७३	रोडजरीविरककीवार्ता ...	२९७
			१७४	मावेटीजिनकेश्रीठाकुरजीवाजरी अरोमतेतिनकी वार्ता ...	२९८
			१७५	गोपाळदासवदनमरानामरति	

अ. सं.	नाम.	पृष्ठ.	अ. सं.	नाम.	पृष्ठ.
	नकीवाता ३००		१९६	मानकुंवरबाईति, नवें श्रीवाकळ	
१७६	रवाछोटदासवैष्णवकीवाता ३०१			प्यानीकुंकीमदनमोहनजीकन्यो	
१७७	दोउठमकिननेनारायणदासकी			तिनकीवाता ३२८	
	कीकुंफांकीदीनीति० वाता ३०२		१९७	माधवदासवडनगरमें रहेतेतिनकी	
१७८	राजाकोवेदासजीसठक्षणोति			वाता ३३०	
	नकीवाता ३०३		१९८	एककुणवीपटेजिनदीरांवापटी	
१७९	गुरुपोसदासकाशीमें रहेतेति			कीमाछांजीकारकरीतिनकी	
	नकीवाता ३०६			वाता ३३१	
१८०	येगीदासजिनमेंहुतकोउछारकि		१९९	साठवाईतथाचारवाईकीवाता ३३३	
	योतिनकीवाता ३०८		२००	दोववैष्णवजिनमेंहैटपरअक्षरकि	
१८१	हैसईसवीकीवाता ... ३०९			येतिनकीवाता ३३४	
१८२	पारवीकीवाता ३११		२०१	एकराजाजिनकेनाममेंदोपंडितर	
१८३	एकवैष्णवजादेभैरवकुंछुच्छा			हेतेतिनकीवाता ३३६	
	प्योतिनकीवाता ... ३१२		२०२	मदनगोपाळदासकायस्थहेते	
१८४	एकवैष्णवसूरतमें रहेतोति० वा. ३१३			तिनकीवाता ३३७	
१८५	एकराजाविरकवैष्णवकोतथाव		२०३	अजीवैष्णवमुनरातेकेवासीति	
	हृत्पकोधर्मपूछतोतिनकीवाता ३१४			नकीवाता ३३९	
१८६	जी वनदासब्राह्मणजिनकीपि		२०४	छप्पादासस्वायीमपुरामें रहेते	
	ताकेभूवासुंयेवनकोउछारअयो ३१६			तिनकीवाता ३४०	
१८७	एकछाहोरकोपंडितकीवाता ३१८		२०५	वैष्णवईश्वरदासजीकोसवोंपर	
१८८	विरकवैष्णवजिनकोअमश्रीनाथ			वैष्णवकीमसन्तामानतेति. ३४२	
	जीनसहीशकेतिनकीवाता ३१९		२०६	एपापदासआंवनकुनवीकीवा. ३४२	
१८९	भीमसेनराजाकीवाता ... ३१९		२०७	येणीदासछोपाकीवाता ... ३४४	
१९०	उत्तमदासकीवाता ... ३२१		२०८	सापोराब्राह्मणजीनकुंवादीवहोत	
१९१	जनश्रमवानदासगौरवारजपूत			सुंदरआपतीतिनकीवाता ३४५	
	कीवाता ३२२		२०९	ठरवीदासजोशीकीवाता ... ३४६	
१९२	एकराजा जिनकेमाथमेंब्राह्मण		२१०	महीपरजीझौरफुडबाईति. वा. ३४७	
	कुंवेष्णवननेवीबलोफयाँ		२११	एकवैष्णवभूपरदासजीनकुंजीमु	
	तिनकीवाता ३२३			साईजीनिपमत्कारदेसायो ति० ३४८	
१९३	रेठाउदंबरब्राह्मणकीवाता ३२४		२१२	मयनबाईचंभातमें रहेतेति. वा. ३४९	
१९४	परमभोगवीकीवाता ... ३२६		२१३	एकब्राह्मणजिननेमयनबाई	
१९५	साधुबहुतिनकीवाता ... ३२६			के पापपापहजारकपेया धरे	
				तिनकीवाता ३५१	

अ. सं.	नाम.	पृष्ठ.	अ. सं.	नाम.	पृष्ठ.
२१४	भुरारीआचार्यसेनातमेंरहेते तिनकीवार्ता	३५३	२३४	तिनकीवार्ता	३८७
२१५	माटननकेएकरजपुतकीवार्ता	३५५	२३५	कायस्थसुरतमेंरहेतोति. वा.	३९२
२१६	एकवैष्णवगुजरातमेंरहेतेजोनके दुखहुंश्रीठाकुरजीकापठठेति नकीवार्ता	३५७	२३५	जीवापरिस्वतथासहजपाठडो शीतयावठाठमाधवदासति.	३९३
२१७	निष्किचनवैष्णवकीवार्ता (निन केमनोरथठाकुरजीनेपूरणकिये)	३५८	२३६	चांपाभाईअधिकारीकीवार्ता	३९५
२१८	रसस्वामपठानदिछीमेंरहेते तिनकीवार्ता	३६१	२३७	तानसेनकीवार्ता	३९७
२१९	एकरजपुतगिनकोश्रीठाकुर जीनेआचारविचारनदेरुयोति नकीवार्ता	३६३	२३८	एकनाझणभौरवाकीखोकी वार्ता	३९९
२२०	शैवकेवेदाकीवार्ता	३६५	२३९	ध्यानदासतयाजमयाधदासकी वार्ता	४००
२२१	शैववैष्णवकीवार्ता	३६६	२४०	गोपाठदासतिननेगोपीनाथदास कपरविम्बासरासयोति. वा.	४०१
२२२	एकमनवासोरावतमेंरहेतेति नकीवार्ता	३६८	२४१	पृथ्वीसिंघजीकीनिरकराजाक न्याणसिंघजीकेवेदाकीवा.	४०२
२२३	एकवैष्णवअकेरचंदगुजरातमेंरहे जिननेस्नेहवासकिव्यसनवान कोशेदान्योतिनकीवार्ता	३६९	२४२	हुमानवीराणीकीवार्ता	४०५
२२४	दामोदरदासऔरगिनजीदोयली नकीवार्ता	३७१	२४३	भगवानदास जोराभरायकेसुं गसुवैष्णवभये तिनकीवार्ता	४०६
२२५	कबुतरकबुतरीकीवार्ता	३७२	२४४	एकचूड़डोहोतिननेश्रीमोकुड नाथजीकोनामभयटकन्योति.	४११
२२६	विहडदासकीवार्ताजिनकोश्रीमु सईजीनेसुंदेहमिठायो	३७४	२४५	गधुकरशाह्राजाकीवार्ता	४१२
२२७	रजावतीराणीकीवार्ता	३७५	२४६	तुलसीदासजीसारस्वत ब्राह्मण तिनकीवार्ता	४१३
२२८	वृक्षिणकोराजातिनकीवार्ता	३८१	२४७	सौदामरगिननेधनियोकेवेदावच वेकीसवरदीनीति. वार्ता	४१५
२२९	सुराठदासगिननेआसुरीब्रह्मको त्यागकियोतिनकीवार्ता	३८२	२४८	हृषीकेशजीकीवार्ता	४१६
२३०	गोकुलदासइतोबानेंगुमकेठकरी तिनकीवार्ता	३८३	२४९	कान्धदासराजमगरमेंरहेतेगिनके वेदाकीवहुनंश्रीठाकुरजीकृपा म्योतिनकीवार्ता	४१९
२३१	नरहीदासगिननेखिपकूपदिसागो तिनकीवार्ता	३८४	२५०	मवुरादासकीवार्ता	४२०
२३२	कपमंजरीकीवार्ता	३८५	२५१	भाष्येन्द्रपूरीकीवार्ता	४२२
२३३	कन्यागण्डहसेआजीवामेंरहेते		२५२	जाटाकण्णदासकीवार्ता	४२४
			१	पुष्टीहदावकीवार्ता ४२५ से ४५० तक	
				इति अनुक्रमणिका समाप्त.	

पुष्टिसार्गीय वैष्णवोंके उपयोगी पुस्तकोंका सूचिपत्र.

श्रीकृष्णाश्रय मूढश्लोक अने शुद्ध गुजरातीटीका	०-२	०-॥
नोपोकगोत मूढश्लोक अनेशुद्ध गुजरातीटीका	०-॥	०-॥
नारदभक्तिस्तुत मूढसंस्कृत अने शुद्ध गुजरातीटीका	०-१॥	०-॥
पोटपग्रंथ मूढश्लोक अने शुद्ध गुजरातीटीका सादी जील्द	०-१२	०-१
पोटपग्रंथ मूढश्लोक अने शुद्ध गुजरातीटीका रेशमी जील्द	१-०	०-१
पुष्टिसार्गीयस्तोत्ररत्नाकर स्तोत्र संख्या (८१) सादी जील्द	०-६	०-॥
पुष्टिसार्गीयस्तोत्ररत्नाकर स्तोत्र संख्या (८१) रेशमी जील्द	०-८	०-॥
उत्सवनिर्णय मूढश्लोक अनेशुद्ध गुजराती टीका	०-८	०-१
वनदात्रा सचित्र अने चोरांशुकोसकी परीक्रमा	०-४	०-१
पुष्टिसार्गीय श्लोक संग्रह	०-४	०-१
गोपाद्वह्मनाम भाषाटीका	०-८	०-१
बल्लभाष्ट्यानअनेदूधपुरुष गुजराती	०-१	०-॥
श्रीगोवर्धननाथजीनुमागद गुजराती	०-१	०-॥
हरायजीकृत शिक्षापत्र मोठु मूढश्लोक अने शुद्ध गुजराती टीका	२-०	०-४
मोक्षनाथजीकृत वचनमृत अजनापा गुजराती अक्षर	०-६	०-१
सिद्धांत रहस्य मूढसहित गुजराती टीका	०-२	०-॥
श्रीकृष्ण जन्मसंख्य पूर्वार्थ गुजराती भाषांतर	१-८	१-४
श्रीमद्भागवद्गीताविषयचरम मूढश्लोक अने शुद्धगुजरातीटीका रेशमी	१-०	०-२
श्रीमद्भागवद्गीता मूढश्लोक अनेशुद्ध गुजराती टीका रेशमी गुठको	०-८	०-१
श्रीयमुनाजीके चाठीसपद गुजराती	०-१	०-॥
सूरसागर सूरदासजी कृत श्रीमद्भागवतके बारहोत्तरपके पद	७-०	०-१२
रागरत्नाकर सचित्र इसमें जो श्रीकृष्णप्रगवानने जोखो छीटाकीनी है
सो सय संपुररागरामजीमेंई उचम सोनहरी जील्द	२-०	०-४
अनविहार नारायणस्वामी कृत बडा अक्षर उत्तम सोनहरी जील्द	२-०	०-४
अनविहार नंददासजी कृत बडाअक्षर सोनहरी जील्द	२-०	०-६
मेमसागर सचित्र बडा (दसमहीठा) बडाअक्षर सोनहरी जील्द	१-४	०-४
इत्यादिक पुस्तकोंके शिवाय हमारे यहां वेद, वेदान्त, कर्मकांड, पुराण, धर्मशास्त्र, न्याय, छन्द, ज्योतिष, काव्य, अलंकार, चम्पू, नाटक, कोष, वैद्यक, योगमार्ग ग्रन्थ, पुष्टिसार्गीय ग्रन्थ, रामानुज सैवदास ग्रंथ जैसे संस्कृत हिंदुस्तानी, गुजराती, मुंयई, तमिली, अमदावादके छपेहुये हजारेपास हरकस्त तयार रहते हैं और मंगयाने पाठे महाशयनको योग्य दासके कमिशन काठके और भेटकी पुस्तक बिना मूल्य छिपे सापहि चाय भेजते हैं चाहिजे सो मंगयाना तुरंत भेज द्ये. सर्व प्रकारके पुस्तक मित्रनेका ठिकाना.

वैष्णव रामदासजी श्रीगुरु गोकुलदासजी.

(रणहर पुस्तकशाला) डाकोर.

॥ श्री ॥

श्रीवास्तवध्यायनमः ॥

श्रीअस्मत्गुरुचरणकमलेभ्यो नमोनमः ॥

श्रीगोपीजनबद्धभाय नमः ॥

श्रीगुसांईजीके निजसेवक दोसौबावनवैष्णव तिनकी वार्ता ॥

श्रीगुसांईजीके सेवक गोविंदस्वामी सनाढ्य
ब्राह्मण महावनमें रहते तिनकी वार्ता ॥

प्रथम गोविंददास आंतरी गाममें रहते ॥ तहां गोविंद-
स्वामी कहावते ॥ और आप सेवक करते ॥ गोविं-
ददास परम भगवद्भक्त नित्य याही रीतीसो रहते ॥
जो श्रीभगवत् चरणारविंदकी प्राप्ति कैसें होय ॥ याही
बातकी तलासी करत रहते हते ॥ एकसमय गोविंददास
आंतरी गांमते ब्रजफों आये ॥ और महावनमें आयके
रहे ॥ काहेतें जो यह ब्रजधामहै ॥ इहां भगवत् चरणार-
विंदकी प्राप्ति होयगी ॥ और गोविंदास कवि हते ॥ सो
आप पद कर्ते ॥ सो जो कोऊ इनके पद सीखकें श्रीगुसां-
ईजीके आगे आयकें गावें ॥ तिनके ऊपर श्रीगुसांईजी
प्रसन्न होते ॥ सो गावनहारे गोविंदस्वामीके आगे आयकें
कहते ॥ जो तुमारे पद सुनके श्रीगुसांईजी बहुत प्रसन्न
होंतहैं ॥ ये वार्ता सुनि गोविंदस्वामीनें ऐसो विचार
कियो ॥ जो श्रीगुसांईजीकूं मिलें तो ठीक ॥ तब एकसमय
श्रीगुसांईजीको सेवक महाबन गयो हतो ॥ सो भगव-

दिच्छाते श्रीगुसांईजीके सेवकको और गोविंदस्वामीको मिलाप भयो ॥ वा वैष्णवकी गोविंदस्वामीकी आपसमें बात चीत भई ॥ जब गोविंदस्वामीने कही के श्रीठाकुरजीको अनुभव कैसे होय ॥ जो मोक्ष बहुत दिनसों या बातकी आतुरता है ॥ ताते कही ॥ तब वा वैष्णवने गोविंदस्वामीकी आतुरता देखिके कह्यो ॥ जो आजकाल श्रीठाकुरजीकुं श्रीविठ्ठलनाथ श्रीगुसांईजीने बसकर राखे हैं ॥ ताते श्रीठाकुरजी और ठौर कह जाय सकत नहीं ॥ श्रीठाकुरजीतो श्रीगुसांईजीके हाथ हैं ॥ सो यह सुन के गोविंदस्वामीकुं अति आतुरता भई ॥ तब गोविंदस्वामीने उन वैष्णवसों कही ॥ जो मोक्ष श्रीगोकुलमें श्रीगुसांईजीके पास लेचलो ॥ तब उहासे उठे सो श्रीगोकुलमें आये तब श्रीगुसांईजी ठाकुरानीघाट ऊपर संध्या-तर्पण करत हते ॥ वा वैष्णवने गोविंदस्वामीकुं श्रीगुसांईजीको दर्शन करायो ॥ गोविंदस्वामी दर्शन करिके मनमें समझे ये कर्ममार्गीय दीखत हैं ॥ सो कहा कारण होयगो ॥ तब गोविंदस्वामीकुं देखके श्रीगुसांईजी बोले जो आवो गोविंदस्वामी बहुत दिनसूं देखे ॥ तब गोविंदस्वामीने कही माहाप्रभु अबही आयोहूं ॥ तब गोविंदस्वामीने अपने मनमें विचार कियो की ॥ आपने मोक्ष कोई दिन देख्यो नहीं हैं सो कैसे जान गये ॥ यामें कुछ कारण दीसत है ॥ जब श्रीगुसांईजी मंदिरमें पधारे ॥ तब गोविंदस्वामीने बीनति करी हे माहाप्रभु मोक्ष कृपा करिके शरण लेओ ॥ तब श्रीगुसांईजीने कही न्हाय

आवो ॥ तब वे न्हाय आयें ॥ तब श्रीनवनीतप्रिया-
जीके संनिधिमें नाम निवेदन करायो ॥ तब गोविंदस्वा-
मीकुं साक्षात् पूर्णपुरुषोत्तम कोटिकंदर्पलावण्यके दर्शन
भये ॥ और सब लीलानको अनुभव मयो ॥ श्रीगुसाईजी
श्रीनवनीतप्रियाजीकी सेवा करके बाहिर पधारे ॥ तब
गोविंदस्वामीनें बीनती करी ॥ जो आपतौ कपटरूप
दिखावत हो ॥ साक्षात् पूर्णपुरुषोत्तमरूप होयके वेदोक्त कर्म
करत हो ॥ सो हम जैसेन कूं मोह होय है ॥ जब श्रीगुसाईजीनें
आज्ञा करी ॥ जो भक्तिमार्ग है सो फूलको वृक्ष है ॥ और क-
र्ममार्ग है सो कांटनकी बार है ॥ तासूं कर्ममार्गकी बारविना
भक्तिमार्ग जो फूलको वृक्ष वाकी रक्षा नहोय ॥ ये सुन-
के गोविंदस्वामी बहुत प्रसन्न भये ॥ गोविंददास ऐसैं कु-
पापात्र भगवदीय भये ॥ प्रसंगा ॥ सो गोविंददास महाव-
नके टेकरापर रहते हते ॥ और नये कीर्तन करके गावते
हते ॥ और उहां श्रीठाकुरजी सुनवेकुं पधारते हते ॥ जब
उहां मदनगोपालदास कायथ कीर्तन लिखवेकुं आवते
हते ॥ सो एकदिन श्रीठाकुरजीकुं गोविंदस्वामीनें कही
॥ इहांताई आप नित्य श्रम करोहो ॥ सो आपको गान
सुनवेकी बहुत इच्छा दीखेहै ॥ आपकुं गानको अभ्यास
है ॥ यातें आपकुं कछु गायो चाहिये ॥ तब आपनें कछु
गान कियो ॥ तब गान सुनके श्रीस्वामिनीजी पधारी ॥
जब तालस्वर बरोबर बजावे लगे तब गोविंदस्वामी धन्य
धन्य कहन लगे ॥ और आपनें भाग्यकी सराहना करन
लगे ॥ जब मदनगोपालदास कायथ बोले ॥ जो इहां कोई

आदसी तो दिसे नहीं है ॥ तुम कौनसू बात करत हो ॥ तब गोविंदस्वामी कछु बोले नहीं ॥ बात गुप्त राखी ॥ पाछे एक दिन श्रीगुसांईजीने पूछी जो श्रीठाकुरजी कैसे मावें हैं ॥ तब गोविंदस्वामीने कही श्रीठाकुरजी बहोत आछे मावें हैं ॥ परंतु तालस्वर श्रीस्वामिनीजी बहोत आछो देत हैं ॥ ये छुनके श्रीगुसांईजी गुप्तकायके छुपहोय रहे ॥ प्रसंग ॥ २ ॥ सो गोविंदस्वामी जब श्रीगोकुलमें रहते छते ॥ सो उहां आंतरिगाममें पहले गोविंदस्वामीके सेवक हते सो श्रीगोकुल आये ॥ सो पूछत पूछत बिनके पास गये ॥ जायके पूछी जो गोविंदस्वामी कहां हैं ॥ तब बिनने कही गोविंदस्वामी मरगये ॥ तब तिनमेंसू एक पहेचानतो हतो ॥ जब बाने कही आप क्यों हमारी हांसी करो हो ॥ जब गोविंदस्वामीने कही हमने स्वामीपनो छोडदियो ॥ जासुं तुम ऐसे समझो जो मरगये हैं ॥ जब बिनने बीनती करी जो अब हम सेवक कौनके होंय ॥ जब गोविंदस्वामीने बिनकुं लेजायके श्रीगुसांईजीके सेवक कराये ॥ सो गोविंदस्वामीके संग सो बिनकुं भगवत्प्राप्ती भई ॥ जिनके संगते सहज भगवत्प्राप्ती होवै बिनकी कृपाते कहा नहोवै सब होवै ॥ बिनकी बात कहा कहिये ॥ प्रसंग ॥ ३ ॥ सो वे गोविंदस्वामी श्रीगोकुलमें रहते ॥ परंतु श्रीयमुनाजीमें पांव नहि देते ॥ श्रीयमुनाजीकुं साक्षात् श्रीस्वामिनीजी अष्टसिद्धीके दाता जानते ॥ जेसो स्वरूप श्रीमहाप्रभुजीने यमुनाष्टकमें वर्णन कियोहै ॥ वैसे श्रीगुसांईजीकी कृपासे गोविंदस्वामी जानते हते जासुं श्रीयमुनाजीमें

पांव नहीं धरते हुते ॥ और श्रीयमुनाजीके दर्शन करते और दंडवत करते ॥ और पान करते सो एकदिन श्री-
 बालकृष्णजी और श्रीगोकुलनाथजी गोविंदस्वामीकुं
 पकडके श्रीयमुनाजीमें नहायवे लगे ॥ जब गोविंदस्वामी-
 नें वीनती करी जो ये मलमूत्रको भन्यो देह श्रीयमुनाजी
 लायक नहीं है ॥ श्रीयमुनाजी साक्षात् स्वामिनी हैं ॥
 जासुं ये अधम देहस्पर्शकरवे योग्य नहीं है ॥ और श्रीय
 मुनाजीकुं तो उत्तम सामग्री समर्पी चहीये ॥ ये मुनके
 श्रीबालकृष्णजी और श्रीगोकुलनाथजी छुप कर रहे ॥
 सो वे गोविंदस्वामी ऐसो स्वरूप श्रीयमुनाजीको जान-
 तहते ॥ प्रसंग ॥ १५ ॥ श्लोक ॥ गगोपकैरनुवननयतोरुदार-
 वेणुस्वनैःकल्पदैस्तनुभृतसुसख्यः ॥ अस्पर्दनंगतिमतां
 पुलकस्तरूणानिर्योगपाशकृतलक्षणयोर्विचित्रं ॥ या श्लो-
 कको व्याख्यान श्रीगुसांईजी गोविंदस्वामीके आगे कहवे
 लगे ॥ जब कहते कहते अर्धरात्र वीती तब श्रीगुसांईजी
 पोढ़ै ॥ गोविंदस्वामी घरकूँ चले ॥ तब श्रीबालकृष्णजी तथा
 श्रीगोकुलनाथजी तथा श्रीरघुनाथजी तीनों भाई वैष्णव-
 नके मंडलमें विराजत हुते ॥ जब गोविंदस्वामीनें जायके
 दंडवत करी ॥ तब श्रीगोकुलनाथजीनें पूछे जो श्री गुसांई
 जीके इहां कहा प्रसंग चलतो हतो ॥ जब गोविंदस्वामीनें
 ये श्लोककी सुबोधिनीजीको प्रसंग कह्यो ॥ फिर कह्यो
 आपको व्याख्यान आप करें यामें कहा केहेनो ॥ जाके
 स्वरूपको वेद हूं नहीं जानसकें वाको व्याख्यान वे आप-
 ही करें तब होय ॥ जब ऐसे कह्यो तब श्रीगोकुलनाथजीनें

दोनौ भाइतसों कही जो गोविंदस्वामीनें श्रीगुसांईजीको स्वल्प कैसो जान्योहै ॥ और इनके ऊपर आपनें कैसी कृपा करी है सो इनके भाग्यको कहावर्णन करिये ये कहिके श्रीगोकुलनाथजी छुपहोयरहै ॥ प्रसंग ॥ ५ ॥ सो गोविंदस्वामी श्रीनाथजीके संग खेलते हते सो एक दिन अपछरा कुंडसों गोवर्धनपर्वतऊपर होयकें श्रीगोवर्धननाथजीके संग गोविंददास आवते हते ॥ सो उहांसे राजभोगकी आरती भई ऐसी अवाज सुनी ॥ जब गोविंदस्वामीनें कहि श्रीनाथजी तो अबी आवतहैं ॥ राजभोग कौननें अरोये हैं ॥ गोविंदस्वामीनें जायके श्रीगुसांईजीसों वीनती करी ॥ जब श्रीगुसांईजीनें दूसरो राजभोग सिद्ध करायके धरायो ॥ और गोपालदासभीतरियानें श्रीगुसांईजीसों वीनती करी ॥ जो एकदिन पृच्छरीकी औरतें गोविंददास श्रीनाथजीके संग आवते में देखे हते ॥ जब श्रीगुसांईजीनें कही ॥ जो कुंमनदास तथा गोविंदस्वामी तथा गोपिनाथदासग्वाल ये तीनो श्रीनाथजीके एकांतके सखाहैं ॥ सो इनकुं अधिकार श्रीमहा प्रसूजीनें दियोहैं ॥ ये बात सुनके गोपालदासजी बहुत प्रसन्न भये ॥ और अपने मनमें कहेवे लगे ॥ जो हम भितरियाभये तो कहा भयो ॥ सो वे गोविंदस्वामी ऐसे भगवदीय कृपापात्र हते ॥ प्रसंग ॥ ६ ॥ सो एकदिन गोविंदस्वामी उत्थापनकेसमें श्रीनाथजीके दर्शनकुं गये ॥ जब देखें तो श्रीनाथजीके पागके पेच खुल रहे हते ॥ तब गोविंदस्वामीनें कही कें पागके पेच क्यों खोलडारहैं

॥ जब श्रीनाथजीनें कही तूं पागके पेंच संवारिदे ॥ तब गोविंदस्वामीनें भीतर जाइके पागके पेंच संवारदिये ॥ तब भीतरियानें श्रीगुसांईजीसोंकही ॥ जो गोविंददासनें अपरस छिवाय दीन्है ॥ पाछें श्रीगुसांईजीनें आज्ञा करि जो गोविंददाससें श्रीनाथजी नहीं छुआयजाय ॥ येतो श्रीनाथजीके संग सदैव खेलें हैं ॥ सो गोविंदस्वामी ऐसे कृपापात्र हते ॥ प्रसंग ॥ ७ ॥ एकदिन श्रीगुसांईजी श्रीनाथजीको शृंगार करत हते ॥ तब गोविंदस्वामी जगमोहनमें कीर्तन करत हते ॥ तब श्रीनाथजीनें गोविंददासकुं आठ कांकरी मारी ॥ जब गोविंदस्वामीनें एक कांकरी मारी ॥ तब श्रीनाथजी चमक उठे ॥ जब श्रीगुसांईजीनें कही गोविंददास यह कहा कियो ॥ तब गोविंदस्वामीनें कही ॥ हे महाराज आपकोतो पूत औरको सूलीकर ॥ जो आठ वखत मोकुं कांकरी मारी जब आप कछु नहीं बोले ॥ ये सुनके श्रीगुसांईजी चुपकरि रहे ॥ सो गोविंददासजीकुं ऐसो सखा भाव सिद्धभयो हतो ॥ प्रसंग ॥ ८ ॥ एकदिन गोविंददासकी बेटी देसमेंसो आई ॥ परंतु गोविंदस्वामी कोईदिन वा बेटीसुं बोले नहीं ॥ जब कान्हवाईनें कही जो बेटीसुं एकदिन तौ बोली ॥ तब विननें कही जो मनतौ एकहै ॥ इतको लगाऊं के उतको लगाऊं फेर कछुदिन रहिके बेटी देसकुं जावे लगी ॥ जब वहु बेटीननें साडीचोली पंठाई ॥ तब गोविंदस्वामीके मनमें दया आई ॥ जो गुरुके घरको अनप्रसादी लेवेगी तो याको विगार होयगो ॥ वे गोविंदस्वामी कोईदिन बेटीसें

बोलते नहते ॥ तो परंतु दयाकेलियें बोले जो तुं
 ये लेवेगी तो तेरो कुरो होयगो ॥ जब बेटीनें
 कही मोड़ुं लसज नहीं हती ॥ तो मोड़ुं तुम-
 नें बड़ी कृपा करिके रस्ता बतायो ॥ तब वे सब कम्हा
 पाछें पठाय दिये ॥ बेटी अपनें घरकों गई ॥ सो वे गोविं-
 दस्वामी गुरुकी अंशसो ऐसें हरपत हते ॥ प्रसंग ॥ ९ ॥
 और फागनके दिन हते ॥ सो सेनसोग सरायकें श्रीगु-
 साईंजी बीड़ी अरु गावत हते ॥ तब गोविंदस्वामी धमार
 गावत हते ॥ सो धमार श्रीगोवरधनरायलाला ये धमार
 पूरी करेबिना गोविंदस्वामी चुप कर रहै ॥ जब श्रीगुसां-
 ईजीनें आज्ञा करी ॥ गोविंददास धमार पूरी करौ ॥ तब
 गोविंदस्वामीनें कही महाराज धमारतौं भाज गईहै ॥
 बेतो घरमें जाय घुसे ॥ खिलतो बंद भयो अब कहा गावूं ॥
 ये छुनके श्रीगुसाईंजी चुप कर रहे ॥ पाछे बैठकमें पधारि ॥
 जब एक तुक आपनें बनायके गोविंद स्वामीके नामकी
 वा धमारमें धरी ॥ वादिनसूं गोविंदस्वामीकी धमार
 लोकमें साढेबारह कहीजायहै ॥ सो गोविंदस्वामी ऐसें
 कृपापात्र हते ॥ जो लीलके दर्शन करिकें गान करते
 हते ॥ प्रसंग ॥ १० ॥ सो वे गोविंदस्वामी महावनके टेकरा-
 पर नित्य गान करते हते ॥ श्रीनाथजी नित्य मुनि-
 वेडुं पधारते हते ॥ और श्रीनाथजीसंग गानहूँ करते
 हते ॥ और वे गोविंदस्वामी भगवल्लीलामें अष्ट सखा-
 नमें हते ॥ सो कोई समें श्रीनाथजी चूकते सो गोविंद-
 स्वामी मूल काढते ॥ और गोविंदस्वामी चूकते जब

दोस्रांवावन वेषणवकी वार्ता.

लाये ॥ पाग पाली दीनी ॥ वे गोविंददासकुं पाग बांध-
उत्तकी ऐसी चतुराई हती ॥ प्रसंग ॥ १२ ॥ सो गोविंद-
दास नित्य जसोदाघाटपर जाय बैठते ॥ सो उहां
एकदिन एक बैरागी गायवे लग्यो ॥ सो राग तालस्वर
हीन हतो ॥ जब गोविंदस्वामीनें कही जो तुं मत गावे ॥
या गायिवेसों कहा होतहै ॥ तब वा बैरागीनें कही मैंतो
मेरेरामकों रिझावतहौ ॥ जब गोविंदस्वामीनें कही राम
तौ चतुरशिरोमणीहै ॥ सो कैसें रीझेंगे ॥ जो तेरो साचो भा-
व होय तौ मनमें नाम लिये सो रीझेंगे ॥ सो वे गोविंदस्वामी
ऐसे निःशंक हते ॥ प्रसंग ॥ १३ ॥ सो एकदिन श्रीना-
थजी सामनाकके लपर चट्टिके निगमने हते ॥ और
छुरला बजावत हत और गोविंददास दूरसाटकराक ऊ-
पर बैठे देखते हते और बाही समय श्रीगुसाईंजी न्हायकें
उत्थापन करवेके लिये श्रीगिरिराज लपर पधारें ॥ सो
श्रीनाथजीनें सामढाक पैसुं देखे और उतावलसों कूदे
और बागाको दांवन फट गयो और लीर झाडपें रहि गई ॥
तब श्रीगुसाईंजीनें केंवार खोलिके उत्थापन करे देखेंतो
बागाको दांवन फटयोहै ॥ जब मनुष्यनसों पूछी जो इहां
कोई आयी तौ नहीं हतो ॥ तब सबनें नाहीं कही ॥ जब
आप विचार करवे लगे ॥ तब गोविंददासनें कही जो आप
या बातको विचार कहाकरेंहै ॥ लरिकाको सुभाव जानें
नहींहैं जो बहुत चंचल है स्यामढाकपैसुं कूदिके बागाको
दांवन फाडयोहै ॥ सो आप चलोतो दिखाऊं ऐसे लीर
विंददासही ॥ जब श्रीगुसाईंजी पधारके वा लीर उतारि

श्रीनाथजी मूल कहते ॥ श्रीनाथजी तथा गोविंदजी
 श्रीगोकुलनाथजी नित्य पधारते और एक मनुष्य बैठा रखते ॥ जो श्रीगुरुसार्ङ्गजी
 भोजन करवेहु पधारें तब मोहुं हुलायलीजो ॥ एकदिन
 वा मनुष्यके मनमें ऐसी आई ॥ जो श्रीगोकुलनाथजी
 नित्य श्रीगुरुसार्ङ्गजीसों छाने पधारतेंहै ॥ एकदिन जो मै
 नबोलाओं तो गुरुसार्ङ्गजी सब जान जाएंगे ॥ जब श्रीगो-
 कुलनाथजीतौ नित्य जाते बंदहोय जाएंगे ॥ ये सब-
 श्रुके वे मनुष्य एकदिन हुलायवे न सयौ ॥ जब श्रीगुरु-
 सार्ङ्गजी भोजनको पधारवे लगे ॥ तब सब लालजी आए ॥
 श्रीगोकुलनाथजी न लय ॥ तब श्रीगुरुसार्ङ्गजीबें दूसरे

मनुष्यहुं आवा करी जो गोविंदस्वामीके पास बल-
 यजी बैठेंहैं विनको हुलाय लव ॥ जब दूसरो मनुष्य
 हुलाय लायो तब वे मनुष्य जो जानके बोलावे नहीं गयो
 हतो सो पश्चात्ताप करवे लायो ॥ जो श्रीगुरुसार्ङ्गजी तो सब
 जानतेंहैं मैनें काहेको श्रीगोकुलनाथजीसों कुटिलता
 करि ऐसी पश्चात्ताप ययो ॥ सो वे गोविंदस्वामी ऐसे
 कृपापात्र हते ॥ जो तिनके संग श्रीनाथजी क्षणक्षण
 आयके बिराजते हते ॥ प्रसंग ॥ ११ ॥ वे गोविंदस्वामी
 पाग आछी बांचते हते ॥ सो टूक टूक पाग होती तब
 कोईहुं खबर न हती ॥ जब एकदिन एक ब्रजवासीनें
 गोविंदस्वामीकी पाग आछी जानके उतारलीनी ॥ तब
 गोविंदस्वामीनें कही सारे ये टूक संभारके धरराखियो
 काल तेरे घरहुं आयके लेजाऊंगो ॥ वे ब्रजवासीनें

लाये ॥ तब श्रीगुसांईजी श्रीनाथजीसों पूछी ॥ जो आपने उतावल काहेको करी ॥ तब श्रीनाथजीनें कही जो उत्थापनको समय भयोहतो ॥ और आप न्हायके पधार हते जासुं उतावल भई ॥ वादिनतें ऐसो वंदोवस्त करथौं ॥ जो तीन बेर घंटानाद तथा तीन बेर शंखनाद करिके और बीस पल रहिके मंदिरके किंवार खोलके उत्थापन करें ॥ सो वे गोविंददास ऐसे कृपापात्र भगवदीय हते ॥ प्रसंग ॥ १४ ॥ एकदिन आगरेमें अकबर पातशाहनें सुन्यो जो गोविंदस्वामी बहुत आछे गावतहैं और निरपेक्षहैं और निःशंकहैं ॥ जब इनके मुखको राग कैसे सुन्यो जाय ॥ ये विचार करिके पातसाही वे पलटके श्रीगोकुलमें इकेले आए ॥ जब गोविंददास जसोदाघाटपर भैरव राग अलापत हते तब वा पातशाहनें वाहवा वाहवा करी ॥ जब गोविंददासनें कही ये राग छीगयो ॥ जब वाने कही जो मैं पातशाहहूँ जब विननें कही जो तुम पातशाहहो तो पातशाही करी ॥ परंतु ये रागतो तुमारे सुनवेसुं छिवाय गयो जब पातशाहनें विचार कन्यो एक देसको मैं राजा हूँ और इनकोतो त्रिलोकीको वैभव फीको लगेहि ॥ जासुं ये काहेकुं आपने हुकुममें रहेंगे ॥ ये विचारिके पातशाह चले गये ॥ और गोविंदस्वामीनें वादिनसुं भैरव राग गायो नहीं ॥ वे गोविंदस्वामी ऐसे टेकी भगवदीय हते ॥ प्रसंग ॥ १५ ॥ और वे गोविंदस्वामीके संग श्रीनाथजी नित्य वनमें खेलते ॥ और कोईदिन गोविंददासको घोड़ा करते और कोईदिन हाथी करते ॥ ऐसे

नित्य क्रीडा करते ॥ सो एकदिन श्रीनाथजीनें गोविंद-
स्वामीकुं घोडो कन्यो हतो और ऊपर आप असवार
भये हते ॥ सो गोविंदस्वामीनें घोडाकीसीन्याई लह-
शंका करी ॥ ये बातें एक वैष्णवनें देखी ॥ सोश्रीगुसाईं-
जीसों जायके कही ॥ जब श्रीगुसाईंजीनें आज्ञा करी जब
गोविंदस्वामी हाथी घोडा होतेहैं ॥ सो हाथी घोडाको
स्वांग पूरा नकरें तो कैसे होवै ॥ और इन बातनमें तुम
मत पडो ॥ ये बात सुनके वे वैष्णव चुप करिगयो ॥ सो
वे गोविंदस्वामी ऐसे कृपापात्र हते ॥ प्रसंग ॥ १६ ॥ एक-
दिन गोविंददास श्रीगुसाईंजीके संग मथुराजीमें केसवरा-
यजीके दर्शनहुं गये ॥ तब उष्णकाल हतो ॥ और सब
जरीको बागा जरीकी ओढनी देखके गोविंददासनें के-
सवरायजीसों पूछो जो नकिंतोहो ॥ सो सुनके केसवरा-
यजी खुलकाये ॥ जब श्रीगुसाईंजीनें कही ॥ जो गोविंद-
दास ऐसे नबोलिये ॥ तब गोविंददासनें कही महाराज
मादी मनुष्यको पोसाक पहन्योहै जब कैसेनपूछो जाय ॥
ये सुनिके श्रीगुसाईंजी चुपकररहै ॥ प्रसंग ॥ १७ ॥ और
एकदिन श्रीनाथजीके राजभोग आवते हते ॥ तब भी
तरियासों गोविंदस्वामीनें कही जो राजभोग धरे पहिले
मोकुं प्रसाद लेबाव ॥ जब भीतरियाननें थार पटिकदियो
और श्रीगुसाईंजीकुं पुकार करि ॥ जब श्रीगुसाईंजीनें गोविं-
ददाससों पूछी यह कहा जब गोविंदस्वामीनें कही जो आ-
प संगमें मोकुं खेलवकुं लेजाएहै ॥ और जो पाछे प्रसादले
वेकुं रहिजाऊं तो वनमें पाछे मोकुं श्रीनाथजी मिले नहींहै

जब कैसैं करुं ये छुनके श्रीगुसांईजीनैं ऐसी बंदोवस्त करी जो राजभोग आवेके समय गोविंददासकुं प्रसाद लेवाव-
नो ऐसी मंडारीसों आज्ञा करि॥सो वे गोविंदस्वामी ऐसे
कृपापात्र हते जिनविना श्रीनाथजी रहि नहीं सक्ते ॥
प्रसंग ॥ १८ ॥ एक दिन श्रीनाथजी गोविंदस्वामी संग
खेलते हते ॥ तब श्रीनाथजीके उपर दाव आयो ॥ तब
उत्थापनको समय भयो ॥ तब श्रीनाथजी भागके मं-
दिरमें घुसगये ॥ तब मंदिरमें भीतर जायकें श्रीनाथ-
जीकुं गीली मारि तब सेवक टहेलवाननैं गोविंददासकुं
धक्का मारके बाहिर काढदिये और उत्थापन भोग धन्यो
तब गोविंदस्वामी जायके रस्तामें बैठे और कहे जो अवि
गायनके संग श्रीनाथजी ये रस्तापर आवेंगे और याको
मार देउंगो पीछे श्रीगुसांईजी न्हायके मंदिरमें पधारे
देखेंतो श्रीनाथजी अनमनैं होय रहेहैं और उत्थापनकि
सामग्री अरोगें नाहीहैं तब श्रीगुसांईजीनैं श्रीनाथजीसों
पूछे जो कैसेहो तब श्रीनाथजीनैं कहि जो जहांसुधि
गोविंददासकुं नहिंमनावोगे तहांसुधि मोकुं कछु भावेगो
नहीं काहेतैं मोकुं रस्ता चलेविना और वाके संग खेले
विना सरेगो नहिं ॥ अवि रस्तामें जाउंतो आन गिनती
नकि मारदेवेगो याचिताकेलियें मोकुं कछु भावै नहिं
है गोविंददास आवेगो जब कछु भावेगो ये बात छुनके
और श्रीनाथजीकी भक्तवत्सलता देखके श्रीगुसांईजीको
हृदय भर आयो तब गोविंददासकुं बुलायके और मना-
यके श्रीनाथजीसुं बीनति करि जो ये हाजिरहैं अब आ-

यगयेहै तब श्रीनाथजीअरोगे सो वे गोविंददास ऐसे
कृपापात्र हते ॥ प्रसंग ॥ १९ ॥ वार्तासंपूर्ण ॥ ॐ

गोविंददासकी भैरव कान्हवाई हति तिनकी ०

सो कान्हवाई श्रीनवनीतप्रियाजीकुं माथे पधरायके सेवा
करत हती ॥ और श्रीठाकुरजी विनकुं अनुभव जताव-
तहते ॥ हंसते और बोलते जो चाहिये सो मांगलेते ॥
और वे कान्हवाई जादिन श्रीगुसाईंजीके घर सेवासैं
जाती जब रसोई न करती हती ॥ तब पातर लायके
भोग धरती हती ॥ और वे कान्हवाई कछुक सामग्री
घरसैंकर राखती हती ॥ जब श्रीठाकुरजी लखनकी-
न्याई मांगते तब वे देति ॥ प्रसंग ॥ १ ॥ एकदिन कान्ह-
वाई श्रीठाकुरजीकुं देवका बेटीजीके पास पधरायके
सहावनगई रातकुं आयसकी नहीं ॥ तब देवका बेटी-
जीनें अपने श्रीठाकुरजी पोढाये तब कान्हवाईके ठाकु-
रजीकुं पोढावते खूलगई हती ॥ जब कान्हवाईकुं श्रीठा-
कुरजीनें सहावनसैं जतायो जो देवका बेटीजी मोकुं
पोढावते खूल गई है ॥ सिंघासन पैं एकैलो बैठो डरपत
हैं ॥ जब कान्हवाई रातको उहांसे चली सो श्रीगोकुल
आयके देवका बेटीजीकुं जगायके अपने श्रीठाकुरजीकुं
पधरायके घर लेजायके पोढाए ॥ प्रसंग ॥ २ ॥ एकदिन
कान्हवाईसों श्रीगोकुलचंद्रमाजीनें कही कि मेरी शय्यामें
कछु चुमतहै ॥ तब कान्हवाईनें जायके नारायणदास
ब्रह्मचारीसों कही ॥ जो श्रीठाकुरजीकुं तो शय्या चुमेंहै ॥

जब नारायणदासनें शय्याकी गादी खुलाई तब रुईमें सो वनौस निकसे ॥ जादिनतें नारायणदास ब्रह्मचारी शय्याकी गादी अथवा रजाई नई भरावते जब अपने हाथनसं रुईके पेल देखके धरते ॥ सो वे कान्हवाई ऐसे कृपापात्र भगवदीय हती ॥ प्रसंग ॥ ३ ॥ एकदिन कान्हवाई श्रीगुसांईजीके घर श्रीनवनीतप्रियाजीके पालनेके दरशन करवेकुं गई ॥ जब जायके देखें तो श्रीनवनीतप्रियाजीतो अकेले झुल्लेहै ॥ तब श्रीनवनीतप्रियाजीनें कही जो कान्हवाई तूं मोकुं झुलाय ॥ तब कान्हवाई झुलावे बैठी ॥ जब श्रीगिरिधरजी पधारे तब कान्हवाईनें खीजकर कही ॥ जो तुमने श्रीठाकुरजीकुं इकेले क्यों छोडे तब श्रीगिरिधरजीनें कही जो अब कोई दिन नहीं छोड़ूंगो ॥ सो वे कान्हवाई ऐसी कृपापात्र हती ॥ प्रसंग ॥ ४ ॥ एकदिन श्रीगोकुलनाथजीनें श्रीगिरिधरजीकुं यज्ञकरवेकुं पूछो ॥ जो हमारी यज्ञकरवेकी इच्छा है तब कान्हवाई बोली जो यज्ञरूप श्रीगोवर्धनधरजी तुमारे माथे विराजेहै ॥ इनके सेवेसों सब यज्ञहोय जाएंगे ॥ ये सुनके श्रीगोकुलनाथजीनें यज्ञकरवेको विचार बंद राख्यो सो वा कान्हवाईकी सब बालक ऐसी कान राखते हते ॥ प्रसंग ॥ ५ ॥ वार्ता संपूर्ण वैष्णव ॥ १ ॥

॥ श्रीगुसांईजीके सेवक छीतस्वामीचौबे ति०

सो वे छीतस्वामी मथुरामें रहतेहते ॥ और मथुराजीमें पांच चौबे बडा गुंडा हते ॥ और ठगई करते और छीत-

चौबे दिन पांचनमें मुख्य हतो ॥ सो विननें विचार कन्यो
 जो कोई गोकुलमें जायहै सो श्रीविठ्ठलनाथजीके बस
 होय जायहै ॥ जासुं ऐसी दीसेहैं जो श्रीविठ्ठलनाथजी
 जादू टोना बहोत जानेहैं ॥ परंतु हमारे ऊपर टोना चले
 तब साँची मानें ये विचार पांचौ चौबेननें कन्यो तब
 एक खोटी नारियल और खोटी रुपैया लैके पांचौ चौबे
 श्रीगोकुल आये तब चार चौबे तो बाहर बैठरहैं ॥ और
 मुख्य जो छीत चौबे हतो विनकुं भीतर पठायो ॥ सो वे
 छीत चौबानें खोटी नारियल तथा खोटी रुपैया जायके
 भेट धन्यो तब श्रीगुसाईजीनें खवाससुं आज्ञा करी ॥
 जो या रुपैयाके पैसा लेआव ॥ जब रुपैयाके पैसा आए
 और नारियल फोड्यो तब छुफेद गरी निकसी ॥ तब छीत-
 स्वासी देखिके मनमें विचारी ॥ जो येतो साक्षात् ईश्वर
 हैं ॥ जब छीतस्वामीनें कही जो महाराज मोकुं शरण
 लेओ ॥ जब श्रीगुसाईजीनें छीतस्वामीकुं नाम सुनायो ॥
 पाछे श्रीनवनीतप्रियाजीके दर्शन करवेकुं गये ॥ भीतर देखें
 तो श्रीगुसाईजी बिराजेहैं ॥ और बाहर आयके देखे तो
 बिराजे हैं जब छीतस्वामीनें विचारी जो श्रीगुसाईजीकी
 ईश्वरता जीवसों जानी नहीं जायहै ॥ जब वे चार चौबे
 बाहर बैठे हते विननें छीतस्वामीकुं बुलाये ॥ तब श्रीगु-
 साईजीनें आज्ञा करी जो तुमारे संगी बाहर तुमकुं बुला-
 वत हे सो तुम जाओ ॥ तब छीतस्वामीनें बाहर आयके
 चारौ चौबानसे कही मोकुं टोना लगगयोहे तुम भाग
 जावो नहिं तो तुमको लगजायगो ये सुनके चारौ चौबे

भाग गये छीतस्वामीनें एक पद करिके गायो ॥ राग नट ॥ भई अब गिरिधरसों पहेंचान ॥ कपटरूपधरिछल्लवे-
आयो पुरुषोत्तमनहिजान ॥ १ ॥ छोटीवडोकछूनहिजान्यो-
छायरह्योअज्ञान ॥ छीतस्वामिदेखतअपनायौश्रीविठ्ठल-
कृपानिधान ॥ २ ॥ ये पद सुनके श्रीगुसांईजी प्रसन्न भए ॥
और छीतस्वामी रातहुं उहां सोय रहे फेर दूसरे दिन
छीतस्वामीहुं श्रीगुसांईजीनें निवेदन करवाये ॥ तब छीत-
स्वामीहुं साक्षात् कोटिकंदर्प लावण्य पूर्णपुरुषोत्तमके
दर्शन भये ॥ और भगवल्लीलाको अनुभव भयो और
श्रीगुसांईजी तथा श्रीठाकुरजीके स्वरूपमें अमेदनिश्चय
भयो दोनो स्वरूप एकहैं ऐसे जानन लगे तब छीत-
स्वामी गोपालपुर श्रीनाथजीके दर्शनहुं गये ॥ उहां
श्रीनाथजीके पास श्रीगुसांईजीहुं देखे ॥ जब बाहेर
निकसके पूछी जो श्रीगुसांईजी कब पधाये है ॥ तब
उहांकि लोगननें कही जो श्रीगुसांईजी तो गोकुल-
बिराजेंहैं ॥ जब छीतस्वामी उहांति श्रीगोकुलमें आयेके
श्रीगुसांईजीके दर्शन किये ॥ जब छीतस्वामीनें ये नि-
श्चय कियो जो श्रीनाथजी तथा श्रीगुसांईजी एकही स्व-
रूप है ॥ जबसुं छीतस्वामीजीनें “गिरिधरन श्रीविठ्ठल”
ऐसी छापके बहुत पद गाए ॥ सो वे छीतस्वामी ऐसे कृ-
पापात्र भगवदीय हते ॥ प्रसंग ॥ १ ॥ सो वे छीतस्वामी
बीरबलके पुरोहित हते ॥ सो वे बीरबलके पास वसौंधी
लेवेहुं गए तब सवारके समें छीतस्वामीनें यह पद गाये ॥
“ जेवसुदेव किये पूरण तप सोई फल फलित श्रीवल्लभ-

देह ॥ ये पद छनके वीरवल बोले जो मैं तो वैष्णव हूं परंतु
 ये बात देशाधिपति सुनेगे तो तुम कहा जवाब देओगे वे
 तो स्लेच्छ है ॥ तब छीतस्वामी बोले जो देशाधिपति
 पूछेंगे तो मैं नीके जवाब देउंगो और मेरे मनसुं तो तूही
 स्लेच्छ है ॥ आज पीछे तेरो मुख न देखुंगो ऐसे कहके छी-
 तस्वामी चले गए ॥ जब ये बात देशाधिपतीनें सुनी तब
 वीरवलसुं पूछो जो तुमारे पुरोहित क्यों रिसाय गए ॥
 तब वीरवलनें सब बात देशाधिपतिआगे कही ॥ ब्राह्मण-
 लोग ह्वा रिस बहुत करे है तब देशाधिपतीनें कही जो
 तुम और हम नावपें बैठे हते जब दीक्षितजीनें मोड़ु आ-
 शिर्वाद दियो हतो तब मैंनें मणी भेट करी हती वे मणी
 कैसी हती जो पांच तोला सोना नित्य देती हती ॥ सो वे
 मणी दीक्षितजीनें श्रीयमुनाजीसें पटक दीनी ॥ जब मेरे
 मनमें बड़ो गुस्सा लय्यो तब मैंनें मणी पाछी सांसी ॥
 तब दीक्षितजीनें श्रीयमुनाजीमेंसुं खौच भरिके मणी काटी
 तब हमसुं कही तुमारी होयसो पहिचान लेओ ॥ जब ह-
 मसुं ये निश्चय भयो ये साक्षात् ईश्वरहै ईश्वरविना ऐसी
 कारज नहीं होयगो ये बात विचारकरतें तुमारे पुरोहित-
 की सब बात साचीहै सो तुमनें क्यों विचार न क्यो ये
 बात छनके वीरवल बहोत खिसानो भयो ॥ और कहू
 सोल्यो नहीं और ये बात श्रीगुसांईजीनें सुनी तब लाहो-
 रके वैष्णव आये हते विनसों आज्ञा करी जो छीतस्वामी-
 की खबर राखते रहियो जब छीतस्वामी बोले जो मैंनें
 वैष्णवधर्म विक्रय करवेकुं लियो नहीं है मेरेतो विश्रांत-

घाट है सो आपकी कृपासों सब चलेगो ॥ ये वातयुनके श्रीगुसांईजी बहोत प्रसन्न भये ॥ प्रसंग ॥ २ ॥ और एक-दिन विरबल देशाधिपतीसों रजालेके श्रीगोकुलमें जन्माष्टमीके दर्शकुं आयो ॥ पाछे वेषपलटायके देशाधिपती हूं छानेछाने आयो ॥ तब जन्माष्टमीके पालनाके दर्शन करे ॥ मनुष्यनकी भीड़में ॥ तब देशाधिपतीकुं श्रीगुसांईजीविना और कोईने पहिचान्यो नहीं ॥ तब छीतस्वामी कीर्तन करते होते ॥ और श्रीगुसांईजी श्रीनवनीतप्रियाजीकुं पालना झुलावते होते ॥ तब छीतस्वामीने ये पद गायो ॥ प्रियनवनीतपालने झूलेश्रीविठलनाथ झुलावेहो ॥ कबहुं-कआपसंगमिलझूले कबहुंकउतरझुलावेहो ॥ १ ॥ कबहुं-कसुरंगखिलोनालैलै नानाभांतिखिलावेहो ॥ चकई फिर कनीलेविंगीटुझुणझुणहातबजावेहो ॥ २ ॥ भोजनकरत थालएकझारीदोठमिलखायखवावेहो ॥ गुप्तमहारसप्रकटजनावेप्रीतिनईउफजावेहो ॥ ३ ॥ धन्यन्यभाग्यदासनिजजनकेजिनयहदर्शनपाएहो ॥ छीतस्वामीगिरिधरनश्रीविठलनिगमएककरगाएहो ॥ ४ ॥ ऐसे दर्शन छीतस्वामीकुं भए ॥ और देशाधिपतीकुं हूं ऐसे दर्शन भए ॥ और मनुष्यनकुं साधारण दर्शन भए ॥ तब देशाधिपती चले तब श्रीगुसांईजीने गुप्तरीतिसुं देशाधिपतीकुं महाप्रसाद दिवाये ॥ तब देशाधिपती आगरे आये ॥ फेर दूसरे दिन विरबलहूं आए ॥ तब देशाधिपतीने विरबलसुं पूछी जो कहा दर्शन किये ॥ तब विरबलने कही श्रीनवनीतप्रियाजी पालना झूलते होते और श्रीगुसांईजी झुलावते होते ॥

तब देशाधिपतीनें कही ये बात झूठी है ॥ श्रीगुरुसाईजी पालना झलते हते और श्रीनवनीतप्रियाजी झुलावते हते ॥ मोकुं ऐसे दर्शन सएहै ॥ और छीतस्वामी तुमारे पुरोहित ऐसे कीर्तनगावते हते ॥ और मैं तेरे पास ठाहो हतो ॥ तब बीरबलनें कही मोकुं ऐसे दर्शन क्यूं नही यये ॥ तब देशाधिपतीनें कही तुमकुं गुरुके स्वरूपको ज्ञान नहींहि ॥ और तुमारे पुरोहित छीतस्वामी जिनकुं इन बातको अनुभव है ऐसैनसों तुमारी प्रीती नहींहि ॥ जब तुमकुं ऐसे दर्शन काहेकुं होवें ॥ सो वे छीतस्वामी ऐसे कृपापात्र हते ॥ ॥ वार्ता संपूर्ण ॥ ॥ वैष्णव ॥ २ ॥ ॥ ॥

॥ श्रीगुरुसाईजीकेसेवकचतुर्भुजदास कुंमनदासके बेटा तिनकी वार्ता—सो वे कुंमनदासजी श्रीनाथजीके संग खेलते हते ॥ सो एकदिन कुंमनदासकुं श्रीगोवर्धननाथजीनें चारस्रुजा धरिके दर्शन दिये ॥ वाहीदिन बेटाको जन्म भयो जासू वा बेटाको नाम चतुर्भुजदास धन्यो ॥ ये बात कुंमनदासजीकी वार्तामें लिखीहि सो वे चतुर्भुजदासजी ११ दिनके भये ताही समय कुंमनदासजीनें श्रीगुरुसाईजीके पास लेजायके नाम सुनवाये और चतुर्भुजदास जब ४१ दिनके भये तब कुंमनदासजीनें श्रीगुरुसाईजीके पास लेजाय निवेदन करवाये ॥ वादिनतें चतुर्भुजदासमें श्रीनाथजीनें इतनी सामर्थ्य धरी जब इच्छा आवे तब मुग्धबालक होय जाय और इच्छा आवेतो बोलवे चालवे सब अलौकिक बातें करवें लग-

जाय जब कुंमनदासजी एकांतमें बैठे तब चतुर्भुजदास
कुंमनदाससों भगवद्दार्ता करें और पृष्ठें और पद गावें
और जब लौकिक मनुष्य आयजाय तब चतुर्भुजदास
सुरधवालक बनजाय ॥ ऐसी सामर्थ्य श्रीनाथजीनें चतु-
र्भुजदासमें धरदीनी ॥ सो जब श्रीनाथजी इच्छा करते
तब चतुर्भुजदासकुं साथ खेलवेकुं लेजाते ॥ और जैसी
लीलाके दर्शनकरते तैसे पद गावते ॥ सो वे चतुर्भुजदास
ऐसे भगवत्कृपापात्र होते ॥ प्रसंग ॥ १ ॥ सो एकदिन श्री-
नाथजी एक ब्रजवासीके घर माखनचोरीकरवेकुं पधारे
और चतुर्भुजदासजीकुं संगले पधारे ॥ ऊँर उहां एकब्र-
जवासीकी बेटीके चतुर्भुजदास नजर आये और श्रीना-
थजीतौ नजर नाहीं पडे ॥ और चतुर्भुजदास पकडाय गये
सो विननें मार खाई ॥ पाछे चतुर्भुजदास श्रीनाथजीके
पास गए ॥ जब चतुर्भुजदासजीनें कही जो महाराज मो-
कुंतौ आछी मारखवाई ॥ श्रीनाथजीनें कही जो तेरेमें
सामर्थ्य ओछी नहीं हती जब तू क्यों न भाग आयो ॥
सो वे चतुर्भुजदास श्रीनाथजीके अंतरंग लीलामध्यपाती
हते ॥ ताते इनकी वार्ता कहा कहिये ॥ प्रसंग ॥ २ ॥ और
जादिन चतुर्भुजदासजीकुं प्रथम लीलाको अनुभव भयो
वादिनते सर्व व्यापी वैकंठ संबंधीलीला सर्वत्र दर्शवे लगी ॥
सो ये सामर्थ्य इनके भीतर श्रीगोवर्धननाथजीनें कृपा-
करिके धरी जब कुंमनदासजीकुं पोढवेके दर्शन होते हते ॥
तब कुंमनदासजी कीर्तन गायवे लगे ॥ सो पदा ॥ “वे देखो-
वरतश्चरीखनदीपकहरिपोढेउंचीचित्रसारी” ॥ सो इतनी-

तुक जब कुंमनदासजीनें गार्ह तब चतुर्भुजदासजी गाचउठे सुंदरबदन निहारन कारन बहुतयतन राखेकर प्यारी ॥ ये सुनिकें कुंमनदासजीनें निश्चय कय्यो जो इनकुं श्रीगुसांईजीकी कृपासों संपूर्ण अतुल्य भयो ॥ सो बड़ी कृपामानके बहोत प्रसन्न भये ॥ जादिनतें चतुर्भुजदास कहुं जाते अथवा नहीं जाते अथवा अवार सवार आवते सो कुंमनदासजी कछु कहते नहीं ॥ ऐसी जानते जो श्रीनाथजीके संग खेलत होऐंगे ॥ सो चतुर्भुजदास ऐंसे भगवत्कृपापात्र भगवदीय हुते ॥ प्रसंग ॥ ३॥ और एकदिन श्रीगोवर्धननाथजीके शृंगारके दर्शन चतुर्भुजदासजीनें कीने और श्रीगुसांईजी आरसी दिखावते हते ॥ तासमें चतुर्भुजदासजीनें ये पद गायो ॥ 'सुभगशृंगारनिरख मोहनको लदपण करि पियहि दिखावै' आपुननेक निहारिये वलिजाऊं आजकी छवि कछु कहत न आवैं ॥ १ ॥ ता पीछे गोविंदकुंडलपर श्रीगुसांईजी पधारि तब एकवैष्णवनें पूछ्यो जो महाराज चतुर्भुजदासजीनें आजकी छवि कछु बरनि न जावै ॥ एसे गायो और आपतो नित्य शृंगार करे है और आरसी दिखावैहै ॥ सो आजके पदको अभिप्राय कछु समझमें नहीं आयो ॥ जब श्रीगुसांईजीनें कही सो चतुर्भुजदाससों पूछियो ॥ तब वा वैष्णवनें चतुर्भुजदाससों पूछी ॥ जब चतुर्भुजदासजीनें औरभी पद गायो ॥ "सो पद ॥ माईरी आज और काल और छिन छिन प्रति और और" ॥ ये पद सुनिके वा वैष्णवनें श्रीगुसांईजीसों पूछ्यो जो भगवल्लीला तो नित्य है और सर्वत्र है ॥ जब चतुर्भु-

जदासजीनें और और क्यों कही ॥ तब श्रीगुसांईजीनें आज्ञाकरी ॥ भगवल्लीलामें विलक्षणपणो येईहै जो नित्य है और क्षणक्षणमें नूतन लागत है और लीलास्थ जीवनकूं और लीलाके दर्शनकरवेवारेनकूं क्षणक्षण नूतन लागतहै और नूतन रुचि उपजेहै ॥ सो गोपालदासजीनें गायोहै ॥ चौथे आख्यानमें पांचवीं तुक ॥ एकरसनाकिमकहं गुणप्रकटदिविधविहार ॥ नित्यलीलानित्यनूतनश्रुतिनपामेपार ॥ ऐसी भगवल्लीला है ॥ ये सुनके वो वैष्णव बहोत प्रसन्न भयो ॥ और वे चतुर्भुजदास ऐसे कृपापात्र हुते जो जिनको नित्यलीलाको अनुभव सर्वत्र होयगयो ॥ प्रसंग ॥ ४ ॥ एकदिन श्रीगुसांईजी श्रीगोकुल विराजते और श्रीगिरिधरजीसों लेके सब बालक श्रीजीद्वार विराजते हते ॥ तब उहां रासधारि आयि तब श्रीगोकुलनाथजीनें श्रीगिरिधरजीसों पूछकें परासोलीमें रास करायो ॥ और रासमें खूब गान भयो ॥ जब चतुर्भुजदासजीसुं श्रीगोकुलनाथजीनें आज्ञा करी जो तुम कछु गावो ॥ तब चतुर्भुजदासजीनें कही जो मेरे सुनवेवारे श्रीनाथजी नहीं पधारे हैं जासुं मैं कैसे गाऊं ॥ जब श्रीगोकुलनाथजीनें कही जो श्रीनाथजी अबी पधारेंगे ॥ ये बात श्रीगोकुलनाथजीकी सत्य करवेकेलियें श्रीनाथजी जागके और श्रीगिरिधरजीकुं जगायके श्रीनाथजी परासोली पधारे और श्रीगिरिधरजी पधारे और चतुर्भुजदासकूं और श्रीगोकुलनाथजीकूं दर्शन भये ॥ और कोईकुं दर्शनभये नहीं ॥ तब श्रीनाथजीके दर्शन-

करके चतुर्भुजदासजी गावे लगे ॥ जब अधिक दुख भयो
 रातहुं बढ गई और चतुर्भुजदासजीनें गायो सो पद ॥
 अद्भुतनटमेखधरेयमुनातटश्यामसुंदरगुणनिधानगिरि-
 वरधरनरासरंगराचें ॥ पद दूसरो ॥ प्यारीश्रीदासुजमेले-
 नृत्यतप्रियासुजान ॥ ऐसे ऐसे चतुर्भुजदासजीनें बहुत
 पदगाये जब रासभयो तब परम आनंदभयो ॥ फेर श्री-
 गिरिधरजीनें श्रीनाथजीकुं रातकेजगेजानके सवारे ज-
 गाए नहीं इतनेमें श्रीगुसाईंजी गोकुलतें पधारे और
 पूछी जो कहासमयहै ॥ जब श्रीगिरिधरजीनें कही जो
 श्रीनाथजी जागेनहीहै ॥ रातकुं रासमें जगे हते ॥ जब
 श्रीगुसाईंजीनें कही जो श्रीनाथजीतो सदैव रास करेंहै
 और सदैव जगेहै जासुं शंखनाद करावो ॥ जब शंखनादक-
 रायके श्रीनाथजीकुं जगाए ॥ फेर श्रीगोकुलनाथजीकुं
 श्रीगुसाईंजीनें आज्ञा करी ॥ जो ऐसो आग्रह करिके श्री-
 नाथजीकुं पधरावने नहीं ॥ एतो सदैव अपनी इच्छातें
 रास करतहै जासुं वीनतीकरिके पधरावने नहीं ॥ वे चतु-
 र्भुजदासजी ऐसे कृपापात्र हते के श्रीनाथजीके बिना दूस-
 रे ठिकानें गान नहीं करत हते ॥ प्रसंग ॥ ५ ॥ एकदिन
 श्रीगुसाईंजीनें चतुर्भुजदाससां आज्ञा करी जो अपछरा-
 कुंडलपर जायके रामदासभीतरीयाकुं बुलायलावो और
 तुम फूल लेआवो तब चतुर्भुजदास जायके रामदासजीकुं
 बुलायके आप फूल वीनके आवते हते ॥ जब श्रीगोवर्ध-
 नपर्वतकी कंदरासुं बाहेर श्रीनाथजी श्रीस्वामिनीजी स-
 हित पधारे और श्रीस्वामिनीजीनें मनमें ये विचार कय्यो

जे यह लीला कोई जानेनहीं इतनेमें चतुर्भुजदासजीने दर्शन करिके ये पद गायो ॥ “ गोवर्धनगिरिसघनकंदरारेननिवासकियोपियप्यारी ॥ और दूसरो पद गायो ॥ “ रजनीराजकियोनिहुंजनगरकीरानी” ये पद सुनके श्रीस्वामिनीजी प्रसन्न भई ॥ फेर चतुर्भुजदासजी फूललेके श्रीगुसांईजीके पास गए ॥ सो वे चतुर्भुजदासजी ऐसे कृपापात्र हते जो श्रीनाथजीके तथा श्रीस्वामिनीजीके मनकीजानवेवारे भये ॥ प्रसंग ॥ ६ ॥ सो चतुर्भुजदासजीकी बहु एकदिन श्रीनाथजीके चरणारविंदमें पहुँचगई जब चतुर्भुजदासजीकुं सूतक आयो सूतकमें चतुर्भुजदासजी वनमें बैठके नित्य कीर्तन करते ॥ तब श्रीगोवर्धननाथजी बिनके चारों ओर दूर दूर खेलै करते ॥ जब श्रीगोवर्धननाथजीने आज्ञा करी जो चतुर्भुजदास तुम दूसरो विवाह करौ ॥ जब चतुर्भुजदासनें कही जो जातमें कन्या नहीं मिलेहै जब श्रीनाथजीनें कही जो तुम धरेजा करौ ॥ जब चतुर्भुजदासजीनें धरेजा कन्यो ॥ तब श्रीगोवर्धननाथजी नित्य चतुर्भुजदाससों हांसी मस्करी करते ॥ सो चतुर्भुजदासजी ऐसे अंतरंग भगवदीय हते ॥ ॥ प्रसंग ॥ ७ ॥ एक समय श्रीगुसांईजी परदेस पधारे हते तब श्रीगिरिधरजीकी ऐसी इच्छा भई जो श्रीनाथजीकुं मथुरामें अपने घर पधरावें तो ठीक ॥ जब श्रीनाथजीकी आज्ञा लैके फागनवदीषष्टीकेदिनसैनपीछे श्रीनाथजीकुं मथुरा पधराए ॥ और फागनवद ७ केदिन बड़ी उत्सव मान्यो और जो कछु घरमें हतो सो सर्वस्व अर्पण कन्यो

और बेटीजीनें एक बीटी घर राखीहती ॥ बेटीजी बालक हते जासूं ससझते नहीं हते ॥ सो विटीहूं श्रीनाथजीनें मांगलीनी ॥ कारण जो श्रीगिरिधरजीनें सर्वस्व अर्पण करवेकी प्रतिज्ञा करीहती सो प्रतिज्ञा सत्यकरिवे-
केलियें श्रीनाथजीनें बीटी मांगलीनी और नित्य चतु-
र्भुजदास गिरिराजजी ऊपर बैठके विरहके पद और हि-
लगके पद गायोकरते ॥ और श्रीनाथजी नित्य विनकुं
संध्यासमें गायनकेसंग पधारते दर्शन देते ॥ सो वैशाख
सुदि त्रयोदशीके दिन चतुर्भुजदासजीनें ये पद संध्यासमें
गायो। श्रीगोवर्धनवासीसांवेरालालतुमबिनरह्योन जायहो।
या पदकी छेलीतुक श्रीनाथजीनें पधारतेही सुनि तब क-
तुणाव्याकुल भये और मनमें ये विचार क्यो जो सर्व-
था काल इहां पधारंगो जासूं भक्तको दुःसह दुःख देखके
श्रीनाथजीसे रह्योनगयो ॥ जब रात्र एकप्रहररही तब
श्रीनाथजीनें वैशाखसुदि चौदसकेदिन श्रीगिरिधरजीकुं
आज्ञा करी जो आज गोवर्धनपर्वतऊपर राजभोग अरो-
गुंगो जब श्रीगिरिधरजीनें मंगलाकरायके श्रीनाथजीकुं
पधराए ॥ और पहेले मनुष्य पठायकें मंदिर खासा करा
यो और श्रीनाथजीकुं पधारते अवार होयगई ॥ जासूं
राजभोग तथा शयनभोग एकसमयमें अरोगे॥ वा दिनसूं
आजदिनपर्यंत वृसिचचतुर्दशीकेदिन श्रीनाथजी दीय-
समें राजभोग अरोगेंहैं ॥ एकतो नित्यकेसमें और
एक शयनभोगके संग ॥ वे चतुर्भुजदास श्रीनाथजीके
ऐसे कृपापात्र हते जो तिनविना श्रीनाथजीसों रह्यो

न गयो ॥ प्रसंग ॥ ८ ॥ एकसमय चतुर्भुज दास
श्रीगुसांईजीकेसंग श्रीगोकुल गए और श्रीनवनीत-
प्रियाजीके दर्शन करे और बाललीलाके तथा [पाल-
नेके कीर्तन करे ॥ और दर्शन करके फेर गोपालपुर
आए जब कुंमनदासनें पूछ्यो जो कहांगयोहतो ॥ तब
बिननें कही श्रीगोकुलगयो हतो ॥ जब कुंमनदासजीनें
कही प्रमाणमें क्योंजाय पढ्यो हतो ॥ तब चतुर्भुजदासनें
श्रीगुसांईजीसों पूछी जो प्रमाणप्रकर्णकीलीला और प्रमे-
यप्रकर्णकी लीलामें कितनो भेद है ॥ जब श्रीगुसांईजीनें
कही जो भगवल्लीला सब एक समान है ॥ कुंमनदासजी-
कुं किशोरलीलामें बहोत आसक्ती है जासूं ऐसे बोले भ-
गवल्लीलामें भेद समझनो नहीं और श्रीठाकुरजी विरुद्ध-
धर्म आश्रयहैं ॥ एककालावच्छिन्न श्रीप्रभु सर्वत्र सबलीला
करतेहैं ॥ ये सुनके चतुर्भुजदासजी बहोत प्रसन्न भए ॥
वे चतुर्भुजदास श्रीगुसांईजीके ऐसे कृपापात्र हते ॥ जिनसूं
श्रीगुसांईजी कछु गुप्त नहीं राखते हते ॥ प्रसंग ॥ ९ ॥ और
चतुर्भुजदासजीके पाछें चतुर्भुजदासजीके बेटा राघोदास
हते ॥ सो बिनछू भगवल्लीलाको अनुभव भयो जब राघो-
दासजीनें धमार गाई ॥ सो धमार ॥ 'एचलजांएजहांहरि-
क्रीडतगोपिनसंगा' ॥ ये धमारकी जब दस तुक भई तब
राघोदासकी देह छूटी ॥ सो भगवल्लीलामें प्रवेश भयो ॥
तब राघोदासजीकी बेटीनें डेढ़तुक धरके धमार पूरी करी ॥
वे चतुर्भुजदास तथा बिनके बेटा बिनकी बेटी ये सब ऐसे
कृपापात्र हते ॥ ताते इनकीवार्ता कहाताईलिखिये ॥
॥ प्रसंग ॥ १० ॥ वार्ता संपूर्ण वैष्णव ॥ ३ ॥ ॥ ॥

बल्लीलामें मन सश होयगयो ॥ अनेकलीलानको अशु-
भव होवै लग्यो ॥ भरे घरके चोरकी सीलाई सोहित
भये ॥ ऐसैं करते सवारो होयगयो ॥ कछु सुन्दिरही-
नहीं ॥ तब श्रीगुसाईंजी पधारकें नंददासजीके कानसं
कही कें नंददासजी उठो दर्शनकरो ॥ जब नंददासजी
उठके ठाढ़े भये तब नंददासजीनें उठके श्रीगुसाईंजीके
दर्शन करके ये पद गायो ॥ 'प्रात समय श्रीवल्लभसुत-
कोउठतहिरसनालीजियेनाम' ॥ इत्यादिक पद गायके ॥
श्रीनवनीतप्रियाजीके दर्शन करे ॥ दर्शन करत भागही
भगवल्लीलाकी स्फूर्ती भई जब पालनेको पद गायो ॥
'बालगोपालललनकोमोदभरीयशुभतिहुलरावत ॥ इत्या-
दि भगवल्लीलासंबंधी बहुत पद नये करके गाये ॥ सो नं-
ददासजीके ऊपर श्रीगुसाईंजीनें ऐसी कृपा करी तब सब-
ठिकानेनसों बिनको मनस्वीचकें श्रीप्रभुनमें लगाय
दीनो ॥ सो वे क्षत्रीकी बहू जिनसों नंददासजीको मन
लग्यो हतो सो वे क्षत्रीकी बहू नंददासजीकुं रस्तामें
पांच सात वार नित्य दीखती हती ॥ परंतु नंददासजी
वाकी आढी देखतेही न हते ॥ ऐसैं श्रीगुसाईंजीकी कृपातें
ऐसो मनको निरोध होयगयो हतो ॥ जासूं इनके भाग्यकी
बड़ाई कहा कहिये ॥ प्रसंग ॥ १ ॥ तापाछे श्रीगुसाईंजी
श्रीजी द्वार पधारे ॥ सो नंददासजीकुं आज्ञा करके संग
लेगये ॥ तब नंददासजीनें जायकर श्रीगोवर्धननाथ-
जीके दर्शन करे ॥ सो साक्षात् कोटिकंदर्पलावण्यपूर्णपु-
रुषोत्तमके दर्शन भये ॥ सो दर्शन करके नंददासजी

बहुत प्रसन्न भये ॥ और नंददासजीकू किशोरलीलाकी स्फूर्ती भई ॥ तब उत्थापनको समय हतो ॥ सो श्रीगुरुसाईजीकी आज्ञा पायकें यह पद गाये ॥ 'सोहतसुरंगदु-रंगीपागदुरंगललनकेसेलोनलोने' ॥ यह पद गायकें अपने मनमें नंददासजीनें बड़े भाग्य माने ॥ फिर संध्याआरतीसमय दर्शन करे ॥ तब ये पद गाये ॥ 'वनते-सखनसंगगायनकेपाछेपाछे आवतमोहनलालकन्हई' ॥ १ ॥ वनतेआवतगावतगौरी ॥ २ ॥ देखसखीहरको-वदनसरोज ॥ ३ ॥ घरनंदमहरकेमिसहीमिसआवतगो-कुलकीनारी ॥ ४ ॥ याभांतसूं नंददासजीनें इत्यादि अनेक पद गाये ॥ सो नंददासजी कोईदिन श्रीगिरिराजजी रहते कोई दिन श्रीगोकुल आवते ॥ जिनकूं संसार ऐसो फीको लागतो ॥ जैसे मनुष्यकूं उलटी देखके बुरो लगे ॥ जासूं वे औरठिकाने जाते नहीं हुते ॥ और श्रीमहाप्रभुजी और श्रीगुसाईजी और श्रीगिरिराजजी और श्रीयमुनाजी और श्रीब्रजभूमी इनको स्वरूप विचार्यो करते ॥ प्रभुनके दूसरे अवतारन पर्यंत कोई ठिकाने बिनको मन नहीं लागतो हुतो ॥ जासूं बिननें श्रीस्वामिनीजीके स्वरूपवर्णमें कब्योहैं ॥ 'बलीयेकुंवरकान सखीसेपकीजे' ॥ या पदमें कब्योहैं ॥ शिवमोहेजिनवेमोहनीजेकोई ॥ प्यारी-केपायनआजआनपरेसोई ॥ ऐसी दृष्टी जिनकी ऊंचि हंती ॥ प्रसंगा॥ २ ॥ सो वे नंददासजी ब्रजछोडके ॐ जो नहीं हुते ॥ सो नंददासजीके बड़े भाई नामसूं न काशीमें रहते हुते ॥ सो बिननें म्भंजो ॥ तब नंददास-

साईजीके सेवक भयेहैं ॥ जब तुलसीदासजीके मनमें ये
 नंद के नंददासजीने पतिव्रताधर्म छोड़ दियोहैं आपनेतो
 श्रीरामचंद्रजी पती हुते॥ सो तुलसीदासजीने ये विचारके
 नंददासजीहुं पत्र लिख्यो ॥ जो तुम पतिव्रताधर्म छोड़के
 क्यों तुमने कृष्ण उपासना करी ॥ ये पत्र जब नंददास-
 जीहुं पढ़चो तब नंददासजीने वाचके ये उत्तर लिख्यो ॥
 जो श्रीरामचंद्रजीतो एकपत्नी व्रतहैं सो दूसरी पत्नीनहुं
 कैसे संभारसकेगे एकपत्नीहुं बरोबर संभार न सके ॥
 सो रावण हरलेमयो और श्रीकृष्णतो अनंत अबलानके
 स्वासीहैं और जिनकी पत्नी भये पीछे कोई प्रकारकी
 भय रहे नहीं है ॥ एककालगच्छिछ अनंतपत्नीनहुं सुख-
 देतहैं ॥ जासुं मैंने श्रीकृष्णपती कीनेहैं ॥ सो जानोगे ॥
 ये पत्र जब नंददासजीको लिख्यो तब तुलसीदासहुं लि-
 ख्यो तब तुलसीदासजीने वाचके विचार कियो के नंद-
 दासजीको मन वहां लगगयोहै ॥ सो वे अब आवेंगे
 नहीं ॥ सो इनकी टेक हमसुं अधिकीहै ॥ हमतो अयुध्या
 छोड़के काशीमें रहेंहैं ॥ और नंददासजीतो ब्रजछोड़के
 कहीं जाय नहीं हैं ॥ इनकी टेक हमारी टेकसुं बड़ीहै ॥
 सो वे नंददासजी ऐसे कृपापात्र भगवदीयहुते ॥ प्रसंग ॥
 ॥ ३ ॥ सो एकदिन नंददासजीके मनमें ऐसी आई ॥ जो
 लोसे तुलसीदासजीने रामायण भाषा करीहै ॥ सो हमहुं
 जीके दर्शन भवतभाषाकरें ये बात ब्राह्मण लोगननें सुनी
 रुपोत्तमके दर्शन मिलके श्रीगुसाईजीके पास गये ॥ सो
 " जो श्रीमद्भागवतभाषा होयगो

तो हमारी आजीविका जाती रहेगी ॥ तब श्रीगुसांई-
जीनें नंददासजीसुं आज्ञा करी ॥ जो तुम श्रीमद्भागवत
भाषा मतकरो और ब्राह्मणनके क्लेशमें मत परो ॥ ब्रह्म-
हृष्ट आछो नहीं है और कीर्तन करके ब्रजलीला गाओ ॥
जब नंददासजीनें श्रीगुसांईजीकी आज्ञा मानी ॥ श्रीम-
द्भागवतभाषा न क्यो ॥ ऐसी श्रीगुसांईजीकी आज्ञाको
विश्वास हतो ॥ ऐसे परमकृपापात्र भगवदीय हुते ॥
प्रसंग ॥ ४ ॥ सो नंददासजीके बड़े भाई तुलसीदासजी
हते ॥ सो काशीजीते नंददासजीकुं मिलबेकेलियें ब्रजमें
आये ॥ सो मथुरामें आयके श्रीयमुनाजीके दर्शन करे
पाछे नंददासजीकी खबर काढके श्रीगिरिराजजी गये
उहां तुलसीदासजी नंददासजीकुं मिले ॥ जब तुलसी-
दासजीनें नंददासजीसुं कही के तुम हमारे संग चलो ॥
गाम रुचे तो अयोध्यामें रहो ॥ पुरी रुचे तो काशीमें
रहो ॥ पर्वत रुचे तो पित्रकूटमें रहो ॥ वन रुचे तो दंड-
कारण्यमें रहो ॥ ऐसे बड़ेबड़े धाम श्रीरामचंद्रजीनें पवित्र
करेंहै ॥ तब नंददासजीनें उत्तर देवेकुं ये पद गावौ सो
पद ॥ जोगिरिरुचेतोवसोश्रीगोवर्धनगामरुचेतोवसोनंद-
गाम ॥ नगररुचेतोवसोश्रीमधुपुरीसोभासागरअतिअभि-
राम ॥ १ ॥ सरितारुचेतोवसोश्रीयमुनातटसकलमनोरथ-
पूरणकाम ॥ नंददासकाननरुचेतोवसोभूमिदंडावन-
धाम ॥ २ ॥ यह पद सुनके तुलसीदासजी बोले जो
ऐसी कोनसो पाप है ॥ जो श्रीरामचंद्रजीके नामसूं न
जाय ॥ जासूं तुम श्रीरामचंद्रजीकुं भजो ॥ तब नंददास-

जीनें एक कीर्तनमें उत्तर दियो ॥ सो पद ॥ कृष्णनाथज-
 बतमें श्रवण सुन्योरी आली सुलीरी सबनहों तो बावरी मईरी ॥
 भरभर आवें नयन चितहुंन परे चैन सुखहुंन आवें नैन तनकी-
 दशाकलु और रहीरी ॥ १ ॥ जे ते कने मधर्म व्रत कीनेरी में व-
 हु विध अंगो अंग मईमें तो श्रवण मईरी ॥ नंददास प्रभु जाके-
 श्रवण सुने यह गति माधुरी मूरत के धों के सी दर्हरी ॥ २ ॥ ये
 पद सुन के तुलसीदास छुप रहे ॥ जब नंददास जी श्रीना-
 थजी के दर्शन करवे कूं गये ॥ तब तुलसीदास हुं उनके
 पीछे पीछे गये ॥ जब श्रीगोवर्धन नाथजी के दर्शन करे
 तब तुलसीदास जीनें साथो नमायो नही ॥ तब नंददास जी
 जान गये ॥ जो ये श्रीरामचंद्रजी बिना और दूसरे कूं नहीं
 नमहे ॥ जब नंददास जीनें मनमें विचार कीनो यहाँ और
 श्रीगोकुलमें इनकुं श्रीरामचंद्रजी के दर्शन कराऊं ॥ तब
 ये श्रीकृष्णको प्रयाव जानेंगे ॥ जब नंददास जीनें श्री-
 गोवर्धन नाथजी सों बीनती करी ॥ सो बोहा ॥ आजकी-
 सो भाकहा कहूं मले विराजे नाथ ॥ तुलसीमस्तक तवन मे-
 घ लुषबाण ले ओहाथ ॥ ये बात सुन के श्रीनाथजीकों श्री-
 गुसाईंजीकी कानतें विचार भयो ॥ जो श्रीगुसाईंजीके
 सेवक कहें सो हमकुं मान्यो चाहिये ॥ जब श्रीगोवर्ध-
 न नाथजीनें श्रीरामचंद्रजीको रूप धर के तुलसीदासजीकुं
 दर्शन दिये ॥ तब तुलसीदासजीनें श्रीगोवर्धन नाथजीकुं
 साष्टांग दंडवत करी ॥ जब तुलसीदासजी दर्शन करके
 बाहिर आये ॥ तब नंददासजी श्रीगोकुल चले जब तुल-
 सीदासजीहुं संग संग आये तब आयके नंददासजीनें
 श्रीगुसाईंजीके दर्शन करे ॥ साष्टांग दंडवत करी और

तुलसीदासजीनें दंडवत करी नहीं ॥ और नंददासजीकुं
तुलसीदासजीनें कहीं के जैसे दर्शन तुमनें वहां कराये
वैसेही यहां कराओ ॥ जब नंददासजीनें श्रीगुसांईजीसों
वीनती करी ये मेरे भाई तुलसीदासहै ॥ श्रीरामचंद्रजी-
विना औरकुं नहीं नमेंहै तब श्रीगुसांईजीनें कहीके तुल-
सीदासजी बैठो ॥ जब श्रीगुसांईजीके पांचमेंपुत्र श्रीरघु-
नाथजी वहां ठाढे हुते ॥ और विन दिननमें श्रीरघुना-
थजीको विवाह भयो हुतो ॥ जब श्रीगुसांईजीनें कही
रघुनाथजी तुम्हारे सेवक आयेहै ॥ इनकुं दर्शन देवो तब
श्रीरघुनाथलालजीनें तथा श्रीजानकीवहूजीनें श्रीराम-
चंद्रजीको तथा श्रीजानकीजीको स्वरूप धरके दर्शन
दिये ॥ साक्षात् दर्शन भये ॥ तब तुलसीदासजीनें साष्टां-
गदंडवत करी ॥ याहीतैं श्रीद्वारकेशजीनें मूलपुरुषमें ॥
गायोहे ॥ “हेतुनिजअभिधानप्रकटेतातआज्ञामानके” ॥
और तुलसीदासजी दर्शन करके बहुत प्रसन्न भये ॥
और पद गायो ॥ “वरणोंआवधिगोकुलगाम” ॥ ये पद
गायके तुलसीदासजी बिदा होयके अपने देशकुं गये ॥
सो वे नंददासजी श्रीगुसांईजीके ऐसे कृपापात्र भगव-
दीय हुते ॥ जिनके कहेंतैं श्रीगोवर्धननाथजीकुं तथा श्री-
रघुनाथजीकुं श्रीरामचंद्रजीको स्वरूप धरके दर्शन देणे-
पढे ॥ जासुं इनकी वार्ता कहांताई लिखिये ॥ वार्ता सं-
पूर्ण ॥ ॥ वैष्णव ॥ ४ ॥

श्रीगुसांईजीके सेवकनागजीभाईसाठोदराना-
गर तिनकी वार्ता ॥ नागजीभाई श्रीमहाप्रभुजीके पास

सेवक होवेको गए ॥ जब श्रीमहाप्रभुजी विचारे जो नाग-
जीद्वारा सृष्टी बहोत अंगीकार होयगी ॥ और नागजी-
भाईके संगते देवीजीव प्रभुनके सन्मुख होएंगे ॥ और पु-
ष्टिमार्गके सिद्धांतके पात्र नागजीभाईहैं ॥ और इनको बंध
बद्धतवर्षपर्यंत चलेगो ॥ जासूं ये लालजीकी शरण जां-
एंतो बहुत अच्छो ॥ जासूं श्रीमहाप्रभुजीनें आज्ञा करी
जो तुम लरकाके सेवक होवो ॥ तब नागजीभाई श्रीगु-
साईजीके सेवक भए सो वे नागजी ऐसैंकृपापात्र भगव-
दीय हते ॥ प्रसंग ॥ १ ॥ और वे नागजी गोधरागासके
देसाई हते ॥ और कछुकारणछुं सरकारमें आजीविका
बंदसई हती सो वे नागजीभाई बडे संकोचमें आयगये
इतनेमें नागजीभाईकी बेटीको विवाह आयो ॥ सो वे
वात खंभातके वैष्णवननें सुनी ॥ सहजपालडौशी तथा
माधवदासदलाल तथा जीवापारिख नागजी भाईके
झेही हते ॥ सो विननें नागजीकीबेटीके विवाहकी खबर
सुनी ॥ जब विननें दसहजार रुपैया गोधरामें नागजीकुं
पठाये ॥ सो वे रुपैया नागजीभाईकुं पहुँचे ॥ तब नागजी-
भाईनें विचार कय्यो जो ये द्रव्यतो वैष्णवनकोहैं ॥ और
वैष्णवननेंतो मोकुं वैष्णवसंबंधसों पठायोहैं ॥ जासूं ये द्रव्य
लौकिकमें नहीं खरचाय तो अच्छो ॥ आपदा कालतो
चार दिनमें मिटजायगो ॥ जब वे द्रव्यकी सोनामोहर
लेके एकलाकडीमें भरके अडेलको चले ॥ जब रस्तामें
एक वैष्णवढोकरी रहती हती वा ढोकरीकुं श्रीठाकुरजीनें
स्वप्नमें आज्ञा करि ॥ जो काल नागजी कासिदको वेष-

धरि आवेंगे तिनकुं तुम प्रसाद लेवाईयो ॥ जब दूसरे-
दिन परदेसिनके उतारामें वा डोकरीनें नागजीभाईकुं
हंठपाए ॥ तब वा डोकरीनें कही जो मैं तुमारी ज्ञातीकी
हूं और श्रीगुसाईंजीकी सेवक हूं जासूं मेरेघर प्रसाद
लेवेकुं चलो तब नागजीभाईनें नाहीं कही ॥ तब नाग-
जीभाई उहांसे चले ॥ जब दो मजिल गये तब श्रीठाकुर-
जीने स्वप्नमें आज्ञा करी जो तुमनें वा डोकरीके घर
प्रसाद क्योंनलियो ॥ वा डोकरीकुं मैनें आज्ञा करी हती
तब नागजी फिरके वा डोकरीके घर प्रसादलेवेकेलिए पा-
छे आयके उहां तीनदिन रहे ॥ और वा डोकरीकुं कही
जो तुमकुं श्रीठाकुरजीनें आज्ञा करी हती सो मोकुं
क्यों न कही ॥ तब वा डोकरीनें कही जो तुमतो श्रीठा-
कुरजीके अंगहो मैं इन बातनमें कहासमझूं ॥ तब ना-
गजी ये मुनके और डोकरीकी नम्रता देखके बहुत प्रसन्न
भये ॥ फिर उहांतें नागजी अडेलगाममें आये ॥ और श्री-
गुसाईंजीके दर्शन करे ॥ और वे लाठी भंडारीकुं दीनी और
कही जो ये लाठी वैष्णवननें दीनीहै सो श्रीगुसाईंजीकुं
दीजिये ॥ ये कहेके नागजीभाई ब्रजमें गये और पाछे
भंडारीनें लाठी श्रीगुसाईंजीके आगे खोली तब द्रव्य नि-
कस्यो ॥ और नागजीभाईतो तीनमहिना श्रीनाथजी-
हारमें रहे ॥ और पाछे ते गोधरामें सब पंचननें हाकमसो
कहेके नागजीभाईकी आजीविका खुली कराई ॥ और
चड्यो द्रव्य लेके नागजीभाईकी बेटीको विवाहकरदियो
जब नागजीभाई गोधरामें आए तब दसहजाररुपैया

खंभातमें पठाय दिये ॥ तब खंभातके वैष्णवनोंने विचार कन्यो जो ये द्रव्यतो नागजीभाईकुं हमनें वैसैंहीं दियो-
 हतो सो अब कैसें लियोजाय ॥ जब वे द्रव्य खंभातके
 वैष्णवनोंने श्रीगुसांईजीके पास भेजदिये ॥ सो वे नाग-
 जीभाई ऐसे भगवदीय और अतुल्यवी होते ॥ श्रीगुसांई-
 जीके स्वरूपमें ऐसे आसक्त होते जो वर्षमें गोधरासूं दो-
 वार जरूर दर्शनकुं आवते ॥ प्रसंग ॥ २ ॥ एकदिन वे
 नागजीभाईकुं गोधराके हाकिमनें राजनगर पठायो ॥
 पातशाहके पास जागीर बढ़ाईवेके लिये और दौयहजार
 रूपैया खरचवेकुं दिये ॥ तब वे नागजीभाई राजनगर
 आये सो उहां एक चीर दक्षिणको अति सुस्थ देख्यो ॥
 सो हजाररूपैयामें लेके श्रीगोकुल गए ॥ और जायके
 श्रीगुसांईजीकुं चीर भेंट कन्यो ॥ और फेर राजनगर आए
 देशाधिपतीकुं मिलकरके पांचगुणी जागीरको पट्टावट-
 वायलिये ॥ फेर गोधरा जायके हाकिमकुं खबर दीनी ॥
 हाकिम ये बात सुनके बहुत प्रसन्न भयो और एक महा-
 लके पांच महाल भए ॥ तादिनतें आजसूधी गोधरापंच-
 महाल कह्योजायहै ॥ सो नागजीभाईको स्नेह प्रभुनमें
 निष्कास हतो ॥ और लौलिककुं तुच्छमानते होते ॥ और
 बिनके लौकिककार्य प्रभु आपसोंआप सिद्ध करते ॥
 ॥ प्रसंग ॥ ३ ॥ और एकसमय श्रीगुसांईजी द्वारिका प-
 धारे होते ॥ नागजीभाई राजनगरसों आव लेके द्वारिका
 पहुंचे ॥ और श्रीगुसांईजीके दर्शन करिके आवनकी वी-
 नती करी ॥ जब श्रीगुसांईजीनें कही श्रीरणछोडजीके मं-

दिरमें पट्टुचायेदवो ॥ जब नागजीनें आंव पट्टुचायके दूसरे आंव मतुष्यकुं पठाय राजनगरसों फेर मंगवाये ॥ तब श्रीगुसांईजीकुं वीनति करी जो ये आंव आपके डेरामे रणछोडजीकुं पधरायके अंगीकार करावें ॥ जब श्रीगुसांईजीको डेरो राम लक्ष्मणजीके मंदिरकेपास हतो ॥ जब उहां श्रीगुसांईजीनें श्रीरणछोडजीकुं पधरायके आंव भोगधरे और नागजीभाईकुं साक्षात् श्रीरणछोडजीके दर्शन भये ॥ जबतें श्रीगुसांईजीकी बैठक वा ठिकाणे भई ॥ और उहां श्रीगुसांईजीके मनमें ऐसी आई ॥ जो ऐसैं आंव श्रीनाथजीअरोगें तो ठीकहै ॥ जब नागजीभाईनें श्रीगुसांईजीके मनकी जानी तब उहांसूं नागजीभाई चले सो राजनगरसूं आंव लेके श्रीनाथजी तथा श्रीनवनीतप्रियाजीके इहां आंव पट्टुचायके फेर राजनगरसों दूसरे आंव लेके सो घाघाघुरघट गाममें श्रीगुसांईजीकुं मिले ॥ और श्रीगुसांईजीकुं उहांके सब समाचार कहे और पत्र आगे धरे ॥ जब श्रीगुसांईजी मनमें विचारि जो नागजीविना मेरे मनकी कोन जाने ॥ तब नागजीभाई सों कही जो तुमारो कहा मनोरथहै ॥ जब नागजीभाईनें वीनती करी जो महाराज श्रीनाथजीकुं इहां पधरायके आंव भोगधरें जब मोकुं दर्शन होवें ॥ तब मेरो चित्त प्रसन्न होय तब श्रीगुसांईजीनें वैसेही दर्शन नागजीभाईकुं कराये ॥ सो वे नागजीभाई ऐंसे कृपापात्र हते ॥ और श्रीगुसांईजीनें विनमें ऐंसी सामर्थ्य धरी हती ॥ जोचाहैं जितनो बोझ उठाय लेंतें और चाहें जितनो रस्ता चलें

जाते ॥ दसदिनको रस्ता होय तहां एकदिनमें पहुँचजाते ॥ वे नागजीसाईं ऐसे कृपापात्र हते ॥ प्रसंग ॥ ४ ॥ एक-
समें नागजीसाईं अढेलकू चले सो रस्तामें श्रीजीदार
आये ॥ तब रामदासनें कही जो नागजीसाईं थोड़ेदिन
इहां रहिके सेवा करौ ॥ तब नागजीसाईं उहां सेवामें
न्हाए ॥ जब श्रीगुसाईंजीकुं एक श्लोक लिखपठाये ॥ सो
श्लोक ॥ सरसिकुशेशयमप्यास्वादितुमागच्छतो लिनो-
भार्गे ॥ यद्विकनककमलपानेनासीत्तोषःकिमन्येन ॥ १ ॥
जब अढेलमें वे पत्र श्रीगुसाईंजीकुं पोहोच्यो तब
श्रीगुसाईंजीनें दोय श्लोक लिखपठाए ॥ श्लोक ॥ नाश-
कुशेशयमानसमर्थयसेयत्प्रियोमधुरः ॥ तस्मिंस्तुष्टतोपो-
दुरयेदौस्थयहिनिरुपमस्नेहात् ॥ १ ॥ यद्यलिरपिनिरुप-
धिभावःस्वभावतःसमागच्छेत् ॥ निरवधितोपोस्यापिप्र-
भवंदेवेति किंवाच्यं ॥ २ ॥ ये श्लोक वाचिकें नागजी ब-
होत प्रसन्न भये ॥ और अढेलजाय फिर श्रीगुसाईंजीके
दर्शन किये ॥ प्रसंग ॥ ५ ॥ और एकसमें नागजीनें गो-
धरातें श्रीगुसाईंजीकुं पत्र लिखे ॥ वामें लिख्यो जो श्री-
गुबोधिनीजी तथा निबंध तथा अणुभाष्य और श्रीमहा-
प्रसूजीके करे भये ग्रंथनको आशय थोड़ेमें समझ पडे सो
लिख पठावेंगे ॥ तब श्रीगुसाईंनें दोय श्लोक लिख पठाए ॥
श्लोक ॥ श्री बल्लभाचार्यपथिप्रगाढं प्रेमैवचास्त्यव्यभिचा-
रहेतुः ॥ तत्रोपमुक्तानवधोक्तमक्तिस्तत्रोपयोगोऽखिलसा-
वनानाम् ॥ १ ॥ यः कुर्यात्सुंदराक्षीणां भवनेलास्यनर्तने ॥
तासां भावनयानित्यसहिसर्वफलादुभाक् ॥ २ ॥ तब ये

श्लोक ॥ वांचके नागजीआईकुं सगरो सिद्धांत स्फुरित
भयो ॥ सो वे नागजीआई ऐसे कृपापात्र भगवदीय हते ॥
वार्ता संपूर्ण ॥ वैष्णव ॥ ५ ॥ ॐ ॥ ॥ ॥

श्रीगुसांईजीके सेवक कृष्णभट्ट हते तिनकी ॥
श्रीमहाप्रभुजीके सेवक पद्मारावल्साचोराब्राह्मण तिनके
वेटा कृष्णभट्टजी हते सो श्रीगुसांईजीके सेवक भए ॥
जब श्रीगुसांईजीने श्रीमद्भागवत सुवोधिनीटीकासहित
कृष्णभट्टकुं पढाए ॥ तब पुष्टिमार्गीय सिद्धांत सब विनके
हृदयमें आयो ॥ और जैसे पद्मारावलकुं श्रीमहाप्रभुजीकी
कृपाते पुष्टिमार्गीय सिद्धांत स्फुरितभयो हतो ॥ तैसे वि-
नके वेटा कृष्णभट्टजीकुं भयो और नित्य प्रति सुवोधि-
नीजी की कथा कहते ॥ सो एकदिन कृष्णभट्टजी ब्रजमें
गये ॥ विनके संग एक कुनवी वैष्णव गयो ॥ और श्रीगु-
सांईजीके तथा श्रीनाथजीके दर्शन करे ॥ जब कुनवी वैष्ण-
वने श्रीगुसांईजीसों वीनती करी ॥ जो कृष्णभट्ट कथामें
ऐसे कहते हते ॥ जो श्रीगिरिराजजी धातुमय रत्नख-
चित हैं ॥ और गोविंदकुंड दूधसों भज्योहे ॥ सो ऐसे
दर्शन क्यों नहींहोवेहें ॥ ये बात सुनके श्रीगुसांईजीने
विचार क्यो जो मेरे सेवक कृष्णभट्टकी वाणी मिथ्या
नहोवे सत्यमईचहिये ॥ जासुं श्रीगुसांईजीने वा कुनवीको
दिव्यनेत्र दिये ॥ और जैसे दर्शन कृष्णभट्टने कहे हते
तैसेही श्रीगिरिराज तथा गोविंदकुंडके कराए ॥ सो वे
कृष्णभट्टजी ऐसे कृपापात्र हते ॥ प्रसंग ॥ १ ॥ एकसमय
कृष्णभट्टजी श्रीनाथजीके भीतरियामें न्हाए और सब

सेवा करन लागे और चरणस्पर्श न करे तब एकदिन श्रीनाथजीने आज्ञा करी जो कृष्णभट्ट चरणस्पर्शकरो ॥ तब कृष्णभट्टने वीनती करी जो लीलाके दर्शन होवैं तो चरणस्पर्शकरूं ॥ तब श्रीनाथजीने आज्ञा करी जो लीलाके दर्शन देहांतरमें होवेंगे ॥ ये मुनके कृष्णभट्टजी उदास होय गए ॥ जब श्रीगुसांईजीने पूछी ॥ जो कृष्णभट्ट उदास कैसें भएहो ॥ तब कृष्णभट्टने कही जो श्रीनाथजीने चरणस्पर्शकी आज्ञा करी है ॥ और लीलाके दर्शनकी नाही कहीहै ॥ जब श्रीगुसांईजीने कही श्रीनाथजीतो बालकहैं तुम क्यों उदास भए ॥ इतनो कहैके श्रीगुसांईजीने कृष्णभट्टको हाथ पकड़के चरणस्पर्श कराए ॥ और श्रीनाथजीकी लीलाके दर्शन कराए ॥ तब कृष्णभट्टजी बहुत प्रसन्न भए और ये निश्चय किये श्रीनाथजीतो श्रीगुसांईजीके बहामैंहैं ॥ प्रसंग ॥ २ ॥ और एकदिन कृष्णभट्टजीने उज्जैनमें वसंतपंचमीको उत्सव क्यो सो वा दिन वसंतपंचमी इती नहीं ॥ जब श्रीनाथजी खेलके गिरिराजऊपर पधारे तब गुलालभरे ॥ दर्शनरामदासभीतरीयाकुं भये जब रामदासने श्रीगुसांईजीसों पूछी जो श्रीनाथजीकुं कौननें खिलाएहैं ॥ तब श्रीगुसांईजीने कही जो कृष्णभट्टने वसंतपंचमीजानके खिलाएहैं ॥ तब रामदासने वीनती करी जो कृष्णभट्टजीतो मृल्लिये ॥ परंतु श्रीनाथजी क्योंखेले ॥ तब श्रीगुसांईजीने कही जो श्रीनाथजीतो भक्तनके वशहैं ॥ जो भक्त जैसे मनोरथ करे वाको वैसो अंगिकार करें हैं ॥ सो वे कृष्णभट्टजी ऐसे कृपापात्र हते ॥ प्रसंग ॥ ३ ॥ और

एकसमैं कृष्णभट्टजी श्रीगोकुल आये हते ॥ जब एकांतमें
चाचाहरिवंशजीसों भगवद्दार्ता करवे लगे ॥ तब उहां
सोंधेकी सुगंध आई ॥ जब कृष्णभट्टजीनें कहि ये
सुगंध कहांसों आईहै ॥ तब चाचाजीनें कही जो वे
छेलआए होंएंगें ॥ जिनकुं तुमविना रह्यो नहिजायहै ॥
सो वे कृष्णभट्टजी ऐसे कृपापात्र हते ॥ जिनके पीछे श्री-
नाथजी फिरत डोलत हते ॥ प्रसंग ॥ ४ ॥ एकसमैं श्रीगुसां-
ईजी उज्जेन पधारे सो कृष्णभट्टजीके घर डेरा किये ॥
और उहांके ब्राह्मण सब मिलके श्रीगुसांईजीके पास आ-
यके प्रश्न कन्यो ॥ जो तुमारे सेवक कृष्णभट्टजी वेदोक्त-
कर्म नहीं करेंहैं और अष्टप्रहर सेवा करेंहैं ॥ जब विनकूं
श्रीगुसांईजीनें उत्तर दियो ॥ सो श्लोक ॥ मत्कर्मकुर्वतापुं-
सांकर्मलोपोभवेद्यदि ॥ तत्कर्मतेप्रकुर्वतित्रिशत्कोटयोम-
हर्षयः ॥ १ ॥ “और कहे भोरभए जानिये” ॥ तब ये मुनके
ब्राह्मण बोले जो भोरभए कैसो जान्यो जायगो ॥ तब
श्रीगुसांईजीनें कहि जहां रात्र होवैहै तहांदिनके पदार्थ
सुझै नहींहैं ॥ जब तुमारे अंतःकरणमें उजारो होयगो
और मायारूपी रात्र मिटगी तब देखोगे ॥ सो गीतामें
कह्योहै ॥ श्लोक ॥ यानिशासर्वभूतानांतस्यांजागर्तिसंय-
मी ॥ यस्यांजाग्रतिमृतानिसानिशापश्यतोमुनेः ॥ १ ॥
ऐसें जब मुन्यो तब विन ब्राह्मणनको संदेह मिटगयो ॥
सो वे कृष्णभट्ट ऐसे कृपापात्रहते ॥ प्रसंग ॥ ५ ॥ सो वे
कृष्णभट्टजी सदैव उज्जेनमें रहते हते ॥ और गुजरातके
तथा दक्षिणके वैष्णव उज्जेन होयके श्रीगोकुल जाते हते

॥ और बिनसुं मिलके सब वैष्णव प्रसन्न होत हते ॥ और कृष्णभट्टजी वैष्णवनपर कैसी प्रीति राखत हते जो वैष्णव बिनके ईहां गांठडी धरते वा वैष्णवकी गांठडीमें छाने छाने बूधचरको प्रसाद बांध राखते ॥ तब ये मनमें लस-
 ज्ञते ॥ जो वैष्णवनको रस्तामें सुख लोगी तब येलेवंगे इनकुं श्रम नहीं होयगो ॥ ऐसी वात्सल्यता वैष्णवनके उपर राखते हते ॥ प्रसंग ६ ॥ एकसमें श्रीगुसाईजीने श्रीगोकुलसुं कासिदपठायके कृष्णभट्टकुं बुलवायो जब कृष्णभट्टजी उज्जैनसों चले ॥ तब नित्य स्वप्नमें कृष्णभट्टके सेव्य श्रीठाकुरजी आयके कहते जोतुमबिना सोई रह्यो नहींजायहै ॥ जब कृष्णभट्टजी रस्तामेंसो एकमनुष्यकुं पत्र देके नित्य आपनें घर पठावते और पत्रमें येही लिखते जो श्रीठाकुरजी प्रसन्नहोंवें सोई करियो ॥ परंतु श्रीगुसाईजीके मिलेबिना कृष्णभट्टजी पाछे न गए ॥ जब कृष्णभट्ट श्रीगोकुल पहुंचे तब श्रीगुसाईजीके दर्शन करे ॥ जब श्रीगुसाईजीनें कही जो तुमनें श्रीठाकुरजीकी आज्ञा क्यों नमानी ॥ तब कृष्णभट्टनें वीनती करी जो महाराज श्रीठाकुरजीतो आपके वश्य हैं ॥ और आपनें हमकुं श्रीठाकुरजी दिखाएहैं ॥ जामूं राजकी आज्ञा कैसें लोपकरीजाय ॥ ये बात सुनके श्रीगुसाईजी चुपकरीरहै ॥ वा कृष्णभट्टकुं श्रीगुसाईजीके आज्ञापर ऐसो विश्वास हतो ॥ प्रसंग ७ ॥ एकदिन उज्जैनके वैष्णव सब भेलेहोयके कृष्णभट्टसों पूछे ॥ जो श्रीठाकुरजी कैसें प्रनन्नहोंवेंहें ॥ तब कृष्णभट्टनें कही जो श्रीठाकुरजीतो स्वामिनीजीकी

कृपातें प्रसन्नहोवेंहैं ॥ याहीतें श्रीस्वामिनी स्तोत्रमें श्रीठा-
 कुरजीकी प्रसन्नताकेलियें श्रीगुसांईजीनें द्वादशप्रकारकी
 प्रार्थना करीहै ॥ और द्वादशप्रकारके दास्यभाव वर्णन
 करेहै ॥ ये सुनके वैष्णव वहीत प्रसन्नभये गीतगोविंदमें
 श्रीठाकुरजीनें कहीहै॥अधरसुधारसमुपनयभामिनी जी-
 वय सृतमिवदासं ॥ त्वयि विनिहितमनिशं विरहानलदग्ध-
 वपुषमविलासं ॥ और नंददासजीनें कहीहै ॥ श्रीवृषभा-
 तुमुता-पद-अंबुज जिनके सदासहाय॥यहरसमग्ररहतजे-
 निसदिन तिनपर नंददासबलिजाय ॥ प्रसंग ॥ ८ ॥ एकदि-
 न नागजीभाई गोधरातें उज्जैनमें आए तब कृष्णदृष्टं मिले
 और महाप्रसाद लेके भगवद्दार्ता करवे लगे ॥ सो एकांतमें
 भगवद्दार्ता करत करत देहातुसंधान भूलगए ॥ सो सातदि-
 वस पीछेदेहकी सुध आई ऐंसे करतकरत नागजीभाई बहुत
 दिन उहां रहे ॥ सो कोई समें तीन दिन कबहु सात दिन
 देहातुसंधान छूट जाय ॥ सो वे कृष्णभट्ट तथा नागजी-
 भाई ऐंसे भगवद्रसमें मग्न हते ॥ प्रसंग ॥ ९ ॥ कृष्णभट्ट
 एकसमय श्रीगोकुल गये सो रस्तामें विनकी देहछूटी
 विनके बेटा गोकुलभट्ट उनकुं चिता भई ॥ जो श्रीगो-
 कुल न पहुंचे और घरमें भी न रहे फेर उनको अग्निसं-
 स्कार करिके उज्जैनमें पाछे आये ॥ और जादिन कृष्ण-
 भट्टकी देह छूटी वाहि समय श्रीगुसांईजी श्रीनाथजी ॥
 शृंगारकरके चौकमें पवारे हते तब कृष्णभट्टजीकुं दे वे ॥
 जब कृष्णभट्टनें साष्टांगदंडवत करी तब श्रीगुसांईजीनें
 पूछ्यो जो तुम कब आये ॥ जब कृष्णभट्टनें वीनति करी

जो राजकीकृपातें अबी आयोहुं ॥ जब श्रीगुसांईजी गो-
पीवल्लभ भोग धरिके बाहेर पधारे ॥ फेर पूछवे लगे जो
कृष्णभट्ट कहाँ ॥ तब रामदासभीतरीयानें कही जो कृ-
ष्णभट्ट तो मंदिरमें जाते देखे परंतु बाहेर निकसते काहू-
न देखें नहीं ॥ जब श्रीगुसांईजीनें एक पत्र लिखायके
उज्जैनमें मनुष्य पठाये ॥ सो मनुष्यनें गोकुलभट्टकुं पत्र
दिये ॥ सो बांचके बहुत प्रसन्न भये ॥ जब गोकुलभट्टनें
श्रीगुसांईजीकुं वीनती पत्र लिखे जो असुक समय असुक
दिवस कृष्णभट्टकी देह छूटीहै ॥ ये पत्र श्रीगुसांईजी बां-
चके कहे जो कृष्णभट्टजी ऐसेही हते ॥ जिनके संग श्री-
नाथजी खेलतहते ॥ सो वे या रीतीसूं भगवल्लीलासें प्राप्त
होवें यामें कहा आश्चर्य है ॥ सो वे कृष्णभट्टजी ऐसे कृ-
पापात्र हते ॥ तातें इनकी वार्ता कहांताई लिखीजाय ॥
॥ प्रसंग ॥ १० ॥ वार्तासंपूर्ण ॥ वैष्णव ॥ ६ ॥ ॐ ॥

श्रीगुसांईजीके सेवक चाचाहरिवंशजी ति०
सो चाचाहरिवंशजी क्षत्री हते विनकुं श्रीगुसांईजीनें
आज्ञा करी ॥ जो श्रीनाथजीको अभिप्राय पुष्टिमार्ग ब-
ढायवेकी है ॥ जासूं तुम परदेसनमें जाय हमारी आ-
ज्ञासूं सबको नाम सुनावो और वैष्णव जो मेट काटे
सो लेआवो तब चाचाहरिवंशजी गुजरात आए ॥ सो
राजनगरकेपास असारवा गाम है ॥ तहां भाईला कोठा-
रीके घरमें रहै ॥ सो उहांते मेट उगायके स्वभातमें
माल लैकेलियें गए ॥ सो उहां गाममें पूछी जो भले
आदमी कौनहैं ॥ तब माधवदास दलालनें कही जो स-

हजपालदोसी भले आदमी हैं ॥ जब माधवदासदलालके साथ सहजपालदोसीके ईहां जाय सब साल लियो सो उत्तम ते उत्तम वस्तुलीनी ॥ और जीवापारिखके उपरकी हुंडी लाएहते सो माधवदास दलालकुं दीनी और कही जो इनके मोलको दाम सब चुकायके बचेसो नाशयणसरपें हमारो डेरा है ॥ तहांपहुंचाय दीजियो ॥ जब माधवदासजी वो द्रव्य लेके विनके डेरापर पहुंचावन गए ॥ तब माधवदासने विनको आचारक्रिया देखके विस्मय भये ॥ तब माधवदासजीने विचार क्यो जो ये कोई महापुरुषहैं ॥ तब माधवदासने कही जो तुमारो धर्म हमकुं सिखावो ॥ तब चाचाजीने विनकुं नाम सुनाये ॥ जब माधवदास सब रीतभांति सीखिके सहजपालदोसी तथा जीवापरिखसुं कही जो येतो बडेमहत्पुरुषहैं ॥ ये बात सुनके वे दोनो जने चाचाजीके पास नाम पाए ॥ जब खंभातसुं वे तीनो जने चाचाजीके साथ श्रीगोकुल आए ॥ तब आयके श्रीगुसांईजीके पास निवेदन करवाए ॥ तब श्रीनाथजीके दर्शन करिके बहुत प्रसन्न भये ॥ सो वे चाचाजी ऐसे कृपापात्र हते ॥ प्रसंग ॥ १ ॥ फेर चाचाजी एकदिन गुजरातके परदेसकुं गए ॥ सो रस्ता छुल्लिगये ॥ सो भीलनके गाममें गए उहां कूवापर एक स्त्री जलभरत हती वा स्त्रीने विनके आचारविचार देखिके अपनै घरकुं लेगई ॥ और विनके पास नाम पायो और सबरीतभांतसुं भोग धरिवे लगी ॥ चाचाजीने विनसुं पूछो जो तुमारे घरके पुरुष कहां गएहैं ॥ तब विनने कही जो चो-

रीकरवेकुं गएहैं हमारो येही धंधो है ॥ तब चाचाजीनें कही जो ये धंधो आछो नहीं है ॥ जब वा स्त्रीनें वीनती करी जो आप इहां रहिके बिनकुं वैष्णवकरिके फेर तुम जाओ तब चाचाजी उहां रहगए तब वा बाईको बेटा गामको सुखी हतो वानें चाचाजीके दर्शनकरतमात्रही वाको चित्त लौकिकमेंसुं निकसके प्रभुनके चरणारविंदमें लग्यो ॥ सो सूरदासजीनें गायोहै ॥ सो पद ॥ “जादिन संत-पाढ़ने आवैं । तीरथकोटीखानकरनफलदर्शनही तैं पावैं ” ॥ जासुं या भीलको मन झट फिरगयो ॥ तब आखी-गाम वैष्णव भयो ॥ जब चाचाजी बिनकुं सब सेवाकी रीति सिखायके उहांसे बिदा भए ॥ तब वे भील चोरी-को धंधो छोड़िके खेती करवे लग्ये ॥ जब रस्तामें चाचा-जीकुं स्वप्नमें श्रीनाथजीनें आज्ञा करी ॥ वे भील आ-चार क्रिया आछी पालेहैं परंतु भोगचाखके धरेंहैं सो सोकुं नित्य भीलनकी जूठन लेनीपरे है जासुं बिनको तुम शिक्षा आछीतरहसुं दीजियो ॥ जब चाचाजी फिरके वा गाममें आय दोमहीना रहके सेवाकीरीती और आ-चारधर्म सब पक्की करायो और सब रीति सिखायके श्री-गुसांईजीकी सेंट लेके गए ॥ सो वे चाचाजी ऐसे कृपा-पात्र हते ॥ प्रसंग ॥ २ ॥ एकसमें चाचाहरिवंशजी श्रीगो-कुलतें उज्जेनकुं चले सो रस्तामें क्षत्रीवैष्णवके घर आए ॥ वा क्षत्रीवैष्णवनें चाचाजीके मुखसे भगवद्वातां सुनके संसारमेंसुं आसक्ति काढडारी ॥ तब चाचाहरिवंशजीकुं वा वैष्णवनें कहि जो ये सर्वस्व श्रीगुसांईजीके पास ले-

जायो चाचाजीनें कही जो में उज्जेनकुं जायके आऊंगो ॥ जब पाछे आयके लेजाऊंगो तब चाचाजी उज्जेनकुं आए कृष्णभट्टसूं बात करी तब कृष्णभट्टनें कही वे क्षत्रीतो अनाचारीहैं तब चाचाजीनें कही ॥ जिनकी संसारमें आसक्ति नहींहै विनको आचारविचारको कहा-कामहे ॥ फेर चाचाजी वा क्षत्रीवैष्णवके घर आए ॥ तब वा वैष्णवनें सब द्रव्य श्रीगुसांईजीकी भेट कन्यो ॥ जब चाचाजी तीनहजार रुपैयालिंगए ॥ और दोसोरुपैया वा वैष्णवकुं जोरसूं देगए व्यवहार चलाईवेकुं वे चाचाजी ऐंसे कृपापात्र हते ॥ जिनके संगसूं हजारों वैष्णवनकी संसारासक्ति छूटगई हती ॥ प्रसंग ॥ ३ ॥ एकसमें श्रीगुसांईजी परदेश पधारे हते रस्तामें एकगाम आयो ॥ वा गाममें वैष्णव कोई न हतो ॥ तब श्रीगुसांईजीनें कही चाचाजी ये रस्ता नहिं निकसे होयगे ॥ सो चाचाजी ऐंसे कृपापात्र हते ॥ जो रस्ता निकसते और जिनलोग-नसूं प्रसंग पढतौ विनको मन श्रीप्रभुनमें लगाय देते ॥ प्रसंग ॥ ४ ॥ और एकसमें चाचाहरिवंशजी श्रीनाथजीके लियें श्रीगोकुलमेंसूं सामग्री लेवेंको गये ॥ सो सामग्री एक वैष्णवके माथे पधरायके श्रीगोकुलते चले ॥ जब यमुनाजीके घाटपर आए तब नाव नहीं हती सांझ होयगई हती ॥ जब चाचाजीनें विचार कन्यो जो सबारे छेघढी रात रहेंगी तब ये सामग्री चहियेगी और रातकुं सिद्ध भई चहिये ॥ और गोपालपुरतो दसकोस दूर हैसो कैसे पोहोंचेंगे ॥ ये विचारके वा वैष्णवसों कही जो में य-

सुनाजीके ऊपर चलुं जहां मैं पांव धरके उठाऊं जा ठिकाणे तुम पांव धरत आईयो ॥ तब चाचाहरिवंशजी श्रीयसुनाजीके ऊपर चलवे लगे और भगवन्नाम लेवे लगे ॥ जब वे वैष्णव पिछाडी भगवन्नाम लेत चल्यो ॥ तब वा वैष्णवनें मनमें विचार क्यो ॥ जो चाचाजी भगवन्नाम लेतेहैं ॥ और मैं भगवन्नाम लेतहुं इनके पग ऊपर पग काहेको धरुं ॥ जब दूसरे ठिकाने पग धरवे लग्यो ॥ तब य-सुनाजीमें डूबवे लग्यो ॥ तब चाचाजीनें आयके वाको हाथ पकरके पार लेगए ॥ जब चाचाजीने कही मैं जाठिका-णेंसु पांव उठाए तुमने वही ठिकाणे क्यों नहीं धरे ॥ वाने कही मैं भगवन्नाम लेतहुं तुमहुं भगवन्नाम लेतेहो ॥ जब चाचाजीनें कही मेरी सुनिहै तेरी अब सुनेंगे ॥ सो वे चाचाजी ऐसे कृपापात्र हते विनकी प्रभुनें सुनी हती ॥ प्रसंग ॥ ५ ॥ एकदिन श्रीगुसांईजी लघुशंका करके पधारे ॥ सो चाचाजीसों भगवद्दार्ता करने लगे सो ऐसैं रसा-वेश भये जो आखीरात चलीगई ॥ हाथमेंसे नीचे झारी धरिवेकी शुध न रहि ॥ और चाचाजीकुं तो तीनदिन सुधि रसावेश रह्यो ॥ वे ऐसैं भगवद्रसके पात्र हते ॥ प्रसंग ॥ ६ ॥ एकदिन चाचाजी गिरिराज ऊपर गए ॥ और शंखनादकी तैयारी हती ॥ चाचाहरिवंशजीकुं ऐ-सो अनुभव भयो की श्रीनाथजी निर्भर निद्रामें हैं ॥ तब शंखनाद होवे न दियो ॥ सब भीतरिया ठाडे रहे ॥ दोघडीपीछे श्रीगुसांईजी पधारे ॥ जब शंखनाद कराए तोहुं श्रीनाथजी जागे नहीं ॥ तब सूरदासजीनें कीर्तन

गायो ॥ सो पद ॥ “कौनपरीनंदललैवान ॥ प्रातसमय-
जागनकीबिरियांसोवतहैपीतांवरतान” ॥ ये यद सुन-
श्रीनाथजी जागे ॥ सो चाचाजीऐसे कृपापात्र हते ॥ जि-
नकी कान श्रीगुसांईजी राखते ॥ और जिनकुं श्रीठाकु-
रजीकी कृतीकी सब शुष रहेती ॥ प्रसंग ॥ ७ ॥ एकदिन
श्रीगुसांईजी शय्यामंदिरमें पधारते हते ॥ जब श्रीनाथजी
श्रीगुसांईजीकी आढि देखवे लगे ॥ तब चाचाजीनें श्री-
गुसांईजीसों वीनती करी जो श्रीनाथजीतो आपकी ओर
चितवें हैं ॥ और आप भीतर कैसे पधारतेहो ॥ तब श्री-
गुसांईजीनें आज्ञा करी जो श्रीनाथजीतो बालकहैं ॥ परंतु
सेवातो करी चाहिये ॥ जब श्रीगुसांईजी सेवा करवेको
पधारे ॥ सो वे चाचाजी ऐसे कृपापात्र हते ॥ जिनकुं
श्रीनाथजीकी घडीघडीकी खबर पडती हती ॥ प्रसंग ॥ ८ ॥
और एकदिन चाचाजीकुं ठोकर लगी हती ॥ जब दुः-
खीहोय बैठरहे हते ॥ तब रुक्मिणी बहूजीके आगे बात
निकसी हती ॥ श्रीगुसांईजीनें कही जो सब वैष्णव हमारे
अंगहैं ॥ तब रुक्मिणी बहूजीनें कही चाचाजी कौनसो
अंगहैं ॥ तब श्रीगुसांईजीनें आज्ञा करी जो हमारे नेत्र हैं ॥
जो देखो चाचाजी दुःखीहैं तो हमारे नेत्र दूखेंहैं ॥ सो
वे ऐसे कृपापात्र हते ॥ प्रसंग ॥ ९ ॥ एकसममें चाचाहरिवं-
शजीकुं आज्ञा करी जो तुम परदेसकुं जाओ ॥ तब चा-
चाजीनें कही हमकुंतो आपके दर्शन विना रह्यो नहिं जाय
जब श्रीगुसांईजीनें आज्ञा करी जहां तुम जावोगे तहां
हम तुमकुं नित्य दर्शन देंवेंगे ॥ बाकी कारण ये हतो जो

श्रीगुसाईजीकुं आसुरव्यामोहलीला करनी हती तासुं
 चाचाजी तासमें ईहां होएंगे तो इनको देह न रहेगो ॥
 जब श्रीगोकुलनाथजी तथा श्रीरघुनाथजी तथा यदुना-
 थजी तथा घनश्यामजी इनकुं स्वमार्गीय ग्रंथनकी प-
 रिपाटी कौन बतावेगो ॥ श्रीगिरिधरजीकुं तो सेवामेंसो
 अवकाश नहींहै ॥ ये विचार करके श्रीगुसाईजीने चा-
 चाहरिवंशजीकुं परदेस बिदा कियो तब चाचाहरिवंशजी
 गुजरात गए ॥ ता पाछे श्रीगुसाईजीने आसुरव्यामोहली-
 ला दिखाई ॥ जब चाचाजीने गुजरातमें ये बात सुनी तब
 तत्क्षण सृष्टित होय गये ॥ जब श्री नाथजीने आयके
 चाचाजीसों कही ॥ जो हाल तुमारो पृथ्वी ऊपर रहेनो
 है मेरी ऐसी आज्ञाहै जब चाचाजीने अपनो देह रा-
 ख्यो ॥ तब चाचाजी ब्रजमें आयके सब बालकनके
 पासतें सुबोधिनीजी सुनवेके मिष करके पढावते ॥
 कारण वे चाचाजी ज्ञातीके क्षत्री हते ॥ सो ब्राह्मणकुलकुं
 कैसे पढावे ॥ जासुं सुनवेके मिषतें सब बालकनकुं पढाए ॥
 सो वे ऐसे कृपापात्र हते ॥ जिनकुं श्रीगुसाईजी मार्गकी
 परिपाटी बतावेकैलीयें पृथ्वीपर छोडगये ॥ जैसे श्रीमहा-
 प्रभुजी दामोदरदास हरसानीकुं परिपाटी बतावेकैलीयें
 छोडगये हते याहीतें श्रीगुसाईजीने शृंगाररसमंडनग्रंथमें
 कह्यो है ॥ श्लोक ॥ यस्मात्सहायभूतो दामोदरदासहरि-
 वंशो ॥ विठ्ठलचितमिदं शृंगाररसमंडनपूर्णम् ॥ १ ॥ या
 श्लोकमेंतें ऐसो निश्चय होवैहै जो दामोदरदासजी तथा
 चाचाहरिवंशजीको अधिकार एक सरीखो है वे चाचाजी

पृथ्वीऊपर एकसौ पचीस वर्षके आसरे रहे हते ॥ जिनकुं काल कल्ल बाधा करसक्यो नहीं ॥ प्रसंग ॥ १० ॥ वार्ता संपूर्ण ॥ वैष्णव ॥ ७ ॥ ॐ ॥ ॥ ॥ ॥

श्रीगुसांईजीके सेवक मुरारीदास हते तिनकी ०

॥ सो मुरारीदास गौडदेशमें नारायणदासके पास नौकरी करवेकुं गए ॥ जब नारायणदासने मुरारीदासकुं काम बताया ॥ सो मुरारीदासको बहोत आच्छो काम देखके दस रुपैया महिना करे ॥ तब मुरारीदासने कही जो मैं आठ रुपैया महिना लेउंगो सवा पहेर दिन चढे आउंगो और छे घडी दिन रहते जाउंगो ॥ तब नारायणदासने ये बात कबूल राखी ॥ जब मुरारीदास चाकरी करने लगे ॥ और मुरारीदासके माथे श्रीबालकृष्णजी विराजते हते ॥ और सातुभाव जनावत हते ॥ और जो चाहे सो मांगते ॥ और बालककी न्याई सब मांगते ॥ सो एक दिन नारायणदासने ऐसो विचार क्यो जो अवारे आवेहें ॥ और वेग जाएहें ॥ सो कहा कारण होयगो ॥ तब नारायणदास विनके पाछे छाने जायके विनके घरमें छिप रहे और विनकुं सब सेवा करते देखी ॥ और श्रीठाकुरजी सों बातें करते देखे ॥ फिर नारायणदासजी दूसरे दिन एकांतमें मुरारीदाससों कही जो हम तुमारे घर काल सब रीती देखीहें ॥ जासूं तुम हमको सेवक करो ॥ जब विनकी बहुत नम्रता देखके मुरारीदासने कही जो हमतों श्रीगुसांईजीके सेवकहें ॥ तुमहुं श्रीगुसांईजीके सेवक होवो ॥ तब नारायणदासने मुरारीदासके पास वीनती पत्र श्रीगुसांईजीको लिखायके

आदमी पठाय श्रीगुसांईजीकुं पधराए जब नारायणदास
 तथा विनकीन्ही श्रीगुसांईजीके सेवक भये ॥ और भगव-
 त्सेवा करवे लगे ॥ और जैसे मुरारीदाससों श्रीठाकुरजी
 बातें करते हते ॥ तैसे नारायणदाससूं करनलगे ॥ सो
 मुरारीदास ऐसे कृपापात्र हते ॥ जिनके संगतें नारायण-
 दासहुं वैष्णव भए सो संगकरियेंतो ऐंसेनको करिये ॥
 जिनके संगसों आपनमें भगवद्धर्म आवें ॥ वार्तासंपूर्ण ॥
 ॥ वैष्णव ॥ ८ ॥ * ॥ ॥ ॥ ॥ ॥
 श्रीगुसांईजीके सेवक गौडदेशके निवासीनारा-
 यणदास पादशाहके दिवाण हते हिनकी ० ॥

एकसमें श्रीगुसांईजी श्रीजगन्नाथरायजीके दर्शनकुं प-
 धारे ॥ और वस्तु जो संगमें हती सो सब खटला भेटकर
 दिये ॥ येबात नारायणदासनें घर बैठे वाहीक्षण जानी ॥
 सो श्रीजगन्नाथरायजीनें जताई ॥ जब नारायणदासनें
 दूसरो खटला तथा अस्वारी वैसीही तैयार करके पठाई ॥
 ॥ और मनुष्यनसुं कही पुरुषोत्तमक्षेत्रके बाहर डेरा करी ॥
 जब श्रीगुसांईजी पधारे तब खबर दीजीयो ॥ तब म-
 नुष्य खटलालेके पुरुषोत्तमक्षेत्रसुं बाहिर जायके डेरा की-
 ये ॥ जब श्रीगुसांईजी पधारे तब वा खटलामें सामान ध-
 रके और सब बालक तथा बहू बेटी सहित नारायणदासके
 घर पधारे ॥ जब नारायणदासनें श्रीगुसांईजीकुं सर्व सम-
 पण मनसुं कन्यो मुखसुं बोलि नहीं ॥ मनमें ऐंसे जानी जो
 बोलुंगोतो श्रीगुसांईजी नहीं करेंगे ॥ तापाछें जब श्रीगु-
 सांईजी श्रीगोकुल पधारे तब नारायणदासनें मनुष्यके

संग सब द्रव्य पठाय दीयि सो वे नारायणदास ऐसे कृपा-
पात्र हते ॥ प्रसंग ॥ १ ॥ एकसमय नारायणदासनें श्रीगु-
साईजीकुं वीनती पत्र लिखके पठाए ॥ जब श्रीगुसाईजी
गौडदेशमें पधारे ॥ जब गांम बाहिर नारायणदासजी श्री-
गुसाईजीकुं पधरायवे आये तब नारायणदासजी श्रीगुसां-
ईजीके चरणारविंदके दर्शन करतही मुच्छा खायगये ॥
और भगवल्लीलाके दर्शन भये हते तासूं भगवल्लीलामें प्र-
वेश करने लगे जब श्रीगुसाईजीनें विचारे जो हालतो इ-
नकुं इहां कारज वोहोत करनेहें और हाल लीलामें प्रवेश
करिवेकुं ढीलहै ॥ ये विचारिकें श्रीगुसाईजीनें नारायणदा-
सके कानमें कह्यो जो उठो अबी ढीलहै तब नारायणदा-
सजी मुनकें उठिवैठे ॥ और श्रीगुसाईजीकुं घरमें पधरा-
यके ले गये ॥ जब श्रीगुसाईजी सेवालके पाछे अडेल पधारे
सो वे नारायणदासजीको ऐसो श्रीगुसाईजीकी आज्ञापर
विश्वास हतो जो भगवल्लीलामें प्रवेश करनेमें ढील करी
॥ प्रसंग ॥ २ ॥ एकसमय नारायणदासनें श्रीगुसाईजीकुं
पत्र लिख्यो जो मोकुं सत्संग नहीहैं ॥ ये पत्र श्रीगुसाईजी
वाचिकें चाचाहरिवंशजीकुं आज्ञा करी जो तुम नारायण-
दासके पास जावो ॥ तब चाचाजीनें वीनती करी जो आ-
पके दर्शनविना कैसे रह्यो जायगो तब श्रीगुसाईजीनें
आज्ञा करी जो तुमकुं सर्व ठिकानें सदैव दर्शन देउंगो जब
चाचाजी नारायणदासके पास आये ॥ जब नारायणदा-
सजीकुं मारगकी रीति बताई और वैष्णवनके उतरिवेके-
लीयें न्यारो घर करायो और श्रीठाकुरजीके सेवाके लीयें

न्यारे मंदिर कराये और नारायणदासजी तथा विनकी स्त्री चाचाजीके संगतें भगवत्सेवा करनेलगे और चाचाजी तथा नारायणदासजी भगवद्द्वार्ता करवे बैठते ॥ तब दोय दिन तीन दिन सुधी देहातुसंधान श्रुति जाते ॥ ऐसे करत करत बोहोत दिन बीते ॥ जब चाचाजीनें श्रीठाकुरजीसों वीनती करी ॥ जो नारायणदास लीलाके दर्शन करिकें मूर्च्छित होय जायहैं ॥ और हालकारजतो बोहोत करनेहैं ॥ जब श्रीठाकुरजी नारायणदासजीकों याही देहसों लीलाको अनुभव करावन लगे फिर जब लीलाके दर्शन करते तब मूर्च्छा नहीं आवती सो वे चाचाजीकी वीनतीसुं और श्रीगुसाईंजीकी कानतें श्रीठाकुरजीनें अती कृपा करी तापीछें चाचाजी उद्वांसुं श्रीगोकुल आये ॥ प्रसंग ॥ ३ ॥ सो वे नारायणदासजीकी स्त्री भगवत्सेवा करती हती जब वैष्णव आवते तब सबकी टहल करती, कोई दिन चार ठगननें वैष्णवको वेश धरकें नारायणदासके घरमें आय रहे जब नारायणदास राजद्वार गये हते ॥ तब उन ठगननें वीरांकुं भगवद्द्वार्ता सुनाई तब वीरांकुं भगवद्रसको आवेश आयो सो मूर्च्छा आयगई जब उन ठगननें वीरांके गलामें फांसी डारके गहेना उतार लीनें सो लेगये रस्तामें नारायणदासजी मिले तब नारायणदासजीनें कही जो हमसों विदा भये विना तुम कैसे जाओहो ऐसे कहिके नारायणदास उनको पाछे फिरायलेगये जब नारायणदास अपने घरमें गये सो स्त्रीकों मृतक भई सुनी जब नारायणदासजी देखेतो वह स्त्री भगवद्रसके आवेषमें

हती जब नारायणदासनें बिनके गलामें छूँ फाँसी काढ
 डारी और लोगनकूँ कही जो यह मरी नहीं है झूठी बात-
 हैं नारायणदासनें मनमें जानी जो मरीकहूँगो तो कोई
 वैष्णवनको संग नहीं करेगो तब नारायणदासनें स्त्रीकुं
 चरणाभृत देके जीवति करी तब वे ठग नारायणदासके
 पांवनपर और कहि हमकुं वैष्णव करो तब नारायणदा-
 सनें कहि तुम श्रीगुसाईंजीके पास श्रीगोकुलमें जायके
 वैष्णव होवो तब नारायणदासने महाप्रसादलेवायके श्री-
 गुसाईंजीके उपर पत्र लिखदियो सोवे नारायणदासजीनें
 वैष्णवनको दोष न देख्यो ॥ जगतमें वैष्णववेषकी निंदा
 नहोवे तैसे कन्यो सो वे नारायणदास ऐसे कृपापात्र हते
 ॥ प्रसंग ॥ ४ ॥ और एकसमय श्रीगुसाईंजी गौडदेशमें
 पधारे हते जब नारायणदासके घर विराजे हते ॥ सो
 नारायणदास श्रीगुसाईंजीकी सेवामें हते ॥ तब राजद्वा-
 रमें जायवे आयवेको'बनतो नहीं हतो तब पात्साहनें
 ऐसो हुकुम दियो जो नारायणदास जहांसूधी तुझारे
 गुरु इहां रहें तहांसूधी तुम सेवा करो सो श्रीगुसाईंजीकी
 कृपाते वा म्लेच्छको मन ऐसो फिर गयो और एकदिन
 पातसाहनें कही जो नारायणदास हमहूँ तुझारे गुरुके द-
 र्शन करेंगे तुम हमारी आहीसां वीनती करो जब ना-
 रायणदासजी आपकूँ वीनती करिकें और पात्साहकूँ घर
 लगये और श्रीगुसाईंजीके दर्शन कराये और वर्षके वर्ष
 पात्साह नारायणदासके घर जाते ॥ और नजराना लेते
 हते सो वाहीदिन नारायणदासनें पात्साहकेआगें लाख-

रूपैयाँ धरे जब पातशाहनें कही मैं नजराना लेवै नहीं आ-
 योहूँ ॥ दर्शन करवेकुं आयोहूँ ॥ और ये द्रव्य अब तुम
 श्रीगुसाईंजीकुं भेंट करौ और कोई दिन तुमारे पास अब
 नजराना नहीं लेउंगो ॥ और ये साक्षात् कन्हैयालालहैं
 इनकी प्रसादीवस्तु कछु हमकुं चाहिये ॥ जब श्रीगुसाईं-
 जीनें प्रसादी उपरणा दियो तब वह उपरणा पात्साह स-
 दैव साथे ऊपर बांधे रहते और जब श्रीगुसाईंजी पधार-
 वेको विचार करते तब नारायणदासजीकुं सूच्छा आय-
 जाती जब श्रीगुसाईंजीनें चाचाहरिवंशजीकुं कही जो तुम
 इनकुं संयोग शृंगाररसको उपदेश करौ और संयोगकी
 वार्ता सुनाओ और हम इनकुं नित्य दर्शन देंगे और
 विप्रयोगकी वार्ता इनकुं मत सुनावो ॥ संयोगरसके अ-
 नुभवविना भगवत्सेवा नहिं होवेहैं ॥ जब चाचाजीके सं-
 गतें विनकुं संयोगरसको अनुभव भयो और भगवत्सेवा
 करनेलगे और राजकारमारकुंहैं भगवत्सेवा मानवे लगे ॥
 सो जितनी कृती संसारव्यवहारकी हती सो वाकुं भगव-
 त्सेवा मानकें करते सब ठिकाने उनकुं भगवदनुसंधान-
 स्फूर्त भयो वे नारायणदासजी ऐसे कृपापात्र हते ॥ प्रसंग
 ॥ ५ ॥ एकदिन नारायणदासके घर श्रीगोपीनाथजीके
 भेटीजी सत्यभामाजी श्रीजगन्नाथरायजीके दर्शन करके
 पाछें आवते पधारे हते ॥ सो नारायणदासको आग्रह दे-
 खके उहांकछुक दिनविराजे सो नारायणदासके घरके
 पास जेलखानो हतो ॥ जेलखानामें जो लोग पातशाह-
 को कर नहीं भरसकते हते सो बंदीखानामें पड़े हते ॥ और

बहोत दुःखी हते ॥ और बड़ी पुकारें करते हते ॥ विनकी
 पुकार सुनके सत्यभामा बेटीजीनें ऐसो विचार क्यो
 ये लोग दुःखीहैं सो इनको दुःख भागेबिना मैं भोजन
 नकरूंगी ॥ तब बेटीजी भोजन करे बिना पधारवेकी तै-
 यारी करी ॥ जब नारायणदासजीनें नाहीं कही ॥ जब
 सत्यभामाबेटीजीनें आखोदिन भोजन न क्यो ॥
 तब गाममें जितने वैष्णव हते तिनने प्रसाद लियो नहीं
 ॥ सब वैष्णव भूखे रहे ॥ यह बातकी खबर पातशाहकुं पडी
 जब पातशाहकुं पडी जब पातशाहनें नारायणदासजीसूं
 पूछ्यो तब नारायणदासजीनें सब समाचार कहे ॥
 जब पातशाहनें कही जो बेटीजीको पचीसहज्जार रुपैया
 भेट घरके भोजन करवेकी विनती करौ ॥ तब बेटीजीनें
 ये बात सुनके कहि जो पातशाहकुं कहो जो पची-
 सहज्जार रुपैया मोकुं नहीं चहीये ॥ इन कैदिनको
 माफ करके छोडो ॥ तब ये बात पातशाहके आगे
 नारायणदासनें कही जब पातशाहनें कही जो ऐंसे त्यागी
 बेटीजी महाराजकी आज्ञा मैं माथेपर नहीं चढावूंगो
 तो हमारो बुरो होयगो ॥ जासूं सब कैदिनकुं पातशाहनें
 छोडदिये तब बेटीजीनें भोजन करे सो नारायणदास
 ऐंसे वैष्णव हते ॥ जिनके संगसूं पातशाहकी बुद्धी ऐंसी
 निर्मल रहेती ॥ वार्ता संपूर्ण ॥ वैष्णव ॥ ९ ॥ ॥ ॥

श्रीगुसांईजीके सेवक कायथ विठ्ठलदास ति०
 सो वा विठ्ठलदासनें गौडदेशमें जायके परगनौ इजारे
 लियो ॥ सो परगनेमें टोटो गयो तब गौडदेशके पातशा-

हके दिवान नारायणदासनें विठ्ठलदासहुं बंदीखाने दिये तब विठ्ठलदासहुं नित्य मार दिवावते ॥ सो विठ्ठलदास कैसे हते नित्य मार खाते परंतु वैष्णवता प्रकट न करी ॥ फेर विठ्ठलदासजी हिसाब चुकायके बंदीखानेतें छुटे ॥ तब श्रीगुसांईजी गौडदेशमें पचारे तब नारायणदास दर्शनहुं गए विठ्ठलदासहुं दर्शनहुं गए ॥ जब श्रीगुसांईजीनें पूछी जो विठ्ठलदास इतने दिन कहां हते ॥ तब विठ्ठलदासनें कही जो याहीदेशमें रहूं ॥ पाछे श्रीगुसांईजी भोजनकरके विठ्ठलदासहुं प्रसादलेवेकी आज्ञा करी ॥ जब विठ्ठलदासजीनें कपड़ा उतारे ॥ जब बिनके शरीरपर मार बहोत पड़ी हति ॥ जासुं बिनकी देह बहुत बिगडरही हती ॥ जब विठ्ठलदासहुं श्रीगुसांईजीनें पूछी जो तुमहुं कहासयो है ॥ जब विठ्ठलदासनें वीनती करी जो महाराज देहको दंड देहही छुजै ॥ तब नारायणदासनें वीनती करी ॥ महाराज इनहुं मैंने मार देवाई है मैंने इनहुं वैष्णव जान्यो न हतो ॥ सो अपराध आप क्षमा करेंगे ॥ तब श्रीगुसांईजीनें कही जो वैष्णव नहीं जान्यो परंतु जीवतो हतो वैष्णवहुं जीवभात्र ऊपर दया राखी चाहिये ॥ और जिनके मनमें दया और विवेक और धैर्य और भगवदाश्रय नहींहि बिनके चित्तमें भगवदावेष नहीं होवे ॥ देखो विठ्ठलदास कैसे धीरजवान हैं ॥ जो इतनो कष्ट पायके दुःख सहन किये ॥ परंतु वैष्णवता गुप्त राखी ऐसेनके वश्य श्रीठाकुरजी रहते ॥ ये कहिकें श्रीगुसांईजी चुप कर रहै जब नारायणदास विठ्ठलदासके पास एकांतमें जायके अपरा

धक्षमा कराए॥ और अब इहां रहोतो बहुत आछोहै तब
विठ्ठलदासनें कही जो तुम मेरी वैष्णवता जानगयेहो। अब
यादेसमें नहीं रहूंगो ॥ सो विठ्ठलदास ऐसे कृपापात्र भ-
गवदीयहते जिननें इतनो दुःखपायकें वैष्णवपनो गुप्त
राख्यो ॥ जासुं इनकी वार्ता कहांताई लिखिये ॥ वार्ता
संपूर्ण ॥ वैष्णव ॥ १० ॥ ❀ ॥ ॥ ॥ ॥

श्रीगुसांईजीके सेवकभैयारूपमुरारीक्षत्रीति०
एकदिन श्रीगुसांईजी गोविंदकुंड उपर संध्या करते हते॥
सो भैयारूपमुरारी उहां सिकार करते करते आए ॥ सो
बिनके एक हाथमें वाज हतो ॥ सो बिननें श्रीगुसांईजीकुं
दूरसी देखे सो साक्षात् पूर्णपुरुषोत्तमके दर्शन भए ॥ त-
ब शिकार छोड दियो और श्रीगुसांईजीसों वीनती करी
जो मेरी तो ये दशा है ॥ जब श्रीगुसांईजीनें कही जबसुं
जागे तबही सवार ॥ ये सुनके भैयारूपमुरारी हाथ
जोडके ठाढे भए ॥ तब श्रीगुसांईजीनें कही स्नानकर
आवो तब न्हायके सन्मुख ठाढे भए ॥ तब श्रीगुसांईजीनें
बिनकुं नाम सुनायो और श्रीनाथजीके संनिधान सम-
र्पण करायो ॥ और भोजन करके महाप्रसादकी पातर
धराई ॥ तब रूपमुरारीनें महाप्रसाद लियो फेर एकदिन
रूपमुरारीनें श्रीगुसांईजीकुं पूछी जो मै आपके चरणस्पर्श
करूं परंतु मेरे करेकर्म मोकुं याद आवैंहैं जासुं मेरो मन
शकैहैं तब श्रीगुसांईजीनें कही अब तुम वैष्णव भए तुमारी
नयो जन्मभयो जासुं तुम नित्य अपरसमें न्हायके चरण-
स्पर्श भलेही करौ सो वे रूपमुरारी ऐसे कृपापात्र हते ॥

जिनको मन दर्शनमात्रहीतें प्रभुके चरणारविंदमें लय्यो
 ॥ वार्ता संपूर्ण वैष्णव ॥ ११ ॥ ❀ ॥ ॥ ॥
 ॥ श्रीगुसांईजीके सेवक कायथ पितापुत्र हते
 तिनकी वार्ता ॥ सो विननें एक परगनाइजारे लियो हतो
 तब विनकुं बीसहजार रुपैयाटूटे जब पातशाहनें विनको
 बंदीखानेमें राख्यो विननें पुरोहितकुं देसमें पठायो सो
 पुरोहित विनके घरके दागीना बेचके दो हजार रुपैया
 लिये और तीनहजार एक ब्राह्मणसों करज लेके पांच ह-
 जार रुपैया विनकुं लायदिये तब विननें विचार क्यो
 जो इन रुपयानसुं छूटेंगे तो नहीं जासुं ये दो हजारतो
 श्रीगुसांईजीकुं भेंट पठाय दें और ब्राह्मणको करज आ-
 पने ऊपर रहेंगे तो ब्राह्मण ऋण बाधा करेंगे जब वि-
 ननें तीन हजार रुपैया पाछें ब्राह्मणको पठाय दिये और
 दो हजार श्रीगुसांईजीकुं भेंट पठाय ॥ सो पुरोहित लेके श्री-
 गुसांईजीके पास गयो ॥ जब श्रीगुसांईजीनें पूछी जो वे
 पितापुत्र कहाँ तब विन पुरोहितनें कही वे तो बंदीखानेमें
 हैं ॥ जब श्रीगुसांईजीनें चाचाहरिवंशजीकुं बीरबलके पास
 पत्र देके दिल्ली पठाए ॥ तब चाचाहरिवंशजी आयके बीरब-
 लके इहां उतरे ॥ और पितापुत्रके पास मनुष्य पठायो ॥
 वा मनुष्यनें श्रीगुसांईजीको आशिर्वाद कहा और पत्र
 दियो वा पत्रके संग बीरबलको पत्र हतो सो वे बापबेटाननें
 बीरबलको पत्र बाँचके छिपाय राख्यो ॥ वा पत्रको अभि-
 प्राय ये हतो ॥ श्रीगुसांईजी बीसहजार रुपैयाके जामिन
 पढ़ेंगे तो आपनौ धर्म न रहेंगे और बंदीखानेमें जो र-

हंगे तो धर्म रहेगो ये विचारके वीरवलको पत्र छिपाय
 राख्यो और वा मनुष्यसों कहि जो पत्र खोवाय गयोहै
 तब वा ब्रजवासीनैं चाचाजीसों कहि जो वीरवलको पत्र
 खोवाय गयोहै तब चाचाजीनैं मनमें विचार कियो जो
 पत्र खोयगयो तो कहाभयो श्रीगुसांईजीके प्रतापतैं सब
 कार्य सिद्ध होयंगे तबये विचारके चाचाजीनैं वीरवलसों
 कहि जो श्रीगुसांईजी वीसहजार रुपैयाके जामिन पडेंगे
 इन बापवेदानकुं छुडाय देवो ॥ तब वीरवलनैं कहैं मैं श्री-
 गुसांईजीको दास हूं मेरे पास द्रव्य है सो श्रीगुसांईजीकोहै
 मैं जामिन पडुंगो तब वीरवलनैं पातशाहकों कहकैं छुडाय
 दीये और परगनोमें पठाये फेर बापवेदानैं कमायके द्रव्य
 भर दीयो सो वे बापवेदा श्रीगुसांईजीके ऐसे कृपापात्र
 हते ॥ जिननैं बंदीखानो कबूल राख्यो और धर्म न
 छोड्यो ॥ वार्ता संपूर्ण ॥ वैष्णव ॥ १२ ॥ ❀ ॥ ॥
 ॥ श्रीगुसांईजीके सेवक कृष्णदासहते ति० ॥
 सो वे कृष्णदास एक म्लेच्छके पास परगनेमें हते ॥ सो
 जो वैष्णव आवतो विनको रुपैया देके खत लिखाय लेते ॥
 और वेपार करावते तब रुपैया तीस हजार टूटे जब
 कृष्णदासकुं म्लेच्छनैं बंदीखानेमें राखे ॥ तब कृष्णदा-
 सको पुरोहित सब खत म्लेच्छकुं देव लय्यो जब कृष्णदा-
 सनैं विचार कियो ये तो मेरो सब धर्म जायगो ॥ और सब
 वैष्णवनकुं कष्ट होयगो ॥ और एकलो मेंहीं कष्ट मुकुंगो तो
 चिंता नहीं ॥ ये विचारके कृष्णदासनैं सब खत जराय
 दिये जब दूसरे दिन म्लेच्छनैं कृष्णदासकुं बुलायके कही

जो तुमारे पास कछ होयतो देओ ॥ विननैं कही हमारे
 पास कछ नहींहैं ॥ जब स्लेच्छनैं कृष्णदासकुं सिरपाव
 दैके और परगनमें पठायो ॥ और घीरेघीरे सब रुपैया
 भरदिये सो वे कृष्णदासजी ऐसे कृपापात्र हते ॥ जिननैं
 बंदीखानो भुक्त्योपण वैष्णवनको कछ न परवे दियो
 तासुं श्रीप्रभुननैं स्लेच्छकी बुद्धी फेर डारी ॥ वार्तासंपूर्ण ॥
 ॥ वैष्णव ॥ १३ ॥ ॐ ॥ ॥ ॥ ॥ ॥

श्रीगुसाईंजीके सेवक गोपालदास सेगलक्षत्री
 तिनकी वार्ता:-सो वे गोपालदास श्रीनंदगाममें रहतें सो
 श्रीनंदमें श्रीगुसाईंजी पधारे जब गोपालदासनैं श्रीगुसां-
 ईजीकुं अपने घरमें उतारे ॥ और सर्वस्व जो घरमें हतो
 सो सब अर्पण करदियो और फेर एक स्लेच्छकी चाकरी
 करवे लगे ॥ और वा स्लेच्छको द्रव्य गोपालदास वैष्णवन
 में खरच करते रहते ॥ जब वा स्लेच्छकुं लोगननैं कही
 याकुं चाकरीसुं काढदेवो ॥ ये नित्य कथा कीर्तनमें द्रव्य
 खरच डारे हैं ॥ तब स्लेच्छनैं कहीजो याके भाग्यसों मेरो
 द्रव्य दिन दिनबढतो जायहै और ये कछ संसारव्यवहा-
 रमें खरचे नाहीं हैं ॥ जासुं इनको कैसे काढबोजाय ॥
 सो वे गोपालदास ऐसे कृपापात्र हते ॥ जिनके संगतें
 स्लेच्छकी बुद्धी निर्मल रहेतीहती ॥ वार्ता संपूर्ण ॥ वैष्णव १४
 श्रीगुसाईंजीके सेवक हरिदास बनिया तिनकी ०
 सो वे हरिदास बनिया मेरता गाममें रहते ॥ वा गाममें
 एकही वैष्णव हते ॥ और वा गामकी राजा जैमल हतो
 सो स्मार्त धर्ममें हतो ॥ और एकादशी पहेली करते हते ॥

और जैमलराजाकी बेनको घर हरिदासवनियाके सामें
हता ॥ सो जब श्रीगुसांईजी हरिदासके घर पधारे हते तब
जैमलकी बेनकुं वारीमेंसूं श्रीगुसांईजीके साक्षात् पूर्ण पु-
रुषोत्तमके दर्शन भए ॥ जब जैमलकी बेननें पत्रद्वारा
श्रीगुसांईजीको वीनती लिखके पत्रद्वारा सेवक भई ॥ का-
हेतैं वे पढदामेंसे बहार नहीं निकसते जासूं पत्रद्वारा सेवक
भये ॥ फिर एकदिन जैमलजीनें ऐसो हुकुम कन्यो जो
गाममें जो दूसरी एकादशी करेगो वाकुं दंड करूंगो ॥
जब जैमलकुं हलकारानें खबर करी जो हरिदासनें दूसरी
एकादशी करीहै ॥ जब हरिदासजीकुं बुलायो ॥ और कही
जो हरिया तैंने दूसरी एकादशी क्यों करी ॥ तब हरिदा-
सनें कही अरे जैमल्ला हमारी खुसी ॥ जब जैमलकुं बडो
क्रोध भयो ॥ और क्रोधावेशतैं सुध मूल गयो और तरवार
खेंचके हरिदासजीकुं मारवे दोन्यो और जैमलराजाकी
कचेरीमें ऐसो हुकुम हतो जो मेरे हुकुम बिना जो कछ
करेगो वाकुं शिक्षा करूंगो ऐसी वाकीरीत हती ॥ जासूं
हरिदासजीकुं कोई पकडवे न उठ्यो ॥ जब जैमलकुं तल-
वार खेंची देखके हरिदास बाहेर भागे ॥ जब वे जैमल
पाछे दोडयो जब हरिदास जैमलकी बेनके घरमें घुस गए ॥
तब वेभी पाछे तलवार लैके गए तब जैमलकी बेननें
जैमलकुं देखके कहेवे लगी जो तूं वैष्णवकुं मारेगो तो
अपराध पड़ेगो और ये तो मेरो बडो भाई है और
तूं छोटा भाई है जासूं याके पांवनपर ॥ नहीं तो
तोडूं अपराध पड़ेगो ॥ और आपने बाप दादा सब

नरकमें जाएंगे ॥ फेर वैष्णव माहात्म्यके श्लोकवा नाई-
 नें जैमलकुं छुनाए ॥ भगवद्भजनमा ॥ मत्तोमद्भक्तमत्तेष्टुप्रीति-
 रभ्यधिका भवेत् ॥ तस्मान्मद्भक्तमत्तश्च पूजनीयो वि-
 शेषतः ॥ १ ॥ अध्वश्रांत मविज्ञात मतिथिधुत्पिपा-
 सितम् ॥ योनपूजयते भक्त्या तयाद्ब्रह्मघातकम् ॥
 ॥ २ ॥ मद्दनाच्छतगुणं मद्भक्तस्य तुर्वदनम् ॥ म-
 द्भोजनाच्छतगुणं मद्भक्तस्य तु भोजनम् ॥ ३ ॥ बृहन्नारदीये ॥
 यो विष्णुभक्तान्निष्कामान्भोजयेच्छ्रद्धयान्वितः ॥ त्रि-
 सप्त कुलसुदृत्य सयाति हरि मंदिरम् ॥ ४ ॥ विष्णोः प्रसाद-
 माकांक्षन् वैष्णवान्परितोषयेत् ॥ अन्यथा वासकासोत्तो-
 नैर्वकेनापि तुष्यति ॥ ५ ॥ पूजनाद् विष्णुभक्तानां पुरुषार्थो-
 स्ति नैतरेः ॥ तेषु च द्वेपतः किंचिन्नास्ति नाशनमात्मनः ॥
 ६ ॥ बल्लालंकारसुपांघै र्याभागवतमर्चयेत् ॥ श्रूयते त-
 स्य वंशोपि श्रीवृद्धिः पुत्रपौत्रकैः ॥ ७ ॥ अंगसंवाहनाद्यैश्च-
 तांबूलैर्व्यजनैस्तथा ॥ तोषयेद्भगवद्भक्तं तुष्यते च जनार्दनः
 ॥ ८ ॥ श्रीमद्भगवते ॥ बाध्यमानोपि मद्भक्तो विषयैरजि-
 तेंद्रियः ॥ प्रायः प्रमत्तया मत्तया विषयैर्नाभिभूयते ॥ ९
 ॥ श्रीमद्भगवद्गीतायाम् ॥ अपि चेत्सुदुराचारो भजते माम-
 नन्यभाक् ॥ साधुरेव समतव्यः सम्यग्व्यवसितो हि सः ॥ १०
 ॥ स्कंदपुराणे ॥ ब्राह्मणः क्षत्रियो वैश्यः शूद्रो वा यदि वेतरः ॥
 विष्णुभक्तिसमायुक्तो ज्ञेयः सर्वोत्तमोत्तमः ॥ ११ ॥ दुराचा-
 रोपि सर्वांशी कृतघ्नो नास्तिकः पुरा ॥ समाश्रयेदादिदेव-
 श्रद्धया शरणं हि यः ॥ १२ ॥ हारीतस्मृतौ ॥ भगवद्भक्तिदीपा-
 मिदं घटुर्जातिकं शमलः ॥ श्वपचोऽपि बुधै श्लाघ्यो न वे-

दादयोपिनास्तिकः ॥१३॥ पाराशरस्मृतौ ॥ तदीयाराधन-
 पुण्यं वक्ष्यामि मुनिसत्तमाः ॥ यदन्वेपणमात्रेण सर्वपापैः
 प्रमुच्यते ॥ नातः परतरं पुण्यं त्रिषु लोकेषु विद्यते ॥ १४ ॥
 सर्वकामप्रदं पुंसामत्यंतातिशयं हरेः ॥ तस्मात्परतरं श्रेयो-
 नास्ति सत्यं ब्रवीम्यहम् ॥ १५ ॥ सकृत्संपूजनं तेषां मुक्ति-
 र्दपापिनामपि ॥ सहस्रवार्षिकी पूजा विष्णोर्भगवतो हरेः ॥
 सकृद्भागवताचार्याः कलां नार्हति षोडशीम् ॥ १६ ॥ सकृ-
 त्संपूजिते पुण्ये महाभागवते गृहे ॥ आकल्पकोटिपितरः परि-
 तुप्तान संशयः ॥ १७ ॥ यथा तुष्यति देवेशो महाभागवता-
 र्चनात् ॥ तथानुष्यति हरिर्विधिवत्सर्वार्चनादपि ॥ १८ ॥
 षष्टिवर्षसहस्राणि विष्णोरा राधने फलम् ॥ सकृद्वैष्णवपूजा-
 यालभते नान्न संशयः ॥ १९ ॥ वैष्णवो यद्गृहे भुंक्ते तस्य भुंक्ते हरिः
 स्वयम् ॥ हरिर्यस्य गृहे भुंक्ते तस्य भुंक्ते जगन्नयम् ॥ २० ॥
 अंदरीपाख्यानं दुर्वासाप्रतिभगवद्वाक्यम् ॥ अहं भक्तपराधी
 नो ह्यस्वर्तत्र इव द्विज ॥ साधुभिर्ग्रस्तहृदयो भक्तैर्मक्तजनप्रि-
 यः ॥ १ ॥ नाहमात्मानमाशासे मद्भक्तैः साधुभिर्विना ॥
 श्रियं चात्यंतिकीं ब्रह्मन्येषां गतिरहंपरा ॥ २ ॥ ये दारागा-
 रपुत्रास्तान्प्राणान्वित्तमिमं परम् ॥ हित्वा मां शरणं याताः कथं
 तांस्त्यक्तुमुत्सहे ॥ ३ ॥ मयि निर्वद्धहृदया साधवः समदर्श-
 नाः ॥ वशीकुर्वति मां भक्त्या सत्स्त्रियः सत्पतिर्यथा ॥ ४ ॥
 मत्सेवया प्रतीतं च सालोक्यादि चतुष्टयम् ॥ नेच्छंति सेवया
 पूर्णाः कुतोऽन्यत्कालविभुतम् ॥ ५ ॥ साधवो हृदयं महं सा-
 धूनां हृदयं त्वहम् ॥ मदन्यत्तेन जानंति नाहं तेभ्यो मनागपि
 ॥ ६ ॥ एवं धर्मैर्मनुष्याणामुद्धवाऽऽत्मनि वेदिनाम् ॥ मयि

संजायतेयक्तिःक्रोऽन्योऽर्थोऽस्यावशिष्यते ॥ ७ ॥ दशम-
स्कंधेउत्तरार्धेभगवद्वाक्यम् ॥ नह्यस्मयानितीर्थानिनदेवामृ-
च्छिलामयाः॥ते पुनंतल्लुकाकलेनदर्शनादेवसाधवः॥८॥ ना-
ग्निर्नसूर्योनचचंद्रतारकानसूर्जलंखंश्वसनोथवाद्मनः।उ-
पासिता भेदकृतोहरंत्यर्थविपश्चितोभ्रंतिद्युहृतसेवया ॥९॥
यस्याऽऽत्मबुद्धिः कुणपेन्निघातुकेस्वधीःकलत्रादिषुभौमई-
ज्यधीः ॥ यत्तीर्थबुद्धिः तलिलेनकर्हिचिज्जनेष्वसिजेषुसए-
वगोस्वरः॥१०॥ ये सुनकेजब जैमलजी शास्त्रके ज्ञाता हते
जब कहन लग्ये जो या शास्त्रको अस्यास कहांसों कियोहै॥
तब वा बाईनें कही मेरे बडे भाई हरिदासतों सीखी-
हौ ॥ तब जैमलनें कही ये तेरो बडो भाई कैसे ॥
जब वा बाईनें कही ये श्रीछुसाईजीके सेवक पहिले
भए और मैं पाछे सेवक भई ॥ जासूं ये मेरे बडे भाई
है ॥ और मेरे प्राणसुं प्रियहै ॥ जब जैमलनें कही
जो ये तेरे घर नित्य आवेहै कहा ॥ तब वा बाईनें कही
जो ये नित्य भगवत्सेवा करवे आवेहै सो तूं चल दर्शन कर
तलवार नीचे घरदे ॥ श्रीठाकुरजीके सन्मुख तलवार नहीं
आवेहै ॥ तब वा बाईनें जैमलजीकुं ऐसे कहिके और हाथ
पकडके तलवार नीचे धरायके श्रीठाकुरजीके सन्मुख
लेगई ॥ और दर्शन करत मात्र क्रोध उतर गयो ॥ और
बुद्धि निर्मल होयगई जैसे सूर्य उदय भयेत कमल प्रफु-
ल्लित होयहै तैसे जैमलजीको हृदयकमल प्रफुल्लित होय-
गयो ॥ और कहेवे लग्यो जो हरिदासजीसूं मेरे अपराध
क्षमा करावो और मोकुं वैष्णव करो जब वा बाईनें जैमल-

जीको न्हावायके हरिदासके पास अपराध क्षमा करायके जैमलजीकुं बैठायो ॥ और कही जो आज इहां महाप्रसाद लेओ ॥ तब जैमलजीने महाप्रसाद लियो ॥ इतनेमें श्रीगुसाईंजी द्वारकासों भेरते पधारे और हरिदासजीके घर खबर पठाई ॥ जब ये बात सुनके हरिदासजी जैमलजीकुं संग लेके श्रीगुसाईंजीके दर्शन करिबेकुं गए ॥ और जैमलजी उहां वैष्णव भए ॥ और सब कुटुंब सहित गाम सहित जैमलजी वैष्णव भए ॥ तब सब लोकनकुं बड़ी आश्चर्य भयो जो जैमलतो हरिदासकुं मारवे गएहते सो वैष्णव होयके घर आए ॥ वे हरिदास ऐसे टेकके वैष्णव हते जैमलजीसों न हरे जैमलके सन्मुख उत्तर दिये ॥ प्रसंग ॥ १ ॥ वे हरिदासकी एक बेटी हती सो हरिदासने पुरोहितसों कही याकी सगाई करि आवो ॥ तब वह पुरोहित जैन धर्मीकुं धनाढ्य जानके धनके लोभसों सगाई करि आयो ॥ जब हरिदास सुनके कछु बोले नहीं ॥ और पुरोहितसों कही द्रव्य और बेटी लेजायके तुम विवाह करिदेवो तब वा पुरोहितने हरिदाससों द्रव्य लेके विवाह करदियो ॥ और बेटीकुं परभारे विदा करदियो सो वे हरिदास ऐसे टेकके भगवदीय हते ॥ जिनने लौकिकनिंदा सहन करि परंतु जैनधर्मीको मुख नदेख्यो ॥ वे ऐसे भगवदीय हते ॥ प्रसंग ॥ २ ॥ वाता संपूर्ण ॥ वैष्णव ॥ १५ ॥ श्रीगुसाईंजीके सेवक हरिदासकी बेटी ति० जब वे पुरोहित हरिदासकी बेटीकुं परनायके सासरामें धरिगयो ॥ वाको नाम कृष्णाबाई हती सोवा कृष्णाबाईने

सासराके घरकी अनाचार देखके ये विचार कियो जो अन्नजल न लेनौ और देहत्याग करनौ ॥ जासूं बानें तीन-दिनसूधी अन्न जल लियो नहीं ॥ जब बाकी सासको स्वभाव दयायुक्त बहुत हतो जासूं बाकुं दया आई ॥ जब बाकी सासुनें कही वह तूं क्यों खावें नहींहिं ॥ जब बाकुण्णानें कही मैं मेरे हाथसूं करके लेऊं दूसरेके हाथको जल हूं न लेऊं ॥ जब बाकी सासुनें बासों कही तूं तेरे हाथसे जल भरलायके रसोंई कर और बासन बहूनें कहे सो सब सासुनें मगाय दीने ॥ जब बा वहुनें रसोंई करके भोग घरचो और भोग सरायके एक पातर अपनी करलीनी और सब महाप्रसाद बिनकुं हठायदीनौ ॥ सो महाप्रसाद लेतमात्रही बिनकी बुद्धी निर्मल भई ॥ जब वे घरमें बा कुण्णाकी सराहना करवे लगे ॥ और वे कुण्णा गाम बाहेर कुवा हतो जहां नित्य जल भरनेकुं जाती हती ॥ बा कुवापर एक वैष्णव बिनकुं मिल्यो ॥ जब बासु हरिदासजीकी पहचान काढी ॥ तब वैष्णव नित्य कुवापर बा बाईको भगवत्स्मरण करते ॥ वे कुण्णा बिनसों भगवत्स्मरण करेबिना प्रसाद न लेती और जादिन वे कुवापर न मिलते जब बिनके घर जायके भगवत्स्मरण कर आवती ॥ काहेतें जो श्रीमहाप्रभुजीनें आज्ञा करीहैं नवरत्नग्रंथमें ॥ "निवेदंतु स्मर्तव्यं सर्वथा तादृशैर्जनैः" ॥ यातें नित्य भगवत्स्मरण करेबिना प्रसाद लेती न हती ॥ एकदिन वे वैष्णव कोई गाम गये हते सो तीन दिनमें आए ॥ जब बा कुण्णानें तीन दिन सूधी प्रसाद न लियो

हंती ॥जब वा कृष्णाकुं सासुनें कही तूं प्रसादकी पातर नित्य क्यों गायकुं देवेहें ॥ और लेत क्यों नहीं हैं ॥ तब वा कृष्णाने कही एक मेरो गुरुभाई नित्य कुवापर मोकुं मिलेहें ॥ और जब न मिले तब वाके घर जायके भगवत्स्मरण करआउंहें ॥ सो अब तीन दिन भये मिले नहिं जासुं महाप्रसाद न लियो ॥ सो वे सासू वाको साच देखके बहोत प्रसन्न भई ॥ और कहेवे लगी मैं तेरे संग चलुं मोकुं वा वैष्णवको घर दिखावेगी ॥ तब वा सासूको वा वैष्णवके घरलेगई ॥ जब वे वैष्णव तीन दिनमें फेर घर आयो हुतो जब वा कृष्णाने वा वैष्णवसों भगवत्स्मरण कियो ॥ जब वाकी सासू वैष्णवकुं हाथ जोरिके कहवे लगी ॥ जो ये तीन दिनसुं भुखीहैं ॥ और तुम कृपाकरिके हमारे घर नित्य आयके याकुं भगवत्स्मरण कर जावो तो मैं तुमारो बडो उपकार मानुंगी ॥ और कछु तुमारे संगसों मेरो आछो होयगो ॥ जब वा वैष्णवनें नित्य आयवेकी हां कही ॥ जबतें नित्य वाके घर जायके भगवत्स्मरण करते ॥ जबतें वा कृष्णाकी सासू और सासरा और धणी और सब घरके वा वैष्णवकुं पेहचानेव लगे और वा वैष्णवकुं कहेवेलगे जो तुमारो धर्म हमकुं समझावो और हम सब तुमारे शिष्य होंगे जब वाने कही हमारे धर्ममें तो सब श्रीगुसाईजीके सेवक होवेहें ॥ जब वाकी सासूनें कही जो वे श्रीगुसाईजी कहांरहेहें इहां कैसे पधारें सो तुम उपाय करी द्रव्यतो हमारे इहां बहोत है ॥ तुम कहो सो मैं खरचुंगी ॥ जब वा वैष्णवनें पत्र लिखायके

कासिद पठायो ॥ तब श्रीगुसांईजी उहां पधारे और वे सब सेवक भए और बिनके संगसों सब गामके वनिया-
 हूं वैष्णव भए ॥ सो वे हरिदासकी बेटी श्रीगुसांईजीकी
 ऐसी कृपापात्र हती जिनके संगसुं सब गाममें वैष्णव भ-
 ये ॥ प्रसंग ॥ १ ॥ श्रीगुसांईजी उहति द्वारका पधारे और
 एकदिन वा कृष्णाकी सासुनें रसोई करी ॥ जब वा कृ-
 ण्णाकुं बढो ताप भयो जो अब योसों समवत्सेवा छूटी
 और रसोई करवेकसमें श्रीठाकुरजी आयके सोकुं सि-
 खावते और इच्छा आवती सो सामग्री करावते और
 सब बालभाव जनावते ॥ सो वे सुख योशुंतो न मिलेयो
 ये विचारके बहुत विप्रयोग करवे लगी ॥ बिनको ताप
 श्रीठाकुरजी सही न सके जब वाकी सासुकुं श्रीठाकुरजी
 नें स्वप्नमें जताएजो मोकुं कृष्णाके हाथकीरसोई बहुत
 आछी लगेहे ॥ जासुं तुम दूसरी सेवा करो ॥ फेर दूसरे
 दिन वाकृष्णाकुं सासुनें कही जो रसोई तुम करो मैं दू-
 सरी सेवा कलंगी और श्रीगुसांईजीकुं हूं श्रीठाकुरजीनें
 जताइ जो आप कृष्णाकुं भलाखण करो जो रसोईकी
 सेवा न छोडे ॥ तब श्रीगुसांईजी द्वारकासुं पाछेवा गाम-
 में पधारे जब वे कृष्णा श्रीगुसांईजीके दर्शनकुं आवती
 जासुं रसोईकी बहुत अवार जानके वाकी सासु रसोई
 करती ॥ जब श्रीगुसांईजीनें वा कृष्णासों आज्ञा करी जो
 तेरे हाथकी रसोई श्रीठाकुरजीकुं भावेहे जासुं तुम
 श्रीठाकुरजीसों पहुँचके हमारे दर्शनकुं आईयो ॥ श्रीप्र-
 भुनकुं श्रम होय ऐसो करणो नहीं ये दासको मुख्य धर्म

है ॥ जादिनतें कृष्णावाई रसोईकी सेवा विशेष करके
आपही करती सो वे कृष्णावाई ऐसी कृपापात्र हती ॥
॥ वाता संपूर्ण वेष्णव ॥१६॥ ॥ ॥ ॥

॥ श्रीगुसाईजीके सेवक अलीखानपठाण ति०

सो वे अलीखान पठाण पृथ्वीपतीके पाससों तबीसाकी ह-
कूमत लेके महावनमें आयरहे और श्रीगुसाईजीके पास
नित्य कथा सुनवेकु आवते ॥ विननैं कथामें ये मुन्यो ॥
श्लोक ॥ “वृक्ष वृक्षेणुधारीपत्रेपत्रेचतुर्भुजः ॥ यत्रवृंदावनं
तत्रलक्षालक्षकथाकुतः” ॥ १ ॥ ये श्लोक सुनके ऐसी ढोड़ी
फिराई जो ब्रजके वृक्षको पत्ता कोई तोरेगो वाकुं मैं शिक्षा
करुंगो ॥ वा देशमें एकतेलीतेल लादके जातो हतो वानें
एक वृक्षकी डार तोड़ी ॥ जब अलीखाननैं वाकी सगरो
तेल वा वृक्षमें ठलवाय दियो ॥ तबसुं ऐसो डर बैठगयो
जो कोई ब्रजके वृक्षको पत्ता न तोरे ॥ प्रसंग ॥ १ ॥ फेर
एक दिन एक चोरकुं अलीखानके पास पकड लाए ॥ वे
चोर सोंगंध खायवे लग्यो और कही जो मैं ताते तेलमें
हाथ डारुंगो जब तातो तेल ठंडो होयगो तब मेरी बात
आप साची मानोगे ॥ तब अलीखाननैं तेल मगायके
कही ॥ जो परमेश्वर ताते तेलकुं ठंडो करसकेहैं वो ठंडेको
तातो कर सकेंगे ॥ जासुं तूं ठंडे तेलमें हाथ डार ॥ जब वा
चोरनैं ठंडे तेलमें हाथ डारे तब वाके हाथ जर गए ॥ सो वे
अलीखानको परमेश्वर ऊपर ऐसो दृढ़विश्वास हतो ॥ प्रसंग
॥ २ ॥ वा अलीखानके पास एकघोड़ा बहुत सुंदर हतो और
एक घड़ीमें छः कोस चलतो हतो ॥ वा घोड़ाकुं देखके

श्रीगुसांईजीने बहुत सराहना करी ॥ जब वा घोड़ा अलीखानने श्रीगुसांईजीके पास पठाया दियो ॥ तब श्रीगुसांईजीने राख्यो नहीं जब अलीखान मनमें समझे जो मैं इनको सेवक होऊँ तो राखेंगे तब अलीखान सेवक भए जब अलीखान सेवा करवे लगे तब अलीखानकी बेटीहुँ सेवाकरवे लगी ॥ तब अलीखानकी बेटीहुँ श्रीठाकुरजीने अनुभव करायो ॥ और संगमिलके नृत्य करते जब अलीखानहुँ खबर पड़ी जो भीतर कहा नृत्यको शब्द होयहै जब अलीखानने छिपके देख्यो तो श्रीठाकुरजी पधारेहैं और नृत्य करहैं सो देखिके बेटीकी बहुत सराहना करन लागे ॥ प्रसंग ॥ ३ ॥ और नित्य श्रीगुसांईजी श्रीगोकुलमें कथा कहते और सब वैष्णव सुनते और अलीखानहुँ नित्य कथा सुनिवेहुँ आवते जब अलीखान आवते तब श्रीगुसांईजी कथा कहते वैष्णवनके मनमें आई जो म्लेच्छ आवेहै जब कथा वाचेहैं ॥ तब श्रीगुसांईजी सब वैष्णवनके मनकी जानके एकदिन वैष्णवनसुँ पूछी जो काल कहा प्रसंग हतो जब कोई वैष्णव कहिसक्यो नहीं तब अलीखानने हाथ जाडके बिनती करी जो आपकी आज्ञा होय तो कालकी कहूँ अथवा आज्ञा होय तो जादिनसुँ कथा सुनूइ सब दिनकी कहूँ जादिनसुँ कथाको आरंभ मयोंहै ये सुनके श्रीगुसांईजी बहोत प्रसन्न भए ॥ सो वे अलीखान ऐसे कृपापात्र हते जो कुछ भगवत् कथा सुनते सो एक अक्षर न भूलते ॥ वार्ता संपूर्ण ॥ वैष्णव ॥ १७ ॥ ॥ ॥ श्रीगुसांईजीके सेवक निहालचंदझलोटाक्षत्री.

वे निहालचंद उज्जेनमें रहते हते ॥ पुष्टिमार्गीय ग्रंथ सुन-
वेमें बहोत आसक्ति उनकी होती ॥ और श्रीठाकुरजी
उनकुं अनुभव जतावत हते सो एक समें ये निहालचंद
श्रीगोकुल चले ॥ रस्तामें सोलह मनुष्य व्यापारि-
नको संग भयो सो रस्तामेंसों चोर वेपारिनकों तथा
निहालचंदकुं पकरिके लगए ॥ सो द्रव्य सब लेके कैद
करे ॥ और सबको मार डारने ऐं सो विचार करयो ॥ परंतु
वे चोरनको जो मुख्य पटेल हतो वाकी मा वैष्णव होती ॥
चाचाहरिवंशजीने जिन भीलनको गाम वैष्णव करयो
हतो वा पटेलकी मा वा गामकी बेटी होती ॥ और वे नि-
हालचंदभाई रात्रिकों कीर्तन करते हते सो वा पटेलकी
माने सुन्ये ॥ सो वे उठके निहालचंदकी पास गई
और विनकुं पूछयो जो तुमारी नाम कहा है विनने नाम
बताये सो वे निहालचंदको नाम वानें वैष्णवनसों सुन्यो
हतो ॥ सो वे नाम सुनतही पावन पड़ी ॥ और बेटाको
लायके पावन पराये अपराध क्षमा कराए ॥ और सब
गामकों वैष्णव कराए ॥ और सब गामसूं मिलके श्री-
गुसाईंजीकी भेट दिवाई और वा निहालचंदने विनचोर
नको खेती करवेकी कही चोरी छुडाय दीनी ॥ फेर उ-
हांसों वे निहालचंद श्रीगोकुल आए और वे सोले वेपा-
रीहूं संग आए और सब वैष्णव भए ॥ और विनके संग
जो मालहतो सो सब भेट कर दीनो ॥ सो वे निहालचंद ऐंसे
कृपापात्र हते ॥ जिनके संगसूं भीलको गाम तथा व्यापारी
सब वैष्णव भए ॥ वार्ता संपूर्ण ॥ वैष्णव ॥ १८ ॥ ॥

श्रीगुसाईजीके सेवक माधवदासक्षत्री तिन०
 सो वे माधवदास काबुलमें रहते हते ॥ सो एकसमें मै-
 यारूपसुरारी देशाधीपतीके संग काबुल गए और उहां ब-
 जारमें माधवदासजीके साथपर तिलक देखके पूछवे गए ॥
 जो तुम कौन हो और ये तिलक क्यों करयो है ॥ जब मा-
 धवदासजीनें कहीहम श्रीगुसाईजीके सेवकहैं ॥ जब रूप-
 सुरारीनें कही जो हमहूं श्रीगुसाईजीके सेवक हैं तब
 माधवदास बहुत प्रसन्न भए ॥ इतनेमें माधवदास उठके
 अंचल फिरायवे लगे ॥ जब रूपसुरारीनें पूछी यह कहाहै
 जब विननें कही श्रीनाथजी गाय चरायके ब्रजमें एधारे
 हैं जासूं अंचल वारत हूं ॥ तब रूपसुरारी ये सुनके द-
 होत विस्मय भए ऐसे आश्चर्य भयो जो श्रीनाथजी ह-
 नको इहां दर्शन देतहैं ॥ तब मनमें इनकी बहोत सराहना
 कियो और माधवदासनें जो श्रीनाथजीको शृंगारकह्यो
 सो मैयारूपसुरारीनें लिखलीनो ॥ फेर माधवदासके घर
 जायके श्रीठाकुरजीको दर्शन कियो सो साक्षात् श्रीगो-
 वर्धननाथजीको दर्शन भयो ॥ तब मनमें कही मेरे बड़े
 स्वारयहैं जो श्रीगुसाईजीनें ऐसे म्लेच्छदेशमेंहूं मोको
 वैष्णवनकोसंग दियो ॥ फेर कछुकदिन रहिके चलवे लगे ॥
 जब माधवदासनें कही जो तुम थोड़े दिन और रही सो
 पृथ्वीपति वीस मजिल जायगो तब मैं तुमकूं एकदिनमें
 पोहोचतो कर देऊंगो ॥ जब रूपसुरारि रहे ॥ बीसदिन
 पाछे माधवदासजी रूपसुरारीके संग घोड़ापर बैठके ए-
 करातमें परवतमेंको दूसरी रस्ता अस्सीकोसको एकरा-

तमें पट्टचे सो वे रस्तामें चोर बहुत हते परंतु माधवदासजीकू तथा भैयारूपसुरारीकू कोईने देखे नहीं और आखीरात रस्तामें भगवद्वार्ता करत आए जब माधवदासने कही मैं हरिद्वारमें श्रीगुसाईजीको सेवक भयो हतो ॥ तब रूपसुरारीकू बडो आश्चर्य भयो जो श्रीनाथजी ब्रजलीलासहित इनको दर्शन देवेंहें सो इनके ऊपर श्रीगुसाईजीकी बहुत कृपाहै ॥ जब माधवदास रूपसुरारीसो विदाहोय अपने घर आए ॥ सो वे माधवदास ऐसे कृपापात्र हते ॥ जिनकुं काबूलमें श्रीनाथजी नित्य दर्शन देते ॥ सार ये कि प्रभूतो केवल भावके वशहैं और साधनके वश नहींहैं सो नंददासजीने कहीहे ॥ दोहा ॥ यद्यपिअगमतेअगमैंहैं, निगमकहतहैंजाहि ॥ तदपिरंगिलिप्रेमवशनिपटनिकटहरिआहि ॥ वार्ता संपूर्ण ॥ वैष्णव ॥ ११ ॥

श्रीगु० सेवक माधवदासभट्ट नागरा कायथ०

वे माधवदास श्रीगुसाईजीके सेवक भए तादिनतें बिनको चित्तशांत भयो और भगवत्सेवा करेव लगे माधवदासके पिता संसारासक्त बहोत हते और विषयी हते और माधवदास ऊपर अप्रसन्न हते और बिनके पास द्रव्य बहुत हतो माधवदासकुं एक पैसा देते न हते सो ऐसे जानतें जो माधवदास भगवत् धर्ममें खर्च डरिगो और माधवदासकी निंदा बहुत करते हते जब वे लुप्त बहुत भये तब माधवदासने बिनसों कही अबतो तीर्थयात्रा करो तो बहुत आछोहैं तब माधवदासके पिता तीर्थकरवेको चले ॥ जब मथुराके चौबे बिनको मिले चौबेनने कही गुरुमुख होय जा

और तब बिननें विचार करयो जो ये चौदे तीं भेरे गुरु भए
 हैं सो बहुत दिन भए हैं परंतु मेरो मन संसारके विषय-
 मेंसे निकरयो नहीं माधवदासके गुरुके शरण जाउंगो
 जब मेरो मन निवृत्त होयगो ये विचार के श्रीगुरुकुल गए
 और वीनति करी जो मेरो अंगीकार करौ तब श्रीगुरुसां-
 ईजीनें नाम निवेदनं करायो ॥ जब माधवदासके पितानें
 श्रीगुरुसांईजीके संग जायके श्रीगुरुवर्धननाथजीके दर्शन
 किये और मनमें ऐसी आई जो श्रीगुरुसांईजीके चरणार-
 विंद नहीं छोड़ंगो जहांछुभी देह रहेगी ॥ ये विचार करिके
 माधवदासकुं पास बुलाय लिये और मनमें कहेवेलो जो
 मेरे धन्य भाग्यहैं जो माधवदास जैसी पुत्र जन्म्यो तो
 मोकुं श्रीगुरुसांईजीके चरणारविंद मिले ॥ और सब तीर-
 थइनके चरणारविंदमें हैं जासुं तीरथ करवे न जाऊंगो
 और सब द्रव्य माधवदासको सोपदिये ॥ सो माधवदास
 ऐसे भगवदीय भये जिनके संगतें उनके पिता जो विष-
 यासक्त हते सो विषयमेंसुं मन काढके प्रभुमें लग्यो
 ॥ वार्ता संपूर्ण ॥ वैष्णव ॥ २० ॥ ❀ ॥ ॥ ॥
 ॥ श्रीगुरुसांईजीके सेवक कटहरीया ति० ॥
 एकसमें श्रीगुरुसांईजी गुजराततें ब्रज पधारते हते रस्तामें
 तीनसे असवार लेके कटहरिया लोगनको छुटते फिरते
 ते तब श्रीगुरुसांईजीकी असवारी जाती देखके आयकेह
 घेरो दियो और पंद्रे बीस गाड़ी हती सबका रोक लीनि
 तब श्रीगुरुसांईजीके मनुष्य एक एक गाड़ीपि एक एक ठाढ़े
 होय गये सो बिन चोरनकुं ऐसे दीखे जैसे गाड़ीपि एक

हते तब जो सामग्रीकी श्रीगुसांईजीके मनमें आवती तब वे सामग्री रूपचंदनदा श्रीगुसांईजीके मनकी जानके झटलेके पठावते हते ॥ और रूपचंदनदाको मन श्रीगुसांईजीके स्वरूपमें तद्रूप होय गयो हतो ॥ ऐंसी ऐंसी इनकी वार्ता अनेकहैं सो वे भगवदीय कृपापात्र हते ॥ इनकी वार्ता कहा कहिये ॥ वार्ता संपूर्ण ॥ वैष्णव ॥ २२ ॥ ॥

॥ श्रीगुसांईजीके सेवक यदुनाथदास हते ति० सो जौनपुरमें रहते सो उहां एक हाथीको महावतकी स्त्रीसों विनको मन आसक्त हतो सो वाके देखेविना जल नहीं पीते ॥ सो एकदिन वो लुगाई सूती हती ॥ पहर दिन रख्यो जहांसूधी उठी नहीं ॥ यदुनाथदास तीन पहर वाके दर-वज्जापें ठाढ़े रहे ॥ जब वे उठी तब वानें लौंडीसों कही जो देख तो बाहेर कोई पुरुषतो नहीं ठाढ़ो है ॥ तब वा लौंडीनें कही जो एक बोहि दैवको मारयो ठाढ़ो है ॥ तब वे स्त्री बोली वोतो बावरो है ॥ जैसे मेरे हाड चामसूं मन लगायोहैं वैसे श्यामसूं लगायौ होतो तोस्यानों जानती ये बात सुनके यदुनाथदासके हृदयमें प्रकाश होयगयो जैसे सूरजउदय होवें तो अंधारो मिटके प्रकाश होजाय ॥ तब उहांसों चलदिये सो घरमें आयके ऐंसी संकल्प कियो जो अब जैसे बने तैसे श्यामकुं भजनो ॥ बाही घड़ी जौनपुर श्रीगुसांईजी पधारे हते ॥ और सब वैष्णव दर्शनकुं जाते हते सो भीड़ देखके यदुनाथदासहैं संग गए ॥ जायके श्रीगुसांईजीके दर्शन किये सो साक्षात् पूर्ण-पुरुषोत्तम कोटिकंदर्पलावण्यस्वरूपके दर्शन भए ॥ जब

दंडवत करिके श्रीगुसांईजीसों वीनती करी जो मोक्ष शरण लेओ ॥ जब श्रीगुसांईजीनें नाम निवेदन करायो ॥ मार्गकी परिणालिका समझायके श्रीठाकुरजी पधराय दीये ॥ फेर यदुनाथदास सेवा करवे लगे ॥ यदुनाथदासको मन भगवत्सेवामें ऐसो आसक्त भयो जो वे स्त्री हाथी-वालाकी रोज सामें आयके ठाडी रहे परंतु यदुनाथदास बाकी आढी देखे नहीं और बोलेहुं नहीं वे यदुनाथदास ऐंसे कृपापात्र हते ॥ जिनको चित्त विषयसों छूटके श्री-प्रभुनमें लगगयो ॥ वार्ता संपूर्ण ॥ वैष्णव ॥ २३ ॥ ❀ ॥

॥ श्रीगुसांईजीके सेवक राजालाखा ति० ॥ वह राजा ब्रजमें तीरथ करवेकों आयो और श्रीनाथजीके दर्शन करिके और श्रीगुसांईजीके शरण गयो ॥ और श्रीनाथजीके स्वरूपमें ऐंसे आसक्त भयो जो श्रीनाथजीविना बाकू कछु भावे नहीं ॥ श्रीनाथजीकी रटन विनकुं अष्टप्रहर रहेतो हतौ ॥ एकदिन बाकी स्त्रीनें कही जो उहां पडदाकी बंदोबस्ती होय तो मै दर्शन करूं ॥ तब राजानें कही श्रीनाथजीके इहां पडदा कैसे ॥ जब वा राणीनें श्रीगुसांईजीसूं परवारी वीनती करवायके पडदाको बंदोबस्त करवायो ॥ और दर्शनकों आई जब एक राजा भीतर हतो और कोई मनुष्य नहीं हतो सो श्रीनाथजीनें कवांड खोलहारे ॥ सो अचानक रानीके ऊपर सीढ़ पड़ी ॥ सो राजानें कही मैनें कस्यो हतो जो इहां पडता नहीं चले और श्रीनाथजीनें कवांड खोले वा राजाकी बात सत्य करवेके लिये खोले ॥ सो ऐंसे श्रीनाथ-

जीमें आसक्त होते ॥ और श्रीगुसांईजीकी कृपातें विनको भाव सदैव ऐसो रहतो ॥ वार्ता संपूर्ण ॥ वैष्णव ॥ २४ ॥ ❀

॥ श्रीगुसांईजीके सेवक ज्ञानचंदकी वार्ता ॥

सो वे ज्ञानचंदकी देह जब थाकी तब सब वैष्णवनसों कही जो तुम भगवन्नामलेओ तब वैष्णव भगवत्स्मरण करनलगे और भगवत्स्मरण करते करते ज्ञानचंदकी देह छूटी ॥ जब श्रीगोकुलमें नवीन देह धरिके श्रीगुसांईजीकुं जायके दंडवत करी ॥ तब श्रीगुसांईजीनें पूछी जो कब आए तब ज्ञानचंदनें कही अवी आयोहूं ॥ इतनेमें श्रीनवनीतप्रियाजीके दर्शन खुले ॥ तब ज्ञानचंद दर्शन करिके लीलामें प्रवेश कर गये ॥ फेर श्रीगुसांईजी बाहेर पधारि जब वैष्णवननें पूछी जो ज्ञानचंद कहां गएहें ॥ तब श्रीगुसांईजीनें आज्ञा करी ॥ ज्ञानचंद भक्तचंदके संग गयेहें। जब चाचाहरिवंशजी समझे जो ज्ञानचंदकी देह छूटी और भगवल्लीलामें गए ॥ चाचाजीनें सब वैष्णवनसों कही ॥ सो वे ज्ञानचंद ऐंसे कृपापात्र होते ॥ जो सबनके देखते वैष्णवनकुं विश्वास उपजायवेके लिये भगवल्लीलामें प्रवेश क्यो ॥ वार्ता संपूर्ण ॥ वैष्णव ॥ २५ ॥ ❀ ॥ ॥ ॥

॥ श्रीगुसांईजीके सेवक भाईलाकोठारीकी ० ॥

जब श्रीगुसांईजी द्वारका पधारते तब भाईलाकोठारीके घर उतरते ॥ जब भाईलाकोठारीकी मन उद्दिग्न होतो श्रीगुसांईजीके दर्शन करवेके लिये तब भाईलाकोठारीके मनकी जानके और सब काम छोडके श्रीगुसांईजी पधारते ॥ और वे भाईलाकोठारीके घरमें ऐंसी चमत्कार ह-

तो जो कोई बिनके घरमें जावे वाकी बुद्धि श्रीगुसांईजीकी कृपातें निर्मल होय जाती वा देशमें एक ब्राह्मण श्रीगुसांईजीकी सेवक भई वानें अपनो सब द्रव्य भेंट कर दीनो ॥ तब वाके परोसमें एक ब्राह्मण जुगल रहतो हतो सो वानें घौलकामें लाखवाई राणीसों कहि एक गोकुलको फकीर आयोहै ॥ और कोठारीके घरमें उतर्न्योहै ॥ और सबको द्रव्य ठगलेवैहै तब लाखवाई राणीनें अपनो प्रधान बाजबहादुरकुं बुलायके परवानगी दीनी ॥ जो तुम राजनगर जावो ॥ और कोठारीके घर जाय सब खबर काढो ॥ तब बाजबहादुर राजनगरमें कोठारीके घर आयो ॥ वा समें दशपांचगिरासिया रजपूत बैठे हते ॥ सो श्रीगुसांईजीके दर्शनकुं आये हते ॥ तब बाजबहादुर बिनमें जायकें बैठ गयो ॥ तब श्रीगुसांईजी पधारें सो बाजबहादुरनें उठके सबसों मिलके दंडवत करी ॥ और साक्षात् कन्हैयालालके दर्शन भये ॥ तब बाजबहादुरनें मनमें विचार कन्यो जो लोग भोक्तुं वृथा इनसुं लडावहैं फिर कालके काल देखें तब बहुत डरप्यो ॥ तब श्रीगुसांईजीसों जायवेकी आज्ञा मागी ॥ तब श्रीगुसांईजीनें बीडा दीयो ॥ तब बाजबहादुरनें वीनती करि ऐसी वस्तु कृपा करके देवें जो सदैव माथेपे धरके फिरु ॥ तब श्रीगुसांईजीने एक सुपारी दीनी ॥ तब पागके खूटमें बांधके माथेपे पहरे रहतो ॥ जब बाजबहादुर मनमें समझो जो ये ईश्वर हैं ॥ तब श्रीगुसांईजीसुं वीनती करी जो महाराज मेह कब वरसेगो दुनियां बहुत धवराय रहीहै ॥ तब आपने कहाँ जो आज ब-

रसेगो ॥ जब सुनके वाजवहादुर अमने घर आयो सो
 रस्तामें वर्षा ऐसी भई जो सब भीजगयो ॥ तब दृढ़ नि-
 श्चय भयो जो ये ईश्वर हैं ॥ फेर वा ब्राह्मण जुगलीकरन-
 वालेकुं मारहारनो ऐसो विचार क्यो तब वाको पक-
 डाय मगायो ॥ ये बात सुनके श्रीगुसांईजीनें कहेवाय प-
 ठायो याको मतमारो ॥ तब वा ब्राह्मणकुं कह्यो जो कोई
 दिन कोईकी जुगली मति करियो ये लिखायके वाकुं श्री-
 गुसांईजीके पास पठायो ॥ तब आयके दंडवत करिके
 कही जो आपकी कृपातें बच्योहूं ॥ अब मोकुं सेवक करो
 ॥ तब वा ब्राह्मणकुं शरण लियो सो वे भाईलाकोठारी
 ऐसे कृपापात्र हते ॥ जो बिनके घरमें जो आवैं बाकी
 बुद्धी निर्मल होयजाती ॥ वार्ता संपूर्ण ॥ वैष्णव ॥ २६ ॥ ❀ ॥
 ॥ श्रीगुसांईजीके सेवक हरजीकोठारीकी वार्ता ॥
 सो वे तीन भाई हते जब श्रीगुसांईजी असारवामें पधारते
 तब तीनो भाईनको मन प्रसन्न राखते ॥ सो एक भाईके
 घर पोढ़ते ॥ और एक भाईके घर रसोंई करते और
 एकभाईके घर बैठक राखते ॥ और बिन तीन भाईनमेंसूं
 हरजीकोठारी पंडित हते ॥ सो वा हरजीकोठारीनें विठ्ठ-
 लसहस्रनामग्रंथ प्रकट क्यो ॥ और श्रीगुसांईजीकुं
 पूर्णपुरुषोत्तम जानते ॥ सो वे तीनोभाई ऐसे कृपापात्र
 हते ॥ जो अबसूधी बिनके घरकी बैठक असारवामें
 प्रसिद्ध है ॥ वार्ता संपूर्ण वैष्णव ॥ २७ ॥ ❀ ॥
 ॥ श्रीगुसांईजीके सेवक गोपालदासकी वार्ता ॥
 सो वा गोपालदास रुपालगाममें रहते वा गोपालदासकी

सगाई भाईलाकोठारीके घर भई हती, एकदिन विनको
 नोता भाईलाकोठारीके घर हतो ॥ तब गोपालदास पांच
 वरसके हते ॥ जब विनकुं देखके श्रीगुसांईजीनें पूछी ॥
 ये कोनहै जब भाईलाकोठारीनें कही जो ये गोमतीको
 वर है तब श्रीगुसांईजीनें कही गोमतीको वर तो सागर
 चहिये जब कोठारीनें कही राजकी कृपातें येही सागर
 होयगो ॥ जब ये बात सुनिके श्रीगुसांईजीनें विचार
 करयो जो मेरो सेवक भाईलाकोठारी भयो याको वच-
 नसत्य भयो चाहिये जब आपनें गोपालदासकुं चर्चित
 तांबूल दियो ॥ जब गोपालदासको हृदय निर्मल भयो ॥
 जब गोपालदासकुं रासलीलाके दर्शन भए ॥ और रास-
 लीलामें सदैव रात्र रहेहे जासूं सवा पहर दिन चढ्यो हतो
 तोहुं गोपालदासनें केदारारागमें वल्लभाख्यान गायो ॥ सो
 वे गोपालदास ऐसे कृपापात्र हते जिननें मारगको सब सि-
 द्धांत नवाख्यानमें वर्णन करयो ॥ और चौथे आख्यानमें
 द्वादशस्कंधकी द्वादशलिला समावेश करिके एकेक तुकमें
 एकेक स्कंधकी लीला गायीहै ॥ सोवे ऐसे कृपापात्र हते ॥
 ॥ प्रसंग ॥ १ ॥ और गोपालदासके हृदयमें आपनें श्रीगु-
 सांईजीनें ही प्रवेश कीयो और आपनेंहि वल्लभाख्यान
 गोपालदासके मुखद्वारा वरनन किये जैसे श्रीमद्भाग-
 वत श्रीठाकुरजीनें शुकदेवजीके हृदयमें प्रवेश करके
 शुकदेवजीके मुखद्वारा वर्णन कीयो जासूं श्रीमद्भागव-
 तमें कोई ठिकाण श्रीराधाजी ऐसो नाम नहीं है ऐसे
 वल्लभाख्यानमंडं । कोई ठिकाण श्रीरुक्मिणीवहूजीका

तथा श्रीपद्मावतीवहूजीको नाम नहीं है सो वे गोपाल-
दास ऐसे कृपापात्र हते वार्ता संपूर्ण ॥ प्र० २ ॥ वैष्णव ॥ २८ ॥
श्रीगुसाईजीके सेवक मानिकचंद ओसवाल
बलियाकी वार्ता ॥ सो वे मानिकचंदको श्रीगुसाईजीकुं
पूर्णपुरुषोत्तमके दर्शन भए ॥ जब मानिकचंद तथा मा-
निकचंदकी स्त्री श्रीगुसाईजीके सेवक भए और मानि-
कचंदनें सर्वस्व अर्पण कर दियो जब मानिकचंदजी
सेवक भए जब ये पद गायो ॥ “चहुं युग वेद वचन प्रति-
पारघो” ॥ इत्यादिक बहुत पद गाये ॥ फेर मानिकचंदकुं
श्रीगुसाईजीने आज्ञा करी ॥ जो तुम बेपार करौ और
घरमें रहके श्रीठाकुरजीकी सेवा करौ जब मानिकचं-
दजी फेर व्यवहार करन लागे ॥ फेर मानिकचंदजी जब
बुढ़ भए तब श्रीठाकुरजी पधरायके श्रीगुसाईजीके पास
आयके रहे ॥ सो वे मानिकचंदको ऐसो नेम हतो पात-
लपर महाप्रसाद लेवेकुं बैठते सो पातलपर महाप्रसाद न
छांहे ॥ एक दिन श्रीगोकुलनाथजीके मंदिरमें मानि-
कचंदजी प्रसाद लेवे बैठे हते सो विन साचोराननें ऐसी
जानी जो ये पातलपर कछु छोडे नहींहैं और पातल
धोयके पी जायहैं तब साचोराननें मस्करी करवेके लीयें
भातके नीचे गोबर घरदीयो ॥ तब मानिकचंद गोबर
सहित खाय गये ॥ वा बातकी खबर श्रीगोकुलनाथ-
जीकुं पडी तब श्रीगोकुलनाथजीनें हाथमें जललेके सा-
चोरानको शाप दियो तुमारो साचोरा देहसुं कोईको
उद्धार नहीं होयगो ॥ और वाई दिनसुं सेवकी जल

पर्यंत साचोरा श्रीगोकुलनाथजीके घरमें नहिं छुवे ऐसो बंदोबस्त क्यो ॥ सो वे मानिकचंदजी ऐसे कृपापात्र होते जिनकी कान श्रीगोकुलनाथजी ऐसी राखते जिन-कैलीयें आज सूची साचोरानको श्रीगोकुलनाथजीकी सेवामें नहीं आवेदेवेहें ॥ वार्ता संपूर्ण ॥ वैष्णव ॥ २९ ॥

॥ श्रीगुसांईजीके सेवक देवब्राह्मण बंगालाके वासीकी वार्ता ॥ सो ब्राह्मण ब्रजजात्रा करवे आए सो श्रीगोवर्धननाथजीके दर्शन करिके बिनको मन बहुत प्रसन्न भयो ॥ और साक्षात् पूर्णपुरुषोत्तमके दर्शन भये तब बिननें श्रीगुसांईजीसों वीनती करी जो मोड़ुं शरण लेओ ॥ तब श्रीगुसांईजीनें कृपाकरिके समर्पण करायो जब वा ब्राह्मणनें इहां रहेके पुष्टिमार्गीय सब सेवाकी प्रणालिका सीखे ॥ फेर वे ब्राह्मण श्रीगुसांईजीकी आज्ञा लेके बंगालमें गए उहां घरमें सेवा करवे लगे फिर एक दिन वा ब्राह्मणनें उढदकी दारके बड़ा करे तब वा ब्राह्मणके मनमें ऐसी आई जो कछु मिष्टान्नइ चहिये जव द्रव्यको संकोच बहोत हतो जब थोडो गुड लाए और श्रीनाथजीकुं भोग समर्प्ये ॥ तब श्रीनाथजी साक्षात् आप अरोगवेकों पघारे और गिरिराजजी ऊपर राज-भोग धन्यो सो नहीं अरोगे ॥ पाछें भीतरियाननें अनोसर करे जब श्रीगुसांईजी श्रीगोकुलविराजते हते ॥ जब उहां श्रीनाथजीनें जताई जो आज हम मृखेंहें हम वा देवब्राह्मणके घरमें गुड और बड़ा अरोगवे गए हते जा-पीछे राजभोग धरिके और सरायके भीतरियाननें अनौ-

सर कर दिये ॥ जब श्रीगुसांईजी बाहीसमें श्रीगोकुलमें श्रीगिरिराजजी पधारे और सामग्री करायके राजभोग धराए ॥ और वा ब्राह्मणकुं पत्र लिखे जो तुमनें अमुक दिन गुड और बड़ा धन्येहैं सो श्रीनाथजी भली मांतिसें आरोगेहैं ॥ ये पत्र वांचके वो ब्राह्मण बहोत प्रसन्न भयो और दो थान बंगाली मलमलके लेके चल्यो ॥ सो आयके श्रीगुसांईजीकुं एक भेट कन्यो और वीनती करी जो ये थान अंगीकार करें जब ॥ श्रीगुसांईजीनें आज्ञा करी जो ये थान श्रीनाथजीके लायकहै ॥ जब वा ब्राह्मणनें वीनती करी जो एक दूसरो थान लायोहूँ सो आप अंगीकार करें ॥ तब श्रीगुसांईजीनें वैसेही कियो ॥ फेर वा ब्राह्मणनें वा मलमलके बागा पहिरके श्रीनाथजीके दर्शन किये ॥ सो वे ब्राह्मण ऐसे कृपापात्र भगवदीय हते ॥ वार्ता संपूर्ण ॥ वैष्णव ॥ ३० ॥ ❀ ॥ ॥ ॥

श्रीगुसांईजीके सेवक गणेशव्यासकी वार्ता ॥ सो वे गणेशव्यासकुं श्रीनाथजी सानुभाव हते ॥ वे गणेशव्यास एकदिन श्रीनाथजीके लीयें सामग्री लावते हते ॥ तब रस्तामें बरसात पड्यो सो गामबाहेर देवीके मंदिरमें आयके डेरा कियो तब लोगननें कही जो मनुष्य रात इहां रहे ताकुं ये देवी तो स्वाय जायहै ॥ तब गणेशव्यासनें देवीको मंदिर घोंयके देवीके कानमें अष्टाक्षर मंत्र सुनायो ॥ और आप उहां सोयरहे तब वा देवीनें गामके राजाकुं स्वप्नमें कही जो अब मैं वैष्णव भईहूँ तुम दो बकरा मोकुं नित्य पठावत हो सो मत पठ्यो ॥ और तुम

सब वैष्णव होय जावो नहिंतो सबकुं दुःख देउंगी ये बात राजाकुं देवीनें स्वप्नमें कही तब वे राजानें सवारे गणेश-व्यासके पास जायके सब वार्ता पूछी जब गणेशव्यास राजाकुं संग लेके आये ॥ सो श्रीगुसांईजीके सेवक कराये सो वे गणेशव्यास ऐसे कृपापात्र हते ॥ जिनके संगसुं देवी तथा राजा वैष्णव भये ॥ प्रसंग ॥ १ ॥ वा गणेशव्यासके ऊपर श्रीगुसांईजी खीजते हते ॥ तब वे गणेशव्यास अपने भाग्य मानते ॥ और श्रीगुसांईजी विनके पीछे उनकी बहुत सराहना करते ॥ तब एक वैष्णवनें पूछी आप उनपर खीजतेहो और पीठपाछे सराहना करोहो सो कैसे ॥ तब श्रीगुसांईजीनें आज्ञा करी जो वैष्णवतातो याहीको नाम हैं जो रीसकरें तोहुं अभाव न आवैं ॥ सो वे गणेशव्यास ऐसे कृपापात्र हते जिनपर श्रीगुसांईजी खीजते पर वे अभाव न लावते ॥ वार्ता संपूर्ण ॥ वैष्णवा ३१ ॥ श्रीगुसांईजीके सेवक मधुसूदनदासकी वार्ता ॥ एकसमय मधुसूदनदास श्रीगोकुल आये और श्रीगुसांईजीके दर्शन करे ॥ और मनमें ऐसी आई जो श्रीगुसांईजीको सेवक होऊं तो ठीक ॥ जब श्रीगुसांईजीसों वीनती करी जो मोकुं शरण लेओ ॥ जब श्रीगुसांईजीनें आज्ञा करी जो नाहाय आवो तब वे नाहाय आये ॥ तब श्रीगुसांईजीनें कृपा करिके नाम निवेदन करायो ॥ जब मधुसूदनदासको चित्त बहुत प्रसन्न भयो जब श्रीगोकुलमें मन लाग्यो पुष्टिमार्गकी रीती सीखवेकुं श्रीगोकुलमें रहि गए ॥ और भिक्षावृत्तिकरके निर्वाह करवे लगे ॥

एकदिन श्रीगुसांईजीनें पूछी जां तुम भिक्षा कहां कहां मांगो हो ॥ बिननें कही सवनके घरसों मांग लाबुद्धं जब श्रीगुसांईजीनें कही जो हमारे सेवक तथा भट्ट तथा हमारे नौकर बिनके घरसुं तुमारे भिक्षा लेनी नहीं कारण बिनके घरमें हमारो द्रव्य आवेहै देवद्रव्य गुरुद्रव्य ब्राह्मणको द्रव्य इनके अंश लीयेंसों बुद्धि अष्ट होवे है जब मधुसूदनदास वैसेही करन लागे जब मधुसूदनदासकी चित्तवृत्ति स्थिर देखके श्रीगुसांईजीनें श्रीनाथजीके पानघरकी सेवा दीनी ॥ और मधुसूदनदासकुं सेवामें ऐसो चित्त लग्यो जो जन्मभर श्रीनाथजीकी सेवा कीनी ॥ तातें इनकी वार्ता कहां ताईं लिखियो ॥ वार्ता सं ० वैष्णव ॥ ३२ ॥ श्रीगुसांईजीके सेवक ब्रह्मदास हते तिनकी ० सो वे ब्रह्मदास गोपालपुरमें रहते हते और व्रजमें फिन्च्यो करते मानसीसेवा करते मानसी जीनकुं साक्षात्कार होयगई हति और राधाकुंडपर एक बंगाली कृष्णचैतन्यको सेवक रहतो हतो सो वे ब्रह्मदासजीको मित्र हतो वेहु मानसी करतो और सदाही दूध पीके रहतो हतो फेर थोड़े दिनपीछे दूध छोड़दियो और छाछपीवे लग्यो एकदिन वा बंगालीनें मानसी सेवा करि जब मानसीमें दूध भोग धन्यो तब प्रसादिदूध मानसीमें पियो फेर नित्यकी छाछ लेवेको समय भयो फेर वा बंगालीनें शिष्यनकुं नहि कहि तोहुंवाके शिष्यननें जीरझ छाछप्याई कारण जो वानें मानसीमें दूध पियो है सो शिष्यनकुं खबर न हती पाछे वा बंगालीकुं ज्वर आयो सो वे ब्रह्मदासजी वा बंगालीकुं

देखवे आये सो वे ब्रह्मदास वैद्यकमें बहुत चतुर हते तब ब्रह्मदासजीनें देखके कहि तुमनें दूधके उपर छाछ लीनीहै जासों ज्वर आयोहै फेर वा बंगालीके शिष्यननें कहि इननें दूध नहिं पीयोहै तब वे बंगाली बोल्यो अपने शिष्यनसुं तुमकुं कहा खबर है जाघरको हमनें दूध पियोहै ये बाई घरके सदैव रहवे वारेहै और जब हमनें दूध पियो जब ये देखते हते सो वे ब्रह्मदासजी श्रीगुसांईजीके ऐसे कृपापात्र हते जो कोई और मनुष्य मानसीसेवा करतो सो अपनी मानसीके प्रतापतें और श्रीगुसांईजीकी कृपातें सबकि मानसी जानजाते ॥ वार्ता संपूर्ण ॥ वैष्णव ॥ ३३ ॥

॥ श्रीगुसांईजीको सेवक नरुवैष्णव हतो सो द्वारिकाके रस्तामें रहेतो तिनकी वार्ता:—सो एकसमें श्रीगुसांईजी द्वारिका पधारते हते सो वैष्णव श्रीगुसांईजीकुं अपने घर पधरायके डेरा कराए ॥ वाको घर बहुत छोटी हतो तोहुं वाको आग्रह देखके श्रीगुसांईजी उहां डेरा किये ॥ और श्रीगुसांईजीनें वा वैष्णवसों पूछी जो तुम निर्वाह कैसे करौहो ॥ जब वा वैष्णवनें कही गामके बाहेर एक वृक्षहै सो वाके नीचे आपने आगे डेराकन्यो हतो सो वा वृक्षके पास बैठके भगवद्वार्ता करहुं और वैष्णव गाममें कोउ नहीहै ॥ जब श्रीगुसांईजीनें कही वृक्ष मोकुं दिखाव जब वे वैष्णव श्रीगुसांईजीकुं पधरायके वा वृक्ष पास लगयो ॥ जब वा वृक्षनें श्रीगुसांईजीकुं आते देखके दंडवत करके मलसे उखरि पन्यो ॥ जब श्रीगुसांईजीनें मनुष्यनकुं कही याको पत्र डाल सब उठाय

लेचलो याको सर्वांग अंगीकार भयो ये वृक्ष आगले जन्ममें वैष्णव हतो और लोगनके दोष देखतो याहीतें वृक्ष भयो है ये बात सुनके वे वैष्णव उहांतें आश्चर्य पायो ॥ फेर श्रीगुसांईजी द्वारिका पधारे ॥ और वा वैष्णवके घर जो कुछ हतो सो सब भेटकरदियो सो वे वैष्णवऐसो कृपापात्र हतो जाकुं श्रीगुसांईजीनें लौकिक निर्वाह पूछो जब विननें अलौकिक निर्वाह बतायो ॥ वैष्णवनकुं ऐसोही चाहिये तातें इनकी वार्ता कहा कहिये ॥ वार्ता संपूर्ण ॥ वैष्णव ॥ ३४ ॥ * ॥ ॥ ॥ ॥

॥ श्रीगुसांईजीके सेवक पाथोगूजरी तिनकी ० सो पाथोगूजरी आन्योरमें रहते हते ॥ सो पाथोगूजरी एकदिन बेटाके लीयें छाक लेजात हती रस्तामें श्रीनाथजीनें कही ये दही भात हमकुं दे तब विननें दियो जब श्रीनाथजी आरोगे जब आरोग चुके इतनेमें शंखनाद भये जब श्रीहस्त धोये दिना मंदिरमें पधारे तब श्रीगुसांईजीनें श्रीनाथजीके दही भातके श्रीहस्त देखिके पूछी जो आप कहां आरोगे है तब श्रीनाथजीनें कही जो पाथोगूजरीके पासतें लीयो हतो ॥ वादिन श्रीगुसांईजीनें पोरियासों कही जो पाथोगूजरी जब आवै तब किवार खोल दीजियो ॥ जब श्रीनाथजी आज्ञा करते तादिन पाथोगूजरी पायके अरोगवाय जाती जादिनतें श्रीगुसांईजीनें कुनवारामें मुख्य सामग्री दही भातकी राखी है सो वे पाथोगूजरी ऐसी कृपापात्र हती ॥ वार्ता संपूर्ण वैष्णव ॥ ३५ ॥

॥ श्रीगुसांईजीके सेवक एकबजवासीकी बहू

तिनकी वार्ता:-जब वे बहू सासरें आई जादिन विनकी भैंसखोय गई ॥ तब वाके घरके मनुष्य कहने लगे या बहूके पांव आछे नहीं हैं जादिन आई तादिनही भैंस गई ॥ जब वा बहूके मनमें चिंता उपजी ॥ तब वानें श्रीनाथ-जीकुं सवासेर माखन मान्यो तब पांच सात दिनमें वाकी भैंस मिली ॥ जब वे बहू भैंसकी छाछ विलोवे लगी जब रोज एक छटांक माखन चुरायलेवे और दूसरे दिन वा माखन ताजामें मिलायके ताजो काढ लेंवें ऐंसे करत करत जब सवासेर माखन पूरो भयो जब लेके श्रीनाथ-जीकुं अरोगवायवे चली ॥ घरसुं बाहेर निकसी जब ऐंसी विचार कन्यो जो मोकुं कोई देखेगो तो कहा कहेंगो जब ऐंसी चिंता उत्पन्न भई न पाछे आयो जाय न आगे गयो जाय ॥ तब श्रीनाथजी वाकुं चिंतासुर देखके पधारे श्रीनाथजीनें ऐंसी जानी जो ये मेरे विना दूसरो देव जानें नहीं हैं जासुं पधारे ॥ और वाको माखन लेके आ-रोगे सो वे बहू ऐंसी कृपापात्र हती ॥ वार्ता संपूर्ण वैष्णव ॥ ३६ ॥ * ॥ ॥ ॥ ॥ ॥

श्रीगुसाईजीकेसेवकगोपीनाथदासग्वालकी ०
सो गोपीनाथदास ग्वालवनमें गाय भैंस चरावत हते ॥ सो एकदिन गोपीनाथदासकुं वनमें भूख लगी ॥ जब श्रीनाथजीनें आठ लहूवा राजभोगकी सामग्रीमें सो वनमें लायके गोपीनाथदासकुं दिये ॥ तब विननें विचार कन्यो जो ये लहूवा श्रीगुसाईजीकी आज्ञा विना खाने न-हीं ॥ जब वे लहूवा श्रीगुसाईजीके पास लेआये ॥ और श्रीगु-

साईजीकुं वीनती करी तब श्रीगुसाईजीनें आज्ञा करिके ल-
ड्डवा श्रीनाथजीनें दीनेहैं सो तुम खावो सो गोपीनाथदास
श्रीगुसाईजीकी आज्ञा बिन कछ् करत नहीं हते ॥ सो एक
दिन गोपालदास भीतरियाकुं वनमें श्रीनाथजीनें कही जो
मोकुं भूख लागीहै ॥ जब भीतरियानें आयके श्रीगुसां-
ईजीसों वीनती करी तब श्रीगुसाईजी सब सीतल सामग्री
तयार करके आप वनमें पधारे ॥ तब तडका बहोत हतो
तब गोपीनाथदास ग्वालने श्रीगुसाईजीसों वीनती करी
जो महाराज ऐसी घाममें काहेको पधारेहै ॥ श्रीनाथ-
जीतो वालकहै यासूं आप पाछे पधारे ॥ तोहूं श्रीगुसां-
ईजी वनमें पधारे ॥ जब जायके श्रीनाथजीकुं सामग्री
अरोगवाई ॥ तब गोपीनाथदास ग्वालने श्रीनाथजीसों
वीनती करी जो महाराज आपनें ऐसी घाममें श्रीगुसां-
ईजीकुं काहेको श्रम करायो ॥ आप आज्ञा करते तो
वहुत सामग्री आयजाति तब श्रीनाथजीनें आज्ञा करी
जो इनके हाथ बिना मोकुं दूसरेके हाथकी भावे नहींहै ॥
और इनके कहे बिना दूसरेके हाथकी अरोगुंहुं नहीं हूं
ये बात सुनके गोपीनाथदास चुप कर रहे ॥ याहीतैं
श्रीरघुनाथजीनें श्रीगुसाईजीको नाम नामरत्नाख्य-
ग्रंथमें ॥ तन्निमंत्रणभोजकः ॥ ऐसो वर्णन क्यो है सो
वे गोपीनाथदासग्वाल ऐसे कृपापात्र हते ताते इनकी
वार्ता कहांताई लिखिये ॥ वार्ता संपूर्ण ॥ वैष्णव ॥ ३७ ॥
॥ श्रीगुसाईजिके सेवक दोभाई तिनकी ॥
वे दोनो भाई पटेल गुजरातके हते श्रीजीद्वारमें रहिके श्री-

नाथजीकी सेवा करते सो एकदिन वे दोउनके मनमें ऐसी आई जो हमनें द्रव्य खरचके श्रीनाथजीकुं सामग्री नहीं अरोगवाई है तब वे दोनो उहांते चले सो एकतलाव खुदावतो हतो सो उहां कंठी तिलक छिपायके मजूरी करन लागे सो रातकुं रसोई करते दिनकुं मजूरी करते ऐसें करत करत बहुत दिन बीते सो विनकुं कोई नें वैष्णवहें ऐसी जान्यो तब चिन दोउनकी खात्री करने लागे और थोड़ी मजूरी करावन लागे तब विननें विचार क्यो जो धर्म बेचके पैसा कमावनो ये बात आछी नहीं जब वे उहांसें श्रीजीद्वार आये और पैसा जो लाये हते सो श्रीगुसांईजीकुं देके श्रीनाथजीकुं अंगीकार कराए जब श्रीगुसांईजीकुं सब बात कही तब श्रीगुसांईजीनें आज्ञा करी जो वैष्णवधर्म प्रकट करके पैसा लावे वे पैसा श्रीनाथजी अंगीकार नहीं करेहें ॥ वे दोनोभाई ऐसे कृपापात्र हते जिननें मजूरी करी तोहुं वैष्णवधर्म प्रकट कियो नहीं ताते इनकी वार्ता कहा कहिये ॥ वार्ता संपूर्ण ॥ वैष्णव ॥ ३८ ॥

॥ श्रीगुसांईजीके सेवक गोपालदास भीतरिया की वार्ता:-सो वे गोपालदास गुजरातमेंते श्रीगुसांईजीके संग आए ॥ और श्रीगुसांईजीनें गोपालदासजीकुं श्रीनाथजीकी सेवा सोंपी ॥ श्रीनाथजी गोपालदासके उपर ऐसी कृपा करते जाठिकाणें गोपालदास सेवामें भूलते ताठिकाणे श्रीनाथजी सिखावते ॥ और गोपालदासजी को प्रसंग गोपीनाथदास ग्वालकी वार्तामें लिख्योहै ॥ श्रीनाथजी गोपालदासकुं संग वनमें लेजाते और जो

सामग्री गोपालदासजीकुं न आवती सो श्रीनाथजी आप
वतायके करायलेते ऐसे अनेक रीतके अनुभव करादते
सो वे गोपालदास ऐसे कृपापात्र हते ॥ वार्ता संपूर्ण ॥

॥ वैष्णव ॥ ३९ ॥ ❀ ॥ ॥ ॥ ॥ ॥

॥ श्रीगुसांईजीके सेवक एक ब्राह्मण ति० ॥

सो ब्राह्मण गंगाजीके तीरपर एक झोंपडी बनायके श्री-
ठाकुरजी पधरायके दोनो स्त्रीपुरुष सेवा करते सो वे
ब्राह्मण भिक्षाकरि लावते और एकदिनको सीधो होयतो
दूसरे दिनके लिये कोई देवे आवे वाके पास लेते नहीं ॥
और जब श्रीठाकुरजीको राजभोगसरे पीछे जितने वैष्ण-
व आये होंय सबकी पातर करते और भगवत्सेवा और
भगवद्दर्शन बिना बिनकी चित्त दूसरे ठिकाने जातो न
हतो ॥ ऐसे करत करत बहुत दिनबीते तब एक पंडित
गंगाजीके तट पर तप करवेकुं आय रह्यो सो पंडित ब-
हुत विद्वान हतो और सामुद्रिकशास्त्र पढ्यो हतो और
वा ब्राह्मणके घरके पास रहतो हतो ॥ और वा पंडितकुं
महाप्रसादकी पातर वे ब्राह्मण धरतो हतो पाछे एकदिन
वा पंडितने ज्योतिषके बलसूं तथा सामुद्रिकसूं ऐसे
जान्यो जो या ब्राह्मणके ऊपर काल चोरीको मुद्दा आ-
वेगो और राजाके मनुष्य पकड ले जायंगे और राजाके
हुकुमसों या ब्राह्मणकुं फांसी देंगे ॥ सो पंडित अपने
मनमें अनेक संकल्प विकल्प करवे लगे दसघडी दिन
काल चढ़ेगो तब या ब्राह्मणके प्राण जाएंगे ऐसे विचार
करत वा पंडितको सगरो दिन गयो सो वे जब समय

धकी निवृत्ति नहीं होयहै मेरी रोमरोममें कीड़ा पड़ने चहीये जब मेरो अपराधनिवृत्त होयगो ऐसे अनन्यताके बचन सुनिके श्रीरामचंद्रजी हस्ये और आज्ञा करी जो जाओ श्रीनाथजीके दर्शन करौ श्रीरामचंद्रजीके बचन सुनके बाको कोढ़ भिटगयो और आयके श्रीनाथजीके दर्शन करे सो वे वैष्णव ऐसे अनन्य हते विनकी अनन्यता देखिके श्रीनाथजी बड़े प्रसन्न भए ॥ और सब प्रकारसु अनुभव जताए ॥ वार्ता संपूर्ण ॥ वैष्णव ॥ ४१ ॥ ❀

॥ श्रीगुसांईजीके सेवक एक कुनबी पटेल हतो तिनकी वार्ता ॥ सो वैष्णव गुजरातके संगमें ब्रजजात्राकुं चले ॥ रस्तामें वा संगके वैष्णवनकी सेहेनत मजुरी करत चलयो ॥ जब श्रीजीदार एकमजल रह्यो जादिन वा वैष्णवकुं ज्वर आयो जब वानें सबको कही जो मोकुं काल गाढीपर बेठाइयो ॥ परंतु बाकी बात कोईने सुनी नहीं तब बाकुं चिंता उत्पन्न भई जोमोकुंसवारें श्रीनाथजीके दर्शन कैसें होयंगे या चिंताके लीयें बाकुं आखी रात नीद नहीं आई ॥ बाकी चिंता श्रीनाथजी सहि न सके जब श्रीनाथजीने श्रीगुसांईजीसों कही जो बाकुं बहुत चिंता मेरे दर्शनके लीयें भईहै जासूं मोकुं नीद नहीं आवेहै ॥ ये बात सुनके श्रीगुसांईजीने कही आप सुखसैं पोढ़ें वह सबसों पहिले आय जायगो ॥ जब श्रीगुसांईजीने बाकुं गाढी भेज सबसूं पहिले बोलायलिये और श्रीनाथजीके दर्शन कराए ॥ दर्शन करत मात्र बाकी देहदशा मूलगई जब श्रीगुसांईजीने याकी ये व्यवस्था देखिके

चरणस्पर्श कराए ॥ तब बाहुं स्मृति आई जब श्रीगुसांईजीकुं साष्टांग दंडवत करी जब श्रीगुसांईजीनें वासों सब समाचार पूछे जब वे संग आयो जब श्रीनाथजीनें श्रीगुसांईजीसों कही इनको दर्शन मत करन देवो जब श्रीगुसांईजीनें वीनती करी जो जीवतो सदैव अपराधसुं भरेहैं इननें वैष्णव जानके अपराध नहीं कियोहैं ॥ जब श्रीनाथजीनें कही अब इनको दर्शन करावो वैष्णव जानके अपराध करै तोमैं अंगीकार न करुंगो फेर श्रीगुसांईजीनें विनकुं समझाये आज पीछे कोईदिन वैष्णवको अपराध मत करियो ऐसे समझायके फेर विनकुं दर्शन करवेकी आज्ञा भई सो पटेल श्रीगुसांईजीको ऐसो कृपापात्र हतो ॥ जिनकी आर्ती श्रीनाथजी न सहि सके ॥ वार्ता संपूर्ण ॥ वैष्णव ॥ ४२ ॥ ॥ ॥ ॥

॥ श्रीगुसांईजीके सेवक एक साहूकारके बेटाकी वहूकी वार्ता:-सो वे वहू एकदिन बारीमें बैठीहती ॥ सो एक तुरकनें देखी सो वा तुरककी वामें आसत्ती भई ॥ वा वहूको देखे विना वो तुरक जल नलेवै जब गाममें वहुत चर्चा होवै लगि और ज्ञातमें निंदा भई जब वा वहूके घरके मनुष्य वा वहूकुं श्रीगोकुल लेगये ॥ या बातकी खबर तुर्ककुं परी सो वे विनकेपाछे दौरधौ ॥ सो रस्तामें जाय मिल्यो ॥ वे लोग कहेने लगे जा दुखके मारे घर छोड्यो सो दुख तो साथ मे आयो ऐसे करते श्रीगोकुल पहुंचे फेर नाववालेकुं वा साहूकारनें कही याहुं पार मत उतारियो ॥ सो वह तुरक यमुनाजीके

किनारे बैठ रह्यो ॥ वा साहूकारनें जायके श्रीगुसांईजीके तथा श्रीनवनीतप्रियाजीके दर्शन किये ॥ जब वा साहूकारनें महाप्रसाद लेवेकि तैयारी करि तब श्रीगुसांईजीनें पांच पातर धराई ॥ वा तुर्ककुं मनुष्य पठाय श्रीगुसांईजीनें बुलाय लियो जब वे पांचजने दूरदूर प्रसाद लेवे बैठे श्रीगुसांईजी विनके सामें आयके विराजे ॥ सो वे चार जनेतो प्रसाद लेके उठे और वा तुर्ककी दृष्टी और मन तो श्रीगुसांईजीके चरणारविंदमें लग रह्यो ॥ और कछु देहानुसंधान रह्यो नहीं जहां सूधी श्रीगुसांईजी वा तुर्कके सामें विराजे रहै ॥ जबसूधी दर्शन करत रह्यो जब श्रीगुसांईजी उठके भीतर पधारे तब वाकीदेह छूटिगई ॥ ये बात श्रीगुसांईजीनें जानी जब श्रीगुसांईजीनें आज्ञा करी वा तुर्ककुं अग्निसंस्कार कराओ ॥ या बातको कारण वैष्णवननें श्रीगुसांईजीसों पूछो तब श्रीगुसांईजीनें कही ये आगले जन्ममें ब्राह्मण वैष्णव हतो ये बहू वाकी स्त्री हती ॥ सो एकदिन एक वैष्णवसुं एकांत भगवद्वाता करत हती वामें कछु दोष हतो नहीं तब याके मनमें वा वैष्णव ऊपर या स्त्रीकोदोष आयो हतो या अपराधते याको स्लेच्छके घर जन्म भयो और वाकी स्त्री हती सो या क्षत्रीके बेटाकी स्त्री भईहै जब या बहूकुं यानें देखी तब वा तुर्ककुं याके नेत्रनमें श्रीगोवर्धननाथजीके दर्शन भये जासुं या बहूमें वाको मन लग गयो जब श्रीगोकुल आयो यमुनाजलपान कन्यो तब याको अपराध निवृत्त भयो अब ये भगवल्लीलामें प्राप्त भयो है ॥ ये बात सुनके

वाँवहूँ विरहताप भयो जब वाकी देह छूटगई ॥ सो वे भगवल्लीलामें प्राप्त भई ॥ सो वे वहु श्रीगुसांईजीकी ऐसी कृपापात्र हती ॥ वार्ता संपूर्ण ॥ वैष्णव ॥ ४३ ॥ ❀ ॥

श्रीगुसांईजीके सेवक साठोदरा नागर गुजरा-
तके वासी तिनकी वार्ता:- सो वे वैष्णव जा गाममें रहते
वा गाममें एक दूसरो वैष्णव रहतो हतो सो दोनो पर-
स्पर मिलाप राखते हते और हिलमिलके भगवत्सेवा क-
रते हते सो एकदिन दोउ जनें जल भरके आवते हते र-
स्तामें एक वेश्याको घर हतो वाकी बेटी नृत्य करती
हती सो साठोदरा वैष्णवनें देखी सो वेश्याकी बेटी दैवी
जीव हती जासुं वे देखवेकुं ठाढ़े रहि गये तब दूसरो वै-
ष्णव अपने घर आयो वह दूसरो वैष्णव मनमें समझ्यो
ये विपईहैं याको संग न करनो और स्त्रीसों कहि जो सा-
ठोदरा वैष्णव मोकुं बोलायवे आवे तौ तुम कहियो घर-
में नहिं है पीछे वा साठोदरा वैष्णवनें वेश्यासों ठराव क-
रके वाकी बेटीकुं घर ले आये रात्रीकुं न्हायके शृंगार
करायके और अष्टाक्षरमंत्रसुनायके श्रीठाकुरजीके सं-
निधान नृत्य करायो और श्रीठाकुरजी वाको गान सु-
नके बहुत प्रसन्न भये और वेश्याकी बेटीमें इतनी साम-
र्थ्य भई जो संस्कृत बोलवे लगी और भगवद्रूपमें मन
लग्यो और वा वैष्णवको बहुत उपकार मान्यो और द्रव्य
न लियो और मनमें ये विचार क्यो जो नित्य ऐसे वै-
ष्णवनको सत्संग होय तो बहुत आछो और वेश्याको
कर्म छोड दियो और वा वैष्णवको सत्संग करवे लगी

फेर वह दूसरो वैष्णव जो गाममें रहेतो हतो वाकी स्त्रीकुं श्रीठाकुरजीनें कही मैं अब तुमारे घरमें नहीं विराजूंगो तुमनें वा साठोदरा वैष्णवको वृथा दोष देख्यो है तब वो वैष्णव साठोदरा वैष्णवके पावन पन्यो और अपराध क्षमा करायो जबसुं साठोदरानागर और दूसरो वैष्णव तथा वेश्याकी बेटीदोनो मिलके भगवद्वाता नित्य करते सो वा साठोदरा वैष्णवके संगते वेश्याकी बेटी परम वैष्णव भई तातेन इनकी वार्ता कहा कहिये ॥ वार्ता संपूर्ण ॥ वैष्णव ॥ ४४ ॥ ❀ ॥ ॥ ॥ ॥

श्रीगुसांईजीके सेवक एक वेश्याकी बेटी ति० वा वेश्याकी बेटीनें साठोदरा वैष्णवके घर श्रीठाकुरजीके आगे आखीरात नृत्य कन्यो जब सवारो भयो तब बाहुं कछु देहकी झुट्ठी रही नहीं भगवदावेशमें मग्न भई तब डेढ़पहर दिन चढ़ गयो वाके घरके बुलायवे आये जब कछु बोले नहीं और कछु मुनेहुं नहीं फिर वाके घरके मनुष्य बाहुं पकड़के लेगये सो घरमें जाय बावरी होय गई कछु खाय नहीं बोले नहीं सो घरके आदमीनकी दृष्टी बचायके वा वैष्णवके घर आई उहां आछी रीतसुं बोली और भगवद्वाता करी और प्रसाद लियो या रीतसुं नित्य करे वाके घरके मनुष्यननें राजद्वारमें पुकार करी जो या वैष्णवनें हमारी बेटीकुं बावरी करदीनी है जब राजाके मनुष्य वा वैष्णवकुं पकड़के लेगये जब राजाने वा वैष्णवकुं देख्यो तो वैष्णव परम भगवदीय हतो भगवत्तेज वाके मुखपर विराजे है तब राजा बोल्यो ये झूठी बात है ये

मंत्र जंत्र कछु करै नहीं वो वैष्णव अपने घर आयो और
वेश्याकी बेटीकुं वाके घरके मनुष्यननें बावरी जानके
निकास दीनी अब वे बाई वैष्णवके घरमें आयके रही इत-
नेमें श्रीगुसांईजी पधारे वा बाईकुं नाम निवेदन करायो
जब वे बाई फेर वैष्णवके घर प्रचारगी करवे लगी एक-
दिन वा साठोदरा वैष्णवकुं श्रीठाकुरजीनें कही जो मेरी
सेवा शृंगार ये बाई करेगी और तुम रसोईकी सेवा करौ
जब ये वैष्णव बहुत प्रसन्न भयो और वह बाई शृंगार क-
रन लगी और वे रसोई करन लग्यो और जब वे वैष्णव
व्याहृतीकुं जाय तब वा बाईसुं श्रीठाकुरजी बोले बत-
लावें सो वे बाई श्रीगुसांईजीकी ऐसी कृपापात्र भई जायुं
वैष्णवको संग सर्वथा करनो॥वार्ता संपूर्ण॥ वैष्णव। ४५।
॥श्रीगुसांईजीके सेवक वाघजीरजपूत ति०॥

सो वे वाघजी रजपूत तथा विनकी स्त्री घरमें श्रीठाकुर-
जी पधायके भलीभातिसुं सेवा करते हते और एक दो
वैष्णवनकुं नित्य नेमसो प्रसाद लेवावत हते एकदिन
वाघजीनें एक वैष्णवकुं न्योतो दियो और तवापूरीकी
सामग्री कराई सो वा दिन शृंगार करके वाघजीरजपूत
राजाकी असवारीमें गयो घरमें घी थोडो हतो सो वाघ-
जीकी स्त्रीनें थोडो घी राजभोगमें धरयो तब वाघजीके
श्रीठाकुरजीनें वाघजीकुं जताई जो घी थोडोहै और त-
वापूरी गलेमें चुभतहै तब वाघजीकुं बड़ी आतुरता भई
जब तहांसुं दोहै और बजारमेंसुं घीलेके और दोडके श्री-
ठाकुरजीके आगे धर दियो सब कपडा पहरे मंदिरमें

चले गये कछु सुघ न रही श्रीठाकुरजीकुं श्रम होवेगो ये बात ध्यानमें रही अनाचार मीलिंगो येबात ध्यानमें न रही तब घी घरके फिर राजाकी अस्वारीमें गयो वा समें वो वैष्णव वहां बैठो हतो वाके मनमें ऐसी आई जोड़ी पेहरके मंदिरमें जायके घी धन्यो जासुं ये आचार विचार कछु राखे नहींहि इनके घरको प्रसाद लेनो नहीं ये विचारके उठगयो फिर वाघजी जब आयो वा वैष्णवकुं बुलायवे गयो जब वे वैष्णव छिप गयो फिर वाघजी घरमें आय दोनो स्त्रीपुरुष झूखे रहे ऐसे तीन दिनसुधी वह वैष्णव आयो नहीं सो वाघजी तीन दिन सूधी झूखे रहे जब वा वैष्णवके श्रीठाकुरजीनें स्वप्नमें वाकी स्त्रीकुं जताई जो मैं तुमारे घरते जाउंगो तुमनें वाघजी ऊपर वृथा दोष धन्यो है वाको चित्ततो मेरेमें लग्यो हतो और देहको भान कछु हतो नहीं जासुं तुमारे घर नहीं बिराजुंगो ये सुनके वा वैष्णवकी स्त्री जागपडी और अपने पतीसों कह्यो जब वो वैष्णव आयके वाघजीके पावन पन्यो और अपराध क्षमा करायो और दोनोनें मिलके महाप्रसाद लियो सो वे वाघजी ऐसे कृपापात्र हते जिनका दुःख श्रीठाकुरजी सहि न सके इनकी वार्ता कहा कहिये ॥ वार्ता संपूर्ण ॥ वैष्णव ॥ ४६ ॥ * ॥ ॥ ॥

॥ श्रीगुसांईजीके सेवक अजबकुंवरबाई ति० ॥

सो वे अजबकुंवर बाई मेवाडमें रहेती हती मीराबाईकी देरांनी हती और उहां एक दिन श्रीगुसांईजी पधारे जब अजबकुंवर बाईकुं साक्षात् पूर्णपुरुषोत्तमके दर्शन भये

जब अजबकुंवर श्रीगुसांईजीकी सेवक भई और अष्टप्रहर श्रीगुसांईजीके चरणारविंदमें चित्त लग्यो रहै जब श्रीगुसांईजी पधारवे लगे तब अजबकुंवर वाईकुं मूर्छा आई तब श्रीगुसांईजी वाकी ऐसी दशा देखके चारदिन उहां विराजै और अजबकुंवर वाईकुं पादुकाजी पधराय दीये तब अजबकुंवर वाई शुद्ध पुष्टिमार्गकी रीती प्रमाणें सेवा करन लगी और श्रीनाथजी अजबकुंवरवाईके संग नित्य चोपर खेलते और अजबकुंवरवाईके मनमें ऐसी हती जो श्रीनाथजी सदैव इहां विराजै तो आछौ एक दिन अजबकुंवरवाईके ऊपर श्रीनाथजी प्रसन्न भये और कही जो कछु मांग तब अजबकुंवरनें माग्यो जो आप सदा इहां विराजो तब श्रीनाथजीनें कही श्रीगुसांईजी और श्रीगुसांईजीके सात लालजी जहां सूधी भूतल ऊपर मेरी सेवा करेंगे तहांसूधी गोवर्धन पर्वत नहीं छोड़ंगो फेर पीछे इहां पधारंगो और तहांसूधी नित्य आवजाव करूंगो ऐस वचन सुनके अजबकुंवरवाई मनमें बहुत प्रसन्न भई जासुं श्री नाथजी मेवाहमें अजबकुंवरवाईको वचन सत्य करवैके लीयें अबसूधी विराजेहें इनकी वार्ता कहा कहिये ॥ वार्ता संपूर्ण ॥ वैष्णव ॥ ४७ ॥ ❀ ॥ ॥ ॥

श्रीगुसांईजीकी सेवक वीरबलकी बेटी ति० ॥

एकदिन श्रीगुसांईजी आगरे पधारे हते वीरबलकी बेटीकुं श्रीगुसांईजीके दर्शन साक्षात् पूर्णपुरुषोत्तमके भये जब वीरबलकी बेटी श्रीगुसांईजीकी सेवक भई और नित्य कथा सुनवैकुं श्रीगुसांईजीके पास जाती और कथामें जो

सुनती सो मनमें लिख राखती एक अक्षर भूलती न हती और दिवस रात वा कथाको अनुभव करत हती, एकदिन बीरबलकुं पादशाहनें पूछी के साहेबको मिलनो कैसे हो-
 वेंहे ये निश्चयकरके हमकुं कहो तब बीरबलनें सब पंडित और महंतनसुं पूछी परंतु बिनकी कही कछु नजरमें आई नहीं ॥ तब बहुत चिंतातुर भये और ऐसो ढरलख्यो जो पातशाह लूट लेवेगो जब बेटीनें कही याको उत्तर श्रीगु-
 साईजी देंवेगे जब बीरबल श्रीगोकुल आये श्रीगुसाईजी कुं बीनती करी तब श्रीगुसाईजीनें आज्ञा करी जो उत्तर पादशाहकुं एकांतमें देउंगो जब बीरबलनें पादशाहसो कही तब पादशाह श्रीगोकुल आये बीरबलहुं संग आये जब बीरबल आयके पादशाहके डेरापर श्रीगुसाईजीकुं पधरायलेगये जब पादशाहनें एकांतमें श्रीगुसाईजीसो पूछी जो साहेब कैसे मिलेंहे सो उपाय बतावो जब श्रीगु-
 साईजीनें लौकिक रीतसो उत्तर दियो, कही जेसें तुम हमकुं मिले ऐसे साहेब मिलतेंहे तब पादशाहनें कही याको कारण समझावो, तब श्रीगुसाईजीनें कही हम हजारन उपाय करें तो तुमको मिलनो कठिन है और तुम वि-
 चान्येतो घडीहुं न लगीतुर्त हमकुं मिललिये ऐसें जीव हजारन उपाय करे तौहुं साहेब नहीं मिलता है और सा-
 हेब विचारे तो श्रुत जीवकुं अपनी करलेवे है, जीवके हाथ कछु नहीं है साहेबकी मर्जी होवे तो क्षणएक न लगे ये सुनके पादशाह बहुत प्रसन्न भये और श्रीगुसाईजीकुं दं-
 डवत करी और बीनती करी जो कछु मेरो अंगीकार करो

तब श्रीगुसांईजीनें कही जो हमकुं गोपालपुर एक घंटामें
 पहुँच्यो जाय ऐसी अस्वारी होवैतो ठीक जब पादशाहनें
 ऐसो घोडो भेट क्यो जो एक घंटामें दशकोष जाय
 और घोडाके खरचमें श्रीगोकुल और गोपालपुर ये दो
 गाम दीये और दंडवत करके आगरेमें गये वा घोडापर
 बैठके श्रीगुसांईजी नित्य गोपालपुर पधारते और पाछे
 श्रीगोकुल आयजाते वा घोडाकी बात गोपालदासजीनें
 सप्तमवल्लभाख्यानमें गाईहे॥“दुरंग चाले वायुवेगें उता-
 वला जाणे नौका चाली सिंधु तरवा”॥ ऐसी रीतीसुं गो-
 पालदासजीनें वर्णन क्यो है सो वीरवलकी बेटी ऐसी
 कृपापात्र होती और श्रीगुसांईजीके ऊपर ऐसो विश्वास
 हतो इनकी वार्ता कहा कहियो॥वार्ता संपूर्ण॥वैष्णव४८॥
 ॥ श्रीगुसांईजीकी सेवक एक कुंजरी तिलकी०
 एकदिन श्रीगुसांईजी गोपाल पुरतें श्रीगोकुलपधारते हते
 रस्तामें एक कुंजरी प्याससों घबरायके पड़ी होती तब
 श्रीगुसांईजीनें खवाससों कहिये कौन पड़ी है तब खवा-
 सनें कहि प्यासके मारे यालुगाईके प्रान निकसैहैं तब
 आपनें खवाससुं कही आपणी झारीमेंतें याकुं जल प्यावो
 तब खवासनें कही झारी छिवाय जायगी तब श्रीगुसांई-
 जीनें आज्ञा करी जो झारीतो दूसरी आवेगी परंतु याके
 प्राणतो बचेंगे तब वाकुं जल प्यायो जब वो चेतन भई
 फिर वे कुंजरी अपने सब द्रव्य लेके श्रीगोकुलमें आयके
 रही दिनकुं दुकान मांडके बैठे रातकुं गामबहार जायके
 रहे कारण जो श्रीगोकुलमें बड़ी जातवालेकुं रात रहेवोको

पृथ्वीपती अकबर बादशाहको हुकम न हतो सो ऐसेमें
 कुंजरी बाहेरसों उत्तम मेवा लायके श्रीगोकुलमें बेचे
 और जो कोई मंदिरमें मेवा पहाँचावे वाके पास दाम
 थोड़े लेवे मनमें ऐसे समझे जो मेरो द्रव्य या रीतसुं
 अंगीकार होयगो ऐसे करत करत वा कुंजरीनैं आखो
 जन्म श्रीगोकुलमें संपूर्ण करयो और श्रीगुसाईंजी यमुना
 जीके घाटपर पधारते जब वा कुंजरीकुं नित्य दर्शन होते
 सो साक्षात् पूर्णपुरुषोत्तमके होते जासुं वे कुंजरी श्रीगुसां
 ईजीकुं पूर्णपुरुषोत्तम जानके श्रीगोकुलमें रही हती जहाँ-
 सृधी वाकी देह रही तहाँसृधी वाकुं बेसेही पूर्णपुरुषोत्त-
 मके दर्शन होते सो वे कुंजरी श्रीगुसाईंजीकी एसी कृपा-
 पात्र भगवदीय हती ॥ वार्ता संपूर्ण ॥ वैष्णव ॥ ४९ ॥
 ॥ श्रीगुसाईंजीके सेवक प्रेत हतीत पतीत द्वय
 भाईतिनकी वार्ता॥दोऊ हतीत पतीत महानदीके तीरऊ-
 पर रहेते हते जो कोई रस्तामें निकसतो जाकुं मारडा-
 रते ऐसे सब लोगनकुं खबर पड़ी सो वे रस्ता उजाड
 भयो कोई आवतो जातो न हतो वा ठेकाणसुं चार चार
 कोश सूधी उजाड भयो हतो कोई खेती करवहुं न आ-
 वतो वे ऐसे प्रेत जबर हते कोई मंत्र जंत्रके वश न हते,
 जो कोई जातो ताकुं मारडारते सो एकदिन चाचाहरि-
 वंशजी गुजराततें श्रीगोकुल जाते हते सो मूलके वे रस्ता
 निकसे तब दोनो प्रेत पर्वत बनके रस्तापर आयके
 पडे एकतो जायवेके रस्तापर आयके पडयो और दूसरी
 पाछें फिरवेके रस्तापर आयके पडयो तब चाचाजीनैं

जान्यो के ये कोई प्रेत हैं जब चाचाहरिवंशजीनें चरणामृत मिलायके बिनके ऊपर जल डाल्यो तब बिननें चाचाहरिवंशजीको प्रताप जान्यो ये कोई बड़े महापुरुष हैं हाथ जोड़के बिनती करन लगे कहीजो हमारी उद्धार करौ, चाचाहरिवंशजीनें बिनकुं अष्टाक्षर मंत्र सुनायो नाम-सुनतहीं बिनकी दिव्यदेह भई और भगवल्लीलामें प्रवेश भये फेर चाचाजी श्रीगोकुल गये और श्रीगुसांईजीसों बिनती करी जब श्रीगुसांईजीनें आज्ञा करी सोवर्ष पहले ये दोऊ ठग हते और वैष्णवको वेष बनायके फिरते हते एक ठिकाणे वैष्णवके घर जायके उतरे हते सो वैष्णवतो घरमें हतो नहीं बाकी स्त्री हती सो रातकुं बाके घर रहिके बा स्त्रीकुं मारके गहेनो लेगये, फेर रस्तामें बिनकुं चोर मिले सो चोरननें बिनकुं मार डाल्ये गहेनो लेगये जैसो बिनने कन्यो तैं सो मुक्त्यो तो सही परंतु वैष्णवकुं माल्यो हतो और वैष्णव बनके ठगाई करते हते या अपराधतें प्रेत भये हते जो तुम इनको उद्धार न करते तो कल्पमरसुधी प्रेत रहेते वैष्णवको अपराध ऐं सों है सो वैष्णवबिना वैष्णवकी अपराध क्षमा करवेकुं कोई सामर्थ्य नहीं है श्रीठाकुरजीद्वक्षमा न करें ये बात अंबरीषके आख्यानमें प्रसिद्ध है जासू वैष्णवके अपराधसुं डरपतरहेनो ऐसे चाचाहरिवंशजीकुं श्रीगुसांईजीनें आज्ञा करी ये सुनके सब वैष्णव प्रसन्न भये सो वे हतीतपतीतकुं चाचाहरिवंशजीनें श्रीगुसांईजीकी कृपातें उद्धार कियो और गोपालदासजीनें ऐसे बल्लमाख्यानमें गाये है ॥ हतीतपतीतनो जुओ

तुमें प्रकटईधाण ॥ सो वे श्रीगुसांईजीकी कृपातें भगव-
 लीलामें प्रवेश भये ॥ वार्ता संपूर्ण वैष्णव ॥ ५० ॥ ❀
 ॥ श्रीगुसांईजीके सेवक गंगाबाई क्षत्राणी-
 तिनकी वार्ता ॥ सो गंगाबाईकी माता महावनमें रहेती
 हती और श्रीगुसांईजीकी सेवक हती और श्रीगुसांईजी-
 के स्वरूपमें चित्त लग रह्यो हतो और वाके मनमें श्री-
 गुसांईजीके स्वरूपमें कामबुद्धि रहेती हती परंतु श्रीगुसां-
 ईजीकीतो ऐसी प्रतिज्ञा हती जो परस्त्रीके सामें काम दृ-
 ष्टीसों देखनो नहीं ये बात वे क्षत्राणी महावनवालीकी
 श्रीगुसांईजीनें जानी तब श्रीगोकुलमें आयवेको वा क्ष-
 त्राणीकुं बंदकन्यो ॥ बार वर्ष पर्यंत श्रीगोकुलमें न आ-
 यवेदीनी सो महावनमें विप्रयोगकी भावनासुं श्रीगुसां-
 ईजीको ध्यान करत हती ॥ एकदिन वाकूं स्वप्न भयो
 जब वाकूं गर्भस्थिति भई सो वे गंगाबाई जन्मे तब वि-
 नकी मातातो भगवल्लीलामें प्राप्त भई सो गंगाबाई जब
 बढि भई तब वे गंगाबाई श्रीगुसांईजीकी सेवक भई और
 महावनसुं गोपालपुरमें आयके रही हती और विनसुं
 श्रीगोवर्धननाथजी हंसते खेलते बातें करते सब लीलाके
 दर्शन करावते और गंगाबाई तैंसि लीलाके पद बनायके
 श्रीनाथजीके आगे गावति और गंगाबाईनें जितने पद
 बनाये ॥ श्रीविठ्ठलगिरिधरन ऐसी छापधरीहैं और सोळेंसैं
 अष्टाईशमें विनको जन्म हतो और सत्रैंसो छत्तीश वर्ष-
 सुधी वे मृतल पर रही हती एकसो आठवर्ष सुधी रही
 हती और मेवाडमें श्रीनाथजीके संग आई हती सो इन-

की विशेष बात श्रीनाथजीके प्राकट्यमें लिखी है एकदिन श्रीनाथजीने श्रीहरिरायजीकुं सेवादमें कही जो गंगावाईकुं वस्त्र आभूषण अतिसुंदर पहिरायके रातकुं जग-मोहनमें बैठाय देवो तब बैठायदीनी तब रातकुं जग-मोहनमें ते श्रीनाथजी गंगावाईकुं देहसहित लीलामें लगये सो वे गंगावाई श्रीनाथजीके ऐसि कृपापात्र भगव-दीय हती तातें इनकी वार्ता कहा कहिये ॥ वार्ता संपूर्ण ॥ वैष्णव ॥ ५१ ॥ ❀ ॥ ॥ ॥

॥ एक श्रीगुसांईजीके सेवक राजा तिनकी वार्ता सो वे राजाको मन दिवसरात भगवत्सेवामें हतो भगवत् उपयोग विना द्रव्य स्वरचतो न हतो और वृथालाप वृथाक्रिया वृथाध्यान तीनों करके रहत हतो लौकिकमें अवश्य होवे वितनो बोलै, वैष्णवको संग दिवसरात छोड़े नहीं और वैष्णव विना कोईके उपर रीझि नहीं वा राजाके गाममें एव भवैया आयो सो भवैया बहोत चतुर हतो और खेलमें ऐसो चतुर हतो जो सबकुं रीझावे बहूत दिन सूधी वा गाममें रह्यो परंतु वाको राजा खेल देखे नहीं वे भवैया ऐसो प्रयत्न करने लग्यो जो कोई उपायसुं राजा मेरो खेल देखै तो ठीक सो वा भवैयानें राजाके कामदारनकुं मिलके ऐसो प्रयत्न करके राजा खेल देखै ऐसो ठराव क्यो जब वो भवैया रातकुं ख्याल करन लग्यो और सब कामदार तथा राजा खेल देखवे बैठे सो वा भवैयानें बहोत खेल करे और बहूत तन्हेंके स्वांग बनाये परंतु राजा रीझ्यो नहीं ॥ वा

भवैयाकूं मनमें बढो पश्चात्ताप भयो और राजाके मनु-
ष्यनसूं पृच्छन लख्यो जो राजा कोनशी रीतीसुं रीझिगो
सो तुम बतावो तब राजाके खवासनें कह्यो जो वैष्णव
विना राजा औरके ऊपर न रीझिगो तब राजाके मनुष्य-
नके सिखायेतें वे भवैया वैष्णवको स्वांग पेहेरके तिलक
सुद्रा माला धरके राजाकी सभामें आयो तब राजानें उ-
ठके वा वैष्णवकूं साष्टांग दंडवत कन्यो और छातीसुं ल-
गायके मिल्यो और गादीपर बैठायेके आप राजा पंखा
करन लख्यो और वा वैष्णवसुं भगवद्वाता करन लख्यो
और भंडार खोलाय दियो और जो चाहिये सो लेवो
ऐसे कहेके वा वैष्णवकी बहुत टहेल करी यद्यपि राजा
जानतो हतो जो ये भवैया है और वैष्णवको स्वांग बना-
यके आयो है तोहूं राजाको वैष्णव वेषपर ऐसो विश्वास
हतो जैसे साक्षात् श्रीठाकुरजी ऊपर होवै ॥ सो वे राजा
हरीगुरु वैष्णवमें भेद रंचकहुं जानतो न हतो तातें इनकी
वार्ता कहा कहिये ॥ वार्ता संपूर्ण ॥ वैष्णव ॥ ५२ ॥ ॥
॥ श्रीगुसांईजीके सेवक दयाभवैया तिनकी
वार्ता ॥ सो वा दया भवैयानें वैष्णवको स्वांग धरके
और राजाकूं रिझायके और राजासूं विदाहोयके अपने
डिरापर चल्यो ॥ मनमें ऐसो विचार करन लख्यो जो
बहुत दिनकी मेहेनत सफल भई जब रस्तामें पाछे देखे
तो चार स्त्री संग पाछे चली आवतिहै और भवैया
ठाढो रहेतो चार स्त्री ठाढी रही जाएं और वेचले तो
संग चलवै लगजाए ॥ सो देखके वाके मनमें आश्चर्य

भयो ये कौनहै फेर वे भवेया विनखीनसुं पूछवे लग्यो
जो तुम कौनहो और मेरे संग काहेकुं आवत हो जब
वे स्त्री बोलवे लगी जो हम चार हत्या हैं तेरे शरीरमें
सदा रहैं जब तूं मरेंगो तब तोकुं नरकमें लेजाएंगी
और अब तेने वैष्णवको वेष धारण क्योहै जासुं तेरे
शरीरमेंसुं हम बाहिर निकसीहैं वैष्णवसुं हम बहुत दूर रहैं
है वैष्णवकी दृष्टीमें हम आवेंतो भस्महोयजाएहै ये बात
सुनके दयाभवेया पाछें फिरयो और जायके राजाके पावन
परयो और कही जो हमकुं वैष्णव करौ और सब वृत्तांत ह-
त्यानकी कह्यो जब राजानें उठके विन चारखीनकुं देख्यो
वे तुरत भस्महोयगई तब दयाभवेयाकुं श्रीगुसाईंजीको
पत्र लिखदेके अडेल पठायो सो वे दया भवेया जायके श्री-
गुसाईंजीको सहकुं टुंव सेवक भयो और श्रीठाकुरजी पध-
रायके भगवत्सेवा करन लग्यो सो कितने दिन अडेलमें र-
हिकेष्टमार्गकी सेवाकी रीत सीखके फिर वा राजाके पास
जन्मसूची रह्यो और दोनो मिलके भगवद्दार्ता करें और
वा भवेयाकुं ऐसो निश्चय भयो जो वैष्णवधर्मतें अन्य
धर्म सब तुच्छहैं जो मैंने वैष्णवको झूठो वेष पेहेन्यो तो
हैं हत्या दूर भागगई और साचो रहंगो तो श्रीगुसाईं-
जीकी कृपातें निश्चय करके मोकुं भगवल्लीलाकी प्राप्ती
होयगी ऐसै करत करत वा भवेयाकुं भगवल्लीलाकी स्मृती
भई और श्रीठाकुरजी सानुभाव जनावन लगे सो वे दया-
भवेया वा राजाके संगतें परम भगवदीय भयो ॥ वार्ता
संपूर्ण ॥ वैष्णव ॥ ५३ ॥ * ॥ ॥ ॥ ॥

॥ श्रीगुसांईजीके सेवक एक कुणबी गुजरातके वासीकी वार्ता—सो वे वैष्णव तादृशी हतो ॥ श्रीठाकुरजी विनकुं सानुभाव जनावत हते सो वैष्णव चाचाजीके संग श्रीगुसांईजीके दर्शनकुं ब्रजमें गयो रस्तामें एक गाम हतो वा गाममें एक ब्राह्मणी हती वा ब्राह्मणीकुं गलित कोढ़ भयो हतो और कीड़ा पढ़गये हते सो वा ब्राह्मणीको बेटा नदी ऊपर भाकुं धोवेकेलिये लेगयो हतो तब वे कुणबी वैष्णव न्हाय पेहेले धोती धोवतो हतो सो वाकी धोतीके छीटा वा ब्राह्मणीके ऊपर पड़े सो जा ठिकाणे छीटा लगे इतने शरीरमेंसों कोढ़ मिटगयो तब वे ब्राह्मणी वैष्णवके पावन पढी और कह्यो जो मेरे शरीरकी ये व्यवस्थाहै परंतु तुमारी धोतीकी छीटतें मेरो शरीर इतनो नीको भयोहै तब वा कुणबी वैष्णवनें कहीमेंतो झट्टुं तुम ब्राह्मण होयके मेरे पावन मति पढो जब वा ब्राह्मणीनें हाथ जोड़के कही तुमतो बड़े महापुरुषहो मेरो दुःख तुमविना दूसरो कोई दूरकरवेकुं सामर्थ्य नहीं है जासुं मेरे ऊपर कृपा करौ तब वे वैष्णव ब्राह्मणीकुं चाचाहरिवंशजीके पास लेगयो और सब वृत्तांत कह्यो तब चाचाजीनें वाकुं नाम सुनायो और चरणामृत दीयो तब वा ब्राह्मणीको सब कोढ़ मिटगयो और सब अंग नीको भयो जब वह ब्राह्मणी आछी रीतीसुं अपने घरगई वाको शरीर नीको भयो देखके वा गामके लोक सब मिलके चाचाहरिवंशजीके पास आयके पावन पढ़े और सबने नामसुन्यो और पुष्टिमार्गकी रीती शीखे और सब गामके लोग वै-

वैष्णव भये और वे ब्राह्मणी तथा बाकी वेटा वा वैष्णवके संग श्रीगोकुल गये जायके श्रीगुसांईजीके सेवक भये श्रीनवनीतप्रियाजीके तथा श्रीगोवर्धननाथजीके दर्शन करके बहुत प्रसन्न भये और व्रजयात्रा करके श्रीठाकुरजी पधरायके अपने देशमें आये सो वे कुणवी वैष्णव ऐसे कृपापात्र हते जिनकी धोतीके छीटानतें कोढ़ मिटगयो तातें इनकी वार्ता कहा कहिये॥वार्ता संपूर्ण॥वैष्णव॥५४॥

॥ श्रीगुसांईजीके सेवक एक बाईक्षत्रानी की वार्ता ॥ वे क्षत्राणी भोरी बहोत हती और श्रीठाकुरजीकी सेवा भलीभांति सों करत हती और श्रीठाकुरजी विनकुं बालभाव जनावत हते और छातीसुं लपटते और गोदमें बैठते और घड़ी घड़ी भूखे होयके खायवेकुं मागतें और वे बाईकुं बहार जावे देते नहीं और जब वे बाई बाहर जाती तो श्रीठाकुरजी रुदन करते या रीतसुं बालभाव जनावते एकदिन घरमें बिलाई लडवे लगी जब श्रीठाकुरजीनें वा बाईसुं कही मैं बहोत डरपतई ऐसे कहिके वा बाईकी छातीसुं लपट गये जब वा बाईनें कही जो तुमनें पूतना आदिक दैत्य मारेहैं जबतो डरपे नहीं अब काहेकुं डरपतहो तब श्रीठाकुरजी वा बाईसुं बोलें नहीं तीन-दीन सूधी कछु मार्गेइ नहीं जब वा बाईनें बहुत प्रार्थना करके और रोवे लगी जब श्रीठाकुरजी फेर बोलवे लगे जासुं वैष्णवनकुं ऐसे विचार राखनो नहीं॥ श्रीठाकुरजीकुं भूख नहीं लगे है और शीत नहीं लगे और प्यास नहीं लगे ये सर्व सामर्थ्यहैं ऐसे विचारके जो श्रीठाकुरजीकी

सेवा करें हैं विनकी सेवा निष्फल होवें हैं श्रीमहाप्रभुजीनें निबंधमें कह्यो हैं ॥ सो श्लोक ॥ माहात्म्यज्ञानपूर्वस्तुमुद्वृद्धसर्वतोधिकः ॥ स्नेहो भक्तिरिति प्रोक्ता तया मुक्तिर्न चान्यथा ॥ १ ॥ जासुं माहात्म्यज्ञान पूर्वक सुदृढ़ सर्वते अधिक स्नेह श्रीठाकुरजीमें राख्यो चाहिये जैसे कोउ राजा होवै तो हुं राजाकी माताके मनमें ऐसे रहे है मेरो बेटा सुखो होयगो और मेरे बेटाकुं ठंड लगती होयगी यारीतीसुं वैष्णवनकुं श्रीठाकुरजी उपर स्नेह राख्यो चाहिये सो वे वार्द्धक्षत्रानी ऐसी कृपापात्र हती ॥ वार्ता संपूर्ण वैष्णव ॥ ५५ ॥ ❀ ॥ ॥ ॥ ॥ ॥

॥ श्रीगुसांईजीके सेवक एक पटेलकी वार्ता ॥ सो वे पटेल गुजरातके संगमें श्रीगोकुलगये और श्रीगुसांईजीके सेवक भये और श्रीगुसांईजीके लालजी सात श्रीगुसांईजीकुं काकाजी कहते हते सो पटेल विनवालकनके सुखतें मुनके श्रीगुसांईजीकुं काकाजी कहते ॥ वा पटेलकुं ऐसो भोरो जानके श्रीगुसांईजीनें गायनकी सेवा करवेकेलीयें खिरकमें राख्यो ॥ सो वे पटेल गायनकी ऐसी सेवा करतो जैसे गाय सुखी होवें गायनके नीचे झाडतो और नित्य गायनके नीचे रेंती बिछावतो और वे रेंती नित्य बहार काढडारतो नित्य नई नई रेंती बिछावतो वह पटेल मनमें ऐसे विचारतो के गायनके शरीरमें जीव न पडे और गायनकुं ठंड न लगे गायनकी ऐसी टेहेल देखके श्रीनाथजी वा पटेलपर प्रसन्न भये और वह पटेल गायनकुं घास धोयके खवावतो कारण जो गाय-

नके दूधमें रज आवेगी तो श्रीनाथजी कैसे आरोगेंगे सो वे पटेल कोईदिन पातर लेवे जाय और कोईदिन नजाय गायनकी टेहेलमें अवार होयजायतो पातरलेवे नजाय मूखो टेहेल कन्यो करे जब वाकुं श्रीनाथजी लडुवा देवे सो वे पटेल खायके गायकी सेवा कन्यो करे ॥ एकदिन वा पटेलसुं श्रीगुसांईजीनें पूछी जो तूं नित्य पातर लेवे क्युनहीं आवेहें जब वा पटेलनें कही काकाजी महाराज कोईदिन श्रीनाथजी लडुवा देवे जब पातर लेवे नहीं आवुंइ जब लडुवा न देवे तब पातर लेवे आवुंइ ये बात सुनके श्रीगुसांईजी बहोत प्रसन्न भये और कही जो तेरी पातर नित्य खिरकमें पठावेंगे सो वे पटेल नित्य गायनकी टेहेल कन्यो करतो ॥ एकदिन वा पटेलनें कही जो अब मेरी पातर मति पठावो मोकुं श्रीनाथजी नित्य लडुवा देवेंहे ये सुनके श्रीगुसांईजीनें आज्ञा करी जो तुम लडुवा सब खायजावोहो के कछ्छ राखो हो ॥ तब वाने कही आधो लडुवा मेरे पास है जब वे श्रीगुसांईजीनें आधो लडुवा मगायो ॥ देखेंतो शय्याभोगको लडुवाहै जब श्रीगुसांईजी देखके वाके ऊपर बहोत प्रसन्न भये ॥ फेर एकदिन मेघ बहोत वरस्यो हतो जब वे पटेल मूखो रह्यो जब श्रीनाथजी झारीबंटालेके वा पटेलके पास आयके वाकुं लडुवा दियो और झारीबंटा उहां छोडके श्रीनाथजी गये ॥ जब वे पटेलझारीबंटा लेके श्रीगुसांईजीकी बैठकमें लायके श्रीगुसांईजीकुं दीये और कही जो रातकुं श्रीनाथजी खिरकमें भूलगयेहैं जब श्रीगुसांईजीनें आज्ञा

करी अब तुम सिंघपोरपे रखवारी करो तब वे पटेल सिंघपोरपर बैठे रहते एकदिन श्रीनाथजी सिंघपोरतें बहार पधारन लगे तब वा पटेलने नाही कही जो रातकुं गहेनो पेहेरके मतजाओ जो जाओगे तो काकाजी मेरे ऊपर खीजेंगे तब श्रीनाथजी पधारे ॥ तब वह पटेल पा-
 लें गयो जब वृंदावनमें जायके श्रीनाथजीने रास कन्यो तब वा पटेलकुं दर्शन भये और उहां आसूषण जो ब्रज-
 भक्तनके पडे सो सब पटेल बीनके लायो फेर लायके श्रीगुसांईजीके आगे धरे और कही जो श्रीनाथजी माने नहीं हैं और रातकुं मंदीरमेंछुं हजारन स्त्री श्रीनाथजीके संग गई हती जब खबर न पडी वे स्त्री कहाँरहती होएंगी में विनको गहेनो बीनलायोहुं ये सुनके श्रीगुसांईजी बहोत प्रसन्न भये जब श्रीगुसांईजीने मनमें विचार क-
 न्यो जो याकुं स्वाभाविक प्रपंचकी स्मृती मूलगई है और भगवत्स्वरूपमें आसक्ति भई है याकुं गायनकी सेवातें निरोधसिद्ध भयोहै याके भाग्यकी बढाई कहा-
 करनी जिनके अरसपरस श्रीनाथजी होय रहेंहैं विचा-
 रके वा पटेलकुं श्रीगुसांईजीने आज्ञा करी जो तूं सिंघ-
 पोरीकी रखवारी कन्यो कर ॥ जहां श्रीनाथजीजाएँ विनकुं जायवेदीजो तूं नाहीं मतकरियो और तोकुं संग ले जाएँतो जईओ नहींतो मति जईओ ये सुनके वा पटेलने बीनती करी गहेनोखोइ आवेतो कैसे करनो तब श्रीगुसांईजीने कही हमारे घर गहेनो बहोत हैं जब सु-
 नके वह पटेल छुपकर रह्यो और सिंघपोरीपर बैठो रहे-

तो जब श्रीनाथजी पधारते जब वाकुं जगायके कही जा-
ते ॥ और इच्छाहोतीतो संग ले पधारते वे पटेल श्रीगु-
साईजीके ऐसे कृपापात्र भगवदीय भये ॥ वार्ता संपूर्ण ॥
॥ वैष्णव ॥ ५६ ॥ ❀ ॥ ॥ ॥ ॥
॥ श्रीगुसाईजीके सेवक एकविरक्त वैष्णवकी ०
सो वे वैष्णव ब्रजमें पर्यटन करते सो खुकटी मागके
निर्वाह करते ॥ एकदिन कोकिला वनमें रसोई करी वा
दिन डोल उत्सव हतो सो वे भूलगये हते जब
रसोई करखुके तब डोलउत्सव याद आयो जब
बड़ो पश्चात्ताप कन्यो पाछे विचार कन्यो भगवद
इच्छा ऐसी है जब कुंजकी लता बांधके डोल कन्यो और
श्रीठाकुरजीकुं झुलायो और दार वाटी करी हती सो
तीनो भोगनमें दार वाटी समर्पी सो या वैष्णवको ऐसो
भाव देखके श्रीठाकुरजी बहुत प्रसन्न भये और श्रीठाकु-
रजी प्रसन्न होयके श्रीगुसाईजीकुं जताये जब श्रीगुसाई-
जीनें मनमें ऐसी जानिके वा वैष्णवके धन्य भाग्य हैं फेर
एकदिन वे वैष्णव श्रीगुसाईजीके पास गये तब श्रीगुसा-
ईजीनें वा वैष्णवकुं डोलके समाचार कहे तब वा वैष्ण-
वनें कही श्रीठाकुरजी जो कछु मानतेहैं सो आपकी कान-
नतें मानतहैं यामें जीवकी सामर्थ्य कछु नहींहैं सो वे वै-
ष्णव ऐसे कृपापात्र हते जिनके भावतें श्रीठाकुरजी वश्य
होय गए हते सो वा वैष्णवको ऐसो भाव हतो तातें इनकी
वार्ता कहांताई कहिये जाकुं देखके श्रीठाकुरजी प्रफुल्लित
रहते हते ॥ वार्ता संपूर्ण ॥ वैष्णव ॥ ५७ ॥ ❀ ॥ ॥

॥ श्रीगुसांईजीके सेवक एक विरक्त तिनकी ॥
 सो वा वैष्णवनें ऐसो नेम लीयो नित्य गिरिराजकी परिक्रमा करनी ऐसे करते बहुत दिन बीते एकदिन वाके मनमें ऐसी आई कोई दिन श्रीगुसांईजी भोसु बोले नहींहैं सो बहुत चिंता नित्य करे एकदिन वा वैष्णवके पांवमें ठोकर लगी जब परिक्रमा करवे न जायसक्यो वा दिन अन्नकूटको उत्सव हतो सो वा वैष्णवके मनमें ऐसी आई जो या रस्ता ऊपर आज श्रीगुसांईजी पधारेंगे सो वे रस्ता झांख्यो और कांकर बिनडारे फेर गोवर्धन पूजाके दर्शन कीये और फेर श्रीगुसांईजीके दर्शन करवे गयो जब श्रीगुसांईजीनें कही आवो वैष्णव बैठो जब वा वैष्णवनें बिनती करी जो महाराजाधिराज कोई दिन आप भोसो बोले नहींहैं आज कृपा करके बोलेहैं याको कारण कहा जब श्रीगुसांईजीनें कही आज तुम पुष्टिमार्गकी रीतीप्रमाणें चलेहो जासुं हम प्रसन्न भयेहैं जब वा वैष्णवनें बिनती करी जो मैं नित्य गिरिराजजीकी परिक्रमा करहुं जब श्रीगुसांईजीनें आज्ञा करी जो ये तो तेरी देहको साधन करेंहैं और आजतो तैनें श्रीठाकुरजीको सुख विचार्यो है पुष्टिमार्गमेंतो जैसे श्रीठाकुरजी सुखी होवै वैष्णवकुं वैसीही कृती करणी चहीये ये सुनके वे वैष्णव बहुत प्रसन्न भये और सब साधन छोडके सेवा करन लगे सो वे वैष्णव ऐसे कृपापात्र हते ॥ वार्ता संपूर्ण ॥ वैष्णवा ॥ ५८ ॥

॥ श्रीगुसांईजीके सेवक एक क्षत्री ति० ॥
 सो वे क्षत्री हीरानकी धरती परखतो हतो एक वरसमें व-

रसाद न वरस्यो सो वाकी खेतीमें कछु भयो नहीं और सरकारनें मसलके पैसा मांगि सो वाके पास हते नहीं तब सरकारनें वाको घर छुट लीयो वाके घर कछु रह्यो नहीं फेर वाकी स्त्री चरखा कांतके जो कछु पैसा आवतो वासुं निर्वाह करते परंतु दोय मनुष्यनको चित्त ऐसो रहैतो श्रीठाकुरजीकुं श्रम होवैहै ये विचार करके ये परदेश चलयो सो जादेशमें हीरा होते हते वाई देशमें गयो उहां एक वेपारीसुं मिल्यो वासुं ठराव कय्यो जो मैं हीरानकी धरती परखुं तुमकुं मैं जो धरती परखदेबुं सो तुमलेउ जो माल निकसे सो आघो मेरो और आघो तुमारो ऐंसे कइल करायके वासुं धरती लेवाई सो धरती खोदाई ॥ जब माल बहुत निकस्यो ता पाछें वा वेपारीनें वा क्षत्री वैष्णवकुं कछु दियो नहीं फेर वेक्षत्रीवैष्णव दूसरे वेपारीसुं मिले वासुं नकी लिखत पढत करके फेर वा देशमें धरती लेवाई फेर वानें धरती खोदाई जब हीरा बहुत निकसे जब विनसुं आघो माल बाटके अपनैं देशकुं चलयो इतनेमें जो पेहेलो वेपारी हतो वाके घरमें अग्नी लगी सो सब माल जर गयो जब वे वेपारी आयके वैष्णवके पावन पय्यो जो मेरो अपराध क्षमा करो अब मेरे पास कछु रह्यो नहींहै जब वा वैष्णवकुं दया आई फेर वाकुं धरती परख दीनी सो वैष्णवनके ऐंसे धर्महोवैहै जो बुराकरे तासुं भलो करणी फिर वह क्षत्री वैष्णव अपने देशकुं चलयो दो चार नौकर राखके अपने देशकुं चलयो जब रस्तामें एक तलाव जंगलमें हतो वा तला-

वके ऊपर ग्यारे ठग उतरे हते उहां क्षत्री वैष्णवनें डेरा कन्यो और अपने मनुष्यनकुं कही तुम चार जने गाम-मेसु सामग्री ले आवो तब वे मनुष्य गये जब ठगननें ऐसो विचार कन्यो याकुं मारके सब माल लेजाएतो ठीक तब ठग मारवे लगे जब वैष्णवनें कही मोकुं न्हाय लेवे देओ तब ठगननें कही जो भलें ॥ फेर वे वैष्णव तला-वमें न्हायवे लग्यो ॥ उहां न्हायके श्रीगुसांईजीको ध्यान कन्यो श्रीगुसांईजी परमदयालहैं भक्तविरह कातर करुणा मयहैं भक्तनकुं छोड़ै नहींहैं जहां तहां भक्तनके पाछें फि-रहैं जासुं वा क्षत्री वैष्णवकुं वा तलावमें दर्शन दिये जब वा वैष्णवनें वीनती करी जो मेरो कहा अपराधहै तब श्रीगुसांईजीनें आज्ञा करी ये आगले जन्ममें ग्यारें चोर हते और तुम सरकारकी नोकरीमें हते तब तुमनें इनकुं मारे हते अब ये तेरो बैर लेवेकुं आयेंहैं इतनो आछो है जो एक जन्ममें ग्यार जने तुमकुं मारेंहैं नहीतो ११ जन्म तुमकुं लेने पढते और एक एक जन्ममें न्यारो न्यारो बैर लेते वो क्षत्री श्रीगुसांईजीकी आज्ञा लेके बहार आय और विन ठगनसों कही अब तुम मोकुं मारौ ॥ परंतु विन ठगननें श्रीगुसांईजीकी वाणी सुनी हती दर्शन न भये हते वा वाणी श्रवणके प्रतापते विनकी बुद्धी निर्मल होय गई हती जैसे भगवानके पार्षदनकी वाणी सुनके अजामेलकी बुद्धि निर्मल भई हती जब यमदूत अजामे-लकुं मारवे लगे हते तब भगवत् पार्षदननें छुढायो हतो वाही समय जो भगवत् पार्षदननें यमदूतनकुं भगव-

घश सुनायो हतो सो अजामेलनें सुन्यो अजामेलकुं अ-
मृतको विंदु पान कहाँहै सो श्रीमहाप्रभुजीनें जलभेदमें
लिख्योहै ॥ तादृशानांक्वचिद्वाक्यंदूतानामिववर्णितं ॥
अजामिलकर्णनवादिंदुपानंप्रकीर्तितं ॥ १ ॥ ऐसे विनठ
गनकुं अमृतकी बूंदनको पान भयो जब वे ठग कहन
लगे तुमनें तलावमें कोणसुं बातें करीहैं और पहले ज-
न्मको वृत्तांत तुमकुं कौन कहतो हतो सो कृपा करके
कहौ अब हम तुमारे दास होएंगे अब तुमकुं नहीं मारेंगे
और हमारे द्रव्य नहीं चाहिये तुम सत्य बोलो जो को-
नसुं बात करीहै जब वे क्षत्री वैष्णवनें जो बात भई हती
सो कहि दीनी जब वे सब ठग विनके पावन परे और
कही जो हमकुं श्रीगुसांईजीके सेवक करावौ पाछें वे क्षत्री वै-
ष्णव रसोई करके सवनकुं प्रसाद लेवायके अपने गाम आ-
यो और आछे हीरानको श्रीगुसांईजीके लीयें हार करायो
और दशहजारके हीरा बेचढारे सब घरके खरचकी वं-
दोवस्ती करी और फेर अपने श्रीठाकुरजी पधरायके
और स्त्रीकुं संग लेके और विन ठगनकुं संग लेके श्री-
गोकुल आयो फेर श्रीगुसांईजीके दर्शन करे और सब
ठगनकी बात कही जब वे ठग श्रीगुसांईजीकी प्रेमपूर्वक
शरण गये और श्रीगुसांईजीकी कृपातें भगवत्स्वरूप और
श्रीमहाप्रभुजीको स्वरूप और श्रीगिरिराजको स्वरूप
और श्रीयमुनाजीको स्वरूप और ब्रजको स्वरूपनको
विन ठगनकुं श्रीगुसांईजीकी कृपातें ज्ञान भयो सो क्षत्री
वैष्णव ऐसे कृपापात्र भगवदीय हते॥वार्ता संपूर्ण॥वे०॥५९

श्रीगुसाईजीके सेवक एक विरक्त तिनकी वा०
 सो वैष्णव श्रीगोकुलमें रहेतो और चुकटी मागके नि-
 र्वाह करतो और वा गाममें एक क्षत्राणी वैष्णव हती सो
 वाके पास द्रव्य बहोत हतो और विरक्त वैष्णव क्षत्रा-
 णीके घर बहोत जातो और भगवद्वार्ता करतो परंतु
 लोग निंदा बहोत करते एकदिन वा वैष्णवसुं श्रीगुसाई-
 जीनें पूछी जो तूं वा क्षत्राणीके घर क्यूं जायहैं तब वा-
 नें कही जो महाराज भेरो वासुं कछु मतलब नहीं है
 कदाचित् कछु द्रव्यको काम पड़े तो वह काम वासुं नि-
 कसे तब श्रीगुसाईजीनें आज्ञा करी जो वैष्णवकुं द्रव्य-
 पात्रकी खुशामद नकरी चाहिये त्यागीकुं खुशामद न-
 करणी श्रीमद्भागवतमें कइयोंहैं ॥ श्लोक ॥ सत्यांक्षितौ-
 किंकशिपोऽप्रयासैर्वाहौस्वसिद्धेद्युपवर्हणेःकिं ॥ सत्यंज
 लौकिंयुरुधाऽन्नपांश्या दिग्बल्कलादौसतिकिंदुक्कलैः ॥१॥
 चीराणिकिंपथिनसंतिदिशंतिभिक्षां नैवांघ्रिपाःपरश्रुतः
 सरितोऽप्यशुष्यन् ॥ रुद्धागुहाःकिमजितोऽवतिनोपसन्ना
 न्कस्माद्भजन्तिकवयोधनदुर्मदाधान् ॥ २ ॥ ऐसे बहोत
 रीतीसुं वा विरक्तकुं श्रीगुसाईजीनें समझायो परंतु वो वै-
 णव समझो नहीं तब श्रीगुसाईजी परमदयालुहैं वा वैष्ण-
 वकुं संसारमें डूबतो देखके श्रीगुसाईजीनें लौकिक चरित्र
 रच्यो वा वैष्णवकुं कही हमकुं रुपैया पांच हजार उधारे
 चाहिये महिना एकमें पाछे देवेंगे वा क्षत्राणीसों तुम बीच
 पढके तुमारे नामसुं उधारे लिवाय देवो जब वा क्षत्राणीकुं
 कहिकै रुपैया पांच हजार वे वैष्णव अपने नामसुं ले-

आयो सो श्रीगुसांईजीकुं दीने तव लेके रुपैया श्रीगुसां-
ईजीनें धरतीमें गढाय दीने महिना दोढ पीछे वा क्षत्रा-
णीनें वा वैष्णवसुं रुपैया मागे तव श्रीगुसांईजीनें वा वैष्ण-
वसों कही जो हमतो वर्ष दो वर्ष पीछे परदेश जाएंगे जव
रुपैया आवेंगे तव देंगे तव वा वैष्णव सुनके चुप कर रह्यो
जव वा क्षत्राणीनें वा वैष्णवकुं सिपाईनके पेहेरेमें बैठाय-
दियो चुकटि मागवे जाने न दिये और घरमें आवे न
दिये एक बार दर्शन करवे सिपाईके संग जावे देवे तव
मनमें ऐसो विचार कन्यो याकुं बहोत दुःख देऊंगी तो
श्रीगुसांईजी रुपैया देंगे जव वो वैष्णव श्रीगुसांईजीके
दर्शन करवे गयो चार सिपाई संग गये तव श्रीगुसांई-
जीनें पूछ्यो वैष्णव ये कहाहै तव वे वैष्णव रोय पड्या
और अपनी संपूर्ण हकीकत कही जव श्रीगुसांईजीनें
कही वा क्षत्राणी तेरी मित्रहै वाके पास चार पांच लाख
रुपैयाको द्रव्य है खावेवारो कोई है नहीं पांच हजारके
लीयें तोकुं ऐसो हेरान कन्यो अब तुम कैसे करोगे तव वा
वैष्णवनें कही जो एकवार क्षत्राणीके रुपैया चूके तो
जन्मसूधी वाको मुख न देखूंगो तीनदिन भयेहै मैंनें अ-
न्नजल लीयो नहीहै ये सुनके श्रीगुसांईजी बहोत कृपा करि-
के वह द्रव्य कढाय दियो और वा वैष्णवकुं कही जो हमारे
कछ द्रव्य चाहितो न हतो तेरी आसक्ती छुडायवेकेलीयें
इतनो काम करना पड्यो तव द्रव्य लेके वा वैष्णवनें
क्षत्राणीकु दियो और अपने मनमें समझ्यो जो श्रीगु-
सांईजी विना ऐसी कृपा कौनकरे और संसारमें दूबते

नकुं कौन काटै ऐसो विचारके वा वैष्णवनें ऐसो नेम
लियो वा क्षत्राणीको सुख न देखुंगो सो वे वैष्णव ऐसो
कृपापात्र हतो जिनकुं श्रीगुसांईजीनें संसारासक्ति छुड़ाई
॥ वार्ता संपूर्ण ॥ वैष्णव ॥ ६० ॥ ॐ ॥ ॥ ॥

श्रीगुसांईजीके सेवक ब्राह्मण स्त्रीपुरुष देवीके
उपासीतिनकी वार्ता—सो वे ब्राह्मण आगरेमें रहेतो हतो
सो वे ब्राह्मणस्त्रीपुरुषनें ऐसे देवीको मंत्र साधे जो देवी
आयके नित्य मध्यरात्रीमें दर्शन देवै और बातें करे ऐसे
करतकरत बहोत दिन बीते एकदिन चाचाहरिवंशजी
श्रीगोकुलमेंतें आगरेगये सो ज्येष्ठमास हतो धूप बहोत
पड़ती हती सो तापकेलीये रस्तामें अवार होयगई, रात
पेहर गई जब आगरे पहुँचे सो बहोत श्रमित भये सो
वा ब्राह्मणके चोतरापर डेरा क्यो उहां हवा आछी
जानके सोयरहे जब मध्यरात्री भई जब वह देवी ब्राह्म-
णके घर आई देखेतो वा ब्राह्मणके चोतरापर पांच वै-
ष्णव सोयरहेहैं देवी प्रसन्न होयके अपने बड़े भाग्य मा-
नके विन वैष्णवनकुं पंखा करन लगी और मनमें येस-
मझीके ये भगवद्भक्त सूतेहैं सो इनकुं उलंघके कैसें जाउं
और वे ब्राह्मणतो देवीके दर्शनकेलीये बहोत आतुर ह-
तो सो दोनो स्त्रीपुरुष बहोत प्रार्थना करन लगे और
स्तुती करन लगे और आवाहन करन लगे तोहुं देवी
आई नहीं आखीरात चाचाजीकुं देवी पंखा करती रही
जब रात चारघड़ी रही तब चाचाजी उठे और संतदा-
सके घर चले जब देवी भीतर गई विनस्त्रीपुरुषनकुं द-

र्शन दिये जब वे ब्राह्मण हाथजोड़के पूछन लख्यो जो आज काहेकुं रातकुं नहीं पधारे हमारो कहा अपराधहै जब देवीनें कही जो तुमारे घरके आगे वैष्णव सूतेहते में विनकुं पंखा करती हती तव वा ब्राह्मणनें हाथजोड़के कही जो वैष्णव तुमसों अधिकहैं कहा ॥ तव वा देवीनें कही जो वैष्णव त्रिलोकीसुं अधिकहैं साक्षात भगवान जिनके वशमेंहैं और मेरे जैसे देवता तो विनकी टेहेल करवेकी अभिलाषा राखेंहैं परंतु येटेहेल मिले नहींहैं ये सुनके वे ब्राह्मण बोल्यो जो तुम कृपाकरके ऐसे वैष्णव-नके दर्शन हमकुं करावो जब वा देवीनें कही जो मैं तु-मारे ऊपर प्रसन्न भईहुं और तुमारो साचो भाव मेरे-मेंहै जासुं मैं तुमकुं कहूँहुं जो तुम दोउजने वा वैष्णवके पास जायके श्रीगुसांईजीके शरण जावो जब वे ब्राह्मण स्त्रीसहित संतदासजीके घर जायके चाचाहरिवंशजीकुं मिले और सब वत्तांत कह्यो तव विनदोउनकुं चाचा-जीनें नाम सुनायो और मारगकी रीती सिखाई फेर विनदोउनस्त्रीपुरुषनकुं चाचाजी श्रीगोकुल ले गये और श्रीगुसांईजीके दर्शन कराये और सब प्रकार जणायो तव श्रीगुसांईजीनें कृपाकरके विन स्त्रीपुरुषनकुं नाम निवेदन करायो जब वे स्त्रीपुरुष श्रीनवनीतप्रियाजीके दर्शन करके बहोत प्रसन्न भये और श्रीमदनमोहनजीकी सेवा माथेपधराई और सेवा करन लगे और श्रीनाथजीके दर्शन श्रीगुसांईजीके संग जायके करे सो वे ब्राह्मण और ब्राह्मणी बहोत प्रसन्न भये तव श्रीगुसांईजीसुं विदा होयके

आगरे आये और एक महिनासूधी चाचाहरिवंशजी हमारे पास रहें ऐसी वीनती श्रीगुसांईजीकुं करके चाचा-जीकुं संग ले आये जब चाचाहरिवंशजीनें कृपाकरके विनकुं मारगकी रीती सिखाई सो वे स्त्रीपुरुष श्रीगुसांईजीके ऐसे कृपापात्र भये ॥ वार्ता संपूर्ण ॥ वैष्णव ॥ ६१ ॥

॥ श्रीगुसांईजीके सेवक कृष्णदासतथाईश्वर-दास दोउ भाईकी वार्ता—सो वे दोनो भाई निष्किंचन होते और सदा श्रीगुसांईजीके पास रहते और श्रीगुसांईजी परदेश पधारते तो संग जाते और जलघराकी सेवा करते होते और दोउ भाई अफीम बहोत खाते होते ॥ एकदिन श्रीगुसांईजीनें विनकुं अफीम खाते देखे जब श्रीगुसांईजीनें विनकुं कही तुम अफीम छोड़देवो विननें वीनती करी महाराज अफीममें कहा दोषहै तब श्रीगुसांईजीनें आज्ञा करी जो अफीम भगवत्स्वरूपकुं सुलावेहैं और अफीम पुरुषार्थ घटावेहैं और तत्त्वनिश्चयकुं सुलायके अतत्त्वमें मन लगावेहैं और जब अफीम न मिले तब कोई बातमें चित्त नहीं लगेहैं ये बात सुनके विन दोउन भाईनें अफीम छोड़दीनी और भगवद्रसमें छुके रहते विनकुं सदा भगवद्रसको अमल रहेतो जासुं भगवद्वार्ता विना दूसरी बात नहीं करते सो वे दोउभाई श्रीगुसांईजीके ऐसे कृपापात्र भगवदीय होते ॥ वार्ता संपूर्ण ॥
॥ वैष्णव ॥ ६२ ॥ * ॥ ॥ ॥ ॥

॥ श्रीगुसांईजीके सेवक एक साहुकारके बेटाकी बह्वकी वार्ता—सो वे साहुकारके बेटाकी बह्व सूरतगाममें

रहेती हती बाकी रूप बहोत सुंदर हतो और वे सती हती एकदिन अपने घरमें क्वाड लगायके नहाती हती सो एक म्लेच्छ पादशाहको नौकर घोडापर बैठके जातो हतो सो बाकी नजर वा स्त्रीके ऊपर गई और देखके कामातुर भयो तब घोडा कुदायके बा के घरके भीतर जायपय्यो सो वे स्त्री नग्न नहाती हती बाकी हाथ पकरलियो जब वह स्त्री बोली इतनी तसती काहेकुं लेहो मैं तुमारी चाकरहुं तुम कहो जैसे करुंगी अबी मोकुं वस्त्र पेहेरे लेवे-देवो ये मुनके वह म्लेच्छ प्रसन्न भयो और कही जो तुम कपडा पेहेरके हमारे संग चलो ये कहेके बा स्त्रीको हाथ छोडदियो बा स्त्रीने कपडा पेहेरके और बा म्लेच्छके मुखमें एक तमाचो मारके एक कोठामें क्वाडदेके चली गई तब म्लेच्छ सरमायके घर गयो फेर मनमें ये विचार कय्यो जितनो द्रव्य अपने पास है खरचके या लुगाईसुं विवाह करनो याकुं छोडनी नही ऐंसे विचारके उपाय हूढवे लग्यो बा स्त्रीके घरके पास एक डोकरी रहेती हती बहोत गरीब हती बा डोकरीसुं बा म्लेच्छनें पेहेचाण करी और नित्य बाके घर जाय ॥ कोईदिन आठ आना कोई दिन रुपैयो कोई दिन दो रुपैया बा डोकरीकुं दे आवै ऐंसे करते करते बा डोकरीसुं कही जो या सेठके बेटाकी बहूको नाम और बापको नाम सासु सुसरा धणी याको नाना नानी मामा मामी सबको नाम और याके शरीरके चिन्ह और बाकी अवस्था और जन्मको वरस तथा महिना दिवस याकुं पृछके मोकुं लिखायदे तो पचाश

मोहर देऊंगो तब वा ढोकरीनें कबूल कन्यो और नित्य वाके घर जाय और वा बहूको तेलकांकी करे और सब बातें पूछे और आयके वा स्लेच्छकूँ लिखाय देवै ऐसे करते जब सब वृत्तांत लिखाय चुकी तब वा स्लेच्छनें एक वेश्याकी छोरी मोललीनी और साहुकारके बेटाकी बहूको नाम हतो सो नाम धन्यो और बाकुं सब सगानके नाम लिखाय दिये जब वह वेश्याकी बेटी दुशार भई सो वा साहुकारके घरके पाछे वा वेश्याकी बेटीकुं ठाडी राखी और सूबाके आगे जायके पुकान्यो जो असुकी साहुकारके बेटाकी बहू मेरे संग सुसलमान होवैकुं खुश है और मेरे संग पर्णवेकुं खुश है सो वाके घरके पाछे ठाडी है बाकुं सरकार बुलायके पूछलेवै जब हाकमनें बाकुं बोलायो और वे बात सब पूछी और सगानके सब नाम लिखलिये और स्लेच्छ बोल्यो ये पाछे फेर बदल जायगी और सुसराके घर चली जायगी जासुं सरकार पकी करलेवै जब वा हाकमनें वासुं पकी लिखत करलीनी फेर बाकुं रजा दीनी फेर वा स्लेच्छनें वेश्याकी बेटीकुं वेश्याके घर पठाय दीनी और पंदरे दिन पाछे वा सूबाके आगे पुकार करी जो वा साहुकारके बेटाकी बहूनें मेरे संग खान पान करके फेर वाके घर गई है तब सूबाने हुकम करके वा बहूकुं पकड़ाई फेर वाको सुसरा वाको बाप और सब गामको पंच एकट्ठे होयके वा सूबाके पास गये परंतु सूबाने मानी नहीं कह्यो ये बाई मेरे पास आयके लिखाय गई है बहोत तकरार भई तब वाके सुस-

रानें कही ये कोईदिन बहार नीकसी नहींहै जासुं हम दि-
ल्लीमें अकबर पादशाहके पास पुकारेंगे जहांसूधी हमारो
दिल्लीमें न्याय नहांवे तहांसूधी वा बहूको धर्म भ्रष्ट नहोवे
और म्लेच्छ या बहूकुं स्पर्श नकरे ऐसे सूवासों नक्की कर-
लियो फिर सूवाको बंदोवस्ती लेके दिल्ली गये तब अकबर
पादशाहने न्याय कज्यो वा म्लेच्छके लाभमें हुकम
कज्यो जब वे बहू ऊंचे स्वरसुं रोवन लगी और कहेन
लगी ॥ हे ईश्वर जो तूम सत्य होतो मेरे प्राणलेखो में या
वातमें कछु जानत नहींहुं वाकी व्यवस्था देखके दिल्ली-
पतीके मनमें ऐसी आई जो वा स्त्रीको मन जो म्लेच्छमें
मोहित होतो तां ऐसी रुदन न करती जासुं प्रभु मेरे न्या-
यमें खामी नपांड तो बहोत आछो सो परमेश्वर मेरो
धर्म राखेंगे ऐसे विचारके हुकुम दीयो और कचेरीमें ऐसो
कह्यो जो या न्यायमें कछु खामिहै वरोवर नहीं दीसे है॥
फेर वा म्लेच्छके संग कर दिनी सो म्लेच्छ कचेरीसुं ले
चल्यो और वे बहू ऊंचेस्वरसुं रुदन करे और छाती कूटे
हजारन लोक तमाशा देखवेकुं एकट्ठे भये वा बहूकुं म्ले-
च्छ ले चल्यो वाई दिन श्रीगुसाईंजी श्रीविठ्ठलनाथजी
दिल्ली पधारे हते जहां श्रीगुसाईंजीको डेरा हतो वा रस्ता
होयके वो म्लेच्छ निकस्यो और वह स्त्री रुदन करती हती
और बहोत मनुष्यनकी भीड संग हती जब श्रीगुसाईं-
जीनें देखी और पूछयो जो ये कहाहै जब सब वृत्तांत सुन्यो
तब वा तुरककुं और वा बहूकुं बुलायो और सब समा-
चार पूछे और मुनके पृथ्वीपतीकुं खबर कराई जो हम

याको न्याय पंदरें दिनमें करदेवेंगे ये सुनके पृथ्वीपती प्रसन्न भयो और कही जो एक महिनाके भीतर जो श्रीगुसांईजी करें सो न्याय मेरे कबूल है ऐसे कहेके वीरवल दिवानकुं श्रीगुसांईजीके पास पठायो सो वीरवलनें वीनती आयके करी ये सुनके श्रीगुसांईजीनें स्लेच्छकुं और ठिकाणे रहेवेको द्रुकूम दियो और वा बहकुं सासु सुसरके पास राखी और दोउनकुं बुलायके विनकी सब हकीकत सुनी फेर एकदिन श्रीगुसांईजीनें दो पीजरा मंगाये एक पीजरामें वा तुरककुं बैठायो एक और पीजरामें वा बहकुं बैठाई और दोनु पीजरा मैदानमें धराय दिये और आखीरात वे पीजराकी पास कोई मनुष्य जायनहीं ऐसी बंदोबस्ती करदीनी और एक मनुष्य दिल्लीपतीकी खातरीको छानो छानो रातकुं वा पीजरेके पास बैठायो जैसे दो उनकुं खबर न पडे ऐसी रीतीसुं वे मनुष्य बैठो रह्यो फेर वा पीजरामें मध्यरातपीछेवह बह बोली वा स्लेच्छकुं कही जो अब मैंतेरी भईहुं और तेरे संग जन्म काढ़ंगी जासुं कछ तुमारो पराक्रम जाणुं तो मेरो चित्त प्रसन्न होवै जो तुमनें कैसी रीतीसों ये उपाय रच्यो सो तुम मोसों कहो तो मोकुं धीरज आवै तो मेरे मनकुं धीरजदेउं मैंने कोईदिन तुमकुं देख्यो नहिं है जो तुमारे पराक्रम नहीं कहोगे तो मेरे प्राण पीजरामुं माथा फोडके कांठ डारुंगी जब वो स्लेच्छ सुनके बहोत प्रसन्न भयो और बोल्यो जो तुम मेरे पराक्रम अब सूधी जानें नहीं है जो तोकुं कछ खबर है नहीं तोहुं इतनो कर दिखायो

हैं फेर वा म्लेच्छनें सब वृत्तांत कह्यो वा डोकरीकी और
 वा वेश्याकी छोरीकी सब रीती जैसी बनीहती सबकही॥
 ये सुनके वे बहू बोली अब मेरे प्राणरहेंगे अब तेरे वश
 होयके तेरे पास आवूंगी ये सुनके वे म्लेच्छ प्रसन्न भयो
 और फेर आपणी बडाई करनलख्यो तब वे मनुष्य जो
 छिपके बैठो हतो वानें दोननकी वार्ते आखीरात भई हती
 सो सब लिख लीनी हती जब सवारो भयो जब श्रीगुसां-
 ईजीनें दोनो पीजरा संगायें और वे मनुष्यनें लिख्यो
 हतो सब वांच्यो जब श्रीगुसांईजीनें वे दोनो पीजरा और
 वे लिख्यो हतो सो पृथ्वीपतीके पास पठाय दीये सो अ-
 कबरपादशाह ये लिखत वांचके वा तुरककुं जन्मकैद दीनी
 और वा सूबाकुं दूर कियो और सूवासों कही जो जासमें
 ये स्त्री तेरे पास लिखायवेकुं आइहती वा इसमें तेनें या
 स्त्रीके वापकी और सुसराकी बुलायके सही क्युं न लीनी
 और वा वेश्याको और डोकरीको घर लूटलियो और
 वा बहूकुं छोडदीनी जब वा बहूनें अपने सगानसों कही
 जो मोकुं श्रीगुसांईजीनें जीवती राखीहैं जासुं मैं इनकी
 सेवक होउंगी फेर वह बहू श्रीगुसांईजीकी सेवक भई और
 वाके सासुसुसरा और माबाप वाको धणी और जितने
 वाके संग गये हते सब श्रीगुसांईजीके सेवक भये और
 श्रीठाकुरजी पधरायके अपने देशकुं आये सो वे बहू अपने
 सत्यमें रही तो वाके संगसुं सब वैष्णव भये सो बहू ऐसी
 कृपापात्र हती ॥ वार्ता संपूर्ण ॥ वैष्णव ॥ ६३ ॥ ❀ ॥
 ॥ श्रीगुसांईजीके सेवक हरिदास स्ववास स-

नोडिया तिनकी वार्ता ॥ सो वे हरिदास श्रीगुसांईजीकी खवासी करतेहते सो हरिदासकुं श्रीगुसांईजीनें दोबातनकी शिक्षा दीनी ॥ एकतो हमारे द्रव्यको स्पर्श न करनो और एक परस्त्रीसों एकांत बात न करनी हमारो द्रव्य स्पर्श करेतें बुद्धी भ्रष्ट होय जाय ॥ और परस्त्रीके एकांत करेतें चित्त चलायमान होवै सो भगवदावेश हृदयमें न होवै ॥ सो हरिदासनें जन्म पर्यंत श्रीगुसांईजीकी आज्ञा पाली ॥ और एकदिन हरिदासनें श्रीगुसांईजीसों वीनती करी जो मेरे श्रीमद्भागवत सुनवेकी इच्छा है तब श्रीगुसांईजीनें आज्ञा करी जो तुम उज्जेनमें जायके कृष्णभट्टजीके पास श्रीमद्भागवत सुन आवो जब हरिदास उज्जेन गये और कृष्णभट्टजीसों कही जां मोकुं श्रीमद्भागवत सुनाओ तब श्रीकृष्णभट्टजीनें वेणुगीतको प्रसंग सुनायो सो ॥ श्लोक ॥ बर्हापीडनटवरवपुःकर्णयोःकर्णिकारं विभ्रद्वासःकनककपिशिवैजयंतीचमालाम् ॥ रंध्रान्वेणो रथरसुथया पूरयन्गोपद्विर्द्विदारण्यस्वपदरमणं प्राविशद्गीतकीर्तिः ॥ १ ॥ या श्लोककी सुबोधिनीको प्रसंग जामें तीनप्रकारकी सुधाको वर्णन क्योहै ॥ एकतो सर्वभोग्या सुधा और दूसरी देवभोग्या सुधा और तीसरी भगवद्भोग्या सुधाको स्वरूप श्रीठाकुरजीनें वेणुगीतमें वर्णन करके ब्रज भक्तनकुं आपके स्वरूपको बोध करायो और वर्णन करवेकी सामर्थ्य दीनी ये प्रसंग हरिदास सुनके मूर्छा स्थायगये सो एक पहेर पाछे चेतन भये फेर हरिदासजीनें कृष्णभट्टसों कही अब श्रीमद्भागवतको

प्रसंग और सुनाओ तब कृष्णभट्टजीनें कही जो मोकुं अव-
काश नहीं है॥ और मनमें कृष्णभट्टजी डरपे जो इनकी दश-
मी अवस्था होय जायगी तो श्रीगुसांईजी खीजेंगे तब कृष्ण-
भट्टजीनें हरिदासजीसों कही तुम जायके श्रीगुसांईजीकी
सेवा करौ फेर हरिदासजी आयके श्रीगोकुलमें श्रीगुसां-
ईजीकी खवासी करन लगे ॥ प्रसंग ॥ १ ॥ एकदिन हरि-
दासजीनें एक साचोराके घरको वैगणको शाकलियो
हतो जब हरिदासजीके मनमें ऐसी आई जो मोकुं इतने
वर्ष भयेहैं श्रीगुसांईजीकी सेवा करुहुं और कछु पगार
नहीं लेउहुं जासुं कछुक द्रव्य श्रीगुसांईजीको लेके चल्यो
जाउं तो ठीक जब श्रीगुसांईजीकी बहूजीके आभूषण
एक हजार रुपैयाके लेके उहांसुं चले सो हरिदासजी
हंदावन होयके और आगे चले सो एक तलाव
हतो उहां एक साधूकी जगह हती उहां हरिदास
सामान धरके और खरचुं गये और तलाव ऊपर न्हाये
तब उहां पवन आई और ब्रजकी रज उडके हरिदासके
मुखमें पडी जब हरिदासजीकी बुद्धी शुद्ध भई और पेट-
मेंसुं सब आसुरावेष निकस गयो तब हरिदासकुं ऐसी
पश्चात्ताप भयो मैंनें कहा काम कन्यो जब हरिदास गा-
ठही लेके श्रीगोकुल फेर आये और आयके श्रीगुसांई-
जीकुं आभूषण दिये और बीनती करी जो मेरी बुद्धी ऐसी
क्युं भई तब श्रीगुसांईजीनें आज्ञा करी जो हमारे सेवक
और हमारी ज्ञातीके भट्ट और हमारे जलधरिया प्रचा-
रक रसोइया मुखिया भितरिया तिनके घर हमारौ वि-

नाप्रसादी द्रव्य जायहै विनके घरको जे कोई वैष्णव
खावै विनकी बुद्धी ऐसी होवै जैसैं तुमारी भई ॥ हरी गुरु
वैष्णवमें विनकी विषम बुद्धी होयजायहै ॥ जहांसूधी तु-
मारे पेटमें वा साचोराको साक रह्यो तहांसूधी तुमारी
बुद्धी बिगडी रही जब तुमारे मुखमें भगवद इच्छातें ब्रज
रज पडी और तुमकुं उलटी भई जब वे अंश निकस
गयो तब तुमारी बुद्धी निर्मल भई यातें सब वैष्णवकुं गुरु
तथा श्रीठाकुरजीके अनप्रसादीद्रव्यको ऐसो डर राख्यो-
चहिये सो वे हरिदास श्रीगुसांईजीके ऐंसे कृपापात्र हते
॥ वार्ता संपूर्ण ॥ वैष्णव ॥ ६४ ॥ ❀ ॥ ॥ ॥

श्रीगुसांईजीके सेवक प्रेमनिधिमिश्रकी वार्ता
सो प्रेमनिधिमिश्र आगरामें श्रीगुसांईजीके सेवक भये
और श्रीठाकुरजी पधरायके सेवा करन लगे और प्रेम-
निधिमिश्र विशेष करके अपरसमें रहते यवनकी बस्ति
जानके बहार नहि निकसते और प्रेमनिधिमिश्रको ऐंसी
नेम हतो सवापहर रात रहै गागर कंतानमें बांध राखते
सो गागर लैके जमुनाजीपैं जाय और नहायके फेर गा-
गर भर लावते सो एकदिन बरसात बहुत भई जहांतहां-
कीच भई तब प्रेमनिधीकुं चिंता भई जो अधिरामें जहां-
तहां पांव पडजायगो और दिनकुं म्लेच्छ छीजाएंगे या
चिंताके लीयें आखीरात नीद न आई सो वाकि चिंताको
देख श्रीगोवर्धननाथजी सहि न सके जब सवापेहेर रात
रहि तब प्रेमनिधि यमुनाजीपैं चले घरसुं बाहर निकसे
तो एक दश बरसको छोरा मसाल लेके आवेहै तब प्रेम-

निधिनं जानि ये कोईको पोंचायके जायहै याके पाछें पाछें जाउंतो ठीक जहांसुधि ये या रस्तापें जाय तहां-सुधि याके पाछें चल्यो जाउंगो फिर जायगो तब यमुना-जीपें जाउंगो ऐसे करतेवे छोरो यमुनाजीसुधि आयो पीछे अंतर्धान होयगयो तब वाकुं बड़ो आश्चर्य भयो ये कौन होयगो कहाहोयगो कोई भूत प्रेतकी सामर्थ्य तो नहींहै जो मेरिदृष्टिमें आयसके ऐसे विचार करन लग्यो फेर न-हायके गागरभरके प्रेमनिधि चले तब मसाल लेके वह छोरा फेर आयगयो तब विचार कन्यो जो यासों पूछं कौनहैं पांचसातपेंड चल्यो इतनेमें एक कोसभर घरहतो सो आय गयो कछु पूछ सक्यो नहि तब वह छोरा चल्यो गयो फिर यानें घरमें विचार कन्यो जो कोसभर रस्ता एक पांचसातपेंडमें आय गयो ये कार्य श्रीनाथजीके हैं जासुं बड़त पश्चात्ताप भयो और वा छोराके रूपमें मन लग रह्यो और नेत्रनमेसुं जल आवै लगगयो सो वे प्रेम-निधि मिश्र ऐसे श्रीगुसाईंजीके कृपापात्र हते जिनके लीयें श्रीनाथजीकुं मसाल लेनी पड़ी ॥ प्रसंग ॥ १ ॥ और प्रेमनिधि कथा ऐसी वांचते जो कोई सुनवे आवतो वाको मन हरणहोयजातो और भगवत्स्वरूपको ज्ञान होयजातो जासुं स्त्री और पुरुष बड़त मनुष्य कथा सुनवेकुं आवते ॥ सो ये बात वा प्रेमनिधीके परोसी जो दुष्ट हते विननसुं सही न गई, विनदुष्टनने जायके पृथ्वीपतीसों पुकार करि तब पृथ्वीपतीनें चोबदार पठाये तब वाहीसमय प्रेमनिधीनें न्हायके उत्थापन किये हते और झारि उठाई हती और

दूसरि भरवेकुं विचार करते हते तब चोबदारनैं जायके पकड़के पृथ्वीपतीके पास लेगये और श्रीठाकुरजी जल विनारहेगये तब पृथ्वीपतीनैं पूछी तुम कथा बांचोहो जो स्त्रीनको क्यौ आवे देवोहो तब प्रेमनिधि बोले जहां भगवत्कथा होवेहैं जो सुनवे उहां आवे विनको उठाय देनो और विनको धमकावनो और विषयदृष्टिसौ देखनो और भगवन्नाम सुनवेमें प्रतिबंध करनो यामें दोष बहुत लगेहैं जासुं मैं कोईको नाहिं नहिं कहूँ तब पृथ्वीपतीनैं कहि तुमकहो सो बात और है ओर तेरी गलीके लोगननैं कहि सो बात और है जहां सूधी निर्धार नहिं होयगो तहांसूधी तुम नहिं छुटोगे ऐसे कहिके विनकुं कैद पठायदियो तब श्रीठाकुरजीनैं पृथ्वीपतीको इष्ट जो पीर बाकोरूप धरके और पृथ्वीपती रातको सूतो हतो जहां गये तब स्वप्नमें बाकुं कहि सोकुं प्यास लगीहै वानें कहि आप जल पीवो तन्हें तन्हें जल मेरे घरमेंहैं अनेक प्रकारकी सुगंधिवाले जलहैं तब श्रीठाकुरजी बोले कौन पियावेगो तब वो पृथ्वीपती बोल्यो जो आप फरमावोगे सोई पियावेगो तब श्रीठाकुरजीनैं बाकुं लात मारी और कहि तु मेरीबात चित्त देके सुनैं नहिं जाके हाथको मैं जल पिछुं बाकुं तेनैं कैद कन्योहैं ऐसे वचन सुनकेवह पृथ्वीपती उठ बैठी तब मनुष्य पठायके वा प्रेमनिधि मिश्रकुं कैदमेंसुं बुलायो और उठके वाके पांव पकड़ लीये और कहि मेरे अपराध क्षमा करौ और साहेब प्यासे हैं तुम जायके जल प्यावो औरके हाथको नहिं पीवैहैं एक तुममें

रीझें जासुं तुम जायके साहेबकुं जल प्यावो और मैं
तुमारे उपर राजीहूं जैसे कथा वांचोहो तैसे वांचो और
कोई देश कोई गाम मैं तुमारि भेट करूं सो लेवो तब
प्रेमनिधि बोले हमकुं कछु नहिं चाहिये द्रव्य पायके को-
ईको आछो नहिं भयो है जिननें द्रव्य पायेंहैं विनकि
बुद्धि स्थिर नहिं होवैहैं विनको बहुत प्रकारके बिगाड
हावहें जासुं मैं द्रव्य नहिं छिड़ंगो तब पृथ्वीपति बहुत
हरप्यो और कही कछु फरमावो तब प्रेमनिधीनें कही
तुम कीई दिन मोकुं बुलाइयो मती ॥ येहि मागुं तब
दोचार मनुष्य और मसाल संग देके वाही समें प्रेमनिधी
जीको घर पठाये तब घर जायके और न्हायके झारि
भरि तब श्रीठाकुरजीकुं धीरज आई और शांत भये वे
प्रेमनिधिमिश्र श्रीगुसांईजीके ऐसे कृपापात्र हते ॥ वार्ता
संपूर्ण ॥ वैष्णव ॥ ६६ ॥ ॥ ॥ ॥ ॥

॥ श्रीगुसांईजीके सेवक ब्राह्मण स्त्रीपुरुष तिन-
की वार्ता ॥ सो वे ब्राह्मण इटाए गाममें रहते हते सो
देविउपासि हते रातकुं देवि विनके पास आवती और
एकदिन चाचाजी इटायामें गये रात बहुत गई जब ब्रा-
ह्मणके चौतरापें डेरा किये सो उहां सोयरहे तब रातको
देवि आई सो वैष्णवको उल्लंघन नकरसकि उहां ठाडी
रहि विष्णुकि माया जो देवि सो वैष्णवको स्वरूप आछि
रीतीसुं जानति हति सो पाछी गई और वे ब्राह्मण अनेक
प्रकारके मंत्र तथा जप तथा आवाहन करन लग्यो जब
रात दोघडि रहितब चाचाजी उठके चलेफेर देवि वा ब्रा-

ह्राणके घरमें गई तब ब्राह्मणनें पूछी क्युं रातको नहिं पधारे
 तब देवीनें कहि चोतरापर वैष्णव सोयेहते विनको उल्लंघन
 कैसें करुं तब वा ब्राह्मणनें पूछी वैष्णव कहा तुमसुं बढेहै
 ॥ तब देवीनें कहि अनन्य वैष्णव सबतें बढेहै इनतें वडो
 कोई नहिं तेतीस करौड देवता विराटके रोमरोममें है
 सो विराट भगवान ब्रह्मांडरूपहैं ऐसे अनंत कोटि ब्र-
 ह्मांड श्रीठाकुरजीके एक एक रोममेंहैं ऐसे भगवानको
 जिनने वस करेहैं ऐसे जो वैष्णव तिनसों वडो कौनहै जि-
 नके पाछे पूर्णपुरुषोत्तम फिरेहैं तब ब्राह्मणनें कहि मोकुं
 वा वैष्णवके दर्शन करणेहैं तब देवीनें कहि गाम बाहर
 जावो, अभी तुमकुं जाते मिलेंगे तब वे ब्राह्मण जायके
 चाचाजीसों मिले और कहि जो मेरे घर पाछे पधारे
 और सब बात कही तब चाचाजीनें कहि हम दशपंद्रे दिन
 पीछे आवेंगे और वा ब्राह्मणको एक उपरना दियो कहा
 जो वा देवीको ये उपरना दीजो फेर ब्राह्मण घरमें आ-
 यके एक छुटीपैं उपरना धरदियो और न्हायके गायत्री
 जप करन लग्यो और वा ब्राह्मणकी स्त्री रसोई करन
 लगी तब पवनचल्यो सो उपरना उडके वा ब्राह्मणके
 माथे उपर जाय पढयो तब वाकि लुभाई वा ब्राह्मणकुं
 कुतिया जैसी दीसवे लगी तब वो ब्राह्मण बोल्यो तु कुति-
 या क्युं होयगईहैं वा स्त्रीनें विचार क्यो जो याको कहा
 भयोहै ये बाबरोतो नहिं भयोहै तब वा ब्राह्मणनें माथेसो
 उपरना उतारलियो फेर वे स्त्री बाकुं मनुष्य जैसी दीस-
 वे लगि तब वा ब्राह्मणनें विचारी या उपरनामें चम-

त्कार है तब वा लुगाईसुं कहिये उपरना ओढके तूं मोकुं देख तब वा लुगाईनें उपरना ओढके देख्यो तब वा ब्राह्मण बाकुं गधाजेसो दिस्यो तब वा लुगाईनें कहि तुम मोकुं गधाजेसें दिसोहो तब ब्राह्मण उपरना ओढके बजारमें चलयो सो कोई गधा कोई कुत्ता कोई घोड़ा कोई उंट ऐसे अनेक प्रकारके पशुदीसें परंतु मनुष्य कोई न दीसें सो आखे गाममें फीरे दोजने एकदुकानपें मनुष्य देखे तब विनकुं जायके पूछि जो तुम कौनसे घरमें हो विननें कहि हम वैष्णवहैं और श्रीगुसांईजीके लेवकहैं और तूं क्युं पूछिहैं तब ब्राह्मणनें सब बात कहि तब वे वैष्णव पछतायवे लगे जो चाचाजी या गाममें आये हमकुं तो मिलेहुं नहिं अब आवे तो हमकुं खबर करियो फिर वा ब्राह्मणनें मनमें विचार क्योकरे जो अब चाचाजी आवे तो मैं वैष्णव होबुं फिर थोडेदिन पीछे चाचाजी आये सो वा ब्राह्मणके घर उतरे और दोनो स्त्रीपुरुषनको चाचाजीनें नाममुनाये फिर दोनो जेने वैष्णव भये श्रीगोकुलमें आयके श्रीगुसांईजीकी कृपाते श्रीनवनीतप्रियाजीके दर्शन किये फिर श्रीगुसांईजीके मुखसों कथा सुनि फिर श्रीनाथजीके दर्शन करे और श्रीठाकुरजी पधरायके इटायमें आयके भगवत्सेवा करन लगे और कितनेक दिन बीते पीछे श्रीठाकुरजी विनकुं अतुभव जतावन लगे वे ब्राह्मण श्रीगुसांईजीके ऐसे कृपापात्र हते जिनको श्रीगुसांईजीनें चाचाजीद्वारा प्रमेयबल दिखायके अंगीकार करलीये ॥ वार्ता संपूर्ण ॥ वैष्णव ॥ ६६ ॥

श्रीगुसांईजीके सेवक श्यामदास विरक्तकी ०

सो वे श्यामदासके ऊपर श्रीगुसांईजीकी संपूर्ण कृपा हती और श्रीठाकुरजी अनुभव जनावत हते एकदिन लालदास ब्राह्मण श्रीगुसांईजीको सेवक भयो और लालदासनें वीनती करि महाराज में कैसे करूं मेरो चित्त स्थिर नहिं रहेहै तब श्रीगुसांईजीनें कहि जो तुम एक वर्षसुधि श्यामदासको सत्संग करौ तब लालदासनें श्यामदाससों कहि जो मैं तुमरो एकवर्षसुधि सत्संग करूंगो श्रीगुसांईजीनें आज्ञा करि है ॥ तब श्यामदासनें कहि मेरे परदेश जानोहैं तब लालदासनें कही मैडूं तुमारे संग तुमारी टेहेल करतो चलूंगो तब वे श्यामदास चले लालदास विनके संग चले रस्तामें एक गाम आयो वा गाममें एक वैष्णवके घर मंडाण हतो वानें वाई दिन पांचसे मनुष्य जिमाचवेको विचार कन्यो हतो सो विननें श्यामदास तथा लालदासकुं न्योतो दियो तब दोनो जने प्रसाद लेवे गये उहां जायके बैठे सो श्यामदासको पातलमें सब कीड़ाकीड़ासे दीसे तब श्यामदासकुं श्रीठाकुरजीनें ऐसी जताई ये द्रव्य कन्याविक्रयकोहै सो मैं कोईदिन अंगिकार करूं नहिंहुं और याहीते ये सामग्री मैं नहिं अरोग्योडूं यातें तुम प्रसाद मतलीजो तब श्यामदासनें प्रसाद लेवेकि नाहिं करि तब सब वैष्णव श्यामदासकुं समझावे लगे श्यामदासतो उठके चले गये सो वा गाममेंसुं दूसरे गाम चले गये और लालदासतो उहां बैठे रहे मनमें ये विचार कियो जो श्यामदास स्यानो वैष्णव नहिंहै वैष्णवनको कह्यो नहिं

माने हैं ऐसे समझके लालदास प्रसाद लेवे बैठे प्रसाद
 लेके श्यामदासके पास गये वादिनतें श्यामदास विनसों
 कछ्छ बोलते नहिं हते पातलधरदेते ऐसे करते करते ए-
 कवर्ष भयो तब श्रीगोकुल गये तब लालदासनें श्रीगुसां-
 ईजीसों वीनती करी जो श्यामदास कछ्छ समझे नहिं है पां-
 चसे वैष्णवनको कछ्छो न मान्यो महाप्रसाद न लियो तब
 श्रीगुसांईजीने आज्ञा करि जो तुमने हमारी आज्ञा और
 वैष्णवकि आज्ञा मानि नहिं ॥ तुमकुं कछ्छो हतो जो तुम
 श्यामदासको सत्संग करौ जब तुमने पांचसे वैष्णवनके
 कहे सों प्रसाद क्यों लियो वह कन्याविक्रयको द्रव्य हतो
 श्रीठाकुरजीने नहिं अरोग्यो हतो जासुं तुमने प्रसाद
 लियो अबतो दो वर्ष पर्यंत श्यामदासकी टेहेल करोगे
 तब श्रीठाकुरजी प्रसन्न होवेंगे तब वे लालदास श्रीगुसां-
 ईजीकी आज्ञा लैके श्यामदासजीकी टेहेल करन लगे सो
 वे श्यामदास श्रीगुसांईजीके ऐसे कृपापात्र हते जिनकुं श्री-
 ठाकुरजीने ऐसी जताई सो कन्याविक्रयके द्रव्यने शुभ-
 कार्य होवै सो व्यर्थ जाय ॥ वार्ता संपूर्ण ॥ वैष्णव ॥ ६७ ॥

॥ श्रीगुसांईजीके सेवक एक वैष्णवकी बेटी-
 की वार्ता ॥ सो वैष्णवकी बेटीको विवाह श्रीरामचंद्र उ-
 पासीके इहां भयो हतो वे बाई बालपनेसुं श्रीगुसांईजीकी
 सेवक भई हती और भगवत्सेवापै तत्पर भई और श्रीठा-
 कुरजी पधरायके सेवा करन लगी और बालपनेसुं भ-
 गवद्धर्मनको आचरण करने लागी श्रीमद्भागवतमें क-
 ह्यो है ॥ श्लोक ॥ कौमार आचरेत्प्राज्ञो धर्मान् भगवता-

(१४६) दोसौवावन वैष्णवकी वार्ता.

निह ॥ याको अर्थ प्राज्ञजेबुद्धिमानहैं सो बालअवस्थासुं भगवद्धर्मनको आचरण करें ऐसे वा वैष्णवकी बेटी अनन्य श्रीकृष्णचंद्रकी भक्त हती सो वे बाई जब बाकेपती-केघर गई जब बाको पति श्रीरामचंद्रजीको उपासी हतो सो देखके वह बाई बाके पतिसुं भाषण करती नहीं एक-दिन बाके पतीनें पूछी जो तुमारे श्रीकृष्णचंद्रकहा करतेहैं वा बाईने कही जो बाललीला और दान लीला और रासलीला और चौर लीला मानलीला जन्मलीला वन-लीला विहारलीला सबलीला जितनीहैं सो एककालाव-छिन्न करतेहैं जब बाके पतिनें कही जो हमारे श्रीरामचंद्रजी राजलीला करतेहैं ऐसे करते नित्य झगडो विन दोउनको चलतो सो श्रीठाकुरजी नित्य आयके विनको झगडो चु-कावते और कहते सर्वत्र मैं हूं तुम मेरेमें अभेद जानो मेरेमें भेद नहींहैं वा स्वरूपमें वा स्त्रीकुं श्रीकृष्णचंद्रजी दीखते और वा पुरुषकुं श्रीरामचंद्रजी दीखते जब वे स्त्रीपु-रुषनको नित्य ऐसे करते आखोजन्म झगडत गयो और नित्य श्रीठाकुरजी झगडा चुकावतरहे जन्मसूधी विनकुं संसार व्यवहारयाद आयो नहीं सो वे बाई वैष्णवकी बेटी श्रीगुसांईजीकी ऐसी कृपापात्र भगवदीय हती ॥ वार्ता संपूर्ण ॥ वैष्णव ॥ ६८ ॥ ❀ ॥ ॥ ॥ ॥ ॥ ॥

श्रीगुसांईजीके सेवक आठ वैष्णव हते ति०

सो वे आठजने एकग्राममें रहते हते सो वे श्रीगोकुल श्रीगुसांईजीके दर्शनकुं आये सो सातजनेनके पास द्रव्य हतो और एक दुर्बल हतो बाके पास कछु भेट कर-

वेकां श्रीफल नहीं हतो सो सात जनेननें जब भेटकरी
 और एक वैष्णव जो दुर्बल हतो वानें कछु भेट नकरी वाके
 पास एक सेरभर चोखा हते सो वे चोखा वा वैष्णवनें
 छिपाय राखे हते जो कोईकुं खबर न पड़ेगी जब श्रीनवनी-
 तप्रियाजीके भंडारमें घर देउंगो ये समझके वानें छिपाय
 राखे हते जब सवने भेट करी तब वो वैष्णव सरमायके
 बेटरह्यो जब वाकुं श्रीगुसांईजीनें आज्ञा करी तेनें चोखा
 छिपाय राख्येहें सो लावो ॥ जब श्रीगुसांईजीनें चोखा
 श्रीगुस्वसों वा वैष्णवके पासतें मागलीये जैसे श्रीठाकुर-
 जीनें गुदामाके पास तंदुल मांगे हते जो वे चोखा अर्ध-
 तो श्रीनाथजीके भंडारमें पठाये और अर्ध तो श्रीनवनी-
 तप्रियाजीके भंडारमें पठाये ॥ प्रसंग ॥ ५ ॥ फेर एकदिन
 वे आठ वैष्णव गोपाल पुरमें श्रीनाथजीके दर्शन करवेकुं
 आये जब वे सात जने तो आछी जगामें उतरे और वे
 दुर्बल वैष्णव तो जहां तहां पडरह्यो और कछु खायवेकुं
 तथा ओढवेकुं वाके पास हतो नहीं सो भूखो पड रह्यो॥
 सात जनानें वाकी खबर काढी नहीं जब श्रीनाथजी
 मध्य रातकुं शय्या भोगको लडुवा और ओढवेकी सु-
 फेती लेके वा वैष्णवकुं दीनी और कही जो श्रीगुसांईजीनें
 मोकुं तेरे पास पठायोहैं वा वैष्णवनें श्रीनाथजीकुं पेहे-
 चानें नहीं जब सवारो भयो तब लोगननें श्रीनाथजीकी
 सुफेती वा वैष्णवकुं ओढी देखी तब श्रीगुसांईजीकुं लो-
 गननें कही जो ये आपके घरसुं श्रीनाथजीके वस्त्र कैसे
 ले गयोहैं जब श्रीगुसांईजीनें मनमें ऐसी जानी जो श्री-

(१४८) दोसौबावन वैष्णवकी वार्ता.

नाथजीनें दीयेहें फिर मंगलाके सयें श्रीनाथजीनें श्रीगु-
साईजीसुं आज्ञा करी जो ये सात जणातो याकी खबर
राखें नहींहैं परंतु मेरे वैष्णवकुं दुःख पडे सो मैं कैसे स-
हीसकुं ये मुनके श्रीगुसाईजीनें विन सातजनानकुं बुला-
यके कही जो तुम एकएकजना वार प्रमाणें याकी टहेल
करौ श्रीनाथजी तुमारी सेवा मानेंगे और जादिन श्री-
नाथजीकी सेवाको काम होवै तोहूं तुमारे यांकी टहेल
छोडनी नहीं श्रीनाथजीकी सेवासुं शतगुणी गुरुकी सेवा
विशेषहै गुरुकी सेवासुं सतगुणी वैष्णवकी सेवा विशेषहै
परंतु वैष्णव निर्लोभी निष्कपटी और अन्याश्रय रहित॥
पुष्टिमार्गकी रीती विना दूसरी रीती न जाणे और लोग-
नकुं अपनी वैष्णवता न जनावे और पुष्टिमार्गकी रीतीसें
कुशल होवै ऐसे वैष्णवनकी सेवा सर्वतें अधिक है याहुं
अधिकी कछ नहींहै सो तुम सात जना याकी टहेलमें
तत्पर रहौ ॥ प्रसंग ॥ २ ॥ फेर एकदिन वे आठ वैष्णव
श्रीगोकुल गये॥ और नित्य उहां दर्शन करते और नित्य
श्रीगुसाईजीके मुखसुं कथा सुनते एकदिन सब वैष्णव
आये और वे दुर्बल वैष्णव आयो नहीं तब श्रीगुसाईजी
पुस्तक खोलके विराजे रहै तब वैष्णवननें बीनती करी
आप कथा बांचो तब श्रीगुसाईजीनें आज्ञा करी जिनके
लीये कथारस श्रीमहाप्रभुजीनें प्रकट क्योहैं वे आवेंगे
जब बांचेंगे जब वे दुर्बल वैष्णव आयो तब कथाको आ-
रंभ श्रीगुसाईजीनें क्यो जब वाहीसमय एक द्रव्य पात्र
बैठो हतो वाने कही जो येतो मजूर जैसो है यामें कहाहै

जब श्रीगुसांईजीनें कही तुमनें जो धन एकट्ठो कऱ्यो है सो सब इहां छोडजाओगे और याने जो भगवद्रस और भगवद्गुणानुवाद एकट्ठो कऱ्यो है सो ये संग लेजायगो जासुं मजूर ये भये के तुम भये ये सुनके वो द्रव्यपात्र बहुत लजायो और सब धंदो छोडके वा दुर्वल वैष्णवको सत्संग करन लग्यो सो वह दुर्वल वैष्णव ऐसो कृपापात्र हतो और वे सात वैष्णव श्रीगुसांईजीकी आज्ञा तें जन्म पर्यंत बाकी टहेलमें लगे रहते सो वे आठ वैष्णव ऐंसे कृपापात्र भगवदीय हते ॥ वार्ता संपूर्ण वे० ॥ ६९ ॥ ❀॥

॥ श्रीगुसांईजीके सेवक तीन तूबावाले वैष्णव ० ॥
 सो वे वैष्णव विरक्तहते सो एकतूबा खासाको और एक सेवकीको और एक बहारको ऐंसे तीन तूबा राखते हते और जा गाममें जाते तहां भगवदिच्छासुं निर्वाह करते एक गाममें गये जहां मेह बहुत बरस्यो कुछ रसोईको उपाय बन्यो नहीं जब तीन दिन सूधी भूखे रहे चौथे दिन बरसात बंद भयो सो वे वैष्णव तलावपें नहायवे गये तब वा गामको ब्राह्मण वैष्णव नहातो हतो सो वा विरक्त वैष्णवकुं वह ब्राह्मण वैष्णव अपने घर ले गयो आछी रीतीसुं बाकी टहेल करी वो ब्राह्मण वैष्णव ऐंसे समझ्योके मेरे घर साक्षात् भगवान पधारेहै और तीन दिन सूधी बिनकुं राख्यो महा प्रसाद लेवायो और वा विरक्त वैष्णवके हृदयमें सदा भगवदआवेश रहतो हतो सो वे प्रसन्न भये और भगवद आवेशतें बोले जो कुछ माग जो तुमारी मनोरथ होयगो सब पूरण होयगो तब वह ब्राह्मण

वैष्णव हाथ जोड़के बोल्यो जो मेरे तो कुछ मनोरथ नहीं हैं परंतु या गामको राजा बहुत धर्म वालो है और ब्राह्मणकी भक्ती वा राजाकुं बहुत है ब्राह्मणकी रक्षा आछी भांती सुं करे हैं साठवर्षको भयो है वाकुं पुत्र नहीं है सो होवै तो बहुत आछो ॥ ये सुनके वो विरक्तवैष्णव भगवद आवेशसों भरे हते और भगवद इच्छासुं बोले जो राजाके चार बेटा होवेंगे और राजावैष्णव होयगो तब ऐसे कहके वैष्णव गये फिर वह ब्राह्मणवैष्णव राजाके पास गयो और जायके आशीर्वाद दियो तब राजानें वा ब्राह्मणकुं आदर करके बैठायो और वीनती करी आप जैसेनको आवनो बड़ें भाग्यनतें होवै हैं और हम जैसे गृहस्थ दीनचित्त बालेनकुं आपबिना कौन पावन करे हम आपके दर्शनमात्रसुं पवित्र भये हैं परंतु आपके आयवेको कारण कह्यो ये बचन राजाके सुनके वह ब्राह्मण वा वैष्णवको बचन स्मरण करके और राजाकी भक्ती देखके बहुत प्रसन्न भयो और कहवे लग्यो राजा मेरे घर एक परम भगवदीय आयो हतो सो वह वैष्णव कहि गयो है जो राजाके चार बेटा होयगि जब राजानें कही जो ब्राह्मण तुम सुनो मैंने बेटाके लीयें बहुत उपाय किये हैं सो तुम सुनो या गाममें एक विश्वनाथ ब्राह्मण रहे है वा ब्राह्मणकुं महादेवजी दर्शन देवें हैं और महादेवजी संपूर्ण कृपा वा ब्राह्मण उपर राखे हैं जो वा ब्राह्मणनें मोकुं यज्ञ करवेकी कही और जब वा ब्राह्मणके कह्युं मैंने चार बखत महारुद्र यज्ञ क्यो तोहुं मेरे पुत्र न भयो फेर वा विश्वनाथ-

ब्राह्मणने श्रीमहादेवजीसों पूंछी जो या राजाके पुत्र क्युं नहीं होवेंहें मैंने चार बार महासूद्र यज्ञ करायो है तोहुं याके पुत्र नहीं भयो तब महादेवजीनें कही मैं श्रीठाकुरजीसुं वीनती करुंगो फेर महादेवजीवैकुंठमें जायके श्रीठाकुरजीसों प्रणाम पूर्वक वीनती करी जब श्रीठाकुरजीनें कही जो या राजाके सात जन्म पर्यंत पुत्र नहीं लिख्योहैं तब ये मुनके श्रीमहादेवजीनें वा ब्राह्मणकुं कही जो तुं कछ प्रयत्न मति कर और हठहुं न कर वा राजाके कर्ममें पुत्र नहीं लिख्योहैं जब वह ब्राह्मण बैठरह्यो वह ब्राह्मण मोसों ऐंसी बोलगयो और तुम कहोहो चारपुत्र होवेंगे ये बात कैसे बनेगी तब वह वैष्णवब्राह्मण बोल्यो जो यामें कछ खर्च नहीं लगेहैं और कछ मेरे चहीयेहुं नहीं मैंतो तुमकुं यातें कहेवे आयोहुं जो और लोग कहेंगे हमनें वेटा दियेहें सो तुम और कोईको कह्यो मानियो मति ॥ और मेरे कहेको विश्वास राखो ॥ ये कहेके वे वैष्णवब्राह्मण अपनें घर गयो और शुद्धचित्तसुं भगवत्सेवा करन लग्यो फेर भगवदिच्छातें वा राजाकी चार स्त्रीनकुं गर्भ रह्यो और दसमहिनावीते पीछे राजाके चार वेटा भये जब राजानें वा वैष्णव ब्राह्मणकुं बुलायके कही जो तुम कोनसे धर्मप्रमाणें चलोहो और कोनदेवकी उपासना करोहो सो कृपाकरके कही और जो वैष्णव तुमकुं मेरे पुत्र होएंगे ऐंसी आशीर्वाद दियो हतो सो वैष्णव कहाहैं और वाकुं और तुमकुं कहा चहीयेहैं सो कही जब वा ब्राह्मण वैष्णवनें कही जो हमकुं तो कछ नहीं चहिये और वे वै-

षण्व हमारो गुरुभाईहै और मेरे गुरुनके पासहैं और
 विरक्त दशामें हैं ॥ बाकुं तो कछु अपेक्षा नहींहै और इहां
 बुलायसुं वे आवेंगे नहीं जब राजानें कही जो मोकुं तु-
 मारे गुरुके दर्शन कराओ जब वा ब्राह्मणवैष्णवनें श्रीगु-
 साईजीकुं वीनती पत्र लिख्यो फेर श्रीगुसाईजी कृपाकरके
 श्रीगोकुलतें पधारे और वा राजाकुं दर्शन दिये और वा
 राजाकुं साक्षात् पूर्णपुरुषोत्तमके दर्शन भयो और वे राजा
 श्रीगुसाईजीको सेवक भयो और अपने सर्व परकर और
 कुटुंब सबकुं श्रीगुसाईजीके सेवक कराये और श्रीठाकुर-
 जी श्रीमदनमोहनजी पधरायके सेवा करन लग्यो और
 श्रीगुसाईजी फेर श्रीगोकुल पधारे फेर एकदिन वा विश्व-
 नाथब्राह्मणनें महादेवजीसों वीनती करी जो तुमनें कही
 हती जो या राजाके सात जन्म सूची पुत्र नहीं होयगो
 सो चार पुत्र कैसे भये तब श्रीमहादेवजीनें जायके श्री-
 ठाकुरजीकुं कही जब श्रीठाकुरजीनें आज्ञा करी मेरे जो
 अनन्य भक्तहैं बिनके मैं अधीनहुं और वे चाहसो कर-
 सकैं और जिननें मोकुं तनमन प्राण समर्पण कियोहैं
 वीनकुं कोन सो अर्थ बाकी रह जायहै वे चाहेतो मोकुंहुं
 जन्म लेनो पड़े और पुत्र दें यामें कहा आश्चर्य है ये
 कछु बड़ो आश्चर्य नहींहै जासुं ये शंका तुम करौ मति
 वैष्णवनको कियो वृथा नहींहोवेहैं वैष्णव त्रिगुणातीतहैं
 और कालके वश नहींहैं और कोईके वश नहींहैं जासुं
 तुम शंका छोडके जाओ तब महादेवजीनें वा विश्वनाथ-
 ब्राह्मणकुं कही जो वैष्णव त्रिलोकीकुं पवित्र करे हैं और

श्रीठाकुरजी विनके पाछें फिरेंहें जैसे गौ पीछें बत्स फिरेंहें
 ऐसे वैष्णवनके लीयें श्रीठाकुरजी अनेक प्रकारके अवतार
 लेवेंहें वैष्णव जैसे इच्छा आवै ऐसे करेंहें जिनकुं भगव-
 चरणारविंदको दृढ़ आश्रय है सो कहानहिं करसकेंगे
 श्रीभागवतमें कह्यो है ॥ श्लोक ॥ यत्पादपंकजपरागनिषे
 वत्प्रायोगप्रभावविधुताखिलकर्मबंधा ॥ स्वैरचरतिमुन
 योपिननह्यमाना इति ॥ वे वैष्णव स्वतंत्र आचरण करेंहें
 विनके ऊपर कोईको हुकम नहींहै जीत्योहै काम क्रोध
 लोभ मोह मद मत्सर जिननें ऐसे वैष्णव सर्व करण समर्थ
 हैं ये मुनके विश्वनाथ ब्राह्मणनें महादेवजीसों कही मोकुं
 वैष्णव करौ तब महादेवजीनें कही जो वा ब्राह्मण वैष्णव
 जिननें राजाकुं वैष्णव क्योहै विनके पास तुम जाओ
 और हमारी नाम देके कहो तो वे तुमकुं वैष्णव करेंगे
 फेर विश्वनाथ वा ब्राह्मण वैष्णवके घर गयो जायके वा
 ब्राह्मण वैष्णवकुं सब समाचार कहे तब वा ब्राह्मण वै-
 ण्वननें विश्वनाथ ब्राह्मणकुं आदर करके बैठायो और
 श्रीठाकुरजीके दर्शन करवाये और महाप्रसाद लेवायो
 फेर पत्र लिखके विश्वनाथ ब्राह्मणकुं श्रीगोकुलपठायो
 फेर विश्वनाथ ब्राह्मण श्रीगोकुल जायके श्रीगुसांईजीको
 सेवक भयो सो वे विरक्त वैष्णव तीनतृवावाले ऐसे भग-
 वदीय हते जिनकी कृपाते वा राजाको सब देश वैष्णव
 भयो ॥ वार्ता संपूर्ण ॥ वैष्णव ॥ ७० ॥ ❀ ॥ ॥ ॥
 श्रीगुसांईजीकी सेवक एक ब्राह्मणीकी वार्ता ॥
 वा बाई वैष्णव जा गाममें रहेती हती वा गाममें एक म-

हादेवजीको पूजारी रहेतो हतो सो शिवको निर्माल्य खातो हतो शिवनिर्माल्य खायेको दोष पद्मपुराणमें लिख्योहै पार्वतीजीनें शिवनिर्माल्य खावेवालानकुं शाप दियो है सो वे महादेवको पूजारीकी देह छूटी सो बाकुं एक वृक्षनीचे अग्निसंस्कार करवे गये सो बाको धूवां आकाशमें गयो एक देवताको विमान जातो हतो ताकुं धूवांको स्पर्श भयो सो वे देवता विमान सहित श्रुमिपर आयके परयो तब बाकुं देखके बहोत लोग एकठे भये सो वा गाममें बडो सोर भयो तब गामको राजा देखवेको आयो सो वे देवता कहेनलख्यो जिननें अश्वमेध यज्ञ क्यो होय सो बाको फल देवेतो विमान सहित स्वर्गमें जाऊं जब राजानें सब पंडित एकठे करै कोईकुं कछु उपाय सूझो नहीं सो वे पंडित राजाके कहेते उपाय करन लगे कोई पाठ करे कोई हवन करे कोई वेद पाठ करे परंतु विमान तो कोई उपायसुं स्वर्गमें जाय नहीं जब वे बाई जल भरवे गई हती सो वा ब्राह्मणीनें पृच्छ्यो ये काहेकी भीडहै जब सब बात लोगननें कही जब वे ब्राह्मणी गागर धरके जायके कही जो तुम सब दूर होय जाओ मैं विमानकुं स्वर्गमें पठाउंगी जब सब लोग सरक गये वा ब्राह्मणीनें हाथमें जल लैके कही जो मैं जलकी गागर लाडुं सो एक पैडकी फल तुमकुं देउंइ ऐसे कहेके वा विमानपर जल छांट्यो सो वे देवता जल पडत मात्र वा ब्राह्मणीकी स्तुती करते करते विमान सहित स्वर्गमें गये ये बात देखके वे राजा और सब गाम वे ब्राह्मणीके पां-

वन परे और कहेन लगे जो हमकुं तीन दिन मेहेनत करते भईहैं और हमने तीन दिन सूधी अन्न जल लियो नहींहैं और बहोत उपाय कीयेहैं परंतु कछु भयो नहींहैं और तुमनें सहज विमान स्वर्गमें पठाय दियो बाको कारण कहा जब वे वाई बोली ॥ श्लोक ॥ विप्राद्विषद्वृण-
युतादरविंदनाभपादारविंदविमुखातश्चपचंचरिष्ठं ॥ मन्ये-
तदर्पितमनोवचनेहितार्थप्राणपुनातिसकुलंनतुभूरिमानः
॥ वा ब्राह्मणीनें ये श्लोक कहेो याको अर्थ—कोई ब्रा-
ह्मणहै और द्वादशगुण सहितहै और पद्मनाभजो श्रीठा-
कुरजीके चरण कमलतें बहिर्मुखहै ऐसे ब्राह्मणसुं भगवान-
की भक्तिकरनार जो चांडाल सो श्रेष्ठहै कैसेहो जो चांडाल जानें मन और वाणी भगवानके अर्पण करीहै और भगवानके विरहसुं आतुरहै मन जाको ऐसो जो चांडाल सो अपनी कुल सहित प्राणनकुं पवित्र करेहैं और वे ब्राह्मणहैं सो प्राणपवित्र न करे सो कुलकुं कहा करेगो ये बात सुनके वे राजा और पंडित सब वे ब्राह्म-
णीके घरमें आये और आयके ब्राह्मणीकुं कही जो तूं कछु गामले और खर्चले और हमकुं पवित्र कर तब वा ब्राह्मणीनें सुनके कही जो मैं तो निरपेक्षहूं और मोकुं कछु चहिये नहीं और तुमारे पवित्र होवेको विचार होवेतो श्रीगुसांईजीके शरण जाओ जब वा राजानें वा ब्राह्मणीके नामको बीनती पत्र लिखके श्रीगोकुलपठायो और श्रीगु-
सांईजीकुं वा गाममें पधराये और सब सेवक भये तब वा राजाकुं श्रीगुसांईजीके दर्शन साक्षात् पूर्णपुरुषोत्तमके भये

जब वे राजा श्रीगुसांईजीके आगे वा ब्राह्मणीकी बहोत ब-
 ढाई करी और भगवद सेवा माथेपधरायके सेवा करन ल-
 ग्यो जब वा राजाने वीनती करी जो महाराजभगवदस्वरू-
 पमें प्रेम और आसक्ती और व्यसन कैसे होवें जब श्री-
 गुसांईजीने वा राजाकुं श्रीनवनीतप्रियाजीके स्वरूपको
 ज्ञान करायो और भक्तिवर्धिनी ग्रंथ पढायो सो वे बाई
 ब्राह्मणी ऐसी कृपापात्र हती जाके संगतें सब गामवैष्णव
 भयो ॥ वार्ता संपूर्ण ॥ वैष्णव ॥ ७१ ॥ ❀ ॥ ॥
 ॥ श्रीगुसांईजीके सेवक एक सेठको लडको हतो
 तिनकी वार्ता ॥ जब श्रीगुसांईजी परदेश पधारे तब वा
 लडकानें श्रीगुसांईजीके श्रीमुखतें कथा सुनी सो दश-
 मस्कंधके द्वादशअध्यायकी श्रीसुबोधिनीजी सुनी ॥
 ॥ सो श्लोक ॥ कृष्णः कमलपत्राक्षः पुण्यश्रव-
 णकीर्तनः ॥ स्तूयमानोऽलुगैर्गोपैः साग्रजो ब्रजमाव्रजत
 ॥ १ ॥ या श्लोककी सुबोधनीमें नित्य श्रीठाकुरजी गौ-
 चारण करके ब्रजमें पधारतेहैं ये लीला नित्य है ये बात
 वा लडकानें सुनी और श्रीगुसांईजीसुं वीनती करी जो
 महाराज ये लीला अबी है के नहीं तब श्रीगुसांईजीने
 आज्ञा करी ये लीला नित्य है और अखंड है और सर्वत्र
 व्यापक है ये बात सुनके वो लरका ब्रजमें गयो और स्या-
 मढाकके पास जायके बैठो सांझ पढी गौ आवैकी विरीयां
 भई जब बाकुं दर्शन न भये तब बाकुं बहोत ताप भयो
 जो सांझपढी तोढ़ ठाकुरजी पधारे नहीं तब बाको विप्र-
 योग देखके श्रीनाथजीने दर्शन दिये और सब गोपवा-

लक संग वेणुनाद करते गायनके संग श्रीनाथजी पधार
 सो देखके वा लडकारुं देहदशा मूल गई और नयो देह
 धरके वा गोपनके लडकानके संग नित्य लीलामें प्रवेश
 कियो सो वैष्णवकी लडका श्रीगुसांईजीके ऐसे कृपापात्र
 हते जिनकुं नित्य लीलाके दर्शनदेके श्रीनाथजीनें अपनी
 लीलामें अंगिकार कियो ॥ वार्ता संपूर्ण ॥ वैष्णव ॥ ७२ ॥
 श्रीगुसांईजीके सेवक आसकरणराजाकी वा ०
 सो वे आसकरणजी नरवरगढमें रहते विनकुं रागसुन-
 वेको व्यसन बहुत हतो सो गान सुनायदेके लायें देशदे-
 शके कलावत गवैया उहां आवते हते और सबकुं आद-
 रपूर्वक सन्मान करते हते और रागकी परीक्षा बहुत
 आछी हती ये बात तानसेनजीनें सुनी तब तानसेनजी
 आसकरनजीके पास आये सो आसकरनजीके पास वि-
 ण्णुपद गायो सो पद ॥ राग सारंग ॥ कुंवरवैठे प्यारीके-
 संग अंगअंगभरेरंग बलवलवल त्रिभंगी युवतिन सुख-
 दाई ॥ ललितगती विलासहास दंपतिमन अतिउल्हास
 विकसित कच मुमनवास स्फुटत कुसुमनिकर तैसीहि
 शरद रेन जुन्हाई ॥ १ ॥ नवनिक्कुंज मधुपगुंज कोकि
 लकल कूजत पुंजसीतल सुंगधमंद वहतपवन अति-
 सुहाई ॥ गोविंदप्रसुरसजोरिनवकिशोरनवकिशोरी नि-
 रखमदनफोज मोरीछैलछबीले नवलकुंवरब्रजभृपकुलम-
 निराई ॥ २ ॥ ये पद सुनके राजा आसकरन बहुत प्रसन्न
 भये और तानसेनसुं कही जो मैंनें बहुत पद सुनेहैं परंतु
 ऐसो विण्णुपद कोईदिन सुन्यो नहीं है सो तुमनें ऐसे पद

कहाति सीखेहैं सो हमकुं शिखाओ जब तानसेनजी वॉले श्रीगोकुलमें श्रीविठ्ठलनाथजी श्रीगुसांईजीहैं विनकेसे-
 वक गोविंदस्वामीहैं विननें ऐसे सहस्रावधी पद कियेहैं
 परंतु श्रीगुसांईजीके सेवक विनावे औरकुं शिखावते
 नाहीहैं मैहूं विनके संगतें श्रीगुसांईजीको सेवक भयोहूं
 जासुं मैहूं कोईकुं शिखावत नाही हूं जब राजा आस-
 करननें कही तुमकुं जो गाम अथवा द्रव्य चहिये सो लेवो
 परंतु ऐसे पद सिखावो तब तानसेनजीनें कही जो मैं
 तुमारे पास द्रव्यकेलीयें नहीं आयोहूं मैंनें ऐसी मुनीहैं
 जो राजा आसकरन गुणकी परीक्षाबहुत आछी करेंहैं
 सो बात देखवेकी लीयें आयोहूं जैसी मुनीहती तैसी देखी
 तो सही और कछु मेरे काम नहींहैं और कछु मोकुं च-
 हिये नहींहैं ये बात मुनके राजा आसकरननें कही मैहूं
 श्रीगुसांईजीको सेवक होउंगो और गोविंदस्वामीकुं
 मिलंगो तुम दश पंदरे दिन इहां रहौ और कृपाकरके
 मोकुं संग लेचलो जब तानसेनजी उहां रहे और थोडे
 दिन पीछे राजा आसकरनजीकुं संग लैके श्रीगोकुल
 गये जब श्रीगुसांईजी ठुकरानी घाटपर संध्या करते हते
 सो राजा आसकरनजीकुं साक्षात् पूर्णपुरुषोत्तम कोटि
 कंदर्पलावण्य ऐसे स्वरूपके दर्शन भये जब श्रीगुसांई-
 जीकुं साष्टांग दंडवत करके ठाढे रहे जब श्रीगुसांईजीनें
 आज्ञा करी आसकरनजी बोहोत दिन भये काहां सूधी
 श्रीठाकुरजी तुमारि बाट देखेंगे तब आसकरननें कहि
 श्रीठाकुरजी आप भटकवेकी पार लावेंगे तो कछु ढील

नहिं लोगी तब श्रीगुसांईजीनें कही न्हायके मंदिरमें आवो जब आसकरनजी न्हाय आये जब श्रीगुसांईजीनें कृपा करके आसकरनजीकुं नाम निवेदन करवायो वाई समय गोविंदस्वामी श्रीनवनीतप्रियाजीके सन्निधान कीर्तन करते हते श्रावण मास हतो ॥ सो पद ॥ राग मल्हार ॥ आईजु स्याम जलदघटा ओल्हर चहुंदिशतें घनघोर ॥ दंपतिपरस्परवाहीजोटीविरहतकुसुमवीनतकालिंदीतटा ॥ १ ॥ बडीबहीबूंदनवरपनलाग्योतेसीलहेकतबीजछटा ॥ गोविंदप्रभुपीयप्यारीउठचलेओढेलालपटदोरलियेजाय-बंसीवटा ॥ २ ॥ येपद गोविंदस्वामी श्रीनवनीतप्रियाजीके सन्निधान गावते हते ॥ सो राजा आसकरननें सुन्यो और तानसेनसों कही जो ये बहुतसुंदर गान करेहें यामें मेरो मन बहोत लागयो है येही गोविंदस्वामी होयंगे और तब तानसेननें कही ये गोविंदस्वामीहिं जब राजा आसकरनजी नित्य गोविंदस्वामीके पास जाते रमणरेतीमेंहुं संग फिय्यो करते ॥ प्रसंग ॥ १ ॥ फेर राजा आसकरननें श्रीगुसांईजीसुं बीनती करी जो महाराज अब मेरे कहा करनो जब श्रीगुसांईजीनें ये आज्ञा करी भगवत्सेवा करौ ऐसे कहेके श्रीमदनमोहनजीको स्वरूप पथराय दियो जब राजा आसकरननें बीनती करी जो मैं भगवत्सेवाकी विधी समझत नहींहुं आप कृपा करके मोकुं समझवैं जब श्रीगुसांईजीनें सेवाकी रीती कही सवारे उठके माला और यज्ञोपवीत संभारनो मालादास्य धर्महै जनेउ वैदिकधर्महै जनेउको अधिकार नहोवै तो मालामात्र

संभारनो और श्रीमहाप्रभुजीको और श्रीठाकुरजीको ध्यान करके नाम लेके दंडवत करके बाहेर आवनो फेर देह कृत्यकरके चरणाभूत लेके सूर्योदय' पहिले दातुन करनो तेल लगाय सुखशुद्ध्यर्थ बीडो खानो ॥ जादिन व्रत-होवै तादिन न खानो स्नानकर श्रीयमुनाजीकी रज ले भगवत्पादाकृती तिलक करिये दश प्रकारके तिलक स-कामहै भगवानके चरणकमलते मनुष्यकुं अंतरायपा-डेहैं सो दशप्रकारके तिलक न करनैं ॥ श्लोक ॥ वर्तुलति यंगछिद्रं-ह्रस्वदीर्घतरंतनुम् ॥ वर्कविरूपवद्वाप्रमिन्नमूल-पदच्युतं ॥ अर्थ ॥ वर्तुल (गोलतिलक) १ तिर्यक् (वांको) २ अछिद्र (चीन्याबिनाको) ३ ह्रस्व (बहो-तछोटो) ४ दीर्घतरं (बहोतनासीकासुधीलांबो) ५ तनुं (बहोतपातलो) ६ वर्क (आडो) ७ विरूप (नीचेसुंसांक-डोनेउपरसुंपहोलो) ८ वद्वाप्रं (उपरसुवांध्यो) ९ मिन्नमू-लं (नीचेसुंदोय लकीर जुदी जुदी) ये जो दशप्रकारके तिल-क हैं सो भगवानके चरणारविंदसुं दूर करेंहैं सो ये दश तिल-क छोडके ऊर्ध्वपुंड्र तिलक करनो पाछे पंचमहाभूत जो या-देहमें है तिनकी भीतर शुद्धि और बाह्यशुद्धि करनी तब-राजा आसकरनैं पूछयो हे प्रभो पंचमहाभूतकी शुद्धीके प्रकार आप कहैं तब श्रीगुसाईंजी हँसके प्रसन्न होयके कहने लगे जो छे मुद्रा करियेतो पंचमहाभूतकी बाह्य-शुद्धि होवै, सो सुनो पद्म धारणतें पृथ्वीकी शुद्धी और शंखधारणतें जलकी शुद्धी और चक्र धारणतें अग्नीकी शुद्धी और गदाधारणतें वायुकी शुद्धी और नाम मुद्रा-

धारणतें आकाशकी शुद्धी, और संप्रदाय मुद्राधारणतें भक्तीकी प्राप्ती होतहै अब पंचमहामृतकी अम्यंतर शुद्धी सुनो रजचरणासृततें पार्थवांशकी शुद्धी, और जलचरणासृततें जलांशकी शुद्धी, और प्रसादी तुलसीतें अश्वयंश शुद्धी, और भगवदीयके संगतें वायवीयांश शुद्धी, और एरुदर्शन तथा भगवद्दर्शनतें आकाशकी शुद्धी, या प्रकार पंचमहामृतकी शुद्धी बाहेर और भीतर करके भगवत्सेवा करनी तब भगवतमंदिरके पास जायके दंडवत करके ये श्लोक बोलनो ॥ श्लोक ॥ नमोनमस्तेऽस्तृप-
भायसात्वतांविदूरकाष्ठायमुद्बुःकुयोगिनाम् ॥ निरस्त-
साम्यातिशयेनराघसा स्वधामनिब्रह्मणिरंस्यतेनमः ॥
॥ १ ॥ ये श्लोक पढ़के मंदिरमें जानो तब तिष्ठि शारी बंटा बीड़ी उठायके प्रसादी पात्रमें ठलायके मांजके ठिकाणे धरके मंदिर सार्जन करनो ॥ और सृत्तिकाकी पृथ्वी होवै तो लीपनो और गच्ची वा पाषाणकी धरती होवै तो भीनो वस्त्र फेरके सूको वस्त्र फेरनो ॥ सिंहासन उठायके झटकके नित्य प्रमाणें विछावनो फेर शारी भरके सिंहासन पासे तबकडीमें धरनी ॥ और मंगल भोगकी सामग्री सिंहासन पासे ढाँक धरनी ॥ पीछे तीन बैर घंटा बजायके तब श्रीठाकुरजीकुं जगावनें ॥ और जगायवेकी विय्यां जगावेके पद अथवा यथाधिकार पाठकरके जगायके सिंहासन पर पधरायके ऋतु अनुसार उढायके टेरा देनो ॥ फेर शय्या उठायके झटकके मंदिर वस्त्र करके फेर शय्याविछाईये ॥ और शय्याके कसना डोलतैलेके

प्रबोधिनी पर्यंत बांधनें ॥ शीतकालमें नहीं बांधिये ॥ फेर आचमनकी झारी भरके मंगल भोग सराईये ॥ तिथीमें आचमन कराय सुखवस्त्र करकेबीड़ा अरुगवायके मंगलआर्तीउतारिये ॥ पाछें एक परातमें पीढा विछायके वाके ऊपर वस्त्र विछाईये और हाथकुं सुहातो जल लेके श्रीठाकुरजीकुं स्नान कराईये ॥ और अंगवस्त्र कराईये ॥ और श्याम स्वरूप होवै तो न्हाय पीछें फुलेल लगाईये ॥ फेर अंगवस्त्र करिये ॥ और गौर स्वरूप होवै तो स्नान पीछे फुलेल न लगाईये और अतर लगाईये ॥ पाछें शृंगार कराईये ॥ वस्त्र तथा आभूषण मेण शलाका कतरनी ये सब वस्तु पासे लै बैठीये शीतकाल होवै तो स्नानतें पहिले अंगीठी धरिये श्रीठाकुरजी बालकहैं यातें सुकोमेवा माखन मिश्री धरके शृंगार कराईये ऋतु प्रमाणे वस्त्र पहिराईये यथा रुची शृंगार कराईये ॥ उत्सवके दिन उत्सवके शृंगार कराईये पाछें राजभोग धरिये परंतु श्रीठाकुरजीकुं ऐसो समय देखके जगाईये ॥ जो मंगलापीछें शृंगार और शृंगार पीछें राजभोग धरवेकू ढील न लगे श्रीप्रभुनकूं श्रम न होवै ॥ फेर राजा आसकरनजीनें पूछी जो आपके इहांतो गोपीवल्लभभोग आवैंहैं और ग्वाल बोलेहैं ग्वालके समय घेयामथके अरोगे हैं सो तो आपनें कही नहीं याको कारण कहा तब श्रीगुसाईंजीनें कृपा करके कब्यो जो गोपीवल्लभ और ग्वाल और संध्याभोग और संध्या-आरती और सांझके समयको ग्वाल वैष्णवनके घरमें नहीं होवै ये अधिकार हमारे कुलकोहै औरकुं नहींहैं

जब राजा आसकरननें बीनती करी हेमहाराज कृपा-
नाथ आपनें मोकुं श्रीमदनमोहनजी पधरायदीयेपरंतु
श्रीमदनमोहनजीके स्वरूपमें कौनसी लीला प्रकटहै सो
कृपा करके कहें तब श्रीगुसाईजीनें ये सुनके कही जो
श्रीमदनमोहनजीके स्वरूपमें फलप्रकर्णके प्रथम अध्या-
यकी लीला प्रगटहै और प्रकर्णकी लीला गुप्तहै जब श्रीम-
दनमोहनजीनें वेणुनाद कन्यो सो ब्रज भक्तनकुं आकर्ष-
ण कीये फेर ब्रजभक्त वेणुनाद सुनके जा कारजमें लगे होते
सो कारज छोडके ब्रजभक्त तुरत गमन कीये जब श्रीठाकुर-
जीके पास गये तब श्रीठाकुरजी बोले ॥ सो श्लोक ॥ स्वा-
गतं वोमहाभागाः प्रियं किं करवाणि वः ॥ ब्रजस्यानामयं
कच्चिद्ब्रूता गमनकारणं ॥ १ ॥ रजन्येषा घोररूपा घोरसत्त्व
निषेविता ॥ प्रतियात ब्रजे न हस्थेयं स्त्रीभिः सुमध्यमः ॥ २ ॥ ये
गमन वाक्य कहे सो सुनके ब्रजभक्त नकुं चिंता भई जासुं
वाक्य ग्रहण न कीये, फेर सो चिंता आतुर होयके विनके
नेत्रनमें तें जल चलवे लग्यो फेर ब्रजभक्त श्रीठाकुरजीके
वाक्य विचारे सो वाक्यनमें सुं सुमध्यमा ऐसो पद निक-
स्यो और ये रात घोर रूप नहींहै ऐसे बचनको विचार
कीये जब ब्रजभक्त अपने मनमें ऐसे समझे येतो व्यंग
वाक्यहै फेर संपूर्ण श्रीअंगके दर्शन भये सो प्रसुनको
स्वरूप गौर देख्यो जब ऐसो विचारे जो हमारो भाव
देखके प्रसू मोहित भयेहै सो तन्मयता निश्चय भई जो
प्रसुनको चित्त हमारेमेंहै ॥ नहीं होवै तौ गौर कैसे
होवै ॥ फेर चरणारविंदको दर्शन भयो सो चरणारविंद

साधन भक्ति रूपहै और पादुकाहैसो अंतराल हैं जैसे वाक्य व्यंगहैं जो वाक्य श्रीअंग सुखद होवैतो ब्रजभक्त ग्रहण करें ॥ नहींतो नकरें ॥ फेर देखैतो दक्षिणचरणारविंदको अंगुलीको स्पर्शमात्र पादुकाजीको देख्यो जव दास्यभक्तीकी स्फूर्ती भई ॥ फेर फलरूप भक्ती जो श्रीमुख तिनके दर्शन भये सो फलरूप भक्तीके आगें चार प्रकारकी मुक्ती तुच्छहै ऐसे दर्शन भये ॥ स्वरूपमुक्तीकुं प्राप्त भई जो अलक सो फलरूप भक्ती जो सुखारविंद ताको आश्रय करेंहैं यातें स्वरूपमुक्तीकरके कहा ॥ सो स्वरूपमुक्ती भक्तीके आगें तुच्छहै ॥ फेर सांख्ययोगरूपी जो कुंडल बिनके दर्शन भये सो सामीप्य मुक्तीकुं प्राप्त हैं ॥ अतिनिकटहैं परंतु फलरूपभक्ती जो श्रीमुख ताको आश्रय कियो हैं ॥ यातें सामीप्य मुक्ति करके कहा ॥ सालोक्यमुक्तीमें अक्षरानंदको अनुभव है सो गंडस्थल युक्त जो अधरायुतके आगें अन्य रस तुच्छहैं सो अक्षरानंदरस तुच्छ हैं सालोक्यमुक्तिकरके कहा ॥ और सायुज्यमुक्तिमें ब्रह्मानंदको अनुभव है ॥ वाक्य ॥ जलनिमग्नजलपानवत् ॥ जैसे जलमें डूबके जल पीवनो ऐसी ब्रह्मानंदको अनुभव है सो हास्य सहित जो अवलोकन वामें जो भक्तिरस है वा भक्तीके आगें ब्रह्मानंदरसको अनुभव कहै कामको ॥ ऐसे भक्तिरसके आगें चतुर्विध जो मुक्ती ब्रजभक्तनकुं तुच्छ लगेहैं ये निश्चय भयो ॥ ॥ सो ॥ श्लोक ॥ वीक्ष्यालकावृतमुखंतवकुंडलश्रीगंडस्थलाधरमुधंसितावलोकं ॥ दत्ताभयचमुजदंडयुगवि-

लोक्यवक्षःश्रियैकरमणंचभवामदास्यः ॥१॥ ऐसो दास्य
रसतें प्राप्त भये जो ब्रजभक्तनके भाव तिनकुं देखके आप
बहुत प्रसन्न भये यद्यपि आत्माराम हते तोई विनकी प्रेम
देखके आपने रमण कियो ॥ वाक्य ॥ आत्मारामोप्यरीरम-
त् ॥ ऐसो ब्रजभक्तनके भावतें श्यामस्वरूप हते सो गौरभ-
ये या रीतीको श्रीमदनमोहनजीको स्वरूप राजा आसक-
रननं श्रीगुसांईजीके मुखतें मुनके श्रीमदनमोहनजीकुं
पधरायके और तानसेनजीकुं संग लैके राजा आसकरन
अपने देशमें आये और ब्रजभक्तनके भावसों सेवा करन
लगे राजकाज सब दिवानकुं सोंपदीये और श्रीमदनमो-
हनजीकी सेवा तथा कीर्तन करनलगे और जब अनव-
सर होवै तब राजा मानसीसेवा करे ऐसे करते करते व-
होत दिन बीते ॥ प्रसंग ॥ २ ॥ फेर एकदिन राजा आस-
करनके ऊपर दक्षिणको राजा चढ़ि आयो जब राजा
आसकरनकुं खबर भई तब राजा आसकरन लडाई क-
रवेकुं चले जब शत्रुकी सेनाकेपास आये तब बरसाद भ-
यो सो राजा आसकरनकी सेनापर तो जलको बरसाद
भयो और शत्रुनकी सेना पर पथ्थरकी सिलानको बर-
सात भयो शत्रुनकी सेना मारीगई जब राजा आशकरन
जीतके पाछे फिरे घोडापर असवारभये और मानसी-
सेवा करनलगे फेर सब सेवा करी रसोई सिद्धकरी और
भोग समर्थ्यो सो कढ़ीकी हांडी भोग धरवेकुं जाते हते
इतनेमें घोडा कूद्यो जब राजा आसकरनको ध्यान से-
वामेंसुं बहार निकस्यो और ऐसे मालूम पढयो जो क-

ढीकी हांडी भेरे हाथतें पडगई और कढ़ी ढुल्लाय गई सो बाहार देखतो सब वस्त्र कढ़ीछुं भरगये जब दिवाननें पूछ्यो जो ये कहा जब आसकरनजीनें कही जो सोकुं कढ़ी बहोत भावेहैं याछुं हांडी भरके में कमरसों बांध राखी हती सो फूटगईहैं ऐसे कहेके सो बात गुप्तराखी फेर राजा आसकरननें मनमें ये विचार कियो जो तनुजा सेवा और वित्तजा सेवा ॥ मानसी सेवा सिद्धहोवेके लीयें करनी कहीहैं ॥ अब मानसी सेवा श्रीगुसाईंजीकी कृपातें सिद्ध भईहैं जब राज और घर कहाकामकोहैं ये विचारके मतीजेको राज्य देदियो और श्रीठाकुरजी वस्त्रआभूषण सब तथा पात्र श्रीगुसाईंजीके इहां पठायदिये और आप श्रीगोकुलमें जायके रहे सब लीलके दर्शन साक्षात् होवैं लगे जैसे लीलके दर्शन होवैं तैसे पद करके गावन लगे ॥ प्रसंग ॥ ३ ॥ एकदिन राजा आसकरन न्हायवे जाते हते ॥ सो श्रीठाकुरजीनें घुरली बजाई सो राजा आसकरनजी सुनके श्रीठाकुरजीकी आढी दौड गये उहां श्रीठाकुरजी ठाढेहैं और अलौकिक सब लीलहैं और सब ब्रजभक्त आवैंहैं और होरीको खेल होवैंहैं ऐसे दर्शन राजा आसकरनजीकुं भये तब राजा आसकरनजी देहदशा भूल गये और दर्शन करके धमार गायवे लगे ॥ सोधमार ॥ यागोकुलकेचौहटे रंगराची ग्वाल ॥ मोहनखेलेफाग नैनलेनेरी रंगराचीग्वाल ॥ येधमारमें जैसेदर्शनकरतगये तैसेगातेगये ऐसे तीनदिनसूधी गायोकरे और कछु सुध न रही जब श्रीगुसाईंजीनें मनुष्यनछुं कही राजा आस-

करनजी तीनदिनसुं नहीं दीखेहैं सो कहाहैं जब लोगननें
 कही जो तीनदिनसों रमणरेतीमें ठाढ़ेहैं जब श्रीगुसाईं-
 जीनें मनुष्य पठायके बुलाय लीये जब श्रीगुसाईंजीके म-
 नुष्य विनकुं ले आये देखेंतो उन्मत्त जैसे होय गये हैं
 तब श्रीगुसाईंजीनें कही अब इनकुं लौकिक सुधि नाहीहैं
 भगवल्लीला साक्षात्कार होयगईहैं ये ब्रजमें जहां इनकी
 इच्छा होवै तहां ये फिरंगे इनकुं कछु कहो मती ॥ प्रसंग
 ॥ ४ ॥ एकदिन राजा आसकरन सेनभोग आयहते जब
 जगमोहनमें बैठे हते सो ब्रजभक्त दूधको कटोरा हाथमें
 लेके यशोदाजीकुं कहेंहैं जो ये दूधबहुत उत्तमहै कपूर मि-
 सरी मील्यो है तुम श्रीठाकुरजीकुं अरुगावो जब जशोदा-
 जी दूधको कटोरा लेके श्रीठाकुरजीकुं आरोगावै पधारे जब
 श्रीठाकुरजी सखामंडळीमे बीराजते हते जब जशोदाजी
 कहेवेलो जो लाल तनक दूध पीवो तब ये सब दर्शन
 आसकरनजीकुं साक्षात् भये जब आसकरनजीनें यह
 पद गायो ॥ राग केदारी ॥ कीजेपान ललारेओटयोदूधला-
 ईहैजशोदामैया ॥ कनककटोराभरपीजिब्रजवाललाडले-
 तेरीवेनीवढेगीमैया ॥ १ ॥ ओट्योनीकोमधुरोअछुतोरु-
 चिसो करीलीजेकन्हैया ॥ आसकरनप्रभुमोहननागरपय-
 पीजेसुखदीजेप्रातकरीगी घैया ॥ २ ॥ जब श्रीयशोदाजी
 तथा रोहिणीजी श्रीठाकुरजी तथा श्रीबलदेवजीकुं सेन-
 भोगधन्यो और सब सखा सहित जेसन लगे तब ये
 दर्शनआसकरनजीकुं भये जब आसकरनजीनें येपद
 गायो ॥ रागकान्हरो ॥ वियारु करत है धनश्याम ॥ खुरमा-

खाजागुंजा मठरीपिस्तादाखबदाम ॥ १ ॥ दूधभातपृतसां-
 निथारभरि लेआईब्रजवाम ॥ आसकरनप्रभुमोहननाग-
 रअंगअंगअभिराम ॥ २ ॥ रागकेदारो ॥ मोहनलालवि-
 यारूकीजे ॥ व्यंजनमीठेखाटेखारेरुचिसोंमाग जननी-
 पैलीजे ॥ १ ॥ मधुमेवापकवानमिठाई ताऊपरतातोपय-
 पीजे ॥ सखासहितमिलीजेमोरुचिसों जूठिनआसकरन-
 कोदीजे ॥ २ ॥ येमुनके श्रीगुसांईजी बहुत प्रसन्न भये फेर
 श्रीगुसांईजीने ये विचार कियो जो प्रभू कैसे दयालहैं
 आसकरनके ऊपर कैसे कृपा करीहैं जो लौकिकके रा-
 जानकुं राजके अंतमें नर्क मिलेहैं और आसकरनकुं रा-
 जके अंतमें भगवत् लीलाके दर्शनभयेहैं औरलीलाकी
 प्राप्तिहोयगी ऐसे श्रीप्रभुनकी कृपा विचारके श्रीगुसां-
 ईजी बहुत प्रसन्न भये पाछे सेनसमयमें दर्शन राजा आ-
 सकरननें करे ता पाछे राजाआसकरननें श्रीठाकुरजीके
 नेत्रनमें नीद झमक रही है ऐसों देख्यो और एक सखी
 हाथजोडके श्रीठाकुरजीके आगेंठाडीहोयके बीनती
 करे हैं जो आपकुं नीद आय रहीहैं सो पोढो ॥ येदर्शन
 लीलासहित राजा आसकरनकुं भये जब राजा आसक-
 रननें येपद गायो ॥ रागकेदारो ॥ पोढीये पिय कुंवरक-
 न्हाई ॥ युक्तिनवलविविधकुसुमावलिमेंअपनेंकरसेजब-
 नाइ ॥ १ ॥ नाहिनसखी समयकाहूकोग्वालमंडलीसब-
 वोराई ॥ आसकरनप्रभुमोहननागरराधाकोललितालेआई
 ॥ २ ॥ रागकेदारो ॥ तुमपोढोहो सजबनाउं ॥ चापूंचरन-
 रहंपायनतर मधुरेंस्वरकेदारोगाउं ॥ १ ॥ सहेचरिचतुर-

सवेजुरिआई दंपतिमुखनयननदरसाउं ॥ आसकरनप्र-
 मुमोहननागरयहसुखश्यामसदाहोपाउं ॥ २ ॥ रागकेदारो ॥
 पोढरहोघनश्यामबलैयालेहूं ॥ श्रमितभयेहोआजगोचा-
 रतघोषपरतहैधाम ॥ १ ॥ सीरीवियार झरोखनकेमगआ-
 वतअतिसीतलमुखधाम ॥ आसकरनप्रमुमोहननागरअं-
 गअंगअभिराम ॥ २ ॥ या रीतीसुं राजाआसकरनजीकुं
 जैसी जैसी लीलाके दर्शन होते सोईसोई पद गावते और
 श्रीगुसाईंजी इनके उपर सदैव प्रसन्न रहते और गोविंद-
 स्वामीके सतसंगतें नित्य श्रीनाथजी आसकरनजीसों
 बातें करते और खेलते ॥ प्रसंग ॥ ५ ॥ सो एकदिन राजा
 आसकरन श्रीजी द्वार आये ॥ और श्रीनाथजीके दर्शन
 करे ऐसी लीलाके दर्शनभये सब ब्रजभक्तयशोदाजीके
 घर मिलके उराहनो देवे आयेंहैं और श्रीठाकुरजीकुं
 यशोदाजीके पास ठाढे देखके उराहनोदेवै भूल्लायेंहैं
 और श्रीठाकुरजीके स्वरूपमें विनकोमन मोहित भयोंहैं
 ऐसी लीलाके दर्शन आसकरनजीकुं भये जब आस-
 करनजी चकित होयरहै जब चतुर्भुजदासजी दर्शन कर
 ते हते विननें येपद गायो ॥ राग आसावरी ॥ भूलीरीउरा-
 हनेकोदेवो ॥ परगयेदृष्टिश्यामघनमुंदरचकितभईचिते-
 वो ॥ १ ॥ चित्रलिखीसी ठाडीगवालिन कोसमजसमझे-
 वो ॥ चतुर्भुजप्रभुगिरिघरमुखनिरखत कठिनभयोघर-
 जेवो ॥ २ ॥ ऐसो पद आसकरनजी सुनकेबहुत प्रसन्न
 भये और विचार कय्यो जैसे अनुभव मोकुं भयोंहैं ऐसी
 कृपा चतुर्भुज दासके उपरहूं है ऐसी विचारके श्रीगुसाईं-

जीकुं बीनती करी जो महाराज आपकी कृपा चतुर्भुज-
 दासके ऊपर बहुतहै तब श्रीगुसांईजीने आज्ञा करी जो
 कुंमनदासजीके बेटाहैं जिनकुं श्रीगोवर्धननाथजी बिना
 क्षणभर रह्यो नजाय ऐसेनको बेटा ऐसे होवै यामें कहा
 आश्चर्य है फेर एकदिन आसकरनजी सांझके समय
 गोविंदकुंडके पास ठाढ़े होते देखे तौ ब्रजभक्तनके युद्ध
 चले आवेहैं और आयके सब गोपीजन ठाढ़ी भई इतनेमें
 श्रीनाथजी गाय चरायके घरमें पधारतेहैं गायनके संग
 गोरजसुं व्यापतहै मुखारविंद जिनको ऐसे प्रसूके दर्शन
 नकुं रस्तामें गोपीजन आवेहैं ऐसे दर्शन आसकरनजीकुं
 भये जब आसकरनजीने ये पद गायो ॥ राग गौरी ॥
 मोहनदेखिसिरानेनैना ॥ रजनीमुखआवतगायनसंगस-
 धुरबजावतवैना ॥ १ ॥ म्वालमंडलीमध्यविराजतसुंदर-
 ताकोऐना ॥ आसकरनप्रसु मोहननागर वारोंकोटिक-
 मैना ॥ २ ॥ आसकरनजीने ऐसे पद बहोत गाये फेर
 आसकरनजी रातकुं श्रीगुसांईजीके पास कथा सुनवेको
 नित्य जाते जैसे वचनामृत सुनते तैसे अनुभव होता
 होता ॥ फेर एकदिन श्रीगुसांईजी श्रीनाथजीकुं जगायवेकुं
 पधारै बाहीसमय अपने अपने घरतें सब ब्रजभक्त सद्य
 माखण और मलाई और दूध और अनेक प्रकारकी
 सामग्री लेके सब पधारेहैं और गोपीजन यशोदाजीकुं
 कहेंहैं हे यशोदाजी लालजीकुं जगाओ हम तुमारे लाल-
 जीके दर्शनकरके और सामग्री अरोगायके जो दही बे-
 चवे जायेंहैं तो हमकुं दशगुणो लाभ होवेंहैं यातें हम तु-

मारे घर आईहैं सो लालजीकुं जगाओ तो इनको मुख
देखके जावैं ॥ तब ऐसे दर्शन आसनकरनजीकुं भये
जब आसकरनजीनें पद गायो सो पद ॥ राग विभास ॥
प्रातसमयघरघरतेंदेखनकोआईगोकुलकीनारी ॥ अपनो
कृष्णजगाययशोदाआनंदमंगलकारी ॥ १ ॥ सबगो-
कुलकेप्राणजीवनधनयामुतकीवलिहारी ॥ आसकरनप्र-
भुमोहननागर गिरिगोवर्धनधारी ॥ २ ॥ राग विभास ॥
उठोमेरेलाललाडिलेरजनीवीतीतिमिरगयोभयोभोर ॥ घ-
रघरदधिमथनियाधूमेअरुद्विजकरतवेदकीघोरा ॥ १ ॥ करि
कलेउदधिओदनमिश्रीवांटिपरोसोंओर ॥ आसकरनप्र-
भुमोहननागरवारोंतुमपरप्राणअंकोर ॥ २ ॥ फेर आस-
करनजीकुं बाललीलाके दर्शन भये यशोदाजी दहीवि-
लोवेहैं और श्रीठाकुरजी बालकचेष्टा करेंहैं और दोढ
दोढके दही मथन करतें रेकुं पकडेहैं यशोदाजीकुं देवे
नहींहैं और यशोदाजी श्रीठाकुरजीकुं समझावेहैं जो
लाला बहुत अवार भईहैं मोकुं दधि मथनकरन दे ऐसे
दर्शन राजा आसकरनजीकुं भये हैं ॥ जब आसकरन-
जीनें ये पद गायो ॥ सो पद ॥ राग रामकली ॥ मोहेदधि-
मथनदेवलिगई ॥ जाउबलबलवदनऊपरछांडमथनीरई ॥
॥ १ ॥ लालदेउंगीनवनीतलींदाआरतुमकितठई ॥ सुत-
हितजानविलोक्यशोमतिप्रेमपुलकितभई ॥ २ ॥ लेउछंग
लगायउरसोप्राणजीवनजइ ॥ बालकेलिगुपालजूकीआस
करणनितनई ॥ ३ ॥ ये पद सुनके श्रीगुसांईजी बहुत प्रसन्न
भये और ये विचारे जो आसकरनकुं प्रभुनको स्वरूप

लीलासहित हृदयारूढ भयोहै सो सब लीला सहित प्रभु इनकु दर्शन देतैहैं ऐसे विचारके श्रीगुसाईजी बहोत प्रसन्न भये प्रसंग ॥६॥ फेर एकदिन आसकरनजी श्रीगोकुलमें आये श्रीनवनीत प्रियाजीके दर्शन करवेकुं गये तब आसकरनजीकुं ये लीलाके दर्शन भये श्रीयशोदाजी श्रीठाकुरजीकुं पालने झुलावेहैं और गोपीजन मिलके यशोदाजीके पास आईहैं और गोपीजन कहेहैं जो हमारो ऐसो नेम है ज्यांसूधी तेरे लालकुं हम खेलावै नहीं और हम पालना झुलावै नहीं तहां सूधी हमारो चित्त घरके काममें नहीं लगेहैं और जो कदाचित् घरकी काम करै तो सब काम बिगड़ेहैं जायु हम सगरी सूती उठके तुमारे लालकुं खिलावन आईहैं ऐसे सब गोपीजन कहेहैं और यशोदाजी हसेहैं ऐसी लीलाके दर्शन आसकरनजीकुं भये जब आसकरनजीने ये पद गायो ॥ राग रामकली ॥ यहनित्यनेमयशोदाजूमैरे तिहारोईलाललडावनकुं ॥ प्रातसमयउठपलनाझुलाउं शकटभजनयशगावनकुं ॥ १ ॥ नाचतकृष्णनचावतगोपीकरकटताल बजावनकुं ॥ आसकरनप्रभुमोहननागरनिरखवदनसजुपावनकुं ॥ २ ॥ सो ऐसे अनेक प्रकारकी लीलाको अनुभव होतोहतो सो राजा आसकरन ब्रजमें फिरते हते और ज्यास्थलमें जाते वाई स्थलमें श्रीठाकुरजी वेसी लीलाके दर्शन देते हते एकदिन राजा आसकरन दानघाटीपर जाते हते उहां देखेतो श्रीनाथजी कामली ओढके हाथमें लकुटी लेके सखामंडली

संग लेके ठाढ़ेहैं और ब्रजभक्त दहीं वेचवेकुं जातहैं और
सब सखादेखके गोपिनकुं पकड़तहैं और कहेंहैं हमारो
दहिंको दान लगैहैं सो देजाओ गोपीजन कहेंहैं जो द-
हींको दान हमनें सुन्यो नहींहैं और तुम कबके दानी
भये जब आसकरणजीनें पद गायो सो ॥ राग विभास ॥
नंदकिशोरयहवोहनीकरननपाई ॥ गोरसकेमिषरसहिद-
दोरतमोहनमीठीताननगाई ॥ १ ॥ गोरसमेरेघरहिविके-
हैंक्योंदंदावनजाय ॥ आसकरणप्रभुमोहननागरयशो-
मतिजायसुनाय ॥ २ ॥ राग विभास ॥ कबतें भयोंहैंद-
धिदानी ॥ मटुकीफोरतहरवातोरतयहवातमेंजानी ॥ १ ॥
नंदरायकीकानकरतहुं और जसोदारानी ॥ आसकरण-
प्रभुमोहननागरगुणसागरअभिमानी ॥ २ ॥ सो ऐसी
लीलाके दर्शन राजा आसकरणजीकुं दानघाटीपर भये
फेर एकदिन राजा आसकरण परासौलीमें गये उहां
श्रीठाकुरजी वेणुनांद करेंहैं और ब्रजभक्त पधारतहैं अ-
तिउत्कंठासहित श्रीठाकुरजीके पास गमन करतहैं ऐसे
दर्शन आसकरणजीकुं भये तब ये पद गायो ॥ राग के-
दारो ॥ गोपमंडलीमध्यमनोहरअतिराजतनंदकेनंदा ॥
शोमितअधिकशरदकीरजनी उडुगणमानोपूर्णचंदा ॥
॥ १ ॥ ब्रजयुवतीनिरखमुखठाढीमानतसुंदरआनंदकेनंदा ॥
आसकरणप्रभुमोहननागरगिरिधरनवरसरसिकगोविंदा
॥ २ ॥ यारीतीसों राजाआसकरनकुं अनेक लीलाके दर्शन
भये ॥ श्रीगुसाईंजीकी कृपातें सो राजा आसकरण ऐसे कृ-
पापात्र हते ॥ प्रसंग ॥ ७ ॥ और राजा आसकरण ब्रजमें फि-

ज्यो करते हते कोईदिन श्रीगोकुलमें कोईदिन श्रीजी द्वार-
में कोईदिन ब्रजके और स्थलनमें फिरते खान पानको
कछु उपाय न राखते विनकी ऐसी दशा देखके
श्रीगुसाईजीने सब वैष्णवनकुं और मुखिया भीतरिया-
नकुं और वहुबेटीनकुं कहि राख्यो हतो जो राजा आ-
सकरण जब आवै इनकुं खावेको जोहाजरहोवै सो ध-
रदेनो कारण जो दोदो चारचार दशदश दिनमें जो
यह और भगवदिछासुं जोमिलेहै सो लेलेवेहैं ऐसे श्रीगु-
साईजीने कहेराखि सो एकदिन श्रीगोकुलमें आसकर-
णजी आये तब श्रीगोपिनाथजीके बेटीजी लक्ष्मी
बेटीजी सत्यभामा बेटीजी बालपणेशों विधवा हते
और श्रीनवनीतप्रियाजीकी रसोईकी सेवा करते हते
और नवनीतप्रियाजीके राजभोग साजवेके समय
आसकरणजीकुं आये देखके बेटीजीने विचार क-
ज्यो वैष्णव भूखो जायगो तो फेर पांच
सात दिनमें आवेगो और श्रीनाथजी याके हृदयमें वि-
राजेहैं आपकोश्रम होवेगो येविचारके लक्ष्मी बेटीजीने
सत्यभामा बेटीजीसुं कहि तुम श्रीनवनीतप्रियाजीके लीयें
दूसरी सामग्री तैय्यार करौ और येंमें आसकरणजीकुं
घरदेऊं इनके हृदयमें श्रीनवनीतप्रियाजी अरोगेंगे ऐसे
विचारके वो थार आसकरणजीके आगें घरदियो तब आ-
सकरणजी सबलेगये फेर और सामग्री सिद्ध करके तब
श्रीनवनीतप्रियाजीकुं राजभोग धरे पाछें भोग सराये
तब श्रीगुसाईजी आरती उतारवेकुं पधारे तब श्रीनवनी-

तप्रियाजीको सुखारविंद बहुत प्रसन्न देखके श्रीगुसां-
ईजीनें पूछी आजकहाहै तब श्रीनवनीतप्रियाजीनें कहि
आज हम दुगुणो राजभोग अरोगेहैं तब श्रीगुसांईजीनें
कहि सामग्रीतो अधिक मैं नहिहैं तब श्रीनवनीतप्रिया-
जीनें कहि या बातकुं बेटीजी जानेहैं फेर श्रीगुसांईजीनें
भोजन करवेकेसमय बेटीजीकुं पुंछि तब लक्ष्मी बेटीजी
मनमेंडरपके और हाथ जोडके सब बात कही ये बात
सुनके श्रीगुसांईजी बहुत प्रसन्न भये और आज्ञा करी जो
वैष्णवको स्वरूप ऐं सोहिहै जाण्यो जायतो ॥ परंतु जहां-
सुधी आप न जणावैं तहांसुधी जीवको कोई उपाय नहिं
है ऐंसे कहेके आप छुप कररहै सो वैं आसकरणजी ऐंसे
कृपापात्र हते जो विनके हृदयमें विराजके श्रीनवनीतप्रि-
याजी अरोगें सो ये बात श्रीगुसांईजीनें गोपालदासजीके
हृदयमें प्रवेश करके बलभाख्यानमें गाईहै ॥ सातुक ॥
लक्ष्मीसत्यभामाबेउअग्रजनीअनुहारेररसना ॥ श्रीनव-
नीतप्रियजेनें रीझव्या सेव्या विविधि प्रकारेररसना ॥
॥ १ ॥ या आख्यानमें सातबालक और सात बडुजी
और छे बेटीजीनको वर्णनहै परंतु श्रीनवनीतप्रियाजीकुं
रिझाए ऐं सो शब्द लक्ष्मीबेटीजी और सत्यभामा बेटीजी
विना औरमें नहिं कहाहै सोवे आसकरणजी श्रीगुसां-
ईजीके ऐंसे कृपापात्र हते ॥ वार्ता संपूर्ण वैष्णव ॥७३॥
। श्रीगुसांईजीके सेवक दोउ भाई साचोरा ति० ।
सोवे दोउ भाई साचोरा गुजरातमें रहते हते ॥ एक
समय श्रीगुसांईजी गुजरात पधारे ॥ तब दोउ भा-

ईमकुं नाम निवेदन कराए तब वे दोनो भाई श्रीठा-
 कुरजीकी सेवा करन लगे और दिवसरात्र भगवद्वाता
 करते और श्रीसुबोधिनीजी वांचते और कछु धंदा
 नहीं करते भगवदिच्छासुं निर्वाह करते एक दिन वै-
 ण्णवनको साथ श्रीगोकुलजातो हतो तब वा गासमें वा
 साचोरानके घरमें जाय के उतरे विनके घर कछु हतो
 नहीं जब विन दोनो भाईनने विचार क्यो जो
 ये वैष्णव आयेहें सो हमारे घरतें प्रसाद लीये विना न
 जाय तो ठीक तब वीनने ऐसोविचार क्यो जो
 अमुक बनियाकी दुकान अपने परोसमें है और वो आ-
 पनो मित्र है वाकी दुकान खोलके जितनी सामग्री चाहिये
 इतनी काढ लेवें फेर ये बनिया आवेगो जब दाम चुकाय
 देंगे ऐसे विचारके रातकुं वाकी दुकान खोली और
 जैसामग्री जितनी चहीती हती इतनी तोलके लीनी तब
 बडो भाई सामग्री लेके घर आयो और छोटे भाई दु-
 कान बंद करवेकुं रह्यो जब सरकारके मनुष्यनने वाकुं
 चोर जानके पक्यो फेर छोटे भाईने बडे भाईकुं खबर
 दीनी जो तुम रसोई करके वैष्णवनकुं प्रसाद लेवाईओ
 और मैं राजसू निवटके काल आवुंगो ये बात वासाचो-
 राके परोसीनने जानी विनने राज्यमें जायके कही मैं
 इनके परोसमें रहूँ ये नित्य बहोत चोरी करके घरमें ला-
 वेंहें और लोगनकुं छुट लावेंहें और सब जगामें डाको
 पाडेहें ऐसे झूठी बातें बनायके सरकारके मनुष्यनकुं सम-
 झायो याकुं मारदारो तो बहुत आछो तब सरकारके

मनुष्यननै वा परोसीकी बात साँची मानके वाकुं मार-
 टा-य्यो और गामके दरवाजापर वाको माथो टांग दियो
 और वृक्षसों वाको धड बांध दियो और गाममें जाहेर
 कय्यो जे कोई मनुष्य चोरी करेगो वाके ये हाल होवेंगे
 और वाको बडो भाई तो घरमें न्हायके रसोई करके
 भोग धरके वैष्णवनकुं प्रसाद लिवाये ॥ विन वैष्णवनकुं
 जावेकी उतावलहती सो दो पातर घरमें करधरी एक अप-
 नी और भाईकी जब भाई आवेगो तब प्रसाद लेउंगो ऐसे
 विचारके दो पातर टांकके विन वैष्णवनकुं पहुँचावे ग-
 यो गामके दरवाजा पर देखे तो भाईको धड और माथो
 टांग्यो है ॥ देखके बहुत उदास भयो और सेवामें न्हायो
 हतो छोटी भाई माच्यो गयो ऐसी खबर बडे भाईकुं पेहेले
 पही न हती जब दरवाजापर देखके रोवे लग्यो और वो-
 धड हतो सो हाथ जोडके वैष्णवनकुं जयश्रीकृष्ण करन
 लग्यो सो वैष्णवदेखके बहुत चकित भये और वाको धड
 छोडके और शीश छोडके धडके ऊपर मिलाय दिथो
 और श्रीनाथजीको प्रसादी बस्त्र हतो सो वाके गलामें
 बांध दियो और चरणामृत वाके मुखमें मेल्यो सो वैष्ण-
 वनकी कृपातें छोटी भाई जीवतो भयो और उठके वै-
 ण्वनकुं दंडवत करन लग्यो और वैष्णवनकुं वीनती
 करी आजकी दिन कृपा करके इहां रहो इतनेमें वा रा-
 जाके मनुष्यननै राजाकुं खबर करी जो वा ब्राह्मणकुं
 आज सवारि मरायो हतो सो वैष्णवननै जीवतो कय्यो
 तब वे राजा मुनके बहोत डरप्यो आयके वैष्णवनके पां-

वन पन्यो और वीनती करी मेरे अपराधक्षमा करौ और मोकुं तुमारो दास करौ और जैसे वने तैसे मोकुं शरण लेउ फेर वा राजानें वा साचोरा दोनो भाईनके परोसीकुं पकडायके मार डारवेको हुकम कन्यो तव वैष्णवननैं छोडायो फेर राजानें कही ये वैष्णव द्रोही और धर्मद्रोही मेरे गाममें नहीं चाहिये राजानें बाकुं देशमेंसुं वाहेर काढ्यो और बाको घर लूट लियो फेर राजा विन वैष्णवनके संग श्रीगोकुल गयो और वैष्णव भयो सो वे दोनो भाई साचोरा ऐसे कृपा पात्र हते जिनकी चित्तकीवृत्ती दिवस रात्र श्रीगुसांईजीके चरणारविंदमें और वैष्णवनकी सेवामें रहेती हती ॥ फेर वाराजानें दोनो भाई साचोरानकुं आजीविकाकर दीनी सो वे दोउ भाई साचोरा ऐसे कृपा पात्र भगवदीय हते ॥ वार्ता संपूर्ण ॥ वैष्णव ॥ ७४ ॥

॥ श्रीगुसांईजीके सेवक रामदास खंभातके वासीकी वार्ता.— एक समें श्रीगुसांईजी गुजरात पधारे जब रामदासजीकुं नाम निवेदन करायो फेर रामदासजीन श्रीगुसांईजीसुं पृच्छी अब कहा आज्ञा है तव श्रीगुसांईजीनैं कही अष्टाक्षर तथा पंचाक्षरको जप करौ तव रामदासजी एकांतमें बैठके जप करते ॥ फिर रामदासजीकुं श्रीगोवर्धननाथजीनैं दर्शन दिये और कही जो तुम व्रजमें आयके हमारी सेवा करौ तव रामदासजी व्रजमें जायके श्रीगुसांईजीकी आज्ञा लैके श्रीनाथजीके शाकघरकी सेवा करन लग्ये फेर श्रीनाथजी शाक घरमें आयके रामदासजीसों वार्ते करे फेर एक दिन गुलाल

कुंडपर श्रीनाथजी पधारे और रामदासजीकुं कही गये
 तुम शीतल सामग्री लैके गुलालकुंडपर आईयो सो
 रामदासजी लैके गये उहां श्रीनाथजी आरोगे सब स-
 खामंडली कुं वाट दीये सो रामदासजीकुं सब लीलाके
 दर्शन भये इतनेमें शंखनाद भये श्रीनाथजीतो झट मं-
 दिरमें पधारे और रामदासजीतो धीरे धीरे भोगके दर्शन
 समे आय पहाँचे और अपने मनमें बहोत डरपे जो श्रीगुसां
 ईजी कहा कहेंगे तव श्रीनाथजीनें श्रीगुसांईजीसों कही
 जो रामदासजी मेरे संग गये हते जासुं तुम कछु इनकुं
 मत कहो तव श्रीगुसांईजीनें रामदासजीसों कही जो
 श्रीनाथजी तुमकुं संग लेजाय तहां नित्य जाओ तुमारे
 बडे भाग्यहैं शाकघरमें दूसरो मनुष्य करेंगे और तुमकुं
 अवकाश होवै जब शाकघरमें सेवा करियो फेर एकदिन
 श्रीनाथजी रामदासजीकुं कदमखंडीपर लगये और उहां
 रासकिये और गोविंदस्वामी कीर्तन गाते हते और स्याम-
 दास मृदंग बजावते हते ऐसे अनेक लीलानके दर्शन श्री-
 नाथजीनें रामदासजीकुं कराये सो वे रामदासजी ऐंसे कृ-
 पापात्र अष्टाक्षरमंत्रके जप करके भये सो नारद पंचरात्रीमें
 कहाहै ॥श्लोक॥ किंमंत्रैर्वदुभिर्विनश्वरफलैरायाससाध्यैर्म
 स्वःकिंचिल्लोपविधानमात्रविफलैःसंसारदुःखावहैः॥एकःस
 न्नपिसर्वमंत्रफलदोलोपादिदोषोज्झितःश्रीकृष्णः शरणममे
 तिपरमोमंत्रोयमष्टाक्षरः ॥ १ ॥ सो अष्टाक्षर जप करते
 रामदासजीकुं लीलानके दर्शन श्रीनाथजीनें पुष्टिमार्ग
 राखवैके लीये कराये जो कोई वैष्णव अष्टाक्षर मंत्रको

जप करेंगे विनके सब मनोरथ पूर्ण होएंगे ॥ वार्ता संपूर्ण ॥ वैष्णव ॥ ७५ ॥ ❀ ॥ ॥ ॥

श्रीगुसाईजीके सेवक ताराचंद भाईकी वार्ता ॥

सो ताराचंद भाई श्रीगोकुलमें श्रीगुसाईजीके दर्शनकुं आये तब श्रीगुसाईजीके दर्शन कीये साक्षात् पूर्ण पुरुषोत्तमके दर्शन भये फेर ताराचंदभाईने नाम निवेदन किये और श्री नवनीतप्रियाजीके स्वरूपमें आसक्त भये फेर कोईदिन ताराचंदको मन चलायमान होवै लय्यो वृथा विचार करन लगे तब श्रीगुसाईजीने आज्ञा करी जो वैष्णवनकुं वृथा लाप तथा वृथा क्रिया तथा वृथा ध्यान वर्जितहैं सो ये सुनके ताराचंदभाईने विचार क्यो जो मेरे मनकी आपने अंतर्दामी पणेषु जानीहै जासुं बड़े भाग्य माने और बहुत शिक्षा मानी और अपने मनकुं स्थिर करवेकुं उपाय ढूँढवे लगे फेर सर्वोत्तमजीनें ढूँढ्यो सो ॥ श्लोक ॥ श्रद्धा विशुद्धबुद्धिर्यः पठत्यनुदिनं जनः ॥ सतदेकमना सिद्धिमुक्तां प्राप्नोत्यसंशयः ॥ १ ॥ यारीतिसुं ताराचंदभाईनें विचार कियो जो श्रद्धा सहित शुद्धबुद्धिसहित जो श्रीसर्वोत्तमजीको पाठ करेंहैं और एकसो आठ नामनको अर्थ चित्तमे धारण करेंहैं विनकी मन स्थिर होवेंहैं और कृष्णाधरामृतरूपी जो सिद्धीहै वा जीवकुं प्राप्त होवेंहै यामें संशय नहीं ऐसे विचारके ताराचंदभाई श्रीगुसाईजीकी आज्ञातें सर्वोत्तमजीको पाठ करनलगे फेर थोड़ेदिनमें श्रीठाकुरजी अनुभव जतावन लगे सो वे ताराचंद श्रीगुसाईजीके ऐसे क-

पापात्र हते ॥ वार्ता संपूर्ण ॥ वैष्णव ॥ ७६ ॥ ॐ ॥ ॥
 ॥ श्रीगुसांईजीके सेवक एक ब्राह्मणकी वार्ता ॥
 सो वे ब्राह्मण पंडित बहुत हतो और कर्ममार्गमें आसक्त
 हतो फेर वह ब्राह्मण श्रीगोकुल आयो और श्रीगुसांई-
 जीको सेवक भयो और भगवत्सेवा करन लग्यो एकदिन
 वा ब्राह्मणवैष्णवनें श्रीगुसांईजीके मुखतें दैवीजीवनके
 लक्षण गुने जो लौकिककर्म तथा वैदिककर्म जो दैवीजीव
 करेंहें सो कपटतें करेंहे नहीं करें तो बिनकुं कुछ बाधा ना-
 हीहै ॥ लोकशिक्षार्थ करेंहें सो पुष्टिप्रवाहमर्यादाग्रथमें क-
 ह्योहै ॥ सो श्लोक ॥ लौकिकत्वं वैदिकत्वं कापट्यात्तेषु नान्य
 था ॥ वैष्णवत्वं हि सहजंततो न्यत्र विपर्ययः ॥ १ ॥ यि बात सुनके
 मनमें विचार कन्यो जो कर्ममार्गमें ते आसक्ती छोड़ी च-
 हीये फेर श्रीठाकुरजी पधरायके अपने देशमें आयके सेवा
 करन लग्यो चुकटी मागलावे और निर्वाह करे और श्री-
 ठाकुरजीकी मंगलातें सेन पर्यंत आखोदिन सेवा करे
 कर्मकरवेको अवकाश आवै नहीं फेर एकदिन बहुत अ-
 वार भई जब झटपट बुहारी करन लग्यो बुहारीकी दोरी
 तूटगई तब जनेउ उतारके बुहारी बांधी परंतु श्रीठाकु-
 रजीकुं अवार न होवें ऐसो मनमें समझो फेर श्रीठाकुरजी
 वा ब्राह्मणकुं देखके हँसे और कहने लगे जो मैं तेरेपर
 प्रसन्न हूँ जो तू जानैहैं जो ब्राह्मण वेदकर्म न करे तो नर-
 कमें जाय ऐसे तू जानेहैं तोड़ मेरे लीयें नरक जानो कबूल
 कन्यो जासुं मैं तेरेपर प्रसन्न हूँ और तू मागेंगो सो देउंगो
 तब वा ब्राह्मणनें हाथ जोड़के कही जो महाराज मोकुं

कछु नहीं चहीये आप सदा मोखुं बोलो और बातचीत करौं यासुं अधिक मैं कछु भावु नहींहुं श्रीगुसांईजीकी कृपातें मोखुं ऐसो सुख भयो है तब श्रीठाकुरजीनें कही जो अब जनेउ पेहेर लेवो तब वा ब्राह्मणनें कही जो अब मोखुं कर्ममार्गसों कहा काम है तब श्रीठाकुरजीनें कही जो लोगनके दिखायवेकुं जनेउ पेहे-यो चहिये तब वो ब्राह्मणनें जनेउ पेहेरके सेवा करन ल्यो और नित्य श्रीठाकुरजी वासुं बोलते और सब अनुभव जतावते सो वे ब्राह्मण श्रीगुसांईजीको ऐसो कृपा पात्र हतो जिननें न-कर्म जानो कबूल क-यो परंतु प्रभुनकुं अवार न होयवे दीनी ॥ वार्ता संपूर्ण ॥ वैष्णव ॥ ७७ ॥ ❀ ॥ ॥

॥ श्रीगुसांईजीके सेवक हरिदास तथा मोहन-दासकी वार्ता ॥ सो वे हरिदास घरमें श्रीठाकुरजीकी सेवा करते हते और मोहनदास बिनके घर आयके उतरे हते सो दिवस रात दोनो जने भगवद्रसमें छके रहते और ह-रिदासजी मोहनदासमें बहोत आसक्त भये सो मोहन-दास बिना एक क्षण रहे न सकते और भगवत्सेवा क-यो करते और ग्रंथ देखे करते और साक्षात् श्रीठाकुरजीको आविर्भाव मोहनदासजीमें मानते और जब मोहनदास जायवेकी बात करते तब मुनके हरिदासजीकुं सूच्छा आय जाती और ऐसी भावना करते जो जन्मपर्यंत मो-हनदासजी इहांसों न जायतो आछो तब एकदिन मोहन-दासनें निश्चय क-योके सवारे जानोहै तब हरिदासजीनें स्त्रीसुं कही जोतू घर और श्रीठाकुरजी और बेटा सब सं-

भार राखो मेरे प्राण नहीं रहेंगे जब मोहनदास इहांतें
जाएंगे तब सर्वथा मेरे प्राण नहीं रहेंगे ऐसे हरिदासजीनें
स्त्रीसां कही तब स्त्रीनें सुनके विचार कियो जो मोहनदास
न जाय और मेरे पतीके प्राण रहें एसो उपाय करनो ये
विचारके रातकुं बेटाकुं विष दियो जब पाछली रातभई
तब बेटानें प्राण छोड़े तब रोयउठी तब मोहनदास तैया-
री करत हते सो कमर छोड़के बास्त्रीकुं जायके पूछी जो
ये तुमारा बेटा रातकुं आछो हतो आज कहा भयो सो
तुम साँच कहो तब हरिदासकी स्त्रीनें साँचो कह्यो ये
सुनके मोहनदासजी चकित भये और एसो विचार कियो
जो इनको कैसे सोह है और मैं कैसे कठिन हूं ऐसे वि-
चारके वा बालकके मुखमें चरणामृत दियो और भगव-
न्नामको उच्चार कियो और श्रीठाकुरजीकुं वीनती करके
वा बालकके कानमें अष्टाक्षर कह्यो तब वे बालक जीवतो
भयो तबतें मोहनदासनें एसो नेम लीयो जो आज पीछे
हरिदासजी घक्का मारके काढ़ेंगे तोहूं इहांतें नहीं जाउंगो
फेर जन्मपर्यंत मोहनदास हरिदासके घरमें रहे सो वे ह-
रिदास तथा हरिदासकी स्त्री ऐसे कृपा पात्र हते जिननें
वैष्णवको संग न छोड़्यो या बातकेलीये पुत्र जेसी वस्तु
त्याग करी तब तें श्रीठाकुरजी हरिदासजीको एसो स्ने-
हदेखके बहोत प्रसन्न भये और कहा ताई कहिये वार्ता
संपूर्ण ॥ वैष्णव ॥ ७८ ॥ * ॥ ॥ ॥ ॥

॥ श्रीगुसांईजीके सेवक एक चोरकी वार्ता ॥

सो चोर श्रीनवनीतप्रियाजीके मंदिरमें रातीकुं छिप रह्यो

पात्र तथा आसूषण तथा वस्त्र सब एकट्ठे करके एक गांठ बांधी और उठायवे लग्यो तब गांठ उठी नहीं वाने आखीरात उपाय तो बहोत करे परंतु सवारसूधी गांठ न उठी फेर वह चोर पकड्यो गयो तब श्रीगुसांईजीके पास लग्ये तब श्रीगुसांईजीनें कही जो याकुं छोडदेओ पृथ्वी-पतीकुं खबर पडेगी तो याकुं मारडारेगो सो श्रीगुसांई-जीकुं बहोत दया आई और चोरकुं छुडाय दियो फेर वा चोरके मनमें ऐसी आई जो मेरे प्राण जति श्रीगुसांई-जीनें मेरेपर कृपा करके मोकुं प्राण दान दियेहें। इनकी शरण जाउं तो ठीक फेर वो चोर श्रीगुसांईजीको सेवक भयो तब श्रीगुसांईजीनें आज्ञा करी जो अब तु चोरी मत करे जब वा चोरनें हाथ जोडके कही जो महाराज चोरी करे बिना मोसुं रह्यो नहीं जायगो तब श्रीगुसांईजीनें कही जो तुं निर्दय होयके चोरी मत कर जाके पास सो रुपैया जितनो द्रव्य होवै तब वा की दोरुपैया जितनी चोरी करे तो वाको मन न दुखे ॥ और सत्य भाषण करे तो श्रीप्रभुजी दयालुहै तेरो मन फेर डारेंगे और आपके चरणारविंदमें लगावेंगे ॥ ऐसे कहेके वा चोरकुं वैष्णव-ताकी रीती सिखायके बिदा कियो फेर वा चोरनें ऐसो विचार कियो जो कोई राजाकी चोरी करुं तो एक बार काम होयजायगो गरीबकी चोरी अब नहीं करुंगो ऐसे वाके मनमें विचार आयो फेर वे चोर एक राजाके घर चोरी करन गयो सो आछो मनुष्य बनके गयो राजाकी पौरी पर जो पूछे वाके आगें सत्य बोले जो तुम कहां जा-

ओहो जब वो कहे हम चोरी करवे जावेंहें तो श्रीठाकुरजीकी प्रेरनातें सबके मनमें ऐसी आई जो ये मस्करी करेहें जासुं बाकुं कोईनें रोक्यो नहीं वे राजाके घर निःशंक होयके भीतर घुस गयो फेर चोरी करके चलयो आयो जो पूछे जासुं सत्य कहे सो सबनें वाकी हांसी जानी फेर पीछे जब खबर परी जो घरमेंसुं जवहरात गये फेर बाकुं पकडलाये ॥ फेर राजानें वा चोरवैष्णव सों पूछ्यो जो तेनें कैसे चोरी करी वानें सब सत्य कह्यो और कह्यो जो मैंने सबकुं कहीहै परंतु तुमारे मनुष्यननें मेरी बात सौंची मानी नहीं फेर राजानें या बातकी तपास करी तो सब बात वा चोरकी सौंची निकसी तब राजानें वा चोरकुं नोकर राख्यो और सब काम सौंप्यो सो वे चोरनें सब राजाको काम माथे उठाय लीयो फेर श्रीगुसांईजीकुं पधरायके बहोत द्रव्य भेट कय्यो और श्रीठाकुरजी पधरायके सेवा करन लग्यो सो श्रीगुसांईजीकी कृपातें परम भगवदीय भयो वा चोरकुं श्रीगुसांईजीकी आज्ञाको ऐसो विश्वास हतो यातें वाके लौकिक अलौकिक सब सिद्ध भयो ॥ वार्ता संपूर्ण ॥ वैष्णव ॥ ७९ ॥

श्रीगुसांईजीकेसेवक एक दयालदासबनीया ०
 सो वा दयालदासके पास लाख रुपैया हते सो धरतीमें गाढीये और एक पैसा खर्च न करनो ऐसो नेम लीयो ॥ फेर एक दिन श्रीगुसांईजी उहां पधारे जब वो दयालदास सेवक भयो और कही जो महाराज एक पैसा खर्च न होवै और मेरो कल्याण होवै ऐसी रीति सिखावो ॥ वारे आना

नित्य कमाई लाबुहुं और चार आना नित्य खरचुहुं तब श्रीगुसांईजीनें कही जो तूं मानसी सेवा कर ॥ फेर वानें मानसी सेवाकी रीती सब सीख लीनी फेर नित्य वे मानसी सेवा करतो दोपेहेर सूधी और कछु काम करतो नहीं ऐसे करते करते एक दिन मानसी सेवामें खीर करी वामें खांड बहुत पढगई सो फेर काढनल्यो तब श्रीठाकुरजीनें वाको हाथ पकन्यो और आज्ञा करी जो यामें तो तेरो खर्च नहीं ल्यो है सो तूं खांड क्युं काटे हैं ये बात सुनके वाके अंतःकरण खुल गये और भगवत्स्वरूप साक्षात्कार होय गयो और लक्ष रुपैया हते सो श्रीगुसांईजी-कुं पठाय दिये जेसो वाको द्रव्यमें चित्त हतो तैसो श्रीठाकुरजीमें ल्यो ॥ सो वह दयालदास बनिया ऐसो कृपा पात्र हतो वाकुं फलरूप मानसी सेवा सिद्ध भई ॥ वार्ता संपूर्ण ॥ वैष्णव ॥ ८० ॥ ❀ ॥ ॥ ॥ ॥

॥ श्रीगुसांईजीके सेवक स्त्री पुरुष हते तिनकी वार्ता- सो वे दोनो जनें श्रीगुसांईजीके सेवक भये और श्रीठाकुरजी पधरायके सेवा करन लगे एक-दिन स्त्री परोसीके घर गई वाके घर वैभव बहुत देख्यो सो वाकुं पूछी तुमारे घर वैभव कैसे भयो तब वानें कही हम देवीकी पूजा करें हैं यातें भयोहै फेर वा परोसननें कही तुम देवीकी पूजा करौ तो तुमारे घर वैभव बढ़ जाय फेर वैष्णवकी स्त्री परोसनकी देवीकी मूर्ती लेआयके घरमें बैठाई और पतीसों कह्यो जो देवीकी पूजाको सामान लावो और वैष्णव पैसा बेचतो हतो सो पैसा बेचन गयो

तब एक पसारीकी दुकानसुं देवीकी पूजाको सामान लेवें बैठो ॥ सो सामान लियो और पैसानकी कोथळीके बदले भूलमें पसारीकी रुपयानकी कोथली उठायलीनी तब पसारी पकडके सरकारमें लेगयो उहकि हाकेमनें ये न्याय क्यो याकुं गद्दापर बैठायके गाममें फेरनो तब वाकुं गद्दाके ऊपर बैठायके गाममें फेरयो तब वैष्णवके मनमें आई मनें अन्याश्रय क्यो जब ये फल भयो जब घरमें जायके तत्काल देवीको स्वरूप पाछो पढोसीके घर धराय दियो फेर चित्त लगायके श्रीठाकुरजीकीसेवा करन लगे तब वाके मनमें ऐसो निश्चय भयो वैष्णवनकुं अन्याश्रय सर्वथा बाधा करे हैं जासुं वैष्णवनकुं अन्याश्रय न करनो अन्याश्रयतें अनिष्ट होवैहै और श्रीठाकुरजी अप्रसन्न होवैहै जासुं सर्वथा अन्याश्रय न करनी ऐसी शिक्षा वा वैष्णवकुं लगी सो वे स्त्री पुरुष ऐसे कृपापात्र हते जिनसुं अन्याश्रय छुडायके श्रीठाकुरजी बोलन लगे ॥ वार्ता संपूर्ण ॥ वैष्णव ॥ ८१ ॥ ❀ ॥ ॥

॥ श्रीगुसांईजीके सेवक देवाभाई पटेलकी वार्ता-सो देवाभाई पटेल गुजरातमें रहते और श्रीठाकुरजी पधरायके सेवा करते और नित्यनेमसुं वैष्णवनको प्रसाद लेवावते : जादिन कोई वैष्णव प्रसाद लेवेवालो न मिले तो तादिन देवाभाई तथा देवाभाईकी स्त्री भूखे रहते और भगवद्रसमें लकेरहेते ॥ फेर एकदिन श्रीगुसांईजी गुजरात पधारे हते तब देवाभाईके बेटानें श्रीगुसांईजीसुं वीनती करी जो महाराज जादिन वैष्णव नहीं आवे तब देवा-

भाई भूखे रहैं ॥ और मैं तो प्रसाद लेके खेतीकरवे जा-
उंइ और मातापिताकुं सुखो राखके मैं प्रसाद लेउंइ ये
अपराध कैसे मिटे ॥ ये बात देवाभाईके बेटाकी मुनके
श्रीगुसाईजी बहुत प्रसन्न भये और आज्ञा करी जो तुम
नित्य न्हायके श्रीठाकुरजीके चरणस्पर्शकरो ॥ और भो-
गधरो तो तुमारो अपराध निवृत्त होवेगो ॥ और देवा-
भाईकुं श्रीगुसाईजीनें कही जादिन कोई वैष्णव न आवे
तब गौकु पातर धरके तुमकुं प्रसाद लेनो ॥ तब ते देवा-
भाई ऐसे करन लगे और देवाभाईको बेटा खेती करतो-
हतो वामें द्रव्य बहोत आवतो सो जितनो द्रव्य घरमें
खर्च होतो सो करते और अधिकीको द्रव्य श्रीनाथजी-
द्वार पठाय देते वे देवाभाई पटेल श्रीगुसाईजीके ऐसे कृ-
पापात्र हते ॥ वार्तासंपूर्ण ॥ वैष्णव ॥ ८२ ॥ * ॥

॥ श्रीगुसाईजीके सेवक एक डोकरीधानीपूनी-
वालीकी वार्ता ॥ वह डोकरीनें श्रीगुसाईजीकुं बीनती
करके श्रीठाकुरजी माथे पधराये तब सेवा करन लगी ॥
तब वह डोकरी सूतकाँतके निर्वाह करती ॥ जब कातवे
बैठे तब श्रीठाकुरजी वा डोकरीके पासकी पुनीमें आय-
के बिराजते और बाललीला करते और वा पूनीकी गादी
तकीया करके बैठते और एक एक पूनी वा डोकरीके
हाथमें काँतवेकुं देते और भूख लागती तो डोकरी पास
धानी मागते सो एकदिन डोकरीकी व्यवस्था श्रीबाल-
कृष्णजी श्रीगुसाईजीके तीसरे लाललीनें देखी और वा
डोकरीसुं कही ये लालजी हमकुं दे तब वा डोकरीनें ला-

लजी पधराय दिये फेर ढोकरी श्रीठाकुरजीविना बहुत दुःखी भई श्रीठाकुरजी वा ढोकरीकी आर्ति सही न सके तब श्रीठाकुरजीनें बालकृष्णजीसुं कही जो ढोकरीके घर पहुँचायदेव धानीपूनी विना मोकुं नहिं चले ॥ तब श्री-बालकृष्णजीनें वही रातमें आयके श्रीठाकुरजीकुं ढोकरीके घर पधराय लाये और कही जैसे नित्य करते हो-वो तैसेही करौ श्रीठाकुरजी तेरेपर प्रसन्न हैं सो वे ढोकरी ऐसी कृपापात्र हती जिनविना श्रीठाकुरजी रहे न सके ॥ वार्ता संपूर्ण ॥ वैष्णव ॥ ८३ ॥ ॥ ॥ ॥

॥ श्रीगुसांईजीके सेवक वैष्णवक्षत्रीमथुरामें रहते तिनकी वार्ता ॥ सो वे क्षत्री वैष्णव श्रीठाकुरजी पधरायके सेवा भलीभांति सुं करते और भगवद्वाता बहुत आछी करते और पुष्टिमार्गके ग्रंथ तथा विनके भावार्थ श्रीगुसांईजीसुं सुनते हते ॥ तब मथुराके वैष्णव भगवद्वाता सुनवेकुं वा क्षत्रीवैष्णवके घर आवते हते ॥ और नित्य क्षत्रीवैष्णव अपने हाथनतें चना शेकके भोग धरते हते ॥ और मंडलीमें वांटते हते ऐसे करते करते बहुत दिन भये एक शेठ द्रव्यपात्र वा मंडलीमें आयवे लग्यो ॥ तब वो चनाको प्रसाद लेके द्वारदेवे ॥ तब श्रीमहादेवजी वैष्णवको रूपधरके भगवन्मंडलीमें नित्य आवते हते कोईकुं खबर न पडती ॥ एक वा क्षत्री वैष्णव पहेचानते हते सो जब चना वह शेठ द्वारदेतो हतो तब महादेवजी वीनलेते ॥ तब एकदिन क्षत्रीवैष्णवनें महादेवजीकुं चना वीनते देखे पाछें वा शेठकुं मंडलीमें आवेकी नहीं कही

तब वे शैठ श्रीगोकुल गयो तब श्रीगुसांईजी वासुं बोले नहीं और श्रीनवनीत प्रियाजीनें वा शैठकुं दर्शन न दीये फेर वो शैठ मथुरामें पाछो आयो और जायके वा क्षत्रीवैष्णवके पावन पय्यो तब क्षत्रीवैष्णवनें कही तुमनें भगवत्प्रसादको अपमान कय्योहै जासुं तुमकुं मंडलीमें आयवेको अधिकार नाहीहै ॥ फेर वो शैठ दीनता करके पावन पडयो फेर वा शैठकुं मंडलीमें आयवे दियो तब श्रीगुसांईजीनें और नवनीतप्रियाजीनें दर्शन दीयो सो वैष्णवनकुं जहां न्यातिव्यवहार बाधा न करे ऐसो प्रसाद मिलेतो सर्वथा अपमान न करनो ऐसो विचार राखनो सो वह क्षत्रीवैष्णव श्रीगुसांईजीके ऐसे कृपापात्र हते जिननें करोडपतीशैठकुं तुच्छ गण्यो और जिनके लिये श्रीगुसांईजीनें और श्रीठाकुरजीनें वा शैठकुं त्याग कियो सो वे क्षत्रीवैष्णव ऐसे कृपापात्र भगवदीय हते ॥ वार्ता संपूर्ण ॥ वैष्णव ॥ ८४ ॥ * ॥ ॥ ॥

श्रीगुसांईजीके सेवक निष्किंचन स्त्री पुरुषकी वार्ता ॥ सो वे स्त्रीपुरुष श्रीठाकुरजीकी सेवा करते हते सो वा गाममें एक शैठ रहेतो हतो वा शैठके घर वा वैष्णवकी स्त्री एक दिन श्रीठाकुरजीके दर्शन करवे गई सो वैभव बहुत देख्यो मनमें ऐसी आई जो मेरे घर ऐसो वैभव श्रीठाकुरजीको होय तो आछो फेर अपने घर आयके पतिसुं कही जो मैं तो वैभवसों सेवा करुंगी वाके पतिनें कही जो द्रव्य तो बहोत है परंतु द्रव्यमें अनर्थ बहुत होवेहै जब द्रव्य होवे तब कोईकी बात मनमें आवे नहीं और

खरचवेको मन होवै नहीं और द्रव्यको अभिमान आयविना रहे नहीं और द्रव्यवान अपराधसुं डरपे नहीं और द्रव्यवान गरीबसुं प्रीती करे नहीं और द्रव्यवान आले बुरेकी परीक्षा करे नहीं और द्रव्यवान गरीबनकुं अपमान वहुत करे जासुं द्रव्यमें बहुत अनर्थ होवैहैं, और द्रव्यवान सत्संग करे नहीं और द्रव्यवान कोईको अहित करतें डरपे नहीं जासुं तुं द्रव्यकी अपेक्षा छोड दे परंतु वो स्त्री मानी नहीं कहिवे लगी वैभव विना सेवा नहीं करुंगी और रिसायके बैठ रही ऐंसे दो दिन सूधी सेवा न करी ॥ वाको पति एकलो सेवा करे तीसरे दिन वाके पतिनें कही जो इहांतें एक कोश दूर एक वृक्ष है वाकें नीचे जायके द्रव्य चहीये जितनी लेआवो तब वह स्त्री टोकरा लेके गई जब वा वृक्षके नीचे धरती खोदी तब द्रव्य बहुत निकस्यो तब वो स्त्री टोकरामें भरवे लगी तब वा वृक्षको भीतरसुं वाणी भई जो तुं हमकुं कुछ देके द्रव्य लेजा तब वा स्त्रीनें कही जो तेरे कहा चहिये तब वानें कही जो तेरे घर श्रीठाकुरजी विराजे हैं सो तुम झारी भरोहो जितनी झारीको फल दे जा और इतने टोकरा द्रव्यके भर लेजा और तब वा स्त्रीनें कही जो अब द्रव्य लेजाऊं जो झारी भरुंगी तो एकझारीको फल नित्य तोकुं देउंगी और नित्य टोकरा भरके लेजाउंगी और जब तेरो द्रव्य नहीं लेजाउंगी जब झारीको फल नहीं देउंगी तब वो वृक्ष बोल्यो अब जो तुं झारी भरेंगी वा झारीको फल नहीं चहिये कारण जो तेरे पास द्रव्य होय

सो जब तेरी झारी श्रीठाकुरजी अंगिकार न करेंगे ॥ वा
 स्त्रीनें कहि काहेते अंगिकार न करेंगे ॥ तब वृक्षनें कहि
 तेरो चित्त द्रव्यमें रहेगो श्रीठाकुरजी चित्त ल्गाय बिना
 अंगिकार कैसे करेंगे आज तैं पेहेले जो तुमने झारी भरीहि
 बिनको फल देवो तो द्रव्य ले जाव तब वा स्त्रीनें कही जो
 निष्किनपणेकी झारी श्रीठाकुरजी अंगिकार करे हैं ये
 निश्चय मोकुं तुमारे कहेंतें भयो है वा झारीको फल नहीं
 देउंगी और तेरो द्रव्य मोकुं चाहिये नहीं मैं निष्किचन
 होयके नित्य झारी भरुंगी जो प्रसू अंगिकारतो करेंगे
 ऐसे कहके वा स्त्रीनें द्रव्य डार दियो और ऐसी चली आई
 और आयके अपने पतीसुं कही मैं निष्किचन होयके
 झारी भरुंगी मैंने तुमारी कह्यो न मान्यो और द्रव्यपात्र
 झोठके घर दर्शन करवेकुं गई जो मेरी दोदिन सेवा छुटी
 और द्रव्य मेरे घरमें आवेगो तो कहा जानें कितनी सेवा
 छूटेगी नोकर राखुंगी सब सेवा बिनकुं देउंगी और मैं
 वैभवकी रक्षा करुंगी जासुं मेरे द्रव्य नहीं चाहिये ऐसे
 कहिके सेवा करन लगी सो वे स्त्री पुरुष श्रीगुसांईजीके
 ऐसे कृपापात्र हते जिननें भगवत्सेवा छोडके द्रव्य ग्रहण
 न कियो ॥ ता तैं इनकी वार्ता कहा कहिये ॥ वार्ता
 संपूर्ण ॥ वैष्णव ॥ ८५ ॥ ॥ ॥ ॥ ॥

॥ श्रीगुसांईजीके सेवक पटेलवैष्णवकी वार्ता ॥

सो वे पटेल गुजरातसुं आयके श्रीगुसांईजीको सेवक भयो।
 तब सब ब्रजयात्रा कर आयो एकदिन श्रीगुसांईजी कथा
 कहते हते तब श्रीयमुनाष्टककी कथा वा पटेल वैष्णवनें

खुनी वा पटेलनें पूछो हे महाराज आठ श्लोकमें अष्ट-
सिद्धि आपनें आज्ञा करीहै परंतु कौनसे श्लोकमें कौनसी
सिद्धि वर्णन करीहै सो कृपाकरके समझावो॥ तब श्रीगुसां-
ईजीनें आज्ञा करी साक्षात् सेवोपयोगी देहकी प्राप्ति जो सि-
द्धि सो पहिले श्लोकमें कहीहै तत्तल्लीलावलोकन जो सिद्धि
सो दूसरे श्लोकमें कहीहै और तद्रसानुभवरूपी जो सिद्धि
सो तीसरे श्लोकमें कहीहै ॥ और सर्वात्मभावरूपी जो सि-
द्धि सो चौथे श्लोकमें कहीहै और यमुनाजीको स्वरूप षट्-
गुणसंपन्न सो चौथे श्लोकमें कह्योहै ॥ और भक्तिदातृत्वरू-
पी जो सिद्धि सो पांचमें श्लोकमें कहीहै ॥ और भगवत्तात्प-
र्यज्ञत्वरूपी जो सिद्धि सो छठे श्लोकमें कहीहै और भगवद्-
शीकरणत्वरूपी जो सिद्धि सो सातमें श्लोकमें कहीहै और
भगवद्रसपोषकत्वरूपी जो सिद्धि सो आठमें श्लोकमें क-
हीहै और जिनके ऊपर भगवत्कृपाहै और श्रीयमुनाजी कृ-
पाकरेहें विनकुं एकएक श्लोकमें अष्टसिद्धि दर्शन देवेंहें
ऐसे श्रीगुसांईजीनें आज्ञाकरी तब वा पटेलकुं श्रीयमुना-
जीनें वैसेही दर्शन दीये जैसे श्रीगुसांईजीनें कहीहती तैसे
दर्शन वा पटेलकुं भये सो वे वैष्णव पटेल श्रीगुसांईजीके
ऐसे कृपापात्र हते ॥ वार्ता संपूर्ण ॥ वैष्णव ॥ ८६ ॥ ❀ ॥
श्रीगुसांईजीके सेवक एक ब्रजवासीकी वार्ता
सो वे ब्रजवासी श्रीनाथजीकुं परे कहेतो ॥ सो ब्रजवासी
गायनकी खिरकमें सेवा करतो हतो और एक सीधो
भंडारमेंसुं लेजातो हतो और आठ पेहरे गायनकी सेवा
मनलगायके बहुत आछी करतो हतो ॥ एकदिन कोई

वैष्णवकुं श्रीगुसांईजी श्रीठाकुरजी पधराय देते हते सो वा ब्रजवासीनें देख्यो फेर एकदिन श्रीगुसांईजीसुं वा ब्रजवासीनें बीनती करी जो मोकुं श्रीठाकुरजी पधराय देवो ॥ वाही समय श्रीगुसांईजी न्हायके पधारते हते ॥ जब आगे एकपत्थर पढ्यो हतो ॥ वा पत्थरकुं श्रीगुसांईजीके खडाउकी ठोकर लगी सो दूरजाय पढ्यो और उहां वे ब्रजवासी ठाडो हतो ॥ श्रीगुसांईजीनें कही परेपरे ऐसे कहके श्रीगुसांईजी भीतर पधारे ॥ जब वो पत्थर ब्रजवासीनें उठाय लियो फेर वा ब्रजवासीनें मनमें ऐसो समझो ये मोकुं श्रीगुसांईजीनें श्रीठाकुरजी पधरायदीये और परेपरे श्रीठाकुरजीको नाम कहि दीयोहैं ॥ ऐसो भोरो हतो सो वे पत्थरकुं ठाकुरजी मानके पधराय ले गयो फेर मनमें समझ्यो जो सीधोतो एक आवैं सो परे कहा खावेगो ॥ और मैं कहाखाउंगो ऐसे समझके मंडारीसुं कही अब हमकुं दो सीधा देओ ॥ मंडारीनें दो सीधा दिये सो फेर जायके रसोई करी और ब्रजवासी भोरो बहुत हतो ॥ जब वानें दो पात्र करदीनी फेर कही आव भाई परे एक पातर तेरी और एक पातर मेरी जब श्रीठाकुरजी आये नहीं तब वो ब्रजवासी कहेनलग्यो जो भाई तूं आयके अपनी पातर संभार ले ॥ जो बरोबर है के फेर फार है जो तूं नहीं आवेंगो तो मैं दोनो पातर तलावमें डार देउंगो तब श्रीठाकुरजी वाको शुद्ध भाव जानके और भोरो जानके पधारे और साक्षात्स्वरूप धरके जी-मन लगे ॥ ऐसे नित्य कृपा करके पधारते ॥ एकदिन

श्रीगुसाईजीनें पूछी जो तूं दो सीधा कहा करेंहैं ॥ जव वानें कही जो आपने वो परे पधराय दीयोंहैं सो एकपा-
तर वे खाय है और एक पातर में खाउंहुं ये वात सुनके श्री-
गुसाईजी मुसकायके चुप कररहैं फेर एक दिन भंडारीनें वा
ब्रजवासी सुं कही जो तुम सूरत गाममें जायके भेट ले
आवो ॥ जव ब्रजवासीनें कही सूरत गाम काहा होवेहैं ॥ भं-
डारीनें कही सूरत गाम सहेर है जव वा ब्रजवासीनें कही भे-
टपत्र और प्रसादकी थेली देवो तो मैं सूरत जाउं ॥ जव
उहांसुं प्रसाद और पत्र लेके और रसोई करके सूरतकी तै-
यारी करी और कही जो मैया परे मैं तो सूरत जाउं गो और
तुं आवेगो के नहीं आवेंगो ॥ जव श्रीठाकुरजीनें कही जो मैं
आवुंगो जव वानें कही जो तेरे छोटे छोटे पांव हैं ॥ और
छोटे छोटे हाथ हैं तूं कैसे चलसकेंगो जव श्रीठाकुरजीनें
कही मैं थोडो थोडो चलुंगो ॥ और थोडीवार तेरे काधे-
पर बैठुंगो ॥ ये बात कहिके श्रीठाकुरजी ब्रजवासीके साथ
चले वे उहांते ब्रजवासी चले जव दो तीन कोस आये तब
श्रीठाकुरजीनें कही मैं थक्योहूँ ॥ जव वा ब्रजवासीके
कांधा उपर बैठे जव थोरी दूर चले तब सांझ भई तब श्री-
ठाकुरजीनें कही जो आज इहां सोएहो फेर काल सूरत
चलेंगे फेर उहां सोय रहे फेर सवारे उठे सो ऐसे ठिकाणे
उठे जाहांसुं सूरत दीयकोश रही हती ॥ तब उहांतिं चले
फेर सूरत आये उहां गाम बाहेर डेरा कीये और उहां श्री-
ठाकुरजीकुं बैठायके वो ब्रजवासी पत्र और प्रसाद लेग-
यो ॥ गाममें वैष्णवनकुं पूछके दियो ॥ वे पत्र बांचके वै-

ष्णवननें विचार कियो जो एकदिनमें पत्र कैसे आयो होय-
 गो ॥ जब ये विचार कियो यामें भेद कछु अवश्य होयगो ॥
 तब वैष्णवननें वाकुं सामग्री दिवाई और एकदिनमें सब
 ठिकाने फिरके पांच हजार रुपैया एकठे करके और हुंडी
 करायके तब ब्रजवासीकुं दीनी ॥ सो ब्रजवासी लेके और
 परेकुं संग लेके उहांतिं चले ॥ फेर रस्तामें आयके सोय
 रहे फेर सवारे उठके पेहर दिन चढयो गोपालपुरमें आये
 फेर भंडारीके पास गयो और दो सीधा मागे ॥ जब भं-
 डारीनें कही सूरत क्युं गयो नहीं जब वानें कही सूरत
 जाय आयोहुं पत्र और वस्त्र लायोहुं ॥ सो भंडारीकुं दीये
 ॥ जब भंडारीनें पांच हजारकी हुंडी और वस्त्र और वै-
 ष्णवनके कागद देखके चकित होयगयो ॥ जो एकरातमें
 कैसे गयो होयगो और कैसे आयो होयगो सो ये बात-
 की बीनती श्रीगुसांईजीके आगे करी श्रीगुसांईजी सुनके
 ऐसी आज्ञा करी जो ए सब श्रीनाथजीके काम है आज
 पीछे या ब्रजवासीकुं कछु काम मत बताईयो और जन्म
 सूची दोय सीधा याकुं नित्य दीजियो और नित्य वा ब्र-
 जवासीकुं बुलायके श्रीगुसांईजी परेकी बातें पूछो करतें
 आज परेनें ये कही आज परेनें ये कही ऐसे नित्य कन्या
 करे सो वे ब्रजवासी भोलो हतो जन्मसुं श्रीठाकुरजीकुं
 परे समझो करे ऐसो कृपापात्र हतो ॥ वार्ता संपूर्ण ॥
 वैष्णव ॥ ८७ ॥ ॥ ॥ ॥ ॥ ॥

श्रीगुसांईजीके सेवक एक स्त्री पुरुष हते ति०
 सो वे स्त्रीपुरुष गरीब हते और नित्य लकड़ीको भारो ला-

यके गाममें बेचके निर्वाह करते और नित्य पैसा अथेला जो वचे सो धराखते और कोई वैष्णव आवे बिनके संग महाप्रसाद बांटके लेते ॥ एकदिन अचानक आठ वैष्णव आये जब वा स्त्रीपुरुषनें विचार क्यो जो कहा करणो जब वा स्त्रीनें कही जो मेरी साडी पेहेरवेकी एक है सो तुम बेचके सामग्री लावो सो वे पुरुष सामग्री लायो ॥ तब वा स्त्रीनें किवार ढाकके रसोई करी और श्रीठाकुरजीकुं भोग धन्यो फेर वाके पतीसुं कही जो मैं कोठीमें बैठी हूं तुम भोगसरायके अनवसर करके वैष्णवनकुं पातर धरो वा पुरुषनें ऐसेही क्यो तब वैष्णव कहने लगे जो तुमारी स्त्री कहाहि तब वा वैष्णवनें कही स्त्रीको लाजकी स्वभाव बहुत है जायुं बहार नहीं आवेहें ॥ वाकी प्रकृती बड़ी खराब है ऐसे वा पुरुषनें कही ॥ जब वैष्णव बोले वह आवेगी तो हम प्रसाद लेवेंगे याको कारण ये है ॥ वैष्णव है के नहीं हमकुं खबर कैसे पढे ॥ वैष्णव न होवे तो वाके हाथकी रसोई कैसे लेवे ॥ ये बात सुनके वो वैष्णव विचारमें पडगयो ॥ जब मंदिरमें मदनमोहनजी श्रीस्वामिनीजीसहित विराजते हते ॥ जब श्रीस्वामिनीजी बोल्ये श्रीठाकुरजीसुं कही जैसे द्रौपदीके चीर बढ़ाये हते तो या वाईके चीर बढ़ायते तुमकुं कहा हरकत है ॥ ऐसे कहेके श्रीस्वामिनीजीनें और श्रीठाकुरजीनें कोठीमें जायके वा लुगाईकुं दर्शन दिये ॥ ओर उहां वस्त्र पेहेराय दिये वे वाई हाथ जोडके बोली हे महाप्रभु हे महामंगलरूप हे शरणागतवत्सल हे अशरणशरण आपकुं ऐसो श्रम

मेरे लीयें भयो ॥ मैंने आपकुं श्रम दियो और मैंने ऐसो काम क्यो ऐसे आपकुं श्रम भयो सो मोकुं धिक्कारहै ऐसे कहिके वा बाईको हृदय भर आयो ये सुनके श्रीठाकुरजी बहुत प्रसन्न भये और अलौकिक वस्त्र दान क्ये ॥ जलमें भीनें होजाय और बहार सूके होये जाएं ॥ नीचोवनें और सुकावनें न परें ॥ ऐसे वस्त्र सदा बाके पास रहें कोईदिन घटे नहीं ॥ तब वे बाई बाहर आयके वैष्णवकुं परोसन लगी तब वैष्णव प्रसन्न होयके प्रसाद लेन लगे फेर वे वैष्णव प्रसाद लेके बिदा होयके गये ॥ तबतें वा कोठीमेंतें कोईदिन अन्न खूटतो नहीं ॥ जब काढते तब भरी रहेती ॥ काहेतें श्रीठाकुरजीनें वा कोठीमें वा बाईकुं दर्शन दिये हते ॥ सो वे स्त्रीपुरुष श्रीगुसाईजीके ऐसे कृपापात्र हते ॥ वार्ता संपूर्ण ॥ वैष्णव ॥ ८८ ॥

॥ श्रीगुसाईजीके सेवक एक विरक्त तथा शेठ आगरेमें रहेते तिनकी वार्ता ॥ सो वे विरक्त वैष्णव चुकटी मागके निर्वाह करते और श्रीठाकुरजीकी सेवा भलीभांति सों करते ॥ और श्रीठाकुरजी बाके उपर बहुत प्रसन्न रहेते ॥ फेर कोईदिन वा शेठके वा विरक्त वैष्णवहुं मिलाप भयो ॥ तब वा शेठनें कही तुम श्रीठाकुरजी पधरायके मेरे घरमें रहो और तुम हम हिलमिलके सेवा करें सो तब विरक्तनें ऐसो क्यो वा शेठके घरमें जायके रह्यो ॥ और बहारकी जे सामग्री चहीती सो विरक्त खरीद लावतो ॥ एकदिन बजारमें नयो खरबूजा पहली पहली आयो हतो सो वे विरक्त वैष्णव खरबूजा लेने

लम्यो सो एक रुपैया खरबूजावालेनें कीमत करी हती सो विरक्त रुपैया देने लम्यो उहां वडी जातवालो आयो वो बोल्थो नैं सवारुपैया देउंगो जब वैष्णव बोल्थो मैं देठ रुपैया देउंगो ऐसे करते दोनोजनें सामा सामी बढे ॥ वो वडी जातवालो पांच बोल्थो तब वे वैष्णव दस बोल्थो जब वो बीस बोल्थो तब वैष्णव तीस बोल्थो जब वो चालीस बोल्थो ऐसे करते हजार रुपैया सुधी दोनो जनें बढगये ॥ जब वावैष्णवनें हजार रुपैया में खरबुजा लियो फेर घर लेके गयो और खर्च लिखायो तोहुं वा शेठनें कछु पूछी नहीं ॥ के या खरबुजाके हजार रुपैया कैसे दिये एसो विश्वास वैष्णवके ऊपर हतो कछु मनमेंहुं ये बात नलाये फेर ठाकुरजीनें खरबूजा उठाय लियो और सिंहासन ऊपर खेलवे लगे जब उत्थापन भये तब खरबूजा शेठनें श्रीठाकुरजीके पास देख्यो तब शेठ बहुत प्रसन्न भयो और श्रीठाकुरजीसुं वीनती करी जो खरबूजा मोकुं देवें तो समारके भोग धरुं तब श्रीठाकुरजीनें कही ये खरबूजा मैं काल आरोगुंगो ॥ ये खरबूजा मोकुं बहुत प्रिय है ॥ ये सुनके शेठ बहुत प्रसन्न भये और मनमें कही जो विरक्त धन्य हैं हजार रुपैया खरचते डन्यो नहीं सो वे विरक्त वैष्णव और शेठ ऐसे कृपापात्र हते जिननें हजार रुपैया खरचे तोहुं शेठके मनमें दोष न आयो सो वे दोनो ऐसे कृपापात्र भगवदीय हते ॥ वार्ता संपूर्ण ॥ वैष्णव ॥ ८९ ॥ ॥ ॥ ॥

॥ श्रीगुसांईजीके सेवक परमानंददास सोनी

तिनकीवार्ता ॥ सो परमानंददाससोनीकुं श्रीमद्भागवत और चार वेद और पुराण और सुबोधिनीजी सब जिह्वाग्र हते और श्रीगुसांईजी कथा वांचते सो नित्य परमानंददास सुनते और विनको हार्द सब समजते और कथामें जो कोई वैष्णव प्रश्न करतो तब श्रीगुसांईजी आज्ञा करते के परमानंददासकुं पूछलेउ तब श्रीगुसांईजी ऐसी कृपा रखते हते ॥ जो कोई आयके पूछते तो परमानंददास उत्तर दे सकते, फेर एकदिन पंडित चार आये श्रीगुसांईजीके पास आये जब श्रीगुसांईजी सेवामें न्हाएहते जब वे चार पंडितनकुं परमानंददास सोनीनें आदर दैके बैठाये ॥ फेर उहां चर्चा निकसी जो जगत सत्य है के असत्य है ॥ तब पंडितननें कही जगत असत्य है ब्रह्मके स्वरूपमें जगत कल्पना मात्र है ॥ जैसे डोरीमें सर्प जैसे सीपमें रूपो कल्पना मात्र है ऐसे जगत ब्रह्ममें कल्पना मात्र है ॥ जब परमानंद सोनीनें पूछी जो जैसे डोरीमें सर्प और सीपमें रूपो कल्पना मात्र है सो दूसरे ठकाणे सर्प तथा रूपो देखे बिना कल्पना नाहीं होवेहै ॥ ऐसो जो ब्रह्ममें जगत मिथ्याहै तो कल्पना करवेवाले मनुष्यने सत्य जगत कहा देख्यो है सो बतावो ॥ ये सुनके पंडित पीछें फिरगये सो परमानंददास सोनी ऐसे विद्वान हते जिनकुं श्रीगुसांईजीकी वाणीपर अत्यंत विश्वास हतो सो परमानंददास ऐसे कृपापात्र हते जिनकुं सर्व शास्त्र हस्तामलक हते ॥ तिनकी वार्ता कहाताईकहिये ॥ वार्ता संपूर्ण ॥ वैष्णव ॥ ९० ॥ ॥ ॥ ॥ ॥

॥ श्रीगुसांईजीके सेवक एक खंडनब्राह्मणकी ०
 सो श्रीनंद गाममें रहेतो हतो ॥ सो वह खंडनब्राह्मण शा-
 स्र पढ्यो हतो सो जितने पृथ्वीपर मतहै सबको खंडन
 करतो ऐसो वाको नेम हतो याहीति सब लोगनने वाको
 नाम खंडन पाढ्यो हतो ॥ सो एकदिन श्रीमहाप्रभुजीके
 सेवक वैष्णवनकीमंडलीमें आयो सो खंडन करन लग्यो
 वैष्णवनने कही जो तेरे शास्त्रार्थ करनो होवै तो पंडिनके
 पास जा हमारी मंडलीमें तेरे आयवेको काम नहीं ॥ इहां
 खंडन मंडन नहींहै ॥ भगवद्दार्ताको काम है ॥ भगवद्वश
 सुननो होवै अथवा गावनो होवै तो इहां आवो तोडु वानें
 मानी नहीं नित्य आयके खंडन करे ॥ ऐंसे वाकी प्रकृती
 हती फेर एकदिन वैष्णवनको चित्त बहुत उदास भयो ॥
 जब वो खंडनब्राह्मण घरमें सूतो तब चार जने वाकुं सु-
 द्रर लैके मारन लगे जब वानें कही तुम मोकुं क्यों मारो-
 हो ॥ जब चार जनेनने कही तुम भगवद्धर्म खंडन करोहो ॥
 और भगवद्धर्म सर्वोपर है ॥ सर्व धर्मनतें श्रेष्ठ है ॥ केवल
 भगवत्परायण हैं ॥ भगवदर्पण क्यो हैं तन मन धन
 जिनने विनको कोई अर्थ वाकी रह्यो नहींहैं ॥ शास्त्रमें
 कहाहै जिनने आत्मनिवेदन क्यो है विनकुं कुछ अर्थ
 वाकी रह्यो नहींहै ॥ सर्व सिद्ध भये हैं ॥ ऐंसे धर्मनकुं खं-
 डन करेहैं जासुं तोकुं मार देवेंहैं ॥ ये सुनके खंडनब्राह्मण
 विन चारजनेनके पावन पढ्यो ॥ और दूसरे दिन भगव-
 न्मंडलीमें आयके वैष्णवनके पावन पढ्यो और वैष्णवन-
 सुं वीनती करी के मोकुं कृपाकरके वैष्णव करौ और वैष्ण-

वनकुं संग लैके श्रीगोकुल आयके श्रीगुसांईजीको सेवक भयो और श्रीगुसांईजीके पास रहिके मार्गके अनुसार सब शास्त्र पढ़यो ॥ और भगत्सेवा करन लग्यो और भगवद्गुण गान करन लग्यो और अपनो जन्म सफल करमान्यो ॥ सो वे खंडनब्राह्मण श्रीगुसांईजीकी कृपातें मंडन भयो और साकार ब्रह्मको स्थापन करन लग्यो सो दैवीजीव हतो सो आसुरीजीवनकी संगतीतें बाकीबुद्धी फिर गई हती बाकुं दैवीजीव जानके श्रीठाकुरजीनें जोर-मुं खेंचलीयो सो फेर मंडनब्राह्मण बाको नाम भयो ॥ वार्तासंपूर्ण वैष्णव ॥ ९१ ॥ ❀ ॥ ॥ ॥

॥ श्रीगुसांईजीके सेवक एक पटेलकी वार्ता ॥ सो वे पटेल गुजरातमें रहेतो हतो ॥ सो श्रीगुसांईजी गुजरातमें पधारे तब वह पटेल सेवक भयो हतो ॥ सो परामें रहेतो हतो ॥ और गाममें नित्य भगवद्वाता सुनवे जातो हतो ॥ गामके और पराके बीचमें एक कोसको रस्ता हतो ॥ सो नित्य वह पटेल भगवद्वाता सुनवे जातो हतो और एकदिन एकादशीको व्रत हतो सो भगवन्मंडलीमें जागरण भयो सो रातके दोबजे पाछे पटेल उहांसुं बल्यो और रस्तामें आवते एकप्रेत मिल्यो बा प्रेतनें रस्ता रोक्यो ॥ जब पटेल पाछे फिन्यो फेर आढो आयके प्रेतनें रस्ता रोक्यो ॥ जब वो पटेल बोल्यो जो तूं को नहै ॥ और क्युं चरित्र करें हैं ॥ जब वो प्रेत बोल्यो मैं प्रेत हूं तो कुं खाउंगो ॥ तब पटेल बोल्यो क्युं खावेनहीं हैं ॥ जब प्रेतनें कही तेरे पास आबुं ॥ परंतु आयो नहीं जाय है ॥ जब पटेल बोल्यो ॥ जो तूं मोकुं स्पर्श कर-

वैकुंठ सामर्थ्य नहीं है ॥ जब ये सुनके प्रेत दोब्बो और पटेलके पास आयो तब प्रेतके अंगमें अग्नीको दाह होवै लग्यो ॥ जब प्रेत पुकारवे लग्यो महापापी हतो ब्रह्मराक्षस हतो ॥ ये देखके वा पटेलके मनमें दया आई तब जललेके प्रेतपर छांटयो ॥ जब वो प्रेतकुं बोलवेकी शक्ती भई और भगवत् स्वरूपको ज्ञान भयो और विचार आयो जोये कोई महापुरुष है ॥ जब प्रेत कहेन लग्यो ॥ हे वैष्णवराज मैं तेरी शरणहुं मेरे अपराध क्षमा करो मेरो उद्धार करौ तब वा पटेलनें तलावमेंसुं जल लेके और अष्टाक्षर मंत्र पढ़के वा प्रेतके ऊपर दूसरीवार डाल्यो सो तत्काल वे प्रेतयोनीसुं मुक्त भयो और जय जय करतो वैकुंठ गयो सो वे पटेल वैष्णव श्रीगुसाईजीको ऐसो कृपापात्र हतो सो वे प्रेत भगवत्पार्थद होयके जिनके चरित्रनकुं वैकुंठमें गायो करतो ॥ वार्ता संपूर्ण ॥ वैष्णव ॥ १२ ॥ ❀ ॥ ॥ ॥ ॥

श्रीगुसाईजीके सेवक निष्किंचन वैष्णव ति०
 सो वे निष्किंचन वैष्णव स्त्री पुरुष मथुराजीमें रहेते हते ॥ सो आंबके दिन हते सो वे वैष्णव दो पैसाके आंब लेवे गयो सो एक टोकरा आंबको एक मालीकेपास हतो सो मालीनें कही आखो टोकरा एक रुपैयामें ल्यो तो देउं तब वा वैष्णवनें रुपैयामें वह टोकरा लेनो कन्यो और टोकरा लेके यमुनाजीके किनारे आंब धोये ॥ और आंब धोय धोयके एक एक आंब श्रीठाकुरजीकुं भोग धरते गये और श्रीठाकुरजी आरोगते गये ॥ जब सब

आंब आरोग चुके तब वा मालीकुं निष्किचन वैष्णवने
 कही जो रुपैया रोक नहीं हैं दश पंदरे दिनमें देउंगो ॥ तब
 मालीनें कही मेरे आंब पाछे देवो तब माली आंबले चलयो
 फेर एक दूसरी शेठ गाममें रहितो हतो वाके मनुष्यनें आंब
 लीये और शेठके घर लेगयो जब वा शेठनें आंबा लेके भोग
 धरन लग्यो जब श्रीठाकुरजीनें कही ये आंब तो में पेहेले
 अरोग्योहुं असुक वैष्णवनें मोकुं भोग धन्ये हैं तब शेठनें
 कही हेमहाराज आप रस्तामें कैसे आरोगो तब श्रीठा-
 कुरजीनें कही जो श्रीगुसाईंजीकी वाणी सत्य करवेके
 लीये अरोग्योहुं श्रीगुसाईंजीनें बलमाष्टकमें कह्यो है ये
 मारग आपने आपकेलीये प्रकट कन्यो है ॥ कोई कछु व-
 स्तु कोई ठेकाणे अर्पण करे है सो वस्तु आप साक्षात् वद-
 नकमलमें आरोगोहो ऐसे में मानुहुं ॥ सो श्लोक ॥ प्रादुर्भू-
 तेनसूमौत्रजपतिचरणांभोजसेवाख्यवर्त्मप्राकटययत्कृतं
 तेतदुतनिजकृतेश्रीहृताशेतिमन्ये॥यस्मादस्मिन्स्थितोय
 त्किमपिकथमपिक्वाप्युपाहर्तुमिच्छत्यद्वातद्गोपिकेशस्वव
 दनकमलेचारुहासेकरोति ॥ १ ॥ ऐसे श्रीगुसाईंजीनें क-
 ह्योहै जो कोई वैष्णव जा ठेकाणे कछु हमकुं समर्पेगो सो
 हम सब अरोगेगे ॥ ये मुनके वे शेठ बहुत प्रसन्न भयो और
 आंब उठायके प्रसादीमें धरे और वा वैष्णवकुं बुलायो और
 वासुं पूछी जो तुमने आंब क्युं लीये नहीं ॥ वानें कही रुपैया
 रोक नहीं हतो जासुं माली पाछो लेगयो ॥ तब शेठनें कही
 तुमनें आंब तो आरोगायलीये तब लेवेकी मतलब कहा रही
 ॥ जब वो वैष्णव बोल्यो आरोगवेवारे जाने के तुम जानौ ॥

॥ तब शैठ उठके वा वैष्णवके पांवन पन्यो और छातीसुं
 लगाय लीयो और कही श्रीठाकुरजीकी आज्ञा है तुम इहाँ
 महाप्रसाद लेवो ॥ तब वा शैठके घर वा निष्किचन वै-
 ष्णवनें महाप्रसाद लियो सो निष्किचन वैष्णव ऐसो कृपा
 पात्र भगवदीय हते ॥ वार्ता संपूर्ण ॥ वैष्णव ॥ ९३ ॥ ❀ ॥
 ॥ श्री गु० से० नानचंद बलिया राजनगरमें रहेते
 हते तिनकी वार्ता ॥ सो वे नानचंद द्रव्यपात्र हते ॥ और
 श्रीगुसाईंजीकुं पूर्णपुरुषोत्तम जाणते हते ॥ इतनेमें श्रीगो-
 कुलनाथजीको विवाह आयो तब नानचंदके ऊपर श्री-
 गुसाईंजीनें कुंकुमपत्री लिखी ॥ जब नानचंदनें सब दे-
 शमें वैष्णवनकुं समाचार दिये ॥ सब वैष्णव गुजरातके गो-
 कुलनाथजीके विवाह ऊपर श्रीगोकुल आये ॥ सो जितने
 वैष्णव विवाह पर गये सवनके संग पांच पांच रुपैया भे-
 टके दिये और हजार रुपैयाकी हुंडी भेट पठाई ॥ सो सब
 लोग कहेवे लग्ये नानचंद लोभीहै एक हजार रुपैया भेट
 पठाईहै ॥ ये बात कोईनें श्रीगुसाईंजीके आगे कही तब
 श्रीगुसाईंजीनें आज्ञा करी जो नानचंदके अंतःकरणकी
 हम जानत हैं वाको भाव गुप्तहै ॥ लोगनके देखते हजार
 रुपैया पठायेहैं ॥ परंतु दश हजार वैष्णवके संग पांच पांच
 रुपैया पठायेहैं सो गुप्तरीतिसुं पचास हजार पठायेहैं ॥ सो
 वाके अंतःकरणकी बात हम जानतेहैं ॥ सो वे नानचंद ऐसो
 कृपापात्र हते जिननें गुप्तरीतिसुं सेवा करी ॥ वार्ता संपूर्ण
 ॥ वैष्णव ॥ ९४ ॥ ❀ ॥ ॥ ॥ ॥ ॥ ॥
 ॥ श्रीगुसाईंजीके सेवक एक डोकरीकी वार्ता ॥

सो वा डोकरीके माथे वालकृष्णजी विराजते हते॥ सो भलिभातिसुं सेवा करती हती सो एकदिन वा डोकरीको काल आयो सो डोकरीकुं साक्षात् मूर्तिमान् काल देखायो जब वा डोकरीने कालसों कह्यो अब मैं तो नहीं आहुं तब काल फिरगयो ऐस करके डोकरीने आठवेर कालकुं फेन्यो फेर कालने धर्मराजासुं कही मैं आठवेर पाछो फिर आयोडुं ॥ जब जाउंडुं तब भगवत्सेवामें लगी होवै ॥ और दूरसुं मोकुं आवतो देखके हाथसुं नाहीं करे ॥ फेर वाके शरीरमें ऐसो कछु तेज दीखे है के वाके पास मोसुं गयो नहीं जाय ॥ जब यमराजानें कही वे डोकरी तेरे दंडमें नहीं आवेगी येतो भगवद्भक्तहै ॥ कालके माथे पांव धरके भगवल्लीलामें पहाँचेगी ॥ फेर एकदिन श्रीगुसांईजी राजनगर पधारे तब वा डोकरीने श्रीठाकुरजी श्रीगुसांईजीकुं पधराय दीये और देहत्यागके भगवल्लीलामें प्राप्त भई सो वे डोकरी कैसे हती जाने आपकी इच्छासुं देहत्याग करी ॥ वार्ता संपूर्ण ॥ वैष्णव ॥ ९५ ॥ * ॥ ॥

॥ श्रीगुसांईजीके सेवक एक डोकरीकी वार्ता ॥

सो वा डोकरी राजनगरमें रहती हती ॥ डोकरीके माथे श्रीगुसांईजीने श्रीठाकुरजी पधराय दीये हते ॥ सो भली भांतिसे सेवा करती हती ॥ सो वह डोकरी निष्किचन हती ॥ वाके घर चमचा नहीं हतो सो सामग्री सीरी करके नित्य भोग धरती ॥ एकदिन वो डोकरी सामग्री करबुकी हती ॥ तब ऐसी खबर भई के श्रीगुसांईजी पधारेहैं ॥ तब श्रीठाकुरजीकुं ताती सामग्री

भोग धरी और चमचाके ठिकाण एक दातन धन्यो और श्रीठाकुरजीसों बीनती करी जो आप ये सामग्री दातनसुं सीरी करके अरोगेंगे मैं दर्शन करी आहुं जब श्रीठाकुरजीकी आज्ञा लेके गई फेर दर्शन करके आई दोचार वैष्णव वा डोकरीके संग आये फेर वा डोकरीनें भोग सरायके विन वैष्णवनकुं दर्शन करायके श्रीठाकुरजीके अनवसर कन्ये वैष्णव डोकरीके संग जो आये हुते विननें दातन देख्यो जब अपने घरमें जायके कोईनें एक कोईनें दोय कोईनें चार कोईनें पचास कोईनें सो दातन श्रीठाकुरजीकुं भोग धन्ये सो ऐसे करते बहुत लोग धरवे लगे दोचार दिन पीछे एक वैष्णवके घर चाचाहरिवंशजी आये सो दातन भोग धन्ये देखे जब पूछी ये दातन क्युं भोग धन्येहैं तब वा वैष्णवनें कही और सब वैष्णव धरेंहैं ॥ जब चाचाजीनें श्रीगुसाईंजीके पास सब वैष्णवनकुं एकट्ठे कन्ये और दातनकी पूछी सबनें कही वा डोकरीके घर देखके हम सबननें धन्ये हैं जब चाचाजीनें वा डोकरीकुं पूछी जब डोकरीनें कही मेरे घर चमचा नहीं हतो सो मोकुं दर्शनकी उतावल हती सो मैंनें एकदिन एक दातन चमचाके ठिकाण धन्यो हतो ॥ वादिन इन वैष्णवननें देख्यो है ॥ तब श्रीगुसाईंजीनें आज्ञा करी ये डोकरीनें तो ठीक कन्यो और तुमनें तो देखादेखी करी ॥ सो वाजबी नहीं ॥ जासुं वैष्णवकुं भगवत्सेवाकी रीती पूछके और समझके करनी ॥ देखादेखी करनी नहीं ॥ देखादेखी करे तो भगवत्सेवामें कहे जो प्रतिबंधहैं सो

होंवें और समझके करतो भगवत्सेवामें कहेंहैं सो फल होंवें ॥ जासुं वैष्णवकुं सेवाकी रीति पूछके करनी ॥ सो वे डोकरी जो सेवाकरती सो पूछके और विचारके करती सो वा डोकरी ऐसी कृपापात्र होती ॥ वार्ता ॥ सं० वै० ९६ ॥

॥ श्रीगुसांईजीके सेवक एक भगवदीय और एक तादृशीकी वार्ता—सो वे गुजरातके वासी होते ॥ जिनमें आपुसमें परीक्षा लीनी ॥ सो भगवदीय वैष्णव राजनगरमें रहते होते ॥ और तादृशीवैष्णव धौलकामें रहते होते ॥ और एक दूसरेकुं मिलवेकुं मन बहुत करते होते सो एक समय भगवदीयकी बेटीको विवाह आयो तब तादृशी वैष्णवकुं कुंकुमपत्री लिखी जब तादृशी वैष्णवजा समय कन्यादानको समय हतो तब भगवदीयके घर आये ता समय भगवदीय लौकिककार्य छोडके और तादृशी वैष्णवकुं मिले और घरमें लायके न्हायके महाप्रसाद लेवायके और विनकुं सुवायके फेर कन्यादान करवेकुं बैठे ॥ फेर दूसरे दिन जब उठवेको समय भयो तब तादृशी वैष्णव श्रीठाकुरजीके मंदिर आगे सूतेहते फेर दूसरे दिन भगवदीय वैष्णव न्हायके एक पेहेर ठाढे रखे परंतु वा तादृशीकुं जगायो नहीं ॥ मनमें ये जान्यो के इनकुं कैसे जगायो जाय ॥ और तादृशी जानके सोय रहे ॥ जब पहरे दिन चढ्यो जब जानके उठे जब तादृशीनें पूछी तुम कबके न्हायेहो जब वा भगवदीयनें कही अबी न्हायोहुं ॥ जब वो तादृशी मनमें समझ्यो याके भगवदीयपनेंमें कसर नहींहै ॥ फेर तादृशी आपने गाम धौ-

लका गयो फेर तादृशी वैष्णवको लग्न भयो ॥ तब राज-
नगरसुं भगवदीय वैष्णवकुं धौलका बुलाये वाही समय
वरघोडो पर्णवेकुं चढ्यो हतो ॥ वाई समय भगवदीय जाय
पहोंच्यो ॥ तब वे वैष्णव घोडा ऊपरसुं उतरके और वि-
नकुं घरमें लेगये और न्दवाय घोवाय महाप्रसाद लेवा-
यके फेर आयके परणवेकुं बैठे सो वे भगवदीय वैष्ण-
वनें या रीतिसुं परीक्षा लीनीऔर मनमें कह्यो याके ता-
दृशीपणामें कसर नहीं है सो वे दोउ वैष्णव ऐसे कृपापात्र
हते जिननें एक दूसरेकेलीयें लौकिक कारज छोडदियो
और देहकुं अनित्य जानके भगवदीयकोमिलाप मुख्य
राख्यो ॥ वार्ता संपूर्ण ॥ वैष्णव ॥ ९७ ॥ ❀ ॥ ॥

॥ श्रीगुसाईंजीके सेवक एक पटेलकी वार्ता ॥
सो वह पटेल वैष्णव राजनगरमें रहेतो हतो ॥ वा पटेल
वैष्णवके दो बेटा हते और एक स्त्री हती और बडेबेटाकी
दोय स्त्री हती और छोटे बेटाकी एक स्त्री हती ऐसे सात
मनुष्य श्रीगुसाईंजीके शरण आये और श्रीठाकुरजी प-
धरायके सेवा करन लगें ॥ तब लजननेनको मन तो श्रीठा-
कुरजीमें लग्यो हतो और एक बडेबेटाको मन लौकिकमें
बहुत हतो ॥ सो कछु भगवत्संबंधी कार्य करतो नहीं हतो
और लौकिकमें तद्वृत्त होय रह्यो हतो एकदिन वाके पि-
ताने एक वैष्णवसुं कही जो याको मन प्रसूमें लगे तो
आछो तब वा वैष्णवनें कही जब श्रीगुसाईंजी कृपा क-
रेंगे तब लगोगो फेर बहुत दिन बीते एकदिन वा वैष्णव
वा पटेलकी दुकानपर गयो और वाको बडो बेटा चोप-

डामें नामो लिखतो हतो ॥ सो दो तीन घडीसूधी वैष्णव
 बैठरह्यो ॥ परंतु वा पटेलके बड़े बेटानें कछु वैष्णवकुं
 बोलायो नहीं ॥ जब वा वैष्णवनें जायके बाके कानमें
 कही जो उठ चेत ॥ तीन दिन पीछे तेरो मृत्यु आयो
 हैं ॥ ऐसे कहेके वो वैष्णव चलयो गयो ॥ सो बाकी चित्त
 उदास होय गयो दुकान बंद करके सोय रह्यो ॥ कछु
 खावेमें पीवेमें मन न लगे वैद्यको औषध करें तोड्ड लगे
 नहीं फेर पितासों कही अमके ठेकाणे वैष्णव रहे है बाकुं
 बुलाय लावो ॥ बाकुं जब बुलायवे गये तब वो वैष्णव
 आनाकानी करके दोदिन आयो नहीं ॥ तीसरे दिन
 आयो जब बाकी नाडी देखके कही जो तुमारे दोघडीमें
 मृत्यु हैं कोई दूसरो तुमकुं आवरदा दें तो बचोगे ॥
 वानें सब घरकेनसुं पूछी तब कोईनें आवरदा देनी कबूल
 करी नहीं फेर वो पटेलको बेटा रोयके कहेवे लग्यो हेवै-
 णव में तेरी शरण हूं ॥ तुम मेरी रक्षा करो ॥ जब वा
 वैष्णवनें कही तूं नित्य भगवत्सेवा और भगवत्स्मरण
 और भक्तवत्कथामें चित्त राखे तो तेरो काल फिर जाय-
 गो ॥ तब वानें हाथ जोडके कही अब जो जीवतो रहूं तो
 दिवस रात भगवत्सेवा तुमारी कृपातें करूं ऐंसी कह्यो ॥
 जब वा वैष्णवनें आशीर्वाद दियो ॥ तब वे मन्यो नहीं ॥
 फेर भगवत्सेवा करन लग्यो ॥ जाकुं भगवत्सेवामें ऐंसी
 आसक्ती भई जैसी लौकिकमें हती ॥ जासुं दशगुणी से-
 वामें भई सो वे पटेलवैष्णव ऐंसी कृपापात्र भयो ॥ वार्ता
 संपूर्ण ॥ वैष्णव ॥ ९८ ॥ * ॥ ॥ ॥ ॥

॥ श्रीगुसांईजीके सेवक मावेटाकी वार्ता ॥

सो वे मा वेटा तीर्थ करवेकुं गये सो तीर्थ करते करते श्रीगोकुल गये ॥ सो श्रीगुसांईजीके दर्शन साक्षात् पूर्ण-
पुरुषोत्तमके भये तब विन मा वेटानें वीनती करी हमकुं
सेवक करी तब श्रीगुसांईजीनें विनकी कृपा करके नाम
निवेदन करायो ॥ और श्रीगुसांईजीकी आज्ञा लैंके श्री-
नाथजीके दर्शन कर आये परंतु श्रीगुसांईजी विना एक
दिन रहे न सकते ॥ वा वेटाकी ऐसी आसक्ती श्रीगु-
सांईजीमें भई ॥ फेर ऐसे कितनेक वर्ष श्रीगोकुलमें श्री-
गुसांईजीके पास रहेते तब श्रीगुसांईजीनें आज्ञा करी अब
देशमें जाओ तब विननें कही महाराज आपके दर्शन
विना कैसे रह्यो जाय ॥ तब श्रीगुसांईजीनें विनकुं
ऐसी स्वरूप पधराय दियो जो आप वा स्वरूपसुं
नित्य दर्शन दें और बातें करें ॥ और भोजनकरें और
झंगार सेवा करें ॥ ऐसी रीतीसुं वे मा वेटा जन्मपर्यंत
श्रीगुसांईजीके स्वरूपकी सेवा घरमें कर्ते और कछु ज-
न्मपर्यंत आसक्ती ससारमें जिनकी भई नहीं ॥ वा स्व-
रूपमें आसक्त रहे और वेगुप्त रीतीसुं सेवा करते कोईकुं
खबर न पढीकें जो विनके घर श्रीठाकुरजी विराजते हैं
॥ ऐसे जन्मपर्यंत गुप्त रीतीसुं सेवा करी ॥ वे मा वेटा
ऐसे कृपा पात्र भगवदीय हते ॥ वार्ता संपूर्ण ॥ वैष्णव ॥ १९ ॥

॥ श्रीगुसांईजीके सेवक देवजीभाई पोरबंदरमें
रहेते हते तिनकी वार्ता-सो वे देवजी भाई लुवाणा
वैष्णव हते ॥ सो नित्य भगवद्वाता सुनवेकुं जाते हते ॥

सो एक दिन देवजीभाईकुं ज्वर आयो सो सात दिन
 सूधी प्रसाद लेवायो नहीं और न्हायेहुं नहीं उ-
 ठये हुं नहीं सातमें दिन सब वैष्णव मिलके देवजीभाईके
 घर आये और विन वैष्णवनकुं आये जानके देवजी भा-
 ईकुं अपार हर्ष भयो ॥ और आनंदके आवेशसुं नृत्य
 करण लगे ॥ आनंदके आवेशसुं ज्वर गयो और सर्व वै-
 ण्वननैं प्रसन्न होयके कहि जो कछु मागो ॥ जब देवजी-
 भाईनैं कही भोकुं जन्मपर्यंत तुमारे भगवदीयको सत्संग
 न छूटे ये मागयो सो वे देवजीभाईकी सत्संगमें ऐसी
 आसक्ती हती जैसी सत्संगमें वृत्रासुरकुं हती ॥ यदर्थी
 ॥ श्लोक ॥ ममोत्तमश्लोकजनेषु सख्यसंसारचक्रे अमृतः स्व
 कर्मभिः ॥ त्वन्मायया त्माऽत्मजदारगं हेष्वासक्तचित्तस्य
 न नाथ श्रूयात् ॥ १ ॥ वार्ता संपूर्ण ॥ वैष्णव ॥ १०० ॥ ❀
 श्रीगुसाईजीके सेवक स्त्री पुरुष राजनगरवासी
 की वार्ता—सो वे स्त्री पुरुष राजनगरमें श्रीठाकुरजीकी
 सेवा करते हते ॥ दिवस रात जिनकी वृत्ती श्रीठाकुरजीमें
 हती ॥ और वैष्णव आये गयेको सत्कार बहुत करते ॥
 ता पाछे एक समय दुष्काल पड्यो अन्न बहुत महंगो
 हतो ॥ घास मिलती नहीं हतो सो एकदिन वा वैष्णवके
 घर गेहुं खरीद लाये हते ॥ सो घरके चोकमें डारे हते ॥
 सो एक गाय दूबरी बहुत हती ॥ सो आयके खावे लगी ॥
 जब वे गाय हाकेसों जाय नहीं ॥ जब वा वैष्णवकी स्त्रीनैं
 गाय हातसुं सरकाई जब गाय पडगई सो गायके प्राण
 छूट गये ॥ वा वैष्णवकुं बहुत पश्चात्ताप भयो ॥ सब वै-
 ण्वननैं वाके माथे हत्याको दोष देके दूर कन्यो ॥ तब

वा स्त्री पुरुषनें अन्नजलत्याग कियो और प्राण छोड़देवें
 ऐसो विचार कियो ॥ दो दिन पीछे श्रीगोकुलनाथजी
 राजनगर पधारे ॥ सब वैष्णव दर्शनकुं गये ॥ तब या
 बातकी श्रीगोकुलनाथजीकुं खबर परी जब श्रीगोकुल-
 नाथजी परमदयालु अशरणशरण भक्तवत्सल दीनबन्धु
 पतितपावन ऐंसे आपकोविरद विचारके या वैष्णवकुं
 बोलायो ॥ बाहुं सब बात पूछी और दूसरे वैष्णवनकुं
 पूछी ॥ सब वैष्णवनकी बात सुनके ऐंसी आज्ञा करीकें
 याके साथे हत्या नहीं है जब वा वैष्णवकुं आज्ञा करीकें
 तूं जायके सेवा कर और निष्किचन वैष्णवकुं बुलायके
 प्रसाद लेवाय जब वा वैष्णवनें ऐंसे कन्यो फेर श्रीगोकु-
 लनाथजीनें वा वैष्णवके हाथकी जल अरोगे सो वे वै-
 ण्व ऐंसी कृपापात्र हतो ॥ अवशुण छिपायो नहीं ॥
 वार्ता संपूर्ण ॥ वैष्णव ॥ १०१ ॥ ❀ ॥ ॥ ॥
 ॥ श्रीगुसांईजीके सेवक दोड पटेल राजनगरमें
 रहते तिनकी वार्ता-सो वे दोनोंभाईविननें भाईलाको-
 ठारीके घरमें श्रीगुसांईजीके पास नाम पाये हते ॥ और नि-
 त्य भगवद्वार्ता सुनवे जाते ॥ और विनकेपर ऐंसी कृपा हती
 जो भगवद्वार्ता सुनते सो कंठ होय जाती ऐंसे करते करते
 बहुत दिनमें सुबोधनीजी सर्व कंठाग्र होय गई ॥ फेर वे
 दोडभाई श्रीगोकुल आय रहे और श्रीनवनीतप्रियाजीके
 दर्शन किये ॥ फेर श्रीगुसांईजीकी आज्ञा लेके ब्रजयात्रा
 करवे गये ॥ और फेर श्रीनाथजीके दर्शन करके श्रीमि-
 रिराजकी तरेटीमें कोठड़ी लेके रहे ॥ और नित्य श्रीनाथ-

जीकी सेवा करते और भगवद्वार्ता करते और भगवद्वार्ताके आवेशमें आवते तब श्रीनाथजी आयके सुनते ॥ और कहते और श्रीनाथजीकुं दोउभाई विना रह्यो नहीं जाय जैसे गायकुं बछड़ा विना रह्यो नहीं जाय ॥ या रीतीसुं श्रीनाथजी विनके पाछे फिरते ॥ सो वे दोउ भाई पटेल श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ १०२ ॥ ॥ ॥ ॥ ॥ ॥
 ॥ श्रीगु० से ० एक श्रोता वक्ता दोनोनकी वार्ता ॥
 सो वे श्रीका वक्ता अपने देशमेंसुं श्रीगोकुल गये सो श्रीनवनीतप्रियाजीके दर्शन करे और श्रीगुसाईंजीके सुखारविंदसुं कथा सुनवे लगे ॥ और सुनके दिवस रात भगवद्वार्ता कन्यो करते ॥ सो भगवद्रसमें ऐसे लीन होयजाते ॥ पांच पांच सात सात दिन विनकुं देहकी छुट्टी न रहेती ॥ ऐसे भगवदावेशयुक्त होयजाते ॥ सो कोईदिनमें विन दोउ जनेनकी देह छूटी ॥ जब अग्नि संस्कार वैष्णवननें कन्यो तब एक श्रोता वैष्णवके हाडकानमें छेद देखे तब वैष्णवननें श्रीगुसाईंजीकुं बीनती करी जो महाराज या श्रोता वैष्णवके हाडनमें छेद क्युं पढगये ॥ तब श्रीगुसाईंजीनें आज्ञा करी जो या वैष्णवकुं भगवद्वार्ता सुनवेकी ऐसी आतुरता हती जो याके रोम रोममें श्रवण होयजाते ॥ और भगवद्वार्ता सुनवेकी उत्कंठा रोम रोममें होजाती ॥ भगवद्वार्ता सुनवेकी ऐसी आतुरता चाहिये ॥ ये बात सुनके वैष्णव बहुत प्रसन्न भये ॥ सो वे श्रोता वक्ता ऐसे कृपापात्र हते ॥ वार्ता संपूर्ण ॥ वैष्णव ॥ १०३ ॥ ❀

॥ श्रीगुरुसार्ङ्गजीकं सेवक एक बनिया ति० ॥

सो वह बनिया वैष्णव गुजरातमें रहेते हते ॥ सो श्रीठाकुर-
जीकी सेवा भली भांति सुं करते और वैष्णव आवते तिनकी
दहेल भली भांति सुं करते और घरमें भगवद्दार्ता होती और
वाके गाममें देवीको मंदिर हतो सो वे देवी वाके घर भ-
गवद्दार्ता सुनवेकुं आवती और कोई देखतो नहीं हतो ॥
और ये वैष्णव देखतो ॥ सो एकदिन वा वैष्णवके घर वै-
ष्णव आये तब वरसाद बहुत भई हती ॥ लकड़ी सब भिज
गई हती ॥ रात बहुत गई हती ॥ सो वा वैष्णव लकड़ी ले-
वेकुं चलयो ॥ रस्तामें देवीको मंदिर हतो ॥ अंधारी रात
हती सो देवी दरवाजामें बाहेर निकलके ठाडी हती देवीनें
कही वैष्णव कहां जाओहो ॥ जब वा वैष्णवनें कही लकड़ी
लेवे जाउहुं ॥ जब देवीनें कही अंधारी रात और वरसाद
पड़ेहै लकड़ी कहां हंडोगे ॥ और मेरे कमाड नये करनेहैं
जासुं एकझूनो कमाड उतार लेजाओ ॥ जब वा वैष्णवनें
एक कमाड उतार लियो और घरमें टूकटूक करके लेगयो
॥ और काम चलायो सब सामग्री करी और वैष्णवनहुं
महाप्रसाद लेवायो ॥ वा वैष्णवके परोसमें एक ब्राह्मण
रहेतो हतो वा ब्राह्मणकी स्त्रीनें वा वैष्णवकी स्त्रीसुं पूछी जो
तुमारे लकड़ी छाणा सब भीजगये वरसादमें तुम लकड़ी
कहांसुं लाये ॥ वा स्त्रीनें कही हमतो देवीके कमाड उतार
लायेहैं ॥ फेर दूसरे दिन वा ब्राह्मणकी स्त्रीनें अपने पतिसुं
कही देवीके कमाड तुमहुं उतार लावो ॥ तब वा ब्राह्मण
देवीके कमाड रातकुं उतारवे गयो ॥ जब वाके कमाडसुं

हाथ चोट गये सो हाथ छूटे नहीं वे ब्राह्मण तो बहुत दुःखी भयो ॥ और एक पेहर सूधी ठाढो रख्यो ॥ कछु उपाय लगे नहीं ॥ जब वा ब्राह्मणकी स्त्री पतीकुं टूटवे गई उहां जायके देखे तो पतीकी ये व्यवस्था भईहै ॥ तब वाकी स्त्रीनें कमाडकुं पकड़के पतीके हाथ छुड़ावन लगी जब स्त्रीके हाथहुं चोट गये ॥ जब वे स्त्रीपुरुष दोनों रोवन लगे और देवीकी प्रार्थना करन लगे ॥ सो आखीरात रोयो करे ॥ जब दोघडी रात रही तब देवी बोली जो तुम भेरे दो कमाड नये कराय द्यो और तुमारे परोसमें बनिया वैष्णव रहे हैं वाके घर एक भारो लकडीनको नित्य पहाँचावो तो तुमकुं छोटुं ॥ जब वा स्त्रीपुरुषनें ये बात कबूल करी ॥ फेर वे ब्राह्मण ब्राह्मणी घरमें आये नये कमाड करायके देवीके मंदिरकुं लगाये और बनिया वैष्णवके घर लकडीको भारो नित्य पोहोंचावन लगे ॥ ऐसे करत करत चातुर्मास बीत गयो और बनिया वैष्णवके घर लकडा बहुत होयगये तब वा बनिया वैष्णवनें ब्राह्मणकुं कही अब लकडी मत लाव ॥ मैं देवीकुं कहंगो तब वा बनिया वैष्णवनें देवीसों कही ॥ जो अब या ब्राह्मणकुं छोड द्यो तब देवीनें छोडदियो तब वा ब्राह्मणनें बनिया वैष्णवकुं कही जो देवी तुमारी कह्यो मानेहैं याकी कारण कही ॥ तब वा बनियाने कही जो वैष्णवधर्म ऐसोहीहि तब वा ब्राह्मणनें कही हमकुं वैष्णव करौ ॥ तब बनियवैष्णवनें वा ब्राह्मणकुं श्रीगोकुल पठायो तब वे स्त्रीपुरुष श्रीगोकुलमें जायके श्रीगुसाईजीके सेवक भये और श्रीनाथजीके द-

शन करके और सेवा पधरायके फेर देशमें आये सो वे
 बनियावैष्णवके ऊपर श्रीगुसांईजीकी ऐसी कृपाहती ॥
 जिनसुं श्रीठाकुरजी बोलते चालते ऐसे परम कृपापात्रहते
 ॥ वार्ता संपूर्ण ॥ वैष्णव ॥ १०४ ॥ ॥ ॥ ॥
 ॥ श्रीगुसांईजीके सेवक एक वेश्याकी वार्ता ॥
 जाको माधवदाससों स्नेह हतो ॥ वा वेश्याकुं जबसुं मा-
 धवदासनें त्याग करीतवतें वे लूण और टिकड़ा खाती
 हती ॥ और घी नहीं खाती हती ॥ और शाक दाल
 चावल तेल बिगरे खाती नहती ॥ ऐसे करते बारें बरस
 बीते ॥ तब श्रीगुसांईजी पधारे जब वह वेश्यादर्शनकुं गई
 और श्रीगुसांईजीके मनुष्यनसों कही जो श्रीगुसांईजीकुं
 बीनतीकरौ मोकूँ शरणलेंवें ॥ मनुष्यननें कही जो श्रीगु-
 सांईजी तुमकुं शरण नहीं लेंवेंगे जब वेश्यानें अन्न
 जल छोड़ दियो और प्राण छोड़वेको संकल्प क्यो ॥
 दोदिन भये जब वानें अन्न जललियो नहीं ॥ तब उ-
 हाकि वैष्णवननें श्रीगुसांईजीसों बीनती करी जो जादि-
 नतें माधवदासजीनें वाको त्याग कियो है वादिनतें
 यानें वेश्यापनो छोड़चोंहै और वादिनसुं नोन टिकड़ा
 खायहै और आपके पधारवेकी बाट देखे है ॥ बारें वर्ष
 भये हैं और आपने वाकुं शरणलेंवेकी नाहीं कही है ॥
 जासुं वह देह छोड़े है ॥ यातें आप कृपाकरके वाकुं
 शरणलेंवैतो ठीक ॥ सब वैष्णवनकी बीनती सुनके श्री-
 गुसांईजीने आज्ञाकरी जो याकुं अबी बुलावो और याकुं
 शरण लेंगो ॥ तब वा वेश्याकुं वैष्णव बुलायलाये और

श्रीगुसाईजीनें कृपा करके नाम निवेदन करायो और भगवत्सेवा पधराय दीनी ॥ तबतें वेश्या श्रीमदनमोहनजीकी सेवा करन लगी और तन्हेंत-हेंके शृंगार और सामग्री करके श्रीमदनमोहनजीकुं अंगीकार करावन लगी ॥ फेरकितनेकदिन पीछे श्रीगुसाईजीकी कृपातें श्रीमदनमोहनजी साबुभाव जनावन लगे ॥ सो वे वेश्या ऐसी परम कृपापात्र भगवदीय हती ॥ वार्तासंपूर्ण ॥ वैष्णव ॥ १८५ ॥ ❀ ॥ ॥ ॥ ॥

॥ श्रीगुसाईजीके सेवक पटेल वैष्णवकी वार्ता ॥ सो वे पटेल गुजरातमेंते एक संग श्रीगोकुल जातो हतो सो वा संगमें पटेल गयो रस्तामें घास खोद लावे और बेचके निर्वाह करे ॥ सो श्रीगोकुल गयो और घास खोदवेकी दरात बेचके श्रीगुसाईजीकुं भेट करी ॥ श्रीगुसाईजीतो अंतरयामी हैं तब वा पटेलकुं बुलावें और पास बैठवें तब दूसरे वैष्णवननें कही यामें कहा गुण है याकुं बुलावोहो तब श्रीगुसाईजीनें आज्ञाकरी यानें सर्वस्व अर्पण कय्यो है ॥ जासुं श्रीठाकुरजी याके ऊपर बहुत प्रसन्न हैं ॥ दो दिनसूधी मूरख्यो रह्यो और हातनसुं घास खोद लायो जब दरात लीनी कोईकी आशा नहीं राखे है ऐसे निष्किचन वैष्णव हमकुं बहुत प्रिय हैं ॥ सो श्रीगुसाईजीनें सर्वोत्तमजीमें श्रीमहाप्रभुजीको नाम कब्यो है सो ॥ स्वार्थोज्झिताऽखिलप्राणप्रियः ॥ याकोअर्थसंपूर्ण स्वार्थ जिननें त्याग करयो हैं ऐसे जो वैष्णव है प्राणनसों प्रिय जिनकुं सो वे पटेल श्रीमहाप्र-

शुजीकुं प्राणनसों प्यारे लगेहैं ॥ ऐसेनके हृदयमें श्री-
ठाकुरजी विराजे हैं जाहुं याके भाग्यकी कहा बढाई
करनी ॥ सो पटेल वैष्णव ऐसो कृपापात्र हतो ॥ वार्ता
संपूर्ण ॥ वैष्णव ॥ १०६ ॥ ॐ ॥ ॥ ॥

॥ श्रीगुसांईजीके सेवक वेणिदास और दामो-
दरदासतिनकी वार्ता ॥ सो वे दोनों भाई राजनगरमें
कपडाखरीद करने गये ॥ उहां श्रीगुसांईजीके सेवक भये
और श्रीगुसांईजीकुं पधरायके सूरत गाममें लाये और
सब घरके मनुष्यनकुं नाम निवेदन कराये फिर सब
कुटुंब लेके ब्रजयात्रा गये और ब्रजमें श्रीठाकुरजी प-
धरायके सेवा करन लगे और कुटुंब सगरो देशमें पाछे
पठायो और वे दोठ भाई उहां रहे ॥ सांझ और सवार
और मध्यान श्रीगुसांईजीकी खवासी करते और रसोई
करते और श्रीठाकुरजीकी सेवा करते ॥ एक दिन श्री-
ठाकुरजी प्रसन्न होयके आज्ञा किये जो कुछ मागो तब
बिन दोठ भाईननें कही जो हरी गुरु वैष्णव तीनोंके
ऊपर हमारो सरखो भाव रहैं और तीनोंके दास हम
होयके रहैं ये मागो तब श्रीठाकुरजी प्रसन्न होयके आज्ञा
दीनी जो ऐसेही होयगो तब ऐसे करते पांच सात वर्ष
उहां रहे फिर बिनके बेटानकुं द्रव्य बहुत मिल्यो तब
बिनके बेटा कुटुंब सहित ब्रजमें आयके बिन दोठ भा-
ईनकुं और श्रीठाकुरजीकुं सूरत गाममें पधराय लाये
सब मिलके सेवा करन लगे हरी गुरु वैष्णवकी सेवा सि-
द्ध होवै लगी इच्छा आवे जैसे मनोरथ करन लगे सो वे

(२२०) दोसौ भावन वैष्णवकी वार्ता.

दोनों भाई ऐसे कृपापात्र भगवदीय भये और जैसे जो मनोरथ करते श्रीठाकुरजीकुं पूछके करते और संसारमें आसक्त न हते द्रव्यमें जिनको चित्त नहीं हतो केवल श्रीगुसांईजीके चरणारविंदमें जिनको चित्त हतो इनके भाग्यकी बहोत बड़ाई कहाँताई कहिये ॥ श्रीगुसांईजी जिनकी सराहना करते ॥ वार्ता संपूर्ण ॥ वैष्णव ॥ १०७ ॥

॥ श्रीगुसांईजीके सेवक एक ब्रजवासीकी वार्ता

एक समय श्रीगुसांईजी द्वारका पधारे सो जामनगरमें एक बनिया सो जोड़ा बेचतो सो बाकी दुकानपर ब्रजवासी जोड़ा लेवे गये सो जोड़ालिये और बाहुं पैसा देवे लगे जब वा बनिया और काम लियो हतो तब वा ब्रजवासीकी बात सुनी नहीं ॥ तब वा ब्रजवासीने वा बनियाकुं लात मारी और पैसा दिये ॥ फेर दूसरेदिन वा बनियाने वा ब्रजवासीकुं देख्यो ॥ जब बनियाके मनमें आई जो मैं देवीको उपासी हुँ और जाकुं कहूँ जोमरजा सो मनुष्य मरजायहै ॥ या ब्रजवासीकुं काल्ह मैंने मरजायवेको शापदियोहतो सो ये मर न गयो ॥ याको कारण कहा ॥ तब वा बनियाने अपनी देवीकुं पूछी जो वह ब्रजवासी मर्यो नहीं याको कारण कहा ॥ तब देवीने कही येतो वैष्णव है यासुं तो मैं डरपुई वैष्णवसुं तो ब्रह्मलक्ष्मी इत्यादिक सब डरपेहैं तब वा बनियाने कही मैंहुँ वैष्णव होउंगो ॥ फेर जायके वा ब्रजवासिसों मिलके श्रीगुसांईजीके शरण गयो नामनिवेदन करके रीतिभांती शीखके श्रीठाकुरजी पधरायके सेवा

करन लय्यो ॥ सो वे ब्रजवासी श्रीगुसांईजीको ऐसो कृ-
पापात्र हतो ॥ जिनकुं देवी प्रतिबंध न करसकी ॥ वार्ता
संपूर्ण ॥ वैष्णव ॥ १०८ ॥ ॐ ॥ ॥ ॥ ॥

॥ श्रीगुसांईजीके सेवक एक वनियाकी वार्ता ॥

सो वे वनियादेवीकी उपासना छोडके ब्रजवासीके संगतें
वैष्णव भयो तबतें जोडावेचनेको धंदा छोडदियो जब
बाकुं दशपंधरे दिन सेवा करते भये हते ॥ बाकुं एक ब्रा-
ह्मण वैष्णव मिल्यो ॥ सो वह वनिया वैष्णव अपने घर
लायो ॥ और आदरसत्कार क्यो और अनसखडी महा-
प्रसाद लिवायो ॥ पाछें वा ब्राह्मणकुं खबर पडी जो ये व-
निया थोडेदिन पहले मोचीको धंदो करतो हतो ॥ तब
वाके मनमें बहुत ग्लानी उपजी ॥ जो या वनियाके हा-
थकों ब्यूं खायो ॥ तब वा ब्राह्मणकुं कोट्ट निकस्यो तब
वा ब्राह्मण वडो दुःखी भयो तब श्रीगुसांईजीके पास वह
ब्राह्मण गयो ॥ और जायके सब बात कही तब श्रीगुसां-
ईजीनें आज्ञा करी हरिदासकी बेटीके घर जाओ वे तु-
मारो उपाय करेगी ॥ तब वह ब्राह्मण हरिदासजीकी बेटी
के घर आयो ॥ तब हरिदासजीकी बेटीकुं सब बात
कही ॥ तब हरिदासजीकी बेटीनें मनोरथ करके वैष्णव-
वनकुं बुलाये और ध्वजा चढाई और सब वैष्णवनकुं
प्रसाद लिवायो तब वैष्णवनकी जूठण वा कोट्टवाले ब्रा-
ह्मणकुं लिवाई तब वा ब्राह्मणको कोट्ट मिट गयो ॥ वैष्ण-
वनकी जूठनको प्रताप श्रीभागवतमें लिख्योहै नारदजीनें
व्यासजीनें व्यासजीसों कहिहै ॥ सो श्लोक ॥ तेमय्यपेता

(२२२) दोसौबावन वैष्णवकी वार्ता.

खिलचापलेऽर्भकेदातेऽधृतकीडनकेऽनुवर्तिनि ॥ चक्रुःकृ
पांयद्यपितुल्यदर्शनाःशुश्रूषमाणेभ्युनयोऽल्पयाविणि ॥ १ ॥
उच्छिष्टलेपाननुयोदितोद्विजैःसकृत्समंभुजेतदपास्तकि
ल्विषः ॥ एवंप्रवृत्तस्यविशुद्धचेतसस्तद्दर्मएवात्मरुचिःप्र
जायते ॥ २ ॥ चार महापुरुष चातुर्मासमें एक ठेकाणे रहे
हते ॥ बिनकी टहेल नारदजीकी मा करती हती और
जूठन लायके खाती हती और बेटाकुं खवावती हती वा
जूठनके प्रतापसुं नारदजी कहेंहैं ॥ व्यासजी में नारद
भयोहुं और साक्षात् भगवत्स्वरूपकोअनुभव करहुं ॥
और भगवदवतारनमें गिनती भईहै सो भगवदीयकी
जूठनको ये प्रताप हैं॥तब वे ब्राह्मणको कोढ़ सिट गयो॥
और वैष्णव धर्मकुं सर्वोपर जानन लग्यो ॥ सो वे बनिया
श्रीगुसाईंजीको ऐसो कृपापात्र भयो ॥ जाके वृथादोष
देखेंतें वा ब्राह्मणकुं तुर्त कोढ़ भयो ॥ वार्ता संपूर्ण ॥ वै-
ष्णव ॥ १०९ ॥ ❀ ॥ ॥ ॥ ॥ ॥

॥ श्रीगुसाईंजीके सेवक श्रीनाथजीके बीनका-
रकी वार्ता ॥ सो वे बीनकारजी श्रीनाथजीके पास बीन
बजावते हते ॥ और महाप्रसाद लेते हते और अधिकी
महाप्रसाद मिलेतो वैष्णवनकुं लेवाय देतेहते ॥ फेर को-
ई समय बीनकारके विवाहको दिन आयो ॥ जब बीन-
कारनें विचार कियो परदेशमें जायके कछु द्रव्य लाऊं-
तो ठीक ॥ विवाहको काम चलजाय तब श्रीनाथजीनें
ऐसे विचार्यो जो ये बीन बहुत आछी बजावेंहें न जा-
यतो ठीक ॥ तब श्रीनाथजीनें बाकी बीनमें सोनाकी

कटोरी धरदीनी सवारे वीन वजावे आये सो वीनमेंसु
कटोरी निकसी ॥ तब वीनकारनें श्रीगुसांईजीके आगे
जायके वीनती करी जो ये कटोरी मेरी वीनमेंसु नि-
कसीहै ॥ तब श्रीगुसांईजी जानगये जो श्रीनाथजीनें दीनी
होयगी ॥ तब श्रीगुसांईजीनें आज्ञा करी जो तुमनें परदेश
जायवेको विचार कियोहै सो श्रीनाथजीकी आज्ञानहीं है
जाहुं तुम सतिजाओ तुमारो कारज होवै इतनो द्रव्य
हमारे पास ल्यो ॥ तब वा वीनकारनें वीनती करी जो
में देवद्रव्य और गुरुद्रव्य नहीं लेऊंगो ॥ आपकी कृपाते
सब कारज सिद्ध होऐंगे ॥ तब वा वीनकारजीनें विचार
कियो अब परदेश जानो नहीं ॥ जो इच्छा होयगी सो
होवेगो ॥ तब गुजरातमेंसों संग आयो और वा संगमें
एक वैष्णव हतो बाकुं वीनकारजीकी बातकी सब खबर
पढी तब वाने वीनकारकुं बुलायके वाको विवाह रुपैया
पांचसे खर्चके कर दियो तब श्रीनाथजी बहुत प्रसन्न
भये ॥ सो वे वीनकारजी श्रीगुसांईजीके ऐसे कृपापात्र
हते ॥ जिनविना श्रीनाथजीकुं रखो न गयो ॥ वार्ता
संपूर्ण ॥ वैष्णव ॥ ११० ॥ ❀ ॥ ॥ ॥ ॥

॥ श्रीगुसांईजीके सेवक प्रेमजीभाई लुवा-
णाकी वार्ता ॥ सो वे हालारमें रहते हते सो वे प्रेमजी-
भाई ब्रजयात्रा करवेकुं गये सो उहां जायके श्रीगुसांई-
जीके सेवक भये और ब्रजयात्रा करके श्रीनाथजीके दर्श-
न करके फेर प्रेमजीभाईनें श्रीगुसांईजीसुं वीनती करी जो
महाराज मोकुं सूक्ष्म सेवा पधराय दें ॥ तब श्रीगुसां-

(२२४) दोसौबावन वैष्णवकी वार्ता.

ईजीनें कृपा करके वस्त्रसेवा पधराय दीनी ॥ फेर प्रेमजी-
भाई श्रीठाकुरजी पधरायके देशमें आये ॥ फेर भलीभां-
तीसुं सेवा करन लगे ॥ फेर एकदिन प्रेमजीभाईके मन-
में ऐसी आई जो और वैष्णवनके इहां तो स्वरूप विरा-
जेंहें और अपने इहांतो वस्त्रसेवा है सो श्रीठाकुरजी कैसे
अरोगत होएंगे ॥ फेर उत्थापनके समय ऐसे दर्शन भये
जितने वस्त्रजीमें तारहते सब स्वरूपात्मक दीखवे लगे ॥
जब प्रेमजीभाईकुं ऐसे दर्शन भये तब प्रेमजीभाईनें म-
नमें निश्चय कियो जो श्रीठाकुरजीके स्वरूप सब एक-
हिहैं सोकुं वृथा संदेह होवेंहें ॥ तब प्रेमजीभाईको संदेह
श्रीठाकुरजीनें सब मिटाय दियो ॥ सो वे प्रेमजीभाई
ऐसे कृपापात्र हते ॥ वार्ता संपूर्ण ॥ वैष्णव ॥ १११ ॥ ❀
॥ श्रीगुसांईजीके सेवक वृंदावनदास छबील-
दासकी वार्ता ॥ सो वे दोउभाई आगेरमें रहते हते ॥
तब वे दोनो भाई संतदासजीके घरमें भगवद्वार्ता सुनवे
जाते हते सो वे नित्य कथा प्रसंग सुनते हते ॥ एकदिन
ऐसो प्रसंग आयो जो नामनिवेदन विना भगवत्प्राप्ति
नहीं होवेंहें ॥ और भगवत्सेवाको अधिकार न होवै ॥
तब विन दोनों भाईननें ऐसो नेम लियो जो नाम निवे-
दन विना जल न लेनो ॥ सवारे उठके श्रीगोकुलगये सो
रातकुं श्रीगोकुल पहुँचे ॥ तब श्रीगुसांईजीके दर्शन कियो ॥
देहवत करी ॥ तब श्रीगुसांईजीनें आज्ञा करी जो महा-
प्रसाद ल्यो तब विननें बीनती करी जो हमनें रातसुं
ऐसो नेम लियो है जो नामनिवेदन विना जल न

लेनो ॥ तब श्रीगुसांईजी दिनकी आर्त देखके कृपा करके नाम सुनाये ॥ और जल लेवेकी आज्ञा करी फेर दूसरे दिन श्रीनवनीतप्रियाजीके संनिधान निवेदन करवायो तब वे दोनो भाईनकुं बहुत आनंद भयो ॥ फेर श्रीगुसांईजीकुं वीनती करी जो अब हमारे कहा करनो ॥ तब श्रीगुसांईजीनें आज्ञा करी ॥ भगवत्सेवा करौ और आगरेमें हृषीकेशजीकी सत्संग करौ ॥ तब मुनके बहुत प्रसन्न भये तब श्रीठाकुरजीकी सेवा माथे पधराई और भलीभांतिसे सेवा करन लगे और वृंदावनदास और छविलदास ऐसे कृपापात्र भये जिनकुं निवेदनकी ऐसी आरति भई जिनसों एक दिन रह्यो न गयो ॥ तातेँ इनके भाग्यको पार नहीं ॥ वार्ता संपूर्ण ॥ वैष्णव ॥ ११२ ॥ ❀ ॥

॥ श्रीगुसांईजीके सेवक एक घोबीकी वार्ता ॥ सो वे घोबी श्रीनाथजीके वस्त्र धोवतो हतो सो श्रीगुसांईजीनें एक दिन देख्यो तब श्रीगुसांईजीनें पूछी जो तूम ऐसो प्रयत्न करके श्रीनाथजीके वस्त्र धोवै है सो इनको तुं कहा स्वरूप जाने हैं ॥ तब वा घोबीनें कही जो महाराज ये वस्त्र श्रीनाथजीके श्रीअंगको स्पर्श भये हैं सो साक्षात् भगवत्स्वरूप हैं और मैंने इन वस्त्रनको स्पर्श कियो है सो मैंहुं भगवत्स्वरूप होउंगो तब श्रीगुसांईजीनें हँसके कही अस्तु फेर वा घोबीकी देह छूटी जब भगवत्स्वरूप होय गयो मारवाडमें एक राजाके गाममें राजाके इहां वे घोबी श्रीठाकुरजीभयो तब सेवा पूजा प्रतिष्ठा बहुत भई और बड़े वैभवसुं राजा सेवा क-

(२२६) दोसीबावन वैष्णवकी वार्ता.

रन लग्यो तब वा गाममें चाचाहरिवंशजी गये और एक बनियाकी दुकानपर उतरे तब वा बनियानें वा गामके श्रीठाकुरजीकी बहुत वड़ाई करी फेर चाचाजीनें संगके वैष्णवनसुं कही चलो देखें कहा है तब चाचाजी देखके कही ये तो श्रीनाथजीको धोबी है परंतु दिव्यदृष्टीसुं देख्यो जायहै तब चाचाजीनें माथो धुणायो तब राजा सेवा करतो हतो तब राजानें देख्यो तब राजानें मनुष्य पठायके चाचाजीकुं बुलवायो और कही जो तुमनें माथो क्युं धुणायोहै तब चाचाजीनें सब बात कही ॥ तब राजानें कही जो ये बात मेरे मानवसे कैसे आवै ॥ तब चाचाजीनें कृपा करके वा राजाकुं दिव्यदृष्टी दीनी ॥ तब वा राजाकुं सब पदार्थ अलौकिक दीखवे लग्ये ॥ जैसे अर्जुनकुं श्रीठाकुरजीनें दिव्य नेत्र दिये जब वानें श्रीठाकुरजीको विश्वरूप देख्यो और जैसे प्राचीनबहिंराजाकुं नारदजीनें दिव्य दृष्टी दीनी ॥ तब जितने पशु यज्ञमें मारे हते सो सब पशु दीखवे लगे ॥ ऐसे चाचाजीनें श्रीगुसांईजीकी कृपातें वा राजाकुं दिव्यदृष्टी दीनी ॥ तब वे ठाकुरजी राजाकुं धोबी दीखे तब वे राजानें तत्काल चाचाजीसुं वीनती करी मोकुं शरण ल्यो तब चाचाजीनें श्रीगुसांईजीकुं पधरायके वे राजा और राजाको गाम सब श्रीगुसांईजीके सेवक कराये सो वे धोबी श्रीनाथजीके वस्त्र धोवत धोवत तद्वप भयो ॥ वार्ता संपूर्ण ॥ वैष्णव ॥ ११३ ॥ * ॥ ॥ ॥ ॥

॥ श्रीगुसांईजीको सेवक एक राजा धोबी ठाकु-

रजी सेवतो तिनकी वार्ता ॥ जब राजाकुं श्रीठाकुरजी
 घोवी निश्चय भयो तब राजानें चाचाजीकुं कही जो
 श्रीगुसांईजीकुं पधरावो तब श्रीगुसांईजीकुं पधरायके
 राजा वैष्णव भयो और भगवत्सेवा करन लग्यो और
 भगवद्दार्ता करन लग्यो ॥ और श्रीगुसांईजीकुं बीनती
 करी जो चाचाजी सदैव मेरे पास रहें ॥ तब श्रीगुसांई-
 जीनें आज्ञा करी जो वर्ष एकमें पांचदिन तुमारे पास
 चाचाजी रहेंगे ॥ तब राजानें कह्यो जो महाराज पांच
 दिन वारे महिनामें आवें तो मेरो निर्वाह कैसे होय ॥ तब
 श्रीगुसांईजीनें आज्ञा करी जो श्रीमद्भागवतमें कह्यो है ॥
 एक क्षण भर चाचाजी जैसेनको सत्संग होवें तो वाके
 बरोबर स्वर्गको सुख और मोक्षको सुख वा एक क्षणभ-
 रके बरोबर नहीं होवेंहैं ॥ सो श्लोक ॥ तुल्यामिलवेना
 पिनस्वर्गनापुनर्भवम् ॥ भगवत्संगिसंगस्यमर्त्यानांकि-
 मुताशिषः ॥ सो या श्लोकमें कह्यो है एक क्षणभर जो भ-
 गवत्संगीके संगकी सुखहै वाके बरोबर और कोईसुख नहीं
 सो तुमकुं तो पांच दिन प्रतिवर्ष ये सुख मिलेगो ॥ तब
 राजानें हाथजोडके बीनती करी महाराज एक वर्षतो
 जरूर चाचाजीकुं मेरेपास राखें ॥ तब श्रीगुसांईजीनें
 हां कही ॥ फेर एकदिन वा घोवी ठाकुरनें राजाकुं कही
 जो मोकुं तुमारे श्रीठाकुरजीके मंदिरके गोखलामें बैठा
 देवो ॥ और एक पातलमहाप्रसादकी मोकुं नित्य धराय
 देवो और मेरो सब वैभव उठायके श्रीनाथजीके उहां
 पठायदेवो ॥ तब राजानें वैसेही कय्यो ॥ और एकवर्ष-

(२२८) , दोसीबावन वैष्णवकी वार्ता.

सूधी चाचाजीनें उहां रहेके राजाकुं सब रीती पुष्टिमार्गकी
सिखाई ॥ सो वह राजा श्रीगुसांईजीको ऐसो भगवदीय
भयो ॥ वार्ता संपूर्ण ॥ वैष्णव ॥ ११४ ॥ ❀ ॥ ॥

॥ श्रीगुसांईजीके सेवक एक पटेलको बेटा
और पटवारीकी बेटीकी वार्ता—सो वे दोउनको बालप-
नैसों आपसमें स्नेह बहुत हतो ॥ तब वे पटवारीकी बे-
टीको विवाह भयो और परदेशमें सासरे गई सासरे जा-
यबेके समय वाके सगे पहांचायवे गये और पटेलको
बेटाहुं गयो ॥ जब वे सब पहांचायके पाछेंफिरे तब पटे-
लको बेटा एक झाडपर चढ़के वाकी गाडी देख्यो कन्यो ॥
जब वे गाडी दूर गई तब पटेलके बेटाकुं विरहताप भयो ॥
तब वाके प्राण छूटगये तब वा वृक्षके नीचे वा पटेलके
बेटाको चोतरा बनायो ॥ फेर बहुत दिन बीते ॥ पीछे
पटवारीकी बेटी पिहरमें आई सो वा वृक्षके नीचे गाडी
ठाडी राखी और पूछ्यो ये चोतरा इहां क्युं बन्योहै ॥
तब लोगननें सब समाचार कहे ॥ तब वा पटवारीकी बे-
टीको प्राण छूटगयो तब वाको चोतरा वा वृक्षके नीचे
बनायो ॥ फेर थोडे दिन पाछे श्रीगुसांईजी वा देशमें प-
धारे और वा वृक्षके नीचे डेरा किये सो वा वृक्षके ऊपर
दोनों झूत होयके रहे हते ॥ सो विननें श्रीगुसांईजीको
पधारे जानके मनमें विचार कन्यो हमारो उद्धार होवै
तो ठीक ॥ तब वे दोनो रातकुं श्रीगुसांईजीके डेराकी
चौकि देवे लगे सिपाईनकुं जायके कही तुम सोय जावो
हम चौकि करेंगे तब सिपाईनें पूछि तुम कौनहो ॥ तब

विननें अपनी सब बात कहि ॥ तब वा सिपाईनें आयके
 चीनती करी तब श्रीगुसांईजी विनकुं देखवे पधारे जब
 श्रीगुसांईजीकी दृष्टि विनसूतनके ऊपर पड़ी तब वे दोनो
 भूतयोनीसुं छूटके दिव्य रूप होयगये ॥ और श्रीगुसां-
 ईजीनें कृपाकरके विनको दृष्टिद्वारा नामनिवेदन क-
 रायो और आपके प्रतापबलसुं तुरत भगवल्लीलामें प्रवेश
 कराये ॥ सो वे श्रीगुसांईजीके ऐसे कृपापात्र हते ॥ वार्ता
 संपूर्ण ॥ वेष्णव ॥ ११५ ॥ ॐ ॥ ॥ ॥ ॥

श्रीगुसांईजीके सेवक दोप्रेत उद्धरे तिनकी वा ०
 एक समें श्रीगुसांईजी गुजरात पधारते हते एक गाम बा-
 हेर डेरा कियो ॥ श्रीगुसांईजी कोईदिन वा गाममें पधारे
 नहीं हते ॥ तब सांझ पडगई तब श्रीगुसांईजीनें डेरा कियो
 तब उहां दोप्रेत रहते हते सो विननें विचार कियो ॥ जो
 श्रीगुसांईजी इहां पधारेहैं इनके शरण जाय तो कल्याण
 होय ॥ तब वे दीउ प्रेतननें श्रीगुसांईजीके जलघरियाकुं
 दिखाई दीनी ॥ तब जलघरियानें श्रीसांईजीकुं चीनती
 करी जो महाराज या कूवापें दोय प्रेत ठाहेंहैं ॥ विनकी
 दृष्टीको जल अपने काम आवेके नहीं ॥ तब श्रीगुसांईजी
 देखवेकुं पचाय्ये तब वे दोनों प्रेतननें साष्टांग दंडवत
 करी ॥ तब श्रीगुसांईजीनें विनके ऊपर कृपादृष्टी करके
 नामनिवेदन करायो ॥ सो तत्काल प्रेतयोनीसुं छूटके
 भगवल्लीलामें गये ॥ तब वा गाममें वेष्णव रहते हते ॥
 विननें श्रीगुसांईजीसुं पूछी जो ये दोनो आगले जन्ममें
 कौन हते ॥ तब श्रीगुसांईजीनें आज्ञा करी ॥ ये दोनों

आगले जन्ममें स्त्रीपुरुष कान्यकुब्ज ब्राह्मण हते ॥ और मर्यादामार्गके वैष्णव हते ॥ सो मर्यादारीतीसुं सेवा करते हते ॥ जब वा ब्राह्मणकी देह छूटवे लगी तब वाकी स्त्रीनें पूछ्यो जो अब मैं कैसे करूं ॥ तब वा ब्राह्मणनें कही तु अन्नजल त्यागके देह छोड दीजो ॥ सो वा स्त्रीनें वैसीहि कन्यो ॥ सो वानें भगवत्सेवा छोडके देह त्याग करी और वाके पतीनें देहत्यागको रस्ता बतायो ॥ या अपराधसुं दोनों प्रेत भये ॥ सो अब इनको उद्धार भयो है ॥ जासुं वैष्णवकुं सहज भगवत्सेवा न छोडनी और कोईकुं भगवत्सेवा छोडावनीहुं नहीं ॥ भगवत्सेवाके आगे सब धर्म तुच्छ हैं ॥ यासुं अधिकी कोई धर्म नहीं है ॥ श्रीठाकुरजीनें गीताजीमें कही है ॥ श्लोक ॥ सर्वधर्मात्परित्यज्य मामेकं शरणं व्रज ॥ इत्यादि वचनतें भगवत्सेवाके आगे सब धर्म तुच्छ हैं ॥ प्रल्हादजीनें कही है ॥ सो श्लोक ॥ देवोऽसुरोऽमनुष्योऽवायक्षो गंधर्व एव च ॥ भजनमुकुंदचरणं स्वस्तिमान्स्याद्यथावयं ॥ या रीतीसुं भजनसो सेवा याके आगे सब धर्म तुच्छ हैं ॥ ये मुनके सब वैष्णव बहोत प्रसन्न भये ॥ सो वे दोनो प्रेत श्रीगुसांईजीकी कृपातें भगवल्लीलामें गये ॥ वार्ता संपूर्ण वैष्णव ॥ ११६ ॥ ॥ ॥

॥ श्रीगुसांईजीके सेवक राजा जोतसिंहजीकी वार्ता—सो वे राजाके पुरोहितको बेटा बडो पंडित हतो और भगवद्धर्ममें कुशल हतो और श्रीगुसांईजीको सेवक हतो और भगवल्लीलाको अनुभव करतो हतो ॥ एकदिन राजाके पास गयो ॥ तब राजा रासाई देवीकी

पूजा करती हतो ॥ तब वा पुरोहितनें राजासुं कही जो
 ऐसी देवीतो हजारनपंढरपुरमें जलभरेहें तब वा राजानें
 कही मोकुं दिखायदे फेर वे राजा और पुरोहितको बेटा
 पंढरपुरमें आये श्रीविठ्ठलनाथजीके दर्शन किये ॥ और वै-
 भव कुछ देख्यो नहीं ॥ तब वा पुरोहितसुं कही ॥ जो मेरी
 देवीको वैभव जितनोहै यासुं वीसमो भाग श्रीविठ्ठलना-
 थजीको नहींहैं तुम मोकुं कहिकुं लायेहो ॥ तब वा पुरोहि-
 तनें श्रीगुसाईंजीकीकृपातें वा राजा जोतसिंहकुं दिव्य-
 दृष्टी दीनी ॥ तब श्रीविठ्ठलनाथजीके सब वैभवके दर्शन होवै
 लगे ॥ अनेक प्रकारकी रचना और अनेक प्रकारकी कुंज
 और अनेक प्रकारके मनुष्यनकुं सेवा करते और अनेक
 प्रकारके वैभव रत्नजडित स्तंभ किवाड सब दीखवे ल-
 गे ॥ तब राजा देखके विस्मित होय गयो ॥ और पुरो-
 हितके बेटाके पावन पय्यो ॥ फेर पुरोहित वा राजाको
 हाथ पकडके दूसरी आडी लेगयो ॥ उहां देखे तो हजारन
 स्त्री जलभरके आवैहैं ॥ और सब स्त्रीनसुं पाछे वा राजाकी
 रासाई देवी जलभरके आवती हती ॥ सो वे राजा-
 नें देखी ॥ तब राजानें देवीसुं पूछ्यो जो येकहाहै ॥ सो
 वा देवीनें कही जो मैंतो सेवा करुंहे तेरे जो कुछ पूछनो
 होवै सो पुरोहितसुं पूछ लीजो ॥ मैं तो अवी सेवामें जा-
 उंहुं ऐसे कहिके वे देवी चलीगई फेर राजाके पुरोहितनें
 दिव्यदृष्टि खेंचलीनी तब साधारण रीतीसुं जैसे नित्य द-
 र्शन होते ऐसे श्रीविठ्ठलनाथजीके दर्शन होवै लगे तब वे
 राजा हाथ जोडके पुरोहितसुं कह्यो जो मोकुं तुमारो

(२३२) ; दोसौबावन वैष्णवकी वार्ता.

सेवक करौ॥तब पुरोहितनें कही जो मैं अहेलमें श्रीगुसां-
ईजीको सेवक भयोहुं विनकी कृपातें असाधारण सुख हो-
वै है ॥ तुमहुं श्रीगुसांईजीके शरण जाओ तो सब कारज
सिद्ध होवेंगे॥तब राजा पुरोहितकुं संग लैंके अहेल जाय-
के श्रीगुसांईजीकोसेवक भयो और नामनिवेदन किये।जब
श्रीठाकुरजी पधरायके ब्रजमें श्रीनाथजीके दर्शन करके
वे राजा अपने घर आयो ॥ और पुरोहितकुं पास राखके
सब सेवाकीरीती सीखी ॥ और स्नेहसुं भगवत्सेवा करन
लगे ॥ थोडेदिन पीछे श्रीगुसांईजीकी कृपातें श्रीठाकुरजी
साधुभाव जतावन लगे सो वे राजा पुरोहितके संगतें भ-
गवदीय भयो ॥ वार्ता संपूर्ण ॥ वैष्णव ॥ ११७ ॥ ❀ ॥

॥ श्रीगुसांईजीके सेवक दोउविरक्त ति० ॥

सो एक विरक्त तादृशी भगवदीय हतो और एक साधा-
रण हतो ॥ तादृशी भगवदीय परदेश जायवे लग्यो तब वा
साधारण वैष्णवनें श्रीगुसांईजीसों बीनती करी अब मेरे
कहा करनो॥तब श्रीगुसांईजीनें आज्ञा करी तुम याके संग
परदेश जावो और याको सत्संग करौ ये कहे जैसे करौ ॥
तब वा वैष्णवनें कहि जो आज्ञा ॥ सो तादृशी भगवदीय
परदेश चलयो ॥ तब वो दूसरो विरक्त तादृशीके संग च-
लयो ॥ सो श्रीगुसांईजीकी आज्ञा लैंके चलयो ॥ रस्तामें
एकदिन तादृशी भगवदीय पाछे रह्यो और साधारण
आगे चलयो ॥ सो एक गाम हतो वा गाममें बैठ रह्यो सो
जहां बैठो हतो वाके परोसमें वेश्याको नृत्य होवै लग्यो
और साधारण वैष्णव देखने लग्यो सो ऐसो मग्न भयो

जो कुछ देहकी शुद्धी रही नहीं ॥ फेर वो तादृशी भगवदीय
 बाकुं छुटवे निकस्यो छूटत छूटत वा गाममें आयके मि-
 ल्यो ॥ परंतु वो वेश्याको नृत्यमें ऐसी मग्न हतो जो कुछ
 वैष्णवकुं पहेचान्यो नहीं, फेर वैष्णव बाकुं बहार खेंच ले-
 गयो तोहुं कुछ शुद्धि आई नहीं, फेर भगवदिच्छासुं वा
 तादृशीकेपावनकी रज उठी सो पवनसुं बाके मुखमें गई
 तब बाको विषयावेश मिट्यो तब बाको चेत भयो फेर सु-
 द्ध आई ॥ देखे तो वे तादृशी पास ठाढे हैं उठके बाके संग
 चलयो फेर कोईदिन श्रीगुसांईजीके पास जब गये तब वा
 तादृशीनें श्रीगुसांईजीसुं सब समाचार कहे फेर श्रीगुसां-
 ईजीनें आज्ञा करी जो बाकुं वेश्याकी रजको स्पर्श भयो
 हतो जासुं आवेश आयगयो ॥ फेर तेरे चरणकी रजको
 स्पर्श भयो जब बाको विषयावेश उतन्यो ॥ सो वैष्णवकी
 चरण रजको ऐसी माहात्म्य है जिनके पावनकि रजकुं
 ब्रह्मा और शिव और शेष और सनकादिक इच्छा करे हैं
 परंतु प्राप्ती नहीं होवै है ऐसे वैष्णवके पावनकि रजसों वि-
 षयावेश मिटे यामें कहा आश्चर्य है सो तादृशी वैष्णव
 सुनके चुप होय गयो सो वे वैष्णव ऐसे कृपापात्र हते ॥
 वार्ता संपूर्ण ॥ वैष्णव ॥ ११८ ॥ * ॥ ॥ ॥

॥ श्रीगुसांईजीके सेवक एक ब्राह्मणी अडेलमें
 रहेती तिनकी वार्ता ॥ सो वे ब्राह्मणीकुं श्रीगुसांईजीनें ना-
 मनिवेदन करायके आज्ञा करी जो श्रीनवनीतप्रियाजीकी
 परिचारगी करौ ॥ सो परिचारगी करन लगी ॥ एकदिन
 दारकी तपेलीमें माजतीवखत दाग रहिगयो तब कोईकुं

खबर न परी ॥ तब श्रीनवनीतप्रियाजीकुं राजभोग धर-
वेकुं श्रीगुसांईजी पधारे ॥ तब श्रीनवनीतप्रियाजीनें कही
जो राजभोगकी सामग्री छिवायगईहै तपेलीमें दाग रहि-
गयोहै ॥ तब श्रीगुसांईजीनें दूसरी सामग्री कराई और
श्रीनवनीतप्रियाजीकुं समर्पी और वा ब्राह्मणीकुं यमुना
पार उतार दीनी ॥ वे ब्राह्मणी यमुनाजीके घाटपर झपडी
बनायके पडी रती और घाटपर गाय भैंस आवैं सो गो-
बर थापे और उपलावेचे ॥ घाट उतरवेकुं लोग आवैं उहां
रसोई करे ॥ विनकुं उपलादेवे ऐसे करके वो ब्राह्मणी नि-
र्वाह करे ॥ परंतु गोबर बहुत हतो जासुं उपलानको ढग-
लावहुत होयगयो ॥ एकदिन एक ब्रजवासी नावलेके उ-
पला लेवेगयो तब वा ब्राह्मणीसुं पूछो ये उपला वेचेगी ॥
तब वा ब्राह्मणीनें ब्रजवासीकुं पेहेचान्यो तब वा ब्राह्मणी
नें कही उपला काहेको चाहिये मंदिरके लीयें चाहिते होंवै
तो लैजावो सब श्रीगुसांईजीकेहैं मेहुं श्रीगुसांईजीकी दा-
सीहुं ॥ तब ये मुनके उपला भरायके नाव लेगयो ॥ तब
श्रीगुसांईजीनें पूछी ये सुंदर उपला कहांसुंलायोहै ॥
तब वा ब्रजवासीनें वा ब्राह्मणीकी दंडवत कही और
सब समाचार कहे तब श्रीगुसांईजी प्रसन्न भये ॥
और आज्ञाकरी जो वा ब्राह्मणीकुं बुलाय लावो ॥
फेर वे ब्रजवासी दूसरी नाव लेगयो ॥ और उपला
भरके वा ब्राह्मणीकुं संग ले आयो फेर वे ब्राह्मणीनें श्री-
गुसांईजीके दर्शन कन्ये ॥ बहुत दिन भये हते तब अ-
पनी दोष विचारके आंखनमेंसुं जलबहेवे लगगयो श्रीगु-

साईजी देखके वा ब्राह्मणीकुं धीरज दीनी और आज्ञाकरी
जो रोवोमति अब श्रीनवनीतप्रियाजी तुमारेऊपर प्रसन्न
भयेहैं ॥ जावो परिचारगीकी सेवा करौ ॥ फेर वे ब्राह्मणी
अत्यंत श्रद्धासहित बहुत संभारराखके परिचारगी करन
लगी ॥ थोड़ेदिन पीछे श्रीनवनीतप्रियाजी अनुभव जता-
वन लगे और वा ब्राह्मणीके ऊपर कृपाकरके बोलन लगे ॥
फेर एकदिन श्रीनवनीतप्रियाजीके खीरमें मेवा थोड़ो
हतो सो वा ब्राह्मणीकुं श्रीनवनीतप्रियाजीनें आज्ञाकीनी
जो खीरमें मेवा थोड़ो है ॥ तब वा ब्राह्मणीनें श्रीगुसाई-
जीकुं बिनती करी तब श्रीगुसाईजी मुनके बहुत प्रसन्न
भये और विचार किये जो याके धन्यभाग्य है ॥ श्रीनव-
नीतप्रियाजीनें ऐसीकृपाकरीहैं सो वे ब्राह्मणी श्रीगुसाई-
जीकी ऐसी कृपापात्र हती जाकुं काढदीनी तोहुं दोष न
आयो और सदैव वा ब्राह्मणीको चित्त श्रीगुसाईजीके च-
रणारविंदमें रहेतो ॥ वार्ता संपूर्ण ॥ वैष्णव ॥ ११९ ॥ ❀ ॥

॥ श्रीगुसाईजीके सेवक दुर्गादासकी वार्ता ॥

सो वे दुर्गादास पूरवदेशमें रहेंते सो तीर्थयात्रा करवेकुं
आये तब वे दुर्गादास श्रीगोकुलमें आये तब श्रीगुसाई-
जी यमुनाजीके घाटपर विराजते हते ॥ तब साक्षात् पू-
र्णपुरुषोत्तम कोटिकंदर्पलावण्यस्वरूपके दर्शन भये तब
दुर्गादासनें श्रीगुसाईजीकुं बानती करी जो महाराज मोकुं
शरणे ल्यो ॥ मैं बहुत जन्मसुं भटकत हुं ॥ तब श्रीगुसा-
ईजीकुं दया आई तब कृपा करके नामनिवेदन कराये ॥
फेर दुर्गादास ब्रजमें बहुत दिन रहे ॥ और श्रीगोवर्धन

(२३६) , दोसीबावन वैष्णवकी वार्ता.

नाथजीके सेवा दर्शन किये ॥ फेर दुर्गादास विदा होयके
देशकुं गये और श्रीठाकुरजी पधरायके सेवा करन लगे
जिनके संगतें बहुत वैष्णव भये और श्रीठाकुरजी दुर्गा-
दासके पास बालककीसी न्याई जो चाहे सो माग लेते॥
और बाललीलाको संपूर्ण अनुभव करावते ॥ सो वे दुर्गा-
दास ऐसे कृपापात्र हते ॥ वार्ता संपूर्ण ॥ १२०॥
॥ श्रीगुसांईजीके सेवक चतुरबिहारीकी वार्ता॥
सो चतुरबिहारी श्रीगोकुलमें आये हते ॥ और श्रीगुसां-
ईजीके दर्शन किये तब श्रीगुसांईजीकुं वीनती करी सोकुं
शरणलेउ ॥ तब श्रीगुसांईजीने कृपा करके नाम निवेदन
करायो ॥ तब श्रीनवनीतप्रियाजीके राजभोगको समय
हतो और चतुरबिहारीकुं लीला सहित दर्शन भये ॥ तब
चतुरबिहारीने नयो पद बनायके गायो ॥ सो पद॥ “किये
जोचटकभटकठाढोरहतनघटपर” ॥ ये पद गायो और
ये सुनके श्रीगुसांईजी बहोत प्रसन्न भये ॥ तब श्रीगुसांई-
जीने जाण्यो के श्रीनवनीतप्रियाजीने इनकुं लीलाको
अनुभव करायो ॥ तब श्रीगुसांईजी बहोत प्रसन्न भये ॥
फेर चतुर बिहारीजी श्रीजीद्वारमें आयके श्रीगुसांईजीके
संग श्रीनाथजीके दर्शन किये ॥ तब मंगलाको समय
हतो चतुरबिहारीने नये पद गाये ॥ और राजभोगकेस-
मय श्रीनाथजीके संनिधान चतुरबिहारीजीने पद गायो
॥ सो पद ॥ “ अनतनजईएहोपियेरहियेमेरेमेहेल ” ॥ ये
सुनके श्रीगुसांईजी बहोत प्रसन्न भये ॥ सो वे चतुरबि-
हारीजी श्रीगुसांईजी पोढ़ते तब पंखा करते और पद गा-

वते सो वे चतुरविहारी श्रीगुसांईजीके चरणारविंदकी
जन्मपर्यंत सेवा करते हते ॥ वार्ता संपूर्ण ॥ वैष्णव ॥ १२१ ॥
श्रीगुसांईजीके सेवक एक क्षत्राणीकी वार्ता ॥
सो श्रीगुसांईजी गुजरात पधारे तब वा क्षत्राणीनें बीनती
करी महाराज सोडुं शरण ल्यो ॥ तब श्रीगुसांईजीनें म-
नुष्यनकुं समस्या करिके कही याकुं न्हावाओ सो न्हा-
यके श्रीगुसांईजीके संनिधान आई ॥ जब श्रीगुसांईजी
नाम मुनायवे लगे तब वा क्षत्राणीके मनमें ऐसी आई
जो श्रीगुसांईजी ऊंचेस्वरसुं बोले तो ठीक तब श्रीगुसांई-
जी बाहुं धीरे धीरे नाम मुनावन लगे ॥ परंतु वे क्षत्राणी
जानके बोले नहिं ॥ तब श्रीगुसांईजी हेला करके बोले
जो मुनेहे के नहीं ॥ तब वे क्षत्राणी बोली जो आपके व-
चनामृत मुनवेके लीयें मैं जानके नहीं बोलीहुं ॥ तब श्री-
गुसांईजी प्रसन्न भये तब वा क्षत्राणीकुं नामनिवेदन
कराये ॥ फेर श्रीठाकुरजी पधरायके सेवा करन लगी ॥
थोडेदिन पीछे श्रीठाकुरजी वा क्षत्राणीकुं यशोदाजी जैसे
अनुभव करावन लगे ॥ श्रीठाकुरजी घरमें जैसे यशोदा-
जीसुं बालचेष्टा करते जैसे वा क्षत्राणीसुं बालचेष्टा करन-
लगे सो वे क्षत्राणी ऐसी परम कृपा पात्र हती ॥ वार्ता
संपूर्ण ॥ वैष्णव ॥ १२२ ॥ * ॥ ॥ ॥ ॥
॥ श्रीगुसांईजीके सेवक माधोदास कपूरकी ॥
सो माधोदास आगरेमें रहते ॥ एकसमय श्रीगुसांईजी
आगरे पधारे ॥ सो जनार्दनदास चोपडा क्षत्रीके घर उ-

(२३८) ; दोसौबावन वैष्णवकी वार्ता.

तरे ॥ उहां माधवदासजी दर्शनकुं गये ॥ सो साक्षात् श्री गोवर्धननाथजीके दर्शन भये ॥ तब माधवदास देखके विस्मित भये ॥ तब श्रीगुसांईजीसुं वीनती करी महाराज मोकुं शरणल्यो ॥ तब श्रीगुसांईजीनें कृपा करके नाम निवेदन करायो ॥ और सेवा पधराय दीनी ॥ तब माधव दासजी सेवा करन लगे ॥ सेवा करते करते माधवदासजीकुं श्रीठाकुरजीकी लीलाको अनुभव भयो ॥ कोईसमय तो श्रीनाथजी रासलीलाके दर्शन करावते और कोई समय दानलीलाके दर्शन करावते और कोई समय बाललीलाके दर्शन करावते ॥ ऐसि अनेक प्रकारकी लीलानके दर्शन माधवदासजाकुं होते ॥ सो वे माधवदासजी श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १२३ ॥ ❀ श्रीगुसांईजीके सेवक भीष्मदास क्षत्रीकी वा ० सो भीष्मदास पूर्वदेशमें रहेते सो तीर्थ यात्रा करवेकेलिये श्रीगोकुल आये ॥ सो श्रीगुसांईजीके दर्शन कीये ॥ और श्रीगुसांईजीकुं वीनती करी मोकुं शरण लेउ ॥ तब श्रीगुसां-ईजीनें कृपा करके भीष्मदास और भीष्मदासके कुटुंबकुं नाम निवेदन करायो ॥ और भीष्मदासनें श्रीनाथजीके दर्शन किये ॥ और दर्शन करके बहोत प्रसन्न भये ॥ और श्री-गुसांईजीकुं वीनती करी महाराज मोकुं भगवत्सेवा पध-राय दीजे ॥ तब श्रीगुसांईजीनें कृपा करके पधराय दीनी ॥ और श्रीबालकृष्णकी सेवा भीष्मदास भलीभांति सुं करन लगे ॥ फिर एकदिन भीष्मदासजीकुं श्रीबालकृष्णजीनें स्व-प्रमं कही जो हमकुं नयो मंदिर कराय देवो ॥ तब भीष्मदा-

वैष्णव (१२५) नारायणदास सनाढ्यब्राह्मण. (२३९)

सजीनें श्रीगोकुलमें नयो मंदिर करायो ॥ और श्रीगुसांईजीकुं वीनतीकरके और श्रीठाकुरजीकुं नये मंदिरमें प-
धराये ॥ और भीष्मदास तथा विनकी स्त्री भलीभांति सुं से-
वा करन लगे और जन्मपर्यंत श्रीगुसांईजीके जरणारविंद
छोड़के कइं गये नहीं ॥ और भीष्मदास नित्य सांझके
समें स्मरणेतीमें जाते और उहां रासलीला आदिक सब
लीलानके दर्शन होते ॥ सो वे भीष्मदास परम कृपा पात्र
भगवदीय भये ॥ वार्ता संपूर्ण ॥ वैष्णव ॥ १२४ ॥ ❀ ॥

श्रीगुसांईजीके सेवक नारायणदास सनाढ्य
ब्राह्मणकी वार्ता ॥ सो वे नारायणदास अन्योरगाममें
रहते हते ॥ नारायणदास श्रीगुसांईजीके दर्शन करवेकुं
आये ॥ सो साक्षात् पूर्णगुरुपौत्तमके भये ॥ तब नारा-
यणदास श्रीगुसांईजीके शरण आये ॥ और नित्य श्री-
नाथजीकी सेवा कन्यो करते ॥ तब नारायणदासकुं
लौकिकमें सगे दुःख बहुत देते ॥ तब नारायणदास श्री-
गोकुलमें आयके रहे ॥ और जन्मपर्यंत श्रीनवनीतप्रि-
याजीकी सेवा करते रहे ॥ विन नारायणदासकुं सेवामें
ऐसी आसक्ती होती जैसे अफीमखायवेवालेकुं अफीम-
विना रह्यो न जाय ॥ ऐसे नारायणदासजी सेवाविना न
रहेशक्ते ॥ और श्रीनवनीतप्रियाजी विनकुं सूते जगा-
यके सेवा करावते और सेवाके समय विनके पास आ-
यके बैठते और बातें करते और सेवा करवावते ॥ सो ना-
रायणदास श्रीगुसांईजीके ऐसे कृपापात्र होते ॥ वार्ता सं-
पूर्ण ॥ वैष्णव ॥ १२५ ॥ ❀ ॥ ॥ ॥ ॥

॥ श्रीगुसांईजीके सेवक एक वैष्णव जमनादास दक्षिणमें रहेते तिनकी वार्ता ॥ सो वे वैष्णव दक्षिणमें रहेते हते एक समय श्रीगुसांईजी दक्षिण पधारे हते ॥ तब वे जमनादास श्रीगुसांईजीके सेवक भये हते ॥ और श्रीठाकुरजी पधरायके सेवा करन लगे ॥ वा देशमें स्लेछनको राज हतो ॥ जब चैत्र महिना आयो तब एक माली गुलाबके फूल बेचवे आयो और वे जमनादासजी फूलनके शोकी बहुत हते ॥ फेर वा मालीसों वा जमनादासनें पूछी जो या फूलनको कहालेवंगो ॥ तब वाने कही एक रुपैया लेउंगो ॥ तब उहां एक तुर्क आयो ॥ वानें कही फूल हमारे सरदारकुं चाहिये ॥ मैं दो रुपैया देउंगो ॥ तब जमनादासनें पांच कहे ॥ तब वा तुर्कनें दस कहे ॥ ऐसे आपसमें दोउजने बढवे लगे जब लाख रुपैया सूधी बधे ॥ तब वे जमनादास लाख रुपैया देके एक फूल लाये ॥ और लायके श्रीठाकुरजीकी पाग उपर धरायो ॥ वाई समय श्रीगुसांईजी गिरिराजजी उपर श्रीनाथजीको श्रृंगार करते हते ॥ तब श्रीनाथजी झुक झुक जाएं ॥ तब श्रीगुसांईजीनें पूछ्यो जो बाबा क्युं झुकोहो ॥ तब श्रीगोवर्धननाथजीनें श्रीगुसांईजीसुं कही जो आपके सेवक जमनादास दक्षिणमें रहेहैं सो वानें लाख रुपयामें एक फूल लैके अपनं श्रीठाकुरजीकुं धरायो है ॥ सो वाके भावके बोझसुं लचक लचक जाउहुं ॥ ऐसो वाको भावहै ॥ जानें मेरे लीयें एक फूलके लाख रुपैया खरचेंहैं ॥ ये बात सुनके श्रीगुसांईजी बहुत प्रसन्न भये ॥ और वा वैष्णवकुं

श्रीगुसाईजीने पत्र लिखके एक ब्रजवासी पठायो ॥ जो तुमनें अमकेदिन फूल धरायो है सो श्रीगोवर्धननाथजीने अंगिकार कियो है ये समाचार वा यमुनादास वैष्णवके पास पहांचे सो पत्र वांचके बहुत प्रसन्न भयो ॥ और पांचलाख रुपैयाको हीरा लेके श्रीगुसाईजीकुं पठायो ॥ सो वे यमुनादास वैष्णव श्रीगुसाईजीके ऐसे कृपापात्र हते द्रव्यकुं तुच्छ जाणते ॥ वार्ता संपूर्ण ॥ वैष्णव ॥ १२६ ॥ ❀

॥ श्रीगुसाईजीके सेवक एक बंगालीकी वार्ता ॥ सो वे गौडिया वृंदावनमें रहेतो हतो ॥ और मजुरी करतो हतो ॥ एकसमय श्रीगुसाईजी वृंदावन पधारे तब वे श्रीगुसाईजीको सेवक भयो तब वाहुं वैष्णवजानके लोग मजुरी अधिकी देवे लगे ॥ तब वानें अपने मनमें विचार कियो जो धर्म वेचके खानो सो अनुचित है ॥ शास्त्रमें लिख्यो है जो भगवानके नाम लैके भिक्षा मागे सो भिक्षा देवेवाले नरकमें जाय जासुं धर्म देखायके भिक्षा और रोजगार करने नही ॥ ये विचारके वो गौडिया जब मजुरी करवे जातो तब तिलकमुद्रा धोतो और कंठी छिपाय राखतो ॥ ऐसे धर्म गुप्त राखके मजुरी करतो ॥ फेर एकदिन वो तिलक धोवते भूलगयो ॥ और मजुरी करवेकुं तैयार भयो ॥ तब श्रीठाकुरजी बोले जो तिलक धोयके जावो ये मुनके बहुत प्रसन्न भयो ॥ फेर नित्य श्रीठाकुरजी वासुं बातें करते और सब सुख देते वे गौडिया श्रीगुसाईजीको एसो कृपापात्र हतो ॥ वार्ता संपूर्ण ॥ वैष्णव ॥ १२७ ॥ ❀ ॥ ॥ ॥ ॥ ॥

(२४२) दोसौबावन वैष्णवकी वार्ता.

॥ श्रीगुसांईजीके सेवक एक ब्राह्मण भागनगरमें रहेते तिनकी वार्ता ॥ सो वे एक समय श्रीगुसांईजी-
दक्षिण पधारे और वा ब्राह्मणकुं वेद पढते देखे ॥ तब
श्रीगुसांईजीनें विचार्यो ये ब्राह्मण वेदको पाठ बहुत
आछो करे है ॥ परंतु कछु समझे नहीं है ॥ कछु समझेतो
आछो ॥ इतनेमें वा ब्राह्मणके मनमें ऐसी आई जो इनकी
शरण जाऊं तो ठीक ॥ तब वह ब्राह्मण श्रीगुसांईजीके
शरण गयो ॥ और कथा सुनवे लग्यो ॥ तब श्रीगुसांई-
जीकी कृपातें वा ब्राह्मणकुं वेदको अर्थ स्फुरित भयो ॥
तब वह ब्राह्मण श्रद्धासहित वेदको पाठ करना लग्यो ॥
तब एक दिन श्रीनाथजीनें श्रीगुसांईजीसों ऐसी आज्ञा
करी जो ये ब्राह्मण हमारे निज मंदिरके आगे नित्य वेद
पढे ॥ तब शृंगारसुं लेके राजभोग पर्यंत नित्य निज मं-
दिरके आगे वेद पढतो ॥ और कहुं अक्षर और मात्रा
भूल तो श्रीठाकुरजी आयके बतावते ॥ वे ब्राह्मण ऐसो
कृपापात्र भयो ॥ वार्ता संपूर्ण ॥ वैष्णव ॥ १२८ ॥ ❀ ॥

॥ श्रीगुसांईजीके सेवक माधुरीदास माली ति-
नकी वार्ता ॥ सो वे माधुरीदास नित्य फूलवीनके हार
कर लावते ॥ सो एकदिन श्रीनाथजीनें माधुरीदासकुं
शिखायो जो तूं या रीतीको हार गृह्य ॥ तब माधुरीदा-
सनें हार तैयार करके श्रीगुसांईजीकुं दियो ॥ तब श्रीगु-
सांईजीनें मुखियाकुं दियो ॥ तब मुखियानें श्रीनाथ-
जीकुं धरायो ॥ सो वह हार बढो बढत भयो ॥ तब मु-
खियानें श्रीगुसांईजीसों कही जो हार बढो है तब श्रीगुसां-

ईजीनें माधुरीदाससों कही नित्य तुमहार करोहो ॥ आज ऐसो क्युं कन्यो ॥ तब माधुरीदासनें कही जो मोकुं श्रीनाथजीनें पास बैठके शिखायोहै ॥ तब श्रीगुसांईजी आप न्हायके हार धरायवेकुं पधारे ॥ तब श्रीनाथजीकुं हार धरायो ॥ तब हार पूरो भयो तब श्रीगुसांईजीनें श्रीनाथजीसुं पूछी याको कारण कहा ॥ तब श्रीनाथजीनें तीनकारण बताये एक तो तुमारे हाथ बिना कोईको हाथ सुहाय नहीं है ॥ और दूसरो कारण ऐसो हार रतन नको चाहिये सो बनवाओ ॥ और कारण ये मुखियाके मुखसुं वास आवे है तब तें श्रीगुसांईजीनें आज्ञा करी मुखियासुं लेके जितने सेवक हैं सो सब मुख बांधके सेवा करौ वा दिनतें सब सेवक मुख बांधके सेवा करें हैं ॥ सो वे माधुरीदासमाली श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १२९ ॥ ॐ ॥ श्रीगुसांईजीके सेवक धर्मदास सो अडिगमें रहते तिनकी वार्ता ॥ सो वे धर्मदास आंखनसुं नहीं देखते हते श्रीगुसांईजी नित्य घोडापर बैठके श्रीजीद्वार पधारते और श्रीगोकुलतें दोय घडीमें गोपालपुर आवते ॥ और गोपालपुरसुं दोय घडीमें श्रीगोकुल पधारते ऐसे आवजाव नित्य होती ॥ एक दिन श्रीगुसांईजी अडिगसुं बाहिर निकसे ॥ रस्तामें एक आधरो ब्राह्मण ठाढो हतो ॥ और घोडा बाके ऊपर आवे लग्यो ॥ तब श्रीगुसांईजीनें घोडो थाभ्यो ॥ तो डूँ वह ब्राह्मण घबराय गयो ॥ रस्तामेंसुं इतउत जाय नसक्यो ॥ तब श्रीगुसांईजीकुं बडुत

(२४४) दोसौबावन वैष्णवकी वार्ता.

दया आई ॥ तब श्रीगुसांईजीनें नीचे उतरके वाके नेत्रऊपर जल छांटयो ॥ तब वाके नेत्र खुल गये ॥ तब श्रीगुसांईजी तो घोड़ाऊपर अस्वार होयके गोपालपुर पधारे ॥ तब वह ब्राह्मणहुं पीछे पीछे धीरे धीरे गोपालपुर पोहोंच्यो ॥ और जायके श्रीगुसांईजीके दर्शन कन्ये और वीनती करी रस्तामें आपने मोकुं नेत्र दिये हे मैं वोही ब्राह्मणहुं मोकुं शरण लेवो ॥ तब श्रीगुसांईजीनें दूसरे दिन वा ब्राह्मणकुं नाम निवेदन करायो ॥ और श्रीनाथजीके दर्शन कराये ॥ और श्रीगुसांईजीनें कृपा करके ग्रंथ पढाये जहां सूधी वाकी देह रही तहां सूधी वे उहांही रहे ॥ तब थोड़े दिनमें वाकी देह छूटी ॥ तब श्रीगुसांईजीनें आज्ञा करीजो धर्मदास बहुत आछो वैष्णव हतो ॥ वार्ता सं० ॥ वैष्णव ॥ १३० ॥

॥ श्रीगुसांईजीको सेवक एक वैष्णव हतो जाने खोटे कर्म करके श्रीगुसांईजीकी परीक्षा लीनी तिनकी वार्ता ॥ सो एक दिन चार वैष्णव मिलके भगवद्वार्ता करते हते ॥ और श्रीगुसांईजीको प्रताप वर्णन करते हते ॥ तब एक अन्यमार्गी बोल्यो मेरो उद्धार करें तब खरी बात है ॥ तब वैष्णवननें कही तेरो उद्धार करेंगे यामें संदेह नहीं है ॥ तब वैष्णवनकी बात सुनके और श्रीगुसांईजीके पास जायके सेवक भयो ॥ फेर जायके स्मशानमें बैठो और उहांही रसोई करके खावे ऐसो भ्रष्ट भयो ॥ फेर आयके विन वैष्णवनसों कहे मैं ऐसे कर्म करुं हुं ॥ अब श्रीगुसांईजी मेरो उद्धार करेंगे तो खबर परेगी ॥ ये सब समाचार विन वैष्णवननें श्रीगुसांईजीसों वीनती करी

तब श्रीगुसांईजी कछु बोल्ये नहीं ॥ फेर एक राजा हतो
तीर्थ करतो करतो श्रीगोकुल आयो ॥ तब वा राजाने
श्रीगुसांईजीसों वीनती करी जो महाराज मोकुं गलित-
कोढ़ मयोंहि मैंने औपध बहोत कीयेंह सो मिटयो नहींहि
॥ और फेर तीर्थ करवेके लीयें निकस्योहुं तोहुं रोग मिटयो
नहींहि ॥ अब आप कछु उपाय बतावें तो मिटगो ॥ तब
श्रीगुसांईजीने आज्ञा करी जो हमारी सेवक अमुकगाममें
स्मशानमें बैठोहै बाकी जूठन खावोतो मिटजायगो ॥ तब
वे राजा श्रीगुसांईजीकी बातपर विश्वास राखके वा गाम
में जायके और उहां स्मशानमें गयो और बासु जूठन
मागी तब वानें नाहीं कही ॥ जब वे खायवे बैठो और
योढो खायवो रह्यो तब राजाने औरसुं बाकी पातलमेंसुं
उठायके जूठन खाई ॥ तब तत्काल वा राजाको कोढ़
मिटगयो ॥ और देह निर्मल भई ॥ फिर वानें राजासुं पूछी
जो याको कारण कहाहै तब वा राजाने श्रीठाकुरजीकी
सब बात वाके आगे कही ॥ फिर वाके मनमें बहोत पश्चा-
त्ताप भयो ॥ जो मैं ऐसो भ्रष्ट हुं तोहुं श्रीठाकुरजी मोकुं
याद करेंह ॥ और मेरेमें इतनी सामर्थ्य धरदीनीहै फेर
वो वैष्णव श्रीगुसांईजीके पास जायके अपराध क्षमा क-
राये ॥ और रोयवे लय्यो तब श्रीगुसांईजीने शास्त्र प्रमाणें
प्रायश्चित्त करायके फिर वाके ऊपर कृपा करके बाकुं सेवा
पधराय दीनी ॥ तब वो भगवत्सेवा करन लय्यो ॥ भगव-
त्सेवाके प्रतापते बाकी चित्त निर्मल होयगयो और श्री-
ठाकुरजीके चरणारविंदमें चित्त लय्यो बह परीक्षा करवे

आयो तोहुं श्रीगुसांईजीनें बाकुं छोड्यो नहीं ॥ ऐसे परम
 दयाल हते ॥ वार्ता संपूर्ण ॥ वैष्णव ॥ १३१ ॥ ॐ ॥ ॥
 ॥ श्रीगुसांईजीके सेवक एक राजा पूरव देशमें
 रहेतो तिनकी वार्ता ॥ सो वे राजा अन्य मार्गोहतो ॥
 और बाके देशमें वैष्णव रहेते बिनकी निंदा करतो ॥ ऐसे
 कहेतो जो वैष्णव मार्ग आछो नहींहैं ॥ पेहेले दूसरे वैष्ण-
 वकुं प्रसाद लेवावेहैं और पीछे आप खावेहैं जासुं ये स-
 बको जूठन खावेहैं ॥ तब ऐसे कहेके फिर लोगनसुं कहे
 वैष्णवतो उच्छिष्टभोगीहैं ऐसे कहेके निंदा बहुत करतो
 तब तो वैष्णवनकी निंदा श्रीठाकुरजी सही नहीं शके ॥
 तब वा राजाकुं कोठ भयो जैसे जैसे राजा निंदा
 करे तैसे तैसे कोठ बढ़तो जाय ॥ तब आखा
 शरीरमें कोठ बढ़गयो ॥ तब राजा बहुत दुःखी भयो बहुत
 औषध कन्ये और कर्म विपाक देखके बहुत प्रायश्चित्त
 कन्ये परंतु कोठ तो बढ़तो जाय ॥ तब वा राजाकुं वैष्णव
 ननें कही जो तुम तीर्थयात्रा करो ॥ तब राजा तीर्थयात्रा
 करवे निकस्यो और जा तीर्थमें जाय जैसी विधी और
 जैसे दान लिखे होवें वैसे करे ॥ ऐसे करतेकरते श्रीगो-
 कुल आयो श्रीगुसांईजीके दर्शन किये और कोठ संबंधी
 वीनती करी तब श्रीगुसांईजी तो अंतरयामीहैं सो जान-
 गये ॥ जो यानें वैष्णवनकी निंदा करीहैं यातें कोठ भ-
 योहैं तब श्रीगुसांईजीनें आज्ञा करी स्मशानमें हमारो
 सेवक बैठोहैं बिनकी जूठन खावोगे तो तुमारो कोठ मि-
 टैगो ॥ तब वा राजानें वैसेही कियो ॥ सो जूठन लेतेही

वैष्णव (१३३) शेटको बेटा और दासी. (२४७)

कोढ़ मिटगयो ॥ जैसे सूर्यउदयतें अंधकार मिट जाय ॥
जैसे असूत पीयेतें मृत्युको भय मिटजाय ॥ जैसे ज्ञान
भये ते संसार मिटजाय ॥ जैसे भक्तीके उदयतें त्रिविध-
ताप मिटजाय ॥ ऐसे जूठनलेतमात्रसुं कोढ़ मिटगयो ॥
सो वा राजाकी देह निर्मल भई ॥ तब श्रीगोकुल आयके
श्रीगुसाईजीके सेवक भये ॥ और वीनती करी महाराज
मैने वैष्णवकी निंदा बहुत करीहै ॥ तब श्रीगुसाईजीनें
आज्ञा करी जो वैष्णवको द्वेष बहुत बुरो है ॥ श्रीठाकुर-
जी और श्रीमहाप्रभुजी वैष्णवको अपराधक्षमा नहीं
करें ॥ वैष्णवको अपराध वैष्णवसुं क्षमा होवै है जासुं हमनें
वैष्णवके पास तुमारी अपराध क्षमा करायो है ॥ सो श्री-
ठाकुरजीनें गीताजीमें कह्यो है ॥ श्लोक ॥ अपिचेत्सुदुरा-
चारीभजतेमामनन्यभाक् ॥ साधुरेवसमंतव्यःसम्यग्व्यव-
हितोहिः ॥ अर्थ ॥ याप्रकारसुं गीताजीमें कह्यो है ॥ जो
दुराचारी होवै और अनन्य होयके मोड़ुं भजतो होवै
वाकुं साधु समजणो ॥ वाने भलो निश्चय कन्यो है ॥
जासुं वैष्णवकी निंदा करनी नहीं ॥ यह सुनके वा रा-
जाने अपनी अपराध क्षमा करायो ॥ और श्रीठाकुरजी
पधरायके सेवा करन लग्यो ॥ दिन दिन वा राजाकुं स-
त्संग लगतो गयो ॥ तैसे भगवद्भाव बढ़तो गयो ॥ तब
वा राजाके ऊपर श्रीठाकुरजी प्रसन्न भये ॥ सो श्रीगुसां-
ईजीकी कृपातें अनुभव भयो सो वे राजा ऐसो कृपापात्र
हतो ॥ वार्ता संपूर्ण ॥ वैष्णव ॥ १३२ ॥ ❀ ॥ ॥ ॥
श्रीगुसाईजीके सेवक शेटको बेटा और दासी

तिनकी वार्ता—सो वह शैठ श्रीगुसाईंजीको सेवक हतो ॥ सो वह शैठकी देह छूटी तब अपने घर दासी हती सो बेटा और ठाकुरजीकी सेवा वा दासीकुं सोंपगयो हतो ॥ सो वो शैठको बेटा दासीकुं माजी कहेतो ॥ सो एक समय वा गाममेसुं वैष्णव श्रीनाथजीद्वार जायवेलगे ॥ तब वह शैठके बेटानें कही मैं माजी यात्रा जाबुं ॥ तब वा दासीनें कही तुम अबी श्रीनाथजीके दर्शनकुं मति जावो श्रीनाथजीकी इच्छा नहीं है ॥ तब वो शैठको बेटा मान्यो नहीं और वा संगमें चल्यो गयो ॥ रस्तामें एक राजाको गाम आयो वा राजाके गाममें सरकारके मनुष्यनके संग वा साहुकारके बेटाकी लड़ाई भई ॥ तब वा गामके राजानें आखो संग कैद कन्यो ॥ दोदिन पाछे सब संगकुं छोड दियो ॥ और एक शैठके बेटाकुं कैद राख्यो ॥ और वे संगतो श्रीजीद्वार गयो ॥ श्रीनाथजीके दर्शन करे और यात्रा करके फेर देशकुं आये ॥ तब रस्तामें वो गाम आयो ॥ तब वह शैठको बेटा कैद हतो सो वे संगवालाननं वा राजाकुं कहेंके छुडायो ॥ फेर वाके गाम आयो तब वा दासीकुं कही जो माजी मोकुं श्रीनाथजीके दर्शन न भये उलटो दुःख पायो ॥ तुमारी कृपा होवेगी तब श्रीनाथजी दर्शन देंगे ॥ फेर वा दासीकुं दया आई तब वा शैठके बेटाकुं कही जो तुम वैष्णवनकी टहेल करो तब तुमकुं श्रीनाथजी दर्शन देंगे ॥ तब शैठको बेटा वैष्णवनकी टहेल करनलाग्यो ॥ सो जो वैष्णव आवैं तिनकुं न्हावे और महाप्रसाद लिवावे और पंखा करै जलपान

और पांवदावे ॥ आखीदिन आपके अंगसुं टेहेल करे ॥
 एकदिन तादृशीभगवदीय अद्भुतदासजी आये ॥ तब वि-
 नकी टेहेल बहुत करी ॥ तब वा अद्भुतदासनें कही कछु
 मागी ॥ तब वा शैठके वेदाने कही मोकुं श्रीनाथजीके द-
 र्शन होवें और ब्रजयात्रा होवें ॥ फेर अद्भुतदासनें कही हो-
 वेंगे ॥ श्रीगुसांईजीकी कानतें श्रीनाथजीदर्शन देवेंगे ॥ तब
 वह शैठको वेटा दासीकुं संग लेके श्रीनाथजीके दर्शनकुं
 गयो और जायके दर्शन करे ॥ और श्रीगुसांईजीके दर्शन
 करे ॥ फेर वा दासीनें श्रीगुसांईजीकुं वीनती करी जो महा-
 राज याके करममें दर्शन नहीं हते और वैष्णवनकी कृपासुं
 भये हैं ॥ तब श्रीगुसांईजीनें आज्ञा करी श्रीनाथजी वैष्णव
 नके वशमेंहै ॥ वे चाहेतो ब्रह्मांड फेरडारे ॥ जब वैष्णव प्र-
 सन्न होवै तब कर्मरेख खोटी खरी सब मिटजाय ॥ ऐसे
 श्रीगुसांईजीके वचन सुनके वह दासी बहुत प्रसन्न भई ॥
 तब वे शैठको वेटा यात्रा करके अपने घर आयो ॥ और
 सेवाकरन लग्यो ॥ वह दासी और शैठको वेटा ऐसे कृपा-
 पात्र हते ॥ वार्ता संपूर्ण ॥ वैष्णव ॥ १३३ ॥ ❀ ॥ ॥

श्रीगुसांईजीके सेवक रूप पोरियाकी वार्ता ॥
 सो वह रूप पोरिया श्रीनाथजीकी सिंघपौर पर बैठते
 हते ॥ और रातकुं धौल गावतेहते ॥ एक दिन गोविंदस्वा-
 मीनें कही जो तुम धौल मत गाओ ॥ तुमारी राग आछो
 नहीं है ॥ तब विननें न गायो तब श्रीनाथजीकुं आखीरात
 नींद न आई ॥ सवारि जब श्रीगुसांईजीनें श्रीनाथजीकुं
 जगाये तब श्रीनाथजीके नेत्र लाल देखे ॥ फेर श्रीनाथ-

जीसों श्रीगुसांईजीनें पूछी जो आपकुं उजागरा क्यूं है ॥ तब श्रीनाथजीनें कही जो रूपा नित्य धौल गावे हैं ॥ जब हमकुं नींद आवे हैं सो रात्रकुं गायो नहीं ॥ जासुं नींद नहीं आई तब रूपाकुं श्रीगुसांईजीनें कही जो तेनें धौल क्यूं नहीं गायो ॥ तब रूपापौरियानें हाथ जोड़के कही जो गोविंदस्वामीनें नहीं करी है ॥ तब गोविंदस्वामीसों श्रीगुसांईजीनें कही तुमनें रूपाकुं गायवे कि नहीं क्युं करी ॥ श्रीनाथजीकुं नींद नहीं आई ॥ तब गोविंदस्वामीनें कही जो मोकुं ये खबर नहीं हती ॥ जो खांड और गुड एक भाव है तब श्रीगुसांईजीनें कही कर्म तैं कृपा न्यारी है ॥ तब गोविंदस्वामी चुप कर रहे ॥ तब रूपापौरिया नित्य धौल गाते तब श्रीनाथजीकुं नींद आवती ॥ प्रसंग ॥ १ ॥ एक दिन रातकुं श्रीनाथजीकुं भूख लगी तब श्रीनाथजीनें रूपापौरियाकुं लात मारके जगायो और आज्ञा करी जो मोकुं भूख लगी है ॥ तब रूपापौरियानें श्रीगुसांईजीकुं जगायके बिनती करी तब श्रीगुसांईजी न्हायके सामग्री लेके भीतर पधारे ॥ और श्रीनाथजीकुं अरोगाये ॥ फेर रूपापौरियापर श्रीगुसांईजी बहुत प्रसन्न भये ऐसे अनेक प्रकारकी लीला रूपापौरियासुं श्रीनाथजी करते और केतनेक लोग ऐसे लिखे हैं जो रूपापौरिया श्रान भये ॥ सो ये बात झूठी है कारण जो जानके अन्नप्रसादी रूपापौरिया खाय नहीं और अजानको इतनी दंड होय नहीं जासुं ये बात सर्वथा झूठी है वे रूपापौरिया श्रीगुसांईजीके ऐसे कृपा-

पत्र हते ॥ वार्ता संपूर्ण ॥ वैष्णव ॥ १३४ ॥ ॐ ॥ ॥
 श्रीगुसाईजीके सेवक एक चूड़डो तिनकीवा०
 सो वह चूड़डो गोवर्धनमें रहेतो हतो ॥ सो श्रीनाथजी
 नित्य विलछकुंड पर खेलवे पधारते और वेचूड़डो
 नित्य घास खादवे जातो ॥ तब श्रीनाथजीनें बाकुं
 दर्शन दिये नित्य श्रीनाथजीवासुं वातें करते ॥ एक
 दिन वह चूड़डो गोपालपुर सूधीश्रीनाथजीके संग वातें
 करते आयो तब श्रीगुसाईजीनें देख्यो ॥ तब श्रीगुसाई-
 जीनें बोलायके बाकुं पूछी श्रीनाथजीनें तोसुं कहा वात
 करी ॥ तब वानें कही महाराज वनकी वात करते हते
 नित्य मोकुं आपकी कृपातें वनमें दर्शन देवे हैं और जा
 दिन मोकुं दर्शन न होंवे वा दिन में अन्न जल नहीं लेऊ-
 ँ ॥ तब दूसरे दिन सवारकुं आयके दर्शन दे जाएं और
 कोई दिन रातकुं दर्शन दे जाएं ॥ ये सुनके श्रीगुसाईजीनें
 मनुष्यनकुं कही जो राजभोगकी माला बोले तब याकुं
 सबसुं पेहेले दर्शन कराय देवो ॥ ये करके बहार जाय तब
 औरनकुं करावो सो वे मनुष्य ऐसे करनलगे ॥ फेर एक
 दिन वह चूड़डो श्रीगुसाईजीकी आज्ञा प्रमाणें आय न
 शक्यो ॥ राजभोग होयचुके और ताला मंगल भयो तब
 आयो ॥ ताला लग्यो देखतेही वाको चित्त उदास होय-
 गयो और तब ज्वर जढगयो ॥ फेर मंदिरके पीछे जायके
 पडरह्यो और बहुत विरहताप भयो ॥ फेर वाको दुःख
 श्रीनाथजी सही न सके ॥ फिर श्रीनाथजीनें छडी लेके
 भीतकुं खोदके मोखो करदियो और मोखामेसुं बाकुं

बुलावे लगे तब वह उठके ठाढो भयो ॥ और श्रीनाथजी-
 के दर्शन किये ॥ और श्रीनाथजीने बाहुं दीये लड्डवा दि-
 ये ॥ तब वह उहांसुं लड्डवा लेके गिरिराजसुं नीचे आयके
 एक लड्डवा खाय लियो और एक लड्डवा बांध राख्यो तब
 गाममें ऐसी बात होय गई ॥ कोईने दिनकुं श्रीनाथजीके मं-
 दरके पाछें मोखो कियो है ॥ ये सुनके श्रीगुसांईजी उदास
 भये और सब भीतरियाने सामानकी तपास करवाई तब
 भीतरियानें कही कछु सामान गयो नहीं ॥ तब वा चूड़्डानें
 श्रीगुसांईजीसों जायके बीनती करी ॥ ये मोखो तो श्री-
 नाथजीनें कियो है ॥ मोहुं दर्शन देवेके लीयें सब बात
 श्रीगुसांईजीसो बिनती करी और लड्डवा देखायो ॥ तब
 श्रीगुसांईजीनें मनुष्यनकुं कही ॥ जब ये दर्शन करवे
 आवे तब सबसुं पेहेले सब समयमें दर्शन करायदेन ॥
 और याहुं नित्य पातर धरनी ॥ तब श्रीगुसांईजीके मनुष्य
 वेसेही करते वह चूड़्डो श्रीनाथजीको ऐसों कृपापात्र हतो
 जाहुं श्रीनाथजी बिना सब संसार फीको लगतो ॥ वार्ता
 संपूर्ण ॥ वैष्णव ॥ १३५ ॥ ❀ ॥ ॥ ॥ ॥ ॥
 श्रीगुसांईजीके सेवक वैष्णव कुनबीकी वार्ता ॥
 सो वह कुनबी वैष्णव गुजरातिके संग श्रीगोकुल आयो
 ॥ उहां जायके श्रीगुसांईजीको सेवक भयो ॥ और श्रीगु-
 सांईजीकुं बीनती करी मोहुं गायनकी सेवामें राखो ॥
 सो वह वनमें गाय चरावतो और गायनकुं चादरसों प-
 होंचतो और गायनके नीचे नित्य सूकी जगा राखतो ॥
 और तनमनसुं गायनकी सेवा करतो वाकी ऐसी सेवा

देखके श्रीगोवर्धननाथजी बहोत प्रसन्न भये ॥ और वा पटेलकुं खीडकमें दर्शन देवे लगे ॥ और खेलवे लगे और उहाँ छोक मंडली करते तब वा पटेलकुं गोपगवालनके संग बैठायके खवावते ॥ तब वह पटेल महाप्रसादकी पातल लेवे जातो नहीं ॥ नित्य एकवार श्रीगुसांईजीके दर्शनकुं जातो तब श्रीगुसांईजीनें एक वार पूछो ॥ जो पटेल तुम प्रसाद कहाँ लेवोहो ॥ तब वा पटेलनें हाथ जोडके कही जो श्रीगोवर्धननाथजी वनमें छोरानके संग नित्य भोजन करन पधारेहें और मोकुंड खवावेहें ॥ तब पातल काहेकुं लेवे आवुं ॥ ये सुनके श्रीगुसांईजी बहुत प्रसन्न भये ॥ फेर एक दिन वैष्णव मंडलीमें एक वैष्णवनें पद गायो ॥ नाचत रासमें गोपाल ॥ तब वा पटेलनें कहीं नाचत घासमें गोपाल ॥ तब वे वैष्णव पटेलकुं पकडके श्रीगुसांईजीके पास लगये ॥ तब श्रीगुसांईजीके आगे वैष्णवनें वीनती करी ॥ जो महाराज ये पटेल ऐसे कहेंहे ॥ तब श्रीगुसांईजीनें आज्ञा करी ॥ जो यानें घासमें नाचत देखे तब कही और तुमनें रासमें नाचत देखे तब कही सो दोनोकी बात सार्चीहै ॥ श्रीगोवर्धननाथजीकी इच्छा होवे जहां जाकुं दर्शन देवे दोनोकी बात सार्चीहै ॥ ये सुनके वे वैष्णव बहुत प्रसन्न भये ॥ सो वे पटेल श्रीनाथजीके सखा भावसां रहते ॥ श्रीगुसांईजीकी कृपातें ऐसो अनुभव भयो हतो ॥ वार्ता संपूर्ण ॥ वैष्णव ॥ १३६ ॥ ❀ ॥ श्रीगुसांईजीके सेवक द्वारकादासजीकी वार्ता सो वे सीलगाममें रहते हते ॥ सो इथीयार बांधते हते और

(२५४) दोस्रौबावन वैष्णवकी वार्ता.

श्रीगोवर्धननाथजीके दर्शनकु आवते ॥ विनकी देहकी दशा भूलजाती ॥ और दूसरे मनुष्य मंदिरके बाहार उठायके लावते ॥ तब श्रीगुसांईजी पधारके द्वारकादासकु हेला पाडते ॥ तब देहकी छुद्दि आवती जब दर्शनकु आवते ॥ जब सदैव ऐसी दशा होती ॥ सो वे नित्य श्रीनाथजीके स्वरूपरसमें लके रहते ॥ वह द्वारकादास श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १३७ ॥

॥ श्रीगुसांईजीके सेवक पठानके बेटाकी वार्ता ॥ सो वे पठानके बेटानें श्रीगुसांईजीके पास नाम सुन्यो ॥ और जातको व्यवहार छोडके वैष्णवकी चाल चलन लग्यो ॥ तब वाके माबाप और सब सगा पृथ्वीपतीके आगे पुकारवे गये ॥ तब पृथ्वीपतीनें कही जो तू कंठी तोडहार ॥ जब वानें कही जासुं मेरो दिल लग्योहै वाकुं कंठी बहुत प्रियहै ॥ और वे यहि बानासुं रीझतहै ॥ तब पृथ्वीपतीनें कही तलवार लावो ॥ याको माथो काटडारें ॥ तब वो पठानको बेटा बोल्यो ॥ दूसरी तलवार काहेकुं मंगावोहो ॥ ये मेरे पास है सो लेउ ॥ ये मुनके पादशाह विचार करन लग्यो ॥ विचार करके कही देखो याकी कैसी धर्ममें निष्ठा है ॥ याके ऊपर मैं बहुत खुश हूं ॥ याकुं कोई कछु मति कहो ॥ और ये बडो साचो मनुष्य है ॥ फेर पादशाहनें वाकुं नोकर राख्यो ॥ सो वह पठानको बेटा श्रीगुसांईजीको ऐसो टेकको कृपापात्र हतो ॥ वानें कंठी न तोडी माथो कटावनो कबूल क्यो ॥ वार्ता सं० ॥ वैष्णव ॥ १३८ ॥ श्रीगुसांईजीके सेवक एक रजपूत और रजपू-

बिष्णु (१३५) एक रजपूत और रजपूतकी बेटी. (२५५)

तकी बेटीकी वार्ता ॥ सो एक समय वे रजपूत अपनी बेटीकुं बिनके सासरतें बुलायके घर लेजाते हते और चाचाहरिवंशजी गुजराततें श्रीजीदार आवते हते ॥ रस्तामें बिनको संग भयो ॥ तब चाचाहरिवंशजीनें विचार कियो ये दोनो बापबेटी जीवतौ देवीहैं ॥ सो विचार करके बिनके संग आये और सांझकुं बिनके घर उतरे ॥ और भगवद्वाता करी और सबके मन भिजाय दिये और वा रजपूतके घरके मनुष्यनकुं सबकुं नाम सुनाये ॥ और सबकुं अपरस्की रीति सिखाई ॥ और रजपूतकी बेटीकी वार्ता सुनके श्रीगोवर्धननाथजीमें मन लग गयो ॥ और बिरहताप भयो ॥ और श्रीगोवर्धननाथजी वा रातकुं बाकें पास पधारे ॥ और सब सुखदिये फेर श्रीनाथजीनें कृपा करी ॥ तब वा रजपूतकी बेटीकुं श्रीनाथजी संग लेके पधारे ॥ और वा रजपूतकी दिव्यदृष्टी भई ॥ चाचाजीकी कृपातें सो वे बेटी श्रीनाथजीके संग लीलामें गई ॥ वा रजपूतनें जाती देखी ॥ तब वे रजपूत आयके चाचाजीके पावन पय्यो ॥ जो वा बेटीकुं श्रीनाथजी ले गये और हमकुं क्युं नहीं लगये ॥ सो याको कारण कहो ॥ तब चाचाजीनें कही जो तुमकुं हूं लेजायंगे परंतु हाल तुमसुं कारज करावनो है और वे रजपूत मुनके प्रसन्न भयो ॥ और चाचाजीके संग आयो और आयके श्रीगुसांईजीके तथा श्रीनाथजीके दर्शन किये ॥ और नाम निवेदन क्यो और श्रीठाकुरजी पधरायके अपने देशमें आये ॥ और घरमें भगवत्सेवा करन लग्ये ॥ और श्रीगोवर्धन-

नाथजी नित्य वा रजपूतकुं दर्शन देते और वा रजपू-
तकी बेटी सहित कोई कोई दिन दर्शन देते ॥ वे रजपूत-
तके संगसों आखो गाम वैष्णव भयो ॥ सो वे रजपूत
श्रीगुसांईजीके ऐसे कृपापात्र हते ॥ वार्ता संपूर्ण ॥
वैष्णव ॥ १३९ ॥ ❀ ॥ ॥ ॥ ॥

॥ श्रीगुसांईजीके सेवक विरक्त वैष्णव तिल ०
सो वे विरक्त वैष्णव गुजरातसुं श्रीजीद्वार गये और श्री-
गुसांईजीके सेवक भये और श्रीनाथजीकुं तथा श्रीगु-
सांईजीकुं और भगवदीयनको एक स्वरूप जानते हते ॥
और ब्रजमें फिज्यो करते एक दिन रस्तामें जाते हते ॥
एक ढोकरीके बेटाकुं सर्पने काटयो सो मरगयो ॥ सो
ढोकरी बद्धत रुदन करती हती ॥ वाकुं देखके और वा
विरक्तकुं दया आई ॥ तब भगवन्नाम सुनायके वाके बे-
टाकुं जीवतो क्यो ॥ ये बात देखके सब लोक बिनके
पाछे लगे ॥ हमकुं ये मंत्र शिखावो तब वानें अष्टाक्षरमंत्र
कह्यो ॥ बिन लोगननें कही ये मंत्र तो हमकुं आवेहें ॥
तब वा वैष्णवनें कही विश्वास राखनो तोड्ड बिन लोग-
नकुं विश्वास न आयो ॥ तब वह वैष्णव चली गयो सो
वे विरक्त वैष्णवकुं भगवन्नामपर ऐसी विश्वास हतो ॥
यासुं अधिक कोई मंत्र मानतो न हतो और जो कारज
करते तो ये नामके प्रतापते करते सो ऐसे कृपापात्र हते ॥
वार्ता संपूर्ण ॥ वैष्णव ॥ १४० ॥ ❀ ॥ ॥ ॥ ॥

श्रीगुसांईजीके सेवक विरक्त वैष्णवकी वार्ता ॥

श्रीगुसांईजी द्वारका पधारे और रस्तामें वह वैष्णव श्री-

गुसाईंजीके संग चल्यो और द्वारका होयके श्रीगुसाईंजीके संग श्रीगोकुल गयो ॥ और जन्मपर्यंत श्रीगोकुलमें रह्यो ॥ तब श्रीनाथजीकी सेवा शुद्ध चित्तहोयके करतो ॥ और जहां मूलजातो तब विनकुं श्रीनवनीतप्रियाजी सिखावते ॥ जो ऐसे यह वस्तु यारीतीसुं होयहै ॥ वे विरक्त वैष्णव श्रीगुसाईंजीके ऐसे कृपापात्र हते ॥ जिनके संग श्रीनवनीतप्रियाजी बालभावसुं खेलते ॥ वार्ता संपूर्ण ॥ वैष्णव ॥ १४१ ॥ ॐ ॥ ॥ ॥ ॥

॥ श्रीगुसाईंजीके सेवक एक क्षत्राणीकी वार्ता ॥

सो वह क्षत्राणी श्रीगुसाईंजीके पास नाम सुनवेकुं बैठी ॥ परंतु बाकुं अष्टाक्षरमंत्र आयो नहीं ॥ तब श्रीगुसाईंजीने आज्ञा करी जो तोकुं मेरो नाम आवेहै ॥ तब वा क्षत्राणीने कही हा प्रभु आवेहै तब श्रीगुसाईंजीने आज्ञा करी ये नाम लियो कर तब वह क्षत्राणी श्रीगुसाईंजीको नाम लियो करती ॥ दिवस रात वा नामके प्रतापते श्रीनाथजीने वा क्षत्राणीकुं दर्शन दिये और वाके घर आयके माखन मागते ॥ और दूध अरोगते सो वे क्षत्राणी ऐसी श्रीगुसाईंजीकी कृपापात्र हती ॥ वार्ता सं० ॥ वैष्णव ॥ १४२ ॥

॥ श्रीगु० से० आनंददास साचोरा ब्राह्मणकी ॥

सो वे आनंददास गुजरातमें रहेते हते और श्रीगुसाईंजीके कृपापात्र हते और आनंददास ब्रजयात्रा करन गये ॥ वा देशमें एक वैष्णव हतो बहुत द्रव्य पात्र हतो और वा शेठकुं श्रीठाकुरजीने कही जो आनंददास साचोराके नाथकी सामग्री मोकुं बहुत भावह ॥ जासुं तुम आनंददा-

(२५८) दोसौ ज्ञावन वैष्णवकी वार्ता.

सकुं बुलावो ॥ तब वे शेठ आनंददासकुं बुलायलाये और ऐसी कही जो जन्मपर्यंत तुम हमारे घर रहो ॥ प्रभु तुमारे ऊपर रीझें ॥ जासुं इनकुं प्रसन्न करौ और वे आनंददास आली रीतीसुं न्हायके सामग्री करन लगे और अनेक प्रकारके मनोरथ करते सो वा गामगें एक ढगुजाट रहेतो हतो ॥ बाहुं सब लोग ढगु पांढे कहते ॥ वह आखो दिन अपरसमें रहेतो हतो ॥ सो एक दिन वा शेठके इहां प्रसाद लेवे गयो ॥ तब आनंददासकुं देखके खूब चिल्लायो ॥ कही जो मैं अजानेके हाथको नहीं लेऊं ॥ रिसाय गयो तब कोई कछु बोल्यो नहीं ॥ परंतु आनंददासको चित्त उदास भयो फेर रातकुं वा ढगुजाटकुं श्रीठाकुरजीनें स्वप्नमें कही जो तू याके हाथको प्रसाद नहीं लेवेंगो तो बहिर्मुख होवेंगो ॥ तब सवारे प्रसाद लेवेके समय वे ढगुजाट आयके आनंददाससों बिनती करी जो मेरे अपराध क्षमा करौ ॥ मैं तुमारे हाथको प्रसाद लेवेकुं आयोहूं ॥ तब आनंददासनें बिनकुं प्रसन्नतासों प्रसादकी पातर धरी ॥ और कछु मनमें दोष लाये नहीं वे आनंददास साचोरा ऐसे कृपापात्र हते जिनकुं श्रीठाकुरजी सब सामग्री शिखाय जाते ॥ वार्ता संपूर्ण ॥ वैष्णव ॥ १४३ ॥ * ॥ ॥ ॥

॥ श्रीगुसाईंजीके सेवक एक नाऊ वैष्णवकी वार्ता ॥ सो वे नाऊ द्वारकाके रस्तामें रहेते हते ॥ उहां श्रीगुसाईंजी पधारे और श्रीगुसाईंजीके नख उतारे जहां सूधी नख उता-या करे तहांसूधी तो मनुष्य देखे ॥ और जब नख उतार चुन्यो और राछबांधे तब साक्षात् पूर्ण-

पुरुषोत्तमके दर्शन भये और श्रीगुसांईजीकुं वीनती करी महाराज सोकुं शरण लें ॥ तब श्रीगुसांईजीनें नामनिवेदन करायो ॥ और वे नाऊ परम भगवदीय भयो और सब राछ कुवामें डार दिये ॥ और ऐसो विचार कन्यो के व्यवहार करके निर्वाह करुंगो ॥ ऐसे विचारके वे नाऊ भगवत्सेवा करन लग्यो ॥ और व्योपार करन लग्यो तब श्रीठाकुरजी धीरेधीरे प्रसन्न भये ॥ वे नाऊ श्रीगुसांईजीके ऐसे कृपापात्र हते ॥ जिनकुं थोडे दिननमें भगवल्लीलाको अनुभव भयो ॥ वार्ता संपूर्ण ॥ वैष्णव ॥ १४४ ॥ ❀ ॥

॥ श्रीगुसांईजीके सेवक भीमजी दुबे साचोरा ब्राह्मणकी वार्ता ॥ सो वे भीमजी दुबेको गाम गुजरातके रस्तापर हतो ॥ और श्रीगुसांईजी गुजरात पधारे तब वा गाममें मुकाम कन्यो हतो ॥ और भीमजी दुबे तलावपर न्हावे आयो हतो ॥ तहां भीमजी दुबेकुं श्रीगुसांईजीके दर्शन भये ॥ तब साक्षात् पूर्णपुरुषोत्तमके दर्शन भये ॥ तब भीमजी दुबे श्रीगुसांईजीको सेवक भयो ॥ और ग्रंथ और मारंगकी रीती सीखवेके लीये भीमजी दुबे श्रीगुसांईजीके संग गये और सब रीती सीखे ॥ और ग्रंथ सीखे और श्रीठाकुरजी पधरायके फिर आयके अपने घरमें रहे ॥ और जब नागजीभाई श्रीगोकुल आवते जावते दो चार दिन भीमजीके पास रहते और भगवद्वार्ता करते और भगवद्रसमें छुके रहते ॥ और एक समय नागजी भाई भीमजीभाईके घर गये ॥ तब भीमजीभाई घरमें हते नहीं ॥ तब नागजीभाई आपनो नाम कहेके श्रीगोकुल चलेगये ॥

जब भीमजीभाई आये और खबर सुनी जो नागजीभाई पाछे गये ॥ तब भीमजीभाईकुं बड़ी उदासी भई ॥ और महाप्रसाद लिये नहीं ॥ तब रातकुं रस्तामें नागजीभाई सूते तब श्रीगोवर्धननाथजी पधारके आज्ञा करी जो तुम भीमजीभाईकुं मिलेविना आयेहो और भीमजीभाई सूखेहैं जो तुम भीमजीभाईके मिलेविना आवोगे तो हम तुमकुं दर्शन नहीं देंगे ॥ तब नागजीभाई सूते उठके पाछे गये ॥ और भीमजीभाईकुं जायके मिले ॥ और चार पांच दिन रहे ॥ तब भीमजीदुबेकी प्रसन्नता राखके नागजीभाई श्रीगुसाईजीके दर्शनकुं गये ॥ और श्रीनाथजीनें पेहेलेतैं श्रीगुसाईजीकुं कही ॥ जो नागजीभाईनें भीमजीकुं दोदिन सूखे राखेहैं ॥ तब नागजीभाई श्रीगुसाईजीके पास गये ॥ और दर्शन किये तब श्रीगुसाईजीनें आज्ञा करी जो वैष्णवको और श्रीठाकुरजीको एकस्वरूप जाननो ॥ वैष्णव कछु ओछी वस्तु नहींहैं ॥ जिनके लियें पूर्णगुरुषोत्तमकुं अपेक्षा भईहै ॥ और पृथ्वीपर जन्मलेनो पढ्योहै ॥ ऐसे वैष्णवनकुं श्रम देनो न चाहिये ॥ ये सुनके नागजीभाईनें अपराध क्षमा करायो ॥ सो वै भीमजीदुबे श्रीगुसाईजीके ऐसे कृपापात्र भगवदीय हते ॥ जिनकी आर्ति श्रीनाथजी न सहिशके ॥ वार्ता संपूर्ण ॥ वैष्णव ॥ १४५ ॥ * ॥ ॥ ॥ ॥ ॥

॥ श्रीगुसाईजीके सेवक राजनगरमें रहते तिनकी वार्ता ॥ सो वै वैष्णवको ऐसो नेम हतो ॥ एक दो चार वैष्णवनको प्रसाद लेवायके लेतो ॥ और जा दिन

वैष्णव कोई नहीं आवतो तब स्त्री पुरुष प्रसाद न लेते ॥
 ऐसो विनको आग्रह हतो सो कोई दिन वे शेठ परदेश
 गये ॥ और स्त्रीकुं कही गये जो तूं नित्य वैष्णवनकुं प्रसाद
 लेवाइयो और जितने वैष्णव प्रसाद लेजाय ईतने पैसा
 गागरमें डारदीजो ॥ तब वा स्त्रीनें ऐसेही करी ॥ फेर जब
 शेठ परदेशतें आयो तब आयके पैसा गिनें तो पैसामेंसुं
 पांच रत्न निकसे ॥ तब स्त्रीसुं पूछी तब स्त्रीने कही मैंनें
 तो पैसा डारे हैं कछु रत्न डारे नहीं ॥ तब विन दिननमें
 श्रीगुसांईजी राजनगरमें विराजते हते ॥ तब वे वैष्णव
 पांच रत्न लैके श्रीगुसांईजीके पास गये ॥ तब श्रीगुसांई-
 जीसों वीनती करी जो महाराज याको कारण कहा हो-
 यगो ॥ तब श्रीगुसांईजीनें आज्ञा करी जो ये पांच भगवदीय
 तादृशी आये होयेंगे ॥ जासुं ये पांच रत्न होय गयेहें ॥
 जासुं वैष्णवनकुं अवश्य करके जैसे बने तैसे आदर क-
 रनो ॥ वे वैष्णव श्रीगुसांईजी को ऐसो कृपापात्र हतो ॥
 जिनकुं रत्नद्वारा वैष्णवके स्वरूपको ज्ञान भयो ॥ सो श्री-
 ठाकुरजीनें करवायो ॥ वार्ता संपूर्ण ॥ वैष्णव ॥ १४६ ॥ ❀
 ॥ श्रीगुसांईजीको सेवक चूहडोबहारवालाकी
 वार्ता ॥ सो वह चूहडो नित्य गोकुलकी गल्ली झाडतो
 और मनमें ऐसे जानतो श्रीगुसांईजी ठाकुरानी घाटपर
 पधारहें ॥ इनके चरणारविंदमें कूरो कचरो न लगे तो
 आछी बातहै ॥ और वैष्णव जूठनकी पातर डारते सो
 वह लेतो ॥ वैष्णवनकी जूठन जो खाई तब वाकुं दिव्य-
 दृष्टी भयी ॥ सब मारगकी रीती वाकुं समज पडगई ॥

और वेदशास्त्रको ज्ञान होय गयो ॥ जैसे नाभाजीकुं भयो हतो ॥ सो विननें भक्तमाल करीहैं ऐसे या चूहडाकुं ज्ञान भयो ॥ एक दिन श्रीगोकुलमें कासीके पंडित आये ॥ सो विननें रसोई करी तब खायके वा चूहडाकुं जूठन देवे लगे तब वा चूहडानें कही मैं तो कोईको जूठन नहीं लेऊं ॥ तब वे दूसरी रोटी देवे लगे ॥ तब कही ये तो अनप्रसादीहैं ॥ श्रीठाकुरजीकुं भोग नहीं धरीहैं ॥ सो मैं नहीं लेउंगो ॥ तब विननें कही भोग धरीहैं ॥ तब वा चूहडानें कही ये रोटी श्रीठाकुरजी अरोगे नहींहैं ॥ तुमारी ये रसोई सब जूठनकीहैं ॥ चूला छूंकके रसोई करीहैं ॥ तब वेदनके तथा शास्त्रनके वचन वा चूहडानें कहे ॥ जब वे पंडित मुनके चकित होयगये ॥ और कहन लगे जिनके चूहडा ऐसे पंडितहैं ॥ वे कैसे होवेंगे इनसुं आपणे वाद करणो खोटो है ॥ ऐसे विचारके पंडित पाछे गये ॥ ये बात कोई वैष्णवनें श्रीगुसांईजीसों कही जो पंडित या चूहडाकी बातें मुनके पाछे गये हैं ॥ तब श्रीगुसांईजीनें आज्ञा करी जो या चूहडानें शुद्ध भावसों वैष्णवनकी जूठन लीनी है ॥ सो याकुं सब ज्ञान होय गयो यामें कहा आश्चर्य है ॥ वैष्णवनकी जूठन लीयेसुं तो हृदय शुद्ध होवे हैं ॥ और ज्ञानदृष्टी होवेहैं वे अन्यमार्गी पंडित कहा जाने ॥ ऐसे कहेके श्रीगुसांईजी छुप होय रहे ॥ सो वे चूहडो ऐसो कृपापात्र हतो ॥ जो वैष्णवनकी जूठन खायके ऐसो भाग्यशाली भयो ॥ वार्ता संपूर्ण ॥ वैष्णव ॥ १४७ ॥ ❀ ॥ ॥ ॥ ॥ ॥

॥ श्रीगुसांईजीके सेवक एक वैष्णवकी वार्ता ॥

सो वे वैष्णव पूरवदेशमें रहेतो हतो ॥ सो श्रीगुसांईजी
पूरवकुं पधारे हते तव सेवक भयो और फेर वाके मनमें
ऐसी आई जो श्रीगुसांईजीके दर्शन कर आऊं तो ठीक
सो वे वैष्णव गोपालपुर आयो ॥ और आयके श्रीगुसां-
ईजीके दर्शन करे ॥ साक्षात् नंदकुमारके दर्शन भये ॥
और श्रीगिरिराज पर जायके श्रीनाथजीके दर्शन कये ॥
और उहां देखे तो श्रीगुसांईजी तथा श्रीनाथजी एक
स्वरूप दीखे है ॥ कोई समय तो श्रीनाथजीमें श्रीगुसां-
ईजी दीख पड़े और कोई समय तो श्रीगुसांईजीमें श्रीना-
थजी दीख पड़े ॥ तव वा वैष्णवनें निश्चय कयो ॥ जो ये
दोनों एकही है ॥ जो इनकुं न्यारे न्यारे समझे सो मनुष्यकी
गणतीमें नहीं है ॥ सो वे वैष्णव ऐसो विचार करन लग्यो ॥
ये दोनों सेव्य और सेवक एक हैं ॥ सेवार्था दीय दीखे है
वास्तवते एकही है ॥ सो गोपालदासजीनें गायेहे ॥ “रूप
वेड एक ते भिन्न थई विस्तरे विविधलीलाकरे भजन-
सारे” ॥ जो ऐसे श्रीगुसांईजीको रूप धरके सेवा करके
न बतावते तो सेवाकी खबर कैसे पड़े ॥ वस्तुतः एकही
है सो वे वैष्णव श्रीगुसांईजीको ऐसो कृपा पात्र हतो ॥
दोनों स्वरूपनकुं एक जानके मग्न रहेतो ॥ वार्ता संपूर्ण ॥
वैष्णव ॥ १४८ ॥ ॥ ॥ ॥ ॥ ॥

श्रीगुसांईजीके सेवक एक श्रावककी बेटीकी ०

सो श्रीगुसांईजी आगरे पधारे हते ॥ और रूपचंदनदाके
घर बिराजते हते ॥ और दशपदें लुगाई रस्तामें जा-

ती होती ॥ वाई समय एक मनुष्यनें तक्सीर करीहती ॥ वाकुं पृथ्वीपतीके द्रुकुमसुं फांसी चढावते हते ॥ वा दसपंदेर लुगाईमें एक श्रावककी बेटी होती ॥ सो मनुष्य-कुं फांसी देते देखके परगई ॥ और मृच्छा आई या बा-तकी खबर श्रीगुसांईजीकुं पडी ॥ तब श्रीगुसांईजीनें वि-चार कन्यो जो याको कैसो दयाको स्वभावहै देवी जी-वविना औरकुं ऐसी दया होय नहीं ॥ ये विचार करके श्रीगुसांईजीनें वाकुं अचेत जानके एक ब्रजवासीकुं कही ॥ याके ऊपर जल छांटो ॥ तब वा ब्रजवासीनें जल छांटयो ॥ दोघडी पाछें वाकी मृच्छा खुली ॥ तब वा श्रावक-की बेटीनें वा ब्रजवासीसों पूछी जो तूं कोणहै ॥ तब वानें कही श्रीगुसांईजीको मनुष्य हूं ॥ तब वे श्रावककी बेटी श्रीगुसांईजीके दर्शनकुं आई ॥ और ब्रजवासीनें सब बात वाकुं मृच्छा आई सो कही ॥ तब श्रीगुसांईजीनें आज्ञा करी ये शुद्धभाववाली है ॥ याके ऊपर जितनो रंग चढावो इतनो चढे ॥ तब वे श्रावककी बेटी बोली ॥ आप जें-सो कारीगर रंग चढावेवालो और कोन मिलेगो ॥ ये छुनके श्रीगुसांईजी बहुत प्रसन्न भये और वाकुं नाम सु-नाये और निवेदन कराये ॥ फेर घरमें आयके सब धोवे लीपवे लगी ॥ तब वाके धनीनें पूछी ये तूं कहा करेहै ॥ तब वाने कही मैं श्रीगुसांईजीकी सेवक भई हूं ॥ तब वा-के पतीनें कही मैहूं श्रीगुसांईजीको सेवक होय आउंहुं ॥ तब वाको धनी सेवक भयो ॥ सो दोनो स्त्रीपुरुष श्रीठा-कुरजीकी सेवा पधरायके करन लगे ॥ और नित्य श्री-

गुसाईंजीके दर्शन करवेकुं आवते ॥ फेर श्रीगुसाईंजी श्री-
गोकुल पधारे तब वा श्रावककी बेटीनें वीनती करी जो
सोकुं आपके दर्शनविना रह्यो नहीं जायगो ॥ तब श्रीगु-
साईंजीनें आज्ञा करी ॥ जो तूं नित्य यमुनाजल भरवेकुं
आईयो ॥ और जब तू यमुनाजीमें नहावेगी ॥ हम
तोकुं दर्शन देंगे ॥ तब वा श्रावककी बेटी ऐसैं
करन लगी ॥ फेर कोई दिन ब्रजवासी श्रीगोकुलमें
आगे आये ॥ सो वाके घर उतरे सो वे ब्रजवासी-
को जप करवेको समय भयो ॥ तब कही जो मैं श्री-
गुसाईंजीकी बैठकमें गौमुखी भूलगयोई सो श्रीगोकुल
पाले जाउंगो जब प्रसाद लेउंगो ॥ तब वा श्रावककी बे-
टीयें कही बैठो बैठो मैं श्रीगुसाईंजीके दर्शन जाउंगी तब
तुमारी गौमुखी लेती आउंगी ॥ इतनो कहैके जलभरवेकुं
गई सो यमुनाजीमें न्हाई और श्रीगुसाईंजीके दर्शन कन्ये
और गौमुखी लेचली ॥ तब वा ब्रजवासीकुं दीनी तब वे ब्रज-
वासी और विचारमें पडगयो ॥ ये श्रीगोकुल जायके कै-
से लाई होएगी तब उठके पावन पन्यो तब वानें कही ये
सब श्रीगुसाईंजीको प्रताप है श्रीगुसाईंजी जब अलौकिक
देहको दान करें तब सब कारज सिद्ध होंवें ॥ ये सुनके वे
ब्रजवासी छुपकर रह्यो सो वे श्रावककी बेटी ऐसी कृपा-
पात्र भई जिनकुं अलौकिक पदार्थ सर्वत्र सर्वमें व्यापक
दीखते हते ॥ वार्ता संपूर्ण ॥ वैष्णव ॥ १४९ ॥ ॥ ॥
॥ श्रीगुसाईंजीके सेवक दोय भाई पटेल सो अ-
लियागिरी चंदन लाये तिनकी वार्ता ॥ वे पटेल गुजरा-

तसुं ब्रजमें गये और श्रीगुसांईजीके सेवक भये ॥ सो उहां श्रीगोवर्धननाथजीकी सेवामें रहे ॥ सो श्रीगोवर्धननाथजीकी सेवा तन मन धन सों करके एकदिन श्रीगुसांईजीनें मलियागरचंदन लेवेकुं दोभाईनकुं पठाये सोवे दोनो भाई मलियागर पर्वत उपर जायके चंदनको झाड़ काटवे लगे तब एक भाईकुं तो सर्पनें फूंक मारी सो दूसरे भाईनें श्रीगोवर्धननाथजीको नाम लेके जल छांटयो तब बाकी विष उतर गयो तब श्रीगुसांईजीकुं जायके मलियागर चंदन दियो तब श्रीगुसांईजीनें आज्ञा करी तुम कुछ मागो तब बिननें बीनती करी जो हम हाथनसुं श्रीनाथजीकुं चंदन धरावें तब श्रीगुसांईजीनें आज्ञा करी भलें धरावो ॥ फेर एक भाईनें चंदन धरायो और दूसरो भाई पंखा करन लग्यो फेर दूसरे दिन दूसरे भाईनें चंदन लगायोने दूसरो भाई पंखा करन लग्यो सो वे दोनो भाई श्रीगुसांईजीके ऐसे कृपापात्र हते ॥ जिनसुं श्रीनाथजी बोलते चालते और वनमें संग लेजाते सो वे श्रीगुसांईजीकी कृपाते ऐसे दोनो भाई भगवदीय भये ॥ वार्ता संपूर्ण ॥ वैष्णव ॥ १५० ॥ ❀ ॥ ॥ ॥ ॥

श्रीगुसांईजीके सेवक किशोरीबाई हती तिन० सो वे किशोरीबाई एक वैष्णवकी बेटी हती और बालकपणामें श्रीगुसांईजीकी सेवक भई हती पाछें शीतला निकसी और शीतलाके रोगसुं किशोरीबाईके हाथपांव छुले भये और माबापतो मरगये हते ॥ और एक किशोरीबाईकी बेहेन एकवार आयके खवाय जाती और किशोरी-

वाई वालकपणेंसुं यमुना अष्टकको पाठ सीखी हती सो
अष्टप्रहर यमुना अष्टकको पाठ कन्यो करती ॥ सो एक
दिन किशोरीवाईकी बेहेनकुं रिस चढी सो किशोरीवा-
ईकुं खवायवे न आई ॥ तब श्रीयमुनाजी पधारके कि-
शोरीवाईकुं रसोई करके प्रसाद लेवाय गये ॥ वाई दिन
आधो रोग मिट गयो फेर दूसरे दिन यमुनाजीनें ऐसी
कृपा करि तब सघलो रोग मिटगयो ॥ तीसरेदिन किशोरी-
वाई आप रसोई करन लगी और महा प्रसाद लियो ॥ चौथे
दिन किशोरिवाई रसोई करन लगी वाईसमय किशोरीवा-
ईकी बेनके मनमें ऐसी आई जो चारदिन भये किशोरीवा-
ईनें कछु खायो नहींहि ॥ तब वे बेहेन खबर काढवे आई
तब किशोरीवाईकी बेहेन देखे तो किशोरीवाई रसोई
करेंहे ॥ तब वे बेहेन देखके चकित होयगई ॥ और मनमें
विचार कियो ये लुली कैसे मिटगई होयगी ॥ फेर किशो-
रीवाईकी बेहेननें लोगनकुं कही तब सब गामके लोग
देखवे आये सो विस्मय भये तब किशोरीवाईके लीयें वा
गाममें श्रीगुसाईजी पधारे तब किशोरीवाई चलके दर्शन
करवेकुं आई और श्रीगुसाईजीकुं वीनती करी जो महा-
राज मोकुं सेवा पधराय देउ ॥ तब श्रीगुसाईजीनें आज्ञा
करी जो तुमारे ऊपर श्रीयमुनाजीकी कृपा भईहे सो य-
मुनाजीकी रेती एक थेलीमें तुमकुं पधराय देउ बिनकी
सेवा सब साजसु करौ तब किशोरीवाई प्रसन्न भई और
श्रीगुसाईजीनें रमणरेतीकी थेली दीनी ॥ सो वे पधरायके
सिंघासन उपर मार्गकी रीतीसुं सेवा करन लगी ॥ सो

किशोरीबाईके ऊपर ऐसी कृपा भई ॥ कोईदिन तो श्री-
नाथजी वा गादीके ऊपर दर्शन देवे और कोईदिन श्री-
नवनीतप्रीयाजी और कोई दिन श्रीमथुरानाथजी कोई-
दिन श्रीविठ्ठलेशजी कोईदिन श्रीद्वारकानाथजी कोईदिन
श्रीगोकुलनाथजी कोईदिन श्रीगोकुलचंद्रमाजी कोईदिन
श्रीबालकृष्णजी कोईदिन श्रीमदनमोहनजी यारीतीसुं
किशोरीबाईकुं सब स्वरूपनके दर्शन लीलासहित होवन
लगे ॥ सो वे किशोरी बाई श्रीगुसांईजीकी ऐसी कृपापात्र
भई ॥ वार्ता संपूर्ण ॥ वैष्णव ॥ १५१ ॥ ॥ ॥

॥ श्रीगुसांईजीके सेवक दोउभाई पटेल ति० ॥
सो वे श्रीगुसांईजीके सेवक दोउ पटेल हते ॥ सो एक
गाममें रहते हते ॥ सो वा गाममें एक देवीको मंदिर
हतो सो जूनो होयगयो हतो ॥ तब वा गामको राजा
देवीको भक्त हतो सो राजानें ऐसो विचार कन्यो जो दे-
वीको नयो मंदिर बने तो ठीक ॥ तब गामके मनुष्यनके
ऊपर कर डान्यो यथाशक्ति सबके पास लेनो ॥ वे दोनो
भाई पटेलनके ऊपर दो रुपैया डारे तब वे दोनो भाई-
नने विचार कियो जो अपनो द्रव्य तो श्रीठाकुरजीको है ॥
सो कैसे दियो जाय तब वा राजा कैसे छोडे सो उपाय
करनो फेर दोनो भाईनने ऐसो विचार कियो या देवीकुं
कूवामें डारदेनी ॥ तब रातकुं आयके वा देवीकुं कूवामें
पटक आये और घरमें आयके सुते ॥ तब वो देवी रा-
जाकी छातीपर जायके चढ़ी जो कूवामें पड़ी ॥ सो तुं
मोकुं काढ और वे वैष्णव पटेल दोयभाई तेरे गाममें र-

हैं विनकुं दो रुपैया दंड क्योहैं सो छोड देउ ॥ तब
 राजा चौकठठयो वाईसमय वे दोनो पटेलनकुं बुलायके
 दंड माफ कन्यी और देवीकुं कूवामेंसुं कढाई सो दोनो
 पटेलनकी श्रीठाकुरजी ऊपर ऐसी विश्वास हतो ॥ सो
 देवीकुं तुच्छ गणी और देवी विनकुं कछु परामव न क-
 रसकी ॥ सो वे दोनो पटेल ऐसे कृपापात्र हते ॥ वार्ता
 संपूर्ण ॥ वैष्णव ॥ १५२ ॥ ❀ ॥ ॥ ॥
 ॥ श्रीगुसाईंजीके सेवक एक वैष्णवकी वार्ता ॥
 वाके शरीरमें कोढ़ भयो हतो तब वे वैष्णव जायके ब्रजमें
 रह्यो ॥ और श्रीगुसाईंजीके दर्शन तथा श्रीनाथजीके द-
 र्शन नित्य करतो और श्रीगुसाईंजीसुं वीनती करतो म-
 हाराज मेरो कोढ़ मिटजाय ऐसी कृपा करौ तब श्रीगुसा-
 ईंजी आज्ञा करते जो श्रीठाकुरजी करेंहैं सो विचारकरके
 करेंहैं फेर वा वैष्णवसुं श्रीनाथजी बोलन लगे तब वा वै-
 ण्वनैं श्रीनाथजीसुं कही मेरो कोढ़ मिटे सो उपाय ब-
 तावो तब श्रीनाथजीनैं कही हम कछु वैद्य नहींहैं ऐसे के-
 हेके वाकी परीक्षा करते तब वो वैष्णव कहेतो जो प्राणजा-
 येगेतो कबुल परंतु अन्याश्रय न करुंगो ॥ ऐसे कहेके
 बैठ रहेतो ॥ एक दिन वाकुं श्रीनाथजीनैं कही जो
 तूं अमकागाममें अमका वैष्णवके घर जायके दर्श-
 न करिआव ॥ वो वैष्णव कहेगो तब तेरो कोढ़ जा-
 यगो ॥ तब वो वैष्णव वा गाममें वा वैष्णवके घर
 गयो और उहां जायके दर्शन करे ॥ देखेतो वा वै-
 ण्वनैं वैश्या राखीहै ॥ परंतु वाकुं अभाव न आयो तब

वा वैष्णवनें पृच्छी जो तुम कैसे आये तब विननें कही श्री
नाथजीनें ऐसी आज्ञा करी है ॥ तब वा वैष्णवकुं पश्चा-
त्ताप भयो तब वाने कही जो मैं ऐसो पतित हुं तोहुं मोकुं
श्रीनाथजी नहीं झूलेहे ॥ मैंने काहेकु ऐसे कन्यो है ॥ तब
वाकुं बहुत विरहताप भयो सो वा तापसुं बाकी देह छूट-
गई और वा वैष्णवको कोढ़ मिटगयो और नूतन अंग
होय गयो ॥ सो ये दोनो कारज श्रीनाथजीनें एक समय
कन्ये एक वैष्णवकुं लीलमे लियो ॥ और एकको कोढ़
मिटायके सेवाकी योग्यता दीनी ॥ सो वे कोढी वैष्णव
श्रीगुसाईजीको ऐसो कृपापात्र हतो ॥ वार्ता संपूर्ण ॥
वैष्णव ॥ १५३ ॥ ❀ ॥ ॥ ॥ ॥

॥ श्रीगुसाईजीके सेवक मेहाधीमरकी वार्ता ॥
सो वे मेहा रावलके पास गोपालपुरमें यमुनाजी किना-
रापर रहेतो हतो ॥ सो श्रीगुसाईजी गुजराततें श्रीगोकुल
पधारे सो गोपालपुरके घाट उतरे ॥ और गोपालपुर
ढेरा किये वाई दिन श्रीगोकुल पधारवेको मुहूर्त नही हतो ॥
सो वे मेहाधीमर माछली पकडवेके लीये यमुनाजीके कि-
नारापर बैठो हतो ॥ तब मेहाधीमरकुं एक वैष्णवनें कही
जो तोहुं एक रुपैया देउ श्रीगुसाईजी इहां विराजे तहां-
सूधी जाल मति डारियो ॥ तब मेहाधीमर रुपैया लेके घर
गयो और मेहाधीमरनें वैष्णवकुं ऐसी कही मोकुं खाय-
वेको दिवाईयो श्रीगुसाईजी भोजन करचुके और सब वै-
ष्णवनकुं पातर धराइ ॥ और वा वैष्णवनें ब्रजवासिसों
कही या गाममें मेहाधीमर रहेहे याकु बुलाय लाव ॥ तब

मेहाधीमर आयो और श्रीगुसांईजीके दर्शन किये ॥ सो
साक्षात् पूर्णपुरुषोत्तमके दर्शन भये और वीनती करी जो
महाराज मोकुं शरण लेउ ॥ तब श्रीगुसांईजीनें कृपाकर-
के नाम सुनायो और मेहाके घरके सवनकुं नाम सुना-
यो ॥ तब वा मेहाकुं श्रीगुसांईजीके स्वरूपको ज्ञान भयो
॥ तब मेहाधीमरनें ये पद गायो ॥ सो पद ॥ राग भैरवा ॥
श्रीविठ्ठलप्रभुमहाउदार ॥ महापतितशरणागतलीनें नि-
र्मयपददीनोनिर्धार ॥ १ ॥ वेदपुराणसारजोकहिये सोपु-
रुषोत्तमहायदियो ॥ मेहाप्रभुगिरिधरप्रगटे पुष्टिमारगर-
सप्रकटकियो ॥ २ ॥ सो ये पद सुनके श्रीगुसांईजी बहुत
प्रसन्न भये और वैष्णव कहनलगे जो मेहा सवारे जाल
डारके बैठो हतो ॥ और दर्शनमात्रसुं याकी निर्मल बुद्धी
कैसी भईहे और प्रभुकी कृपाको पार नहीं ॥ फिर श्रीगुसांई-
जीनें मेहाकुं नृठन धरी सो वे मेहानें लीनी ॥ तब भगवल्ली-
लाकी अनुभव भयो फेर श्रीगोकुलमें श्रीगुसांईजीके संग
आये ॥ श्रीठाकुरजी पधरायके सेवा करन लगे ॥ फेर
अन्नकूटपर श्रीनाथजीके दर्शनकुं आये तब मेहानें अन्न-
कूटके पद गाये ॥ सो पद ॥ राग सारंग ॥ हमारोंदेवगो-
वर्धनपर्वत । गोधनजहांमुखारो ॥ सुरपतिकों बलिभागन
दीजे कीजेमतोहमारो ॥ १ ॥ पावकपवन चंदजलसुरज
पर्वतआजालीने ॥ ताईश्वरकोकह्योकीजीये ॥ कहाइंद्रकेदी-
ने ॥ २ ॥ जाकेआसपाससबव्रजकुलमुखीरहेप्रभुपारे ॥
जोरैसकटअछूतोल्लेभलोमतोकोटारे ॥ ३ ॥ बडेबडेवै-
ठविचारमतोकरिपर्वतकोबलिदीजे ॥ नंदलालकोकुंवरला

ढिलोकान्हकहेसोकीजे ॥ ४ ॥ माखनदूधदह्योधृतपायस
 सबलेलेब्रजवासी ॥ यज्ञस्वरूपधरेबलिमुक्तपर्वतशैलनि
 वासी ॥ ५ ॥ मिथ्योभागसुरपति जियजान्योमेघदि
 येमुकुराई ॥ मेहाप्रभुगिरिधरकरराख्योनंदसुवनसुखदान
 सुखदाईद्वाराग सारंग ॥ मुनियेतातहमारोमतोश्रीगोवर्धन
 पूजाकीजे ॥ जोतुमयन्नरच्योसुरपतिकोसोबलीइहांलेदीजे
 ॥ १ ॥ कंदमूलफलफूलनकीनिधिजोभागोसोपावो ॥ यह-
 गिरिवासहमारोनिशिदिननिर्भय गायचरावो ॥ २ ॥ दूधद-
 हीकेमाठभरायेव्यंजनअमृतअपार ॥ मधुमेवापकवान
 मिठाईभरिभरिराखेथार ॥ ३ ॥ बडेबडेबैठिविचारमतो
 करिकान्हकहेसोइकीजे ॥ विविधभांतिकोअन्नकूटकरिप-
 र्वतकोबलिदीजे ॥ ४ ॥ यहनगनानारूपधरतहैब्रजजनको
 रखवारो ॥ देवनमेंयहबडोदेवतामोहूकोअतिप्यारो ॥ ५ ॥
 नंदनंदनऔररूपआपधरिआपनभोजनकीनो ॥ मेहाप्रभु
 गिरिधरनलाढिलोभागभागसबलीनो ॥ ६ ॥ ये पदगाय
 चुक्यो तब मेहाकुं सुछां आई ॥ तब मेहाकुं श्रीगुसांई-
 जीनें कृपादृष्टि करके ठाडोकियो ॥ और आज्ञा करी जो
 श्रीनाथजीकी आज्ञा ऐसी है कलुक दिन भूतलपर रहो ये
 सुनके उठ बैठे और दंडवत करी और कही जो ॥ नि-
 जेच्छातःकरिष्यति ॥ ऐसे कहैके ठाकुरजीकी सेवामें त-
 त्पर भयो ॥ फेर मेहा गोपालपुरमें आयके सेवा करन
 लग्यो फेर मेहाकी स्त्रीके गर्भ भयो और प्रसवको समय
 भयो ॥ मेहा गाममें नहीं हतो ॥ तब मेहाकुं बेटा भयो ॥
 तब मेहाकी स्त्रीकुं बडो पश्चात्ताप भयो ॥ ये दृष्ट बेटा

क्युं भयो मेरी भगवत्सेवा छूटी ॥ ऐसे विचारके रुदन
 करबेलगी तब श्रीठाकुरजीनें आज्ञा करी जोरो मति ॥
 नाहायके मेरी सेवा कर तब वे स्त्रीनें रीतीप्रमाणें नाहायके
 भगवत्सेवा करी ॥ फेर जब मेहा आयो तब मेहानें कही
 तेने ऐसी अवस्थामें सेवा क्युं करी ॥ तब वा स्त्रीनें कही
 मोकुं श्रीठाकुरजीनें आज्ञा करीहै ॥ तब मेहा सुनके व-
 द्धत प्रसन्न भयो ॥ और मेहानें वद्धत नवे पद करके भग-
 वल्लीला अनेक प्रकारसुं गाईहै ॥ सो वे मेहा श्रीगुसांईजी-
 के ऐसे भगवदीय कृपापात्र हते ॥ वा० स० ॥ वै० ॥ १५४ ॥
 ॥ श्रीगुसांईजीके सेवक एक वैष्णव मोहनदास
 हते तिनकी वार्ता ॥ सो वे मोहनदास गोपालपुरमें रहेते
 हते ॥ तब गोविंदकुंडपें नित्य नाहावे जाते ॥ गोपालपु-
 रसुं चढ़के और गोविंदकुंडकी आढी उतरते ॥ एकदिन
 उतरवेके रस्तापर गोवर पय्यो हतो ॥ तब वे वैष्णव दू-
 सरी आढी उतय्यो सो श्रीगुसांईजीनें उतरतो देख्यो तब
 श्रीगुसांईजीनें माथो हलायो ॥ फेर वे मोहनदासनें श्री-
 गुसांईजीकुं दंडवत करके पूछन लग्यो जो आपनें मोकुं
 देखके माथो क्युं हलायो ॥ तब श्रीगुसांईजी बोले जो तुम
 श्रीगिरिराजपर कारण विना पांवघरोहो ॥ और पावनसुं
 खुंदोहो सो गिरिराजको माहात्म्य कछु जानो नहींहो ॥
 तब दूसरे वैष्णवननें पूछी जो श्रीगिरिराजजीको माहात्म्य
 आप कृपाकरके कहो ॥ तब श्रीगुसांईजीनें पद्मपुराणकी
 कथा कही ॥ जो एक दिन श्रीठाकुरजी तथा नारदजी-
 वनमें ठाडे हते ॥ तब श्रीठाकुरजीनें कही नारदजी जल

लावो ॥ तब नारदजी जल लेवेकुं गये उहां जायतो एक सरोवर हतो ॥ और दीय ऋषी तपस्या करते हते और तलावके पास मनुष्यनके हाडनको पर्वत हतो ॥ और नारदजी देखके विस्मय होय गये सो नारदजी जल लीये विना पाछें आये ॥ तब श्रीठाकुरजीनें पूछी जो जल क्युं लाये नहीं तब नारदजीनें समाचार कहे और कारण पूछे तब श्रीठाकुरजीनें कही जो दो ऋषी तपश्चर्या करेहैं ॥ गोवर्धन पर्वतके दर्शनके लीयें फेर देह छोड़ेहैं ॥ फेर जन्मेहैं फेर तपश्चर्या करेहैं ॥ इनके इतने जन्म भयेहैं ॥ जिनके शरीर छूट छूटके हाडनको पर्वत होय गयोहैं ॥ तो हुं गोवर्धन पर्वतके दर्शन नही भये हैं ॥ ये सुनके नारदजी बहुत विस्मय भये ॥ सो श्रीगुसांईजी आज्ञा करेंहैं जो आपनकुं गोवर्धन पर्वत श्रीमहाप्रभुकी कानतें दर्शन देवेहैं और ऐसेरूप श्रीगोवर्धनपर्वत साक्षात् लीलामध्यपाती सो ऐसे गोवर्धनपर पांव कैसे धन्ये जाया ॥ कछु भगवत्सेवाको कार्य होवे तो ऊपर चढ़नो नहीं तो सर्वथा पांव धरनो नहीं ॥ ये सुनके वा मोहनदासकुं बहुत पश्चात्ताप भयो ॥ और श्रीगुसांईजीसों अपनो अपराधक्षमा कराये ॥ फेर श्रीनाथजीकी सेवा दर्शन विना कोईदिन गिरिराजपर पांव धरते नहीं हते ॥ सो ऐसे श्रीगुसांईजीके कृपापात्र हते ॥ वार्ता संपूर्ण ॥ वैष्णव ॥ १५५ ॥ ❀ ॥

श्रीगुसांईजीके सेवकचतुर्भुजदासब्राह्मणकी ० सो वे चतुर्भुजदास पंडित बहुत हते और विद्याको अभ्यास विशेष हतो और अकबर पादशाहसों मिलाप वि-

होए हतो अकर पादशाह जो कछु प्रछेते सो जवाव तु-
 रत देते एकदिन पादशाहनें चतुर्भुजदासकी सराहना
 करी तब वीरवलनें कही ये तो मेरी चाकरी करतो हतो ॥
 तब पादशाहनें पूछी तब चतुर्भुजदासनें कही जो आपके
 सिल्लेके लीये कानकोनकी चाकरी न करी चहीये ये सु-
 नके पादशाह बहुत प्रसन्न भयो ॥ और चतुर्भुजदासकुं
 महिनाके हजार रुपैया कर दिये और जो कोई पंडित
 आवतो तिनके संग चतुर्भुजदास वाद करते और सब पं-
 डितनकुं जीत लेते ॥ फेर एक समय चतुर्भुजदास मथु-
 राजीसें आये और विश्रांतघाटपर न्हाये और उहां कहेन
 लगे ॥ जो 'विद्या भागवतावधि' ॥ येसुनके एक वैष्णव
 बोल्या चातुरी 'विष्टलेशावधि' ॥ तब चतुर्भुजदासनें कही
 जो मोकुं विष्टलनाथजीको मिलाप करायदे ॥ तब वो वै-
 णव चतुर्भुजदासकुं श्रीगुसांईजीके पास लगयो तब श्री-
 गुसांईजीके दर्शन किये ॥ सो साक्षात् पूर्णपुरुषोत्तम को-
 टिकंदर्पलावण्य ऐसे स्वरूपके दर्शन भये तब चतुर्भुज-
 दास श्रीगुसांईजीके सेवक भये और श्रीगोवर्धननाथजीके
 दर्शन किये ॥ और श्रीगोवर्धननाथजीके कवित बनाये ॥
 और आखा जन्मपर्यंत श्रीजीद्वार छोडके कहुं गये नहीं
 ॥ एकदिन पृथ्वीपतीकुं खबर पडी जो चतुर्भुजदास गो-
 पालपुरमें है ॥ तब मनुष्य बुलायवेकुं पठाये तब चतुर्भु-
 जदासनें पृथ्वीपतीकुं पत्र लिख्यो वा पत्रमें लिख्यो ॥
 जाको मन नंदनंदनसुं लाग्यो नीको ॥ सुखसंपतकी कहां
 लग वरनो सब जग लागत फीको ॥ ये पत्र लेके वा मनु-

व्यनें पृथ्वीपतीकुं दियो तब पृथ्वीपतीनें विचार कियो
 जिनकुं जगत फीको लग्यो तो तिनकुं अपने कैसे मीठे
 लगेंगे ॥ सो वे चतुर्भुजदास श्रीगुसांईजीके ऐसे कृपापात्र
 भये ॥ वार्ता संपूर्ण ॥ वैष्णव ॥ १५६ ॥ ❀ ॥ ॥
 श्रीगुसांईजीके सेवक विरक्तवैष्णवकी वार्ता
 सो वह ब्राह्मण वैष्णव एक गामडामें रहेतो हतो ॥ सो
 चुकटी मागके निर्वाह करतो ॥ और श्रीठाकुरजीकी सेवा
 भली भांतीसों करतो ॥ और श्रीठाकुरजी सानुभाव ज-
 तावत हते ॥ सो वे वैष्णवनके घरनतें चुकटी मागतो तब
 एक वैष्णवके घर चुकटी लेवे गयो सो वाके बेटाकी देह
 छूटी हती ॥ तब वे वैष्णव वाईसमय गयो तब वा वैष्ण-
 वनें विचार कियो जो याकी आवरदा बहुत हतो ॥ कष्ट
 याकी देह छूटी ॥ ऐसो विचार कियो याको अकाल मृ-
 त्युभयो है ॥ तब वा वैष्णवनें चरणासृत वाके मुखमें दियो
 ॥ और चरणासृतको श्लोक पढ़यो ॥ अकालमृत्युहरणं
 सर्वव्याधि विनाशनम् ॥ विष्णुपादोदकं तीर्थं जठरे धार-
 याम्यहम् ॥ १ ॥ ये अक्षर बोल्यो तब श्रीठाकुरजी वा वै-
 णवकी वाणी सत्य करवेके लीयें वा वैष्णवके बेटामें प्राण
 संज्ञा धरी ॥ तब वा वैष्णवकी बेटा जीवती भयो ॥ जा-
 समय वा ब्राह्मण वैष्णवनें वाकुं जीवतो कन्यो वाई समय
 वा ब्राह्मण वैष्णवमें भगवदावेश भयो हतो ॥ फेर जब ब-
 हार आयो तब लोगननें वा ब्राह्मण वैष्णवसों पूछी ये
 कैसे जीयोहैं तब वानें कही चरणासृत और अष्टाक्षरम-
 त्रसुं जीवतो भयोहैं ॥ लोगननें ये बात झूठी मानी सो

ब्राह्मण वैष्णव ऐसो कृपापात्र हतो ॥ जाको चरणासृत
 ऊपर दृढ विश्वास हतो ॥ वार्ता संपूर्ण ॥ वैष्णव ॥ १५७ ॥
 श्रीगुसांईजीके सेवक गुलाबदास क्षत्रीकी वा-
 र्ता ॥ सो वे गुलाबदास परम कृपालु जो श्रीगुसांईजी ति-
 नके शरण गये ॥ फेर थोड़ेदिन पाछे म्लेच्छके देशमें जा-
 यके रहे और भ्रष्ट होय गये और भक्षामक्ष करन लगे ॥
 और गुलाबखान नाम धरायो ॥ फेर ये बात श्रीगुसांई-
 जीने सुनी तब श्रीगुसांईजीने एक वैष्णव पठायो विनकुं
 बुलायवके लीये तब वा वैष्णवने जायके कही गुलाबदास
 तुमकुं श्रीगुसांईजी बुलावेंहैं ॥ तब गुलाबदास वेश्याके
 पास बैठे हते सुनके कही जो मैं ऐसो भ्रष्ट हूं तोहूं श्रीगु-
 सांईजी संभारेहैं ॥ ऐसे तीनवार वैष्णवसुं पूछी जो श्रीगुसां-
 ईजी मोकुं संभारेहैं ॥ तब विरहताप भयो तब गुलाबदा-
 सके प्राण छूटगये ॥ वे वैष्णव देखके चकित भये फेर उ-
 हांसुं चलयो और मनमें विचार कियो ये संदेह श्रीगुसां-
 ईजीसों पूछ्यो तब श्रीगुसांईजीके पास आयके देखे तो
 गुलाबदास श्रीगुसांईजीकुं पंखा करत देख्यो ॥ तब वा
 वैष्णवको संदेह दूर भयो ॥ सो वे गुलाबदास श्रीगुसांई-
 जीके ऐसे कृपापात्र हते जिनके कर्म विरहतापसुं जरगये
 और शुद्ध होयके भगवल्लीलामें चलेगये ॥ वार्ता संपूर्ण ॥
 वैष्णव ॥ १५८ ॥ * ॥ ॥ ॥ ॥ ॥
 श्रीगुसांईजीके सेवक धोंधी कलावत तिनकी
 वार्ता ॥ सो वह धोंधी बड़ीजातवालो हतो और गान
 विद्या में कुशल हतो और श्रीगुसांईजीको सेवक भयो ॥

(२७८) दोसीबावन वैष्णवकी वार्ता.

तब श्रीगुसांईजीनें कृपा करके वा धोंधीकुं श्रीनवनीतप्रियाजीके कीर्तनकी सेवामें राखे सो वे धोंधी श्रीनवनीतप्रियाजीके संनिधान कीर्तन करते हते ॥ एकदिन कीर्तन सुनके श्रीनवनीतप्रियाजीनें ताल दियो तब श्रीगिरिधरजी ठाढे हते सो एकहजार रुपैयाके सोनाके कड़ा पहरे हते ॥ सो उतारके धोंधीकुं दीये तब श्रीगुसांईजीनें येवात सुनी और श्रीगिरिधरजीकुं कह्यो जो श्रीनवनीतप्रियाजीनें ताल दियो जो तेनें इकेलो कड़ो क्युं दियो सब गहेनो क्युं नहि दियो इतनो तुमारी लीसीपणो अधिकीहै ॥ तब श्रीगिरिधरजी बोले जो मैं आपसुं ढरप्यो जाहुं नहीं दियो तब श्रीगुसांईजी सुनके बहोत प्रसन्न भये ॥ तब वा धोंधीकुं आज्ञा करी जो नित्य तेरे मन लगायके कीर्तन करनें तब वे धोंधी नवे पद करके गायवे लग्यो ॥ वे धोंधी श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १५९ ॥ * ॥ ॥ ॥ ॥ ॥ ॥

॥ श्रीगुसांईजीके सेवक एक बनियाकी वार्ता ॥ सो वे बनिया गोपालपुरमें रहेते हते और जे कोई श्रीनाथजीके दर्शन करके आवें वासुं शृंगार प्रेच्छते ॥ सो पाछें जो आवे विनके आगे शृंगार कहे ॥ सब लोग जाने जो ये बड़ो वैष्णव है वैष्णव जानके विनके पाससुं सोदा लेवे ॥ ऐसे करके लोगनके पास ठगके बहुत रुपैया एकठे करे ऐसे करते करते साठवरसके भये और साठ हजार रुपैया एकठे करे एकदिन सूरदासजी भगवदिच्छातें वा बनियाके पास कछु लेवेकुं आये तब वा बनि-

या सूरदासजीके आगे श्रीनाथजीके शृंगारकी बढाई करन लख्यो तब सूरदासजीने मनमें जान्यो ये पाखंडी है तब सूरदासजीने कही श्रीनाथजीके दर्शनकुं चल तब वाने कही सांझकुं आउंगो फिरसांझकुंसूरदासजी आये तब कही काल आउंगो ऐसे करते दोचारदिन काढे एकदिन सूरदासजीने ये पद गायो ॥ आज काम काल काम परसुं काम करना ॥ पहेले दिन बहुत काम काममें पचमरना ॥ १ ॥ जाग्रत काम सोवत काम विमुखमयो चरणा ॥ छांड कामसुमरश्यामसूरपकरशरणा ॥ २ ॥ ये पद सूरदासजीने वा बनियाकुं सुनायके खेंचके लाये फेर जायके श्रीगुसांईजीके दर्शन कराये तब सूरदासजीने श्रीगुसांईजीसों बिनती करी जो याकुं शरण ले तब श्रीगुसांईजीने कृपा करके नाम निवेदन करवायो फिर भेट करवेको समय भयो तब वा बनियाने एक रुपैया भेट कन्यो तब सूरदासजीने वा बनियाकुं उपदेश करवेके लीये एकपद गायो ॥ सो कीर्तन ॥ ॥ सूरसाठी प्रारंभः ॥ ॥ राग सारंग ॥ कृष्णसुमरतनपावनकीजे ॥ जोलोंजगस्वपनासोजीजे ॥ १ ॥ अवधिउसासगिनतसवतेरे ॥ सोबीतत भईआवतनेरे ॥ २ ॥ जोयेस्वपनेन्याईविचारे ॥ कबहुंनजन्मविषयलगाहारे ॥ ३ ॥ गहींविवेकबीजजोबोवें ॥ कबहुंनजठरअग्निमेंसोवें ॥ ४ ॥ बारवारतोकुंसमझावे ॥ जोछिनजायसोबहोरिनआवे ॥ ५ ॥ ठगनीविषयठगोरीलाई ॥ घटिकाघटतजोछिनछिनजाई ॥ ६ ॥ गनतहिंगनतअवधिनीयरानी ॥ छांडचल्योनिधिभईविरानी ॥ ७ ॥ होत

कहा अब के पछतानें ॥ तरुवर पत्रन मिलें पुराने ॥ ८ ॥ पवन
 उडे सो बहुरिन आवैं ॥ कर्ता और अने कबनावैं ॥ ९ ॥ जल
 थल पशु पंछी सुकर क्रिमि ॥ मानस तनु पायो सब जग भ्रमि ॥
 १० ॥ कबहुं नीके नाथन गायो ॥ एक मदन दश दिशि हिं
 भ्रमायो ॥ ११ ॥ सोत तुलु खों वैरति विगतनि ॥ काच गहें
 छोडी चितामनि ॥ १२ ॥ मनहीं मन माया अवगाहत ॥
 नायक भयो तिहुं पुरचाहत ॥ १३ ॥ स्वर्गरसात लभूर जहा
 नी ॥ तोउने तृप्त भयो अभिमानी ॥ १४ ॥ ऐसे हिकरत अव
 धिस बबीती ॥ गयो न ज्ञान रह्यो मदरीती ॥ १५ ॥ कबहुं स
 जन मिलि करत बडाई ॥ कबहुं ललना ललित लडाई ॥ १६ ॥
 कबहुं हय हाथी रथ आसन ॥ कबहुं पलका सुखद सुवासन ॥
 १७ ॥ कबहुं चमर छत्र सिरदोरे ॥ कबहुं सुभट पशुन चढि
 दोरे ॥ १८ ॥ कबहुं तोरन छत्र बनावे ॥ कबहुं मदगज यूथल
 डावे ॥ १९ ॥ नौबत द्वार बजत हीं ठाडी ॥ त्यो त्यो तृष्णा श
 त गुण बाढी ॥ २० ॥ दिव्य वसन फल फूल सुवासी ॥ नव यौ
 वन अबला सुखरासी ॥ २१ ॥ द्वार कपाट सहस्र एक लागें ॥
 सुभट पहेलुवा चहुं दिश जागें ॥ २२ ॥ रमणी रमत नरजनी
 जानी ॥ माया मदपीयो अभिमानी ॥ २३ ॥ सुत बितवनि
 ताहि तलगायो ॥ तब चेत्यो जब काल चितायो ॥ २४ ॥ झूठो
 नाटक संगन साथी ॥ नौबत द्वार न हय रथ हाथी ॥ २५ ॥
 झूठ छिनकर्म मयो मिखारी ॥ क्यों कृत शूल सहै अवगारी ॥
 २६ ॥ भयो अनाथ सनाथन बांध्यो ॥ त्रिजग शूल शर सन्मुख
 खसांध्यो ॥ २७ ॥ मनुष देह धरि कर्म कमायो ॥ तेतिर छेदु खदा
 रुण आयो ॥ २८ ॥ जेहि तन काज जीव वध कीनें ॥ रसनारस

आमिपरसलीनें ॥ २९ ॥ सोतनछूटतप्रेतकरिडाऱ्यो ॥ प्रेत
प्रेतकहिनगरनिकाऱ्यो ॥ ३० ॥ हिंसाकरपालनकरिजाकी
॥ विष्टाकिमीभस्मभइताकी ॥ ३१ ॥ रोगभोगअरुविषय
भयानक ॥ हरिपदविमुखविषयरसपानक ॥ ३२ ॥ जागजा
गइहांकोतेरो ॥ मायास्वप्नकहतसवमेरो ॥ ३३ ॥ कृष्णविना
तोहिकोनछुडावे ॥ कोकरुणामयविरदकहावे ॥ ३४ ॥ अन्य
देवकोनहींभरोसो ॥ वातनखटरसलाखपरोसो ॥ ३५ ॥
जेजनकह्योवृषतिकीन्याई ॥ मृगतृष्णाकरिकोनअघाई ॥
॥ ३६ ॥ ऐसेअन्यदेवसुखदायक ॥ हरिविनकोनछुडावन
लायक ॥ ३७ ॥ धर्मराजमुनिकृतीतिहारी ॥ तंविषयनर
तदुरतविसारी ॥ ३८ ॥ गर्भअग्निरक्षाजिनकीनी ॥ संकट
मेटिअभयतादीनी ॥ ३९ ॥ हस्तचरणलोचननासामुख ॥
रुधिरबूंदतैलबोअधिकसुख ॥ ४० ॥ सोसुखतैस्वपनेनहिं
जान्यो ॥ प्राणनाथनिकटनपहिचान्यो ॥ ४१ ॥ कितयह
शूलसहैअपराधी ॥ ममसिखतैएकोनहिसाधी ॥ ४२ ॥
कोटिकवारमानसतनुपायो ॥ हरिपथछोडअपथकूधायो
॥ ४३ ॥ समयगयेअसमयपछतैये ॥ मानसजन्मबद्धरि
कितपैये ॥ ४४ ॥ पारसपायजलधिमेंबोरें ॥ पुनपुनमुनत
कपालहिंफोरें ॥ ४५ ॥ चिंतामणिकौडीलेदीनी ॥ मुनिप
रमितकरुणाअतिकीनी ॥ ४६ ॥ जज्ञतसारेंपीठदेभागे ॥
पुनपुरुषारथकहेनहिलागे ॥ ४७ ॥ पायकल्पतरुमूलछिदा
वे ॥ सोतरुपुनकैसेतुं पावे ॥ ४८ ॥ मधुभाजनपूरणविधि
दीनो ॥ सोतैछांडहलाहलपीनो ॥ ४९ ॥ कामधेनुतजअ
जाविसाई ॥ हरिबलछांडविषयअवगाही ॥ ५० ॥ यहनर

देहस्यामविनखोई ॥ कदिकौतुकलोंबाधिविगोई ॥ ५१ ॥
 काहेनकर्मकियोतैंऐसो ॥ ध्रुवशुकसनकसनंदनजैसो ॥
 ॥ ५२ ॥ सुरनरनागअसुरमुनिदेवक ॥ हरिपदभजतसबे
 वैंसेवक ॥ ५३ ॥ परदक्षिणादेसीसनमावें ॥ मनसिजतो
 हिनपरसनपावें ॥ ५४ ॥ जाकेभजतएतोमुखलहिये ॥ सु
 नशठसोकैसेविसरैये ॥ ५५ ॥ अगनितपतितनामनिस्ता
 रे॥जन्ममरणसंतापनिवारे ॥ ५६ ॥ निर्भय होय भक्तिनि
 धिपाई ॥ कबहुंकालव्यालनहिंखाई ॥ ५७ ॥ सबसुखजी
 वनकृष्णनामपद ॥ भवजलव्याधिउपायपरमगद ॥ ५८ ॥
 श्रीभागवतपरमहितकारी ॥ द्वाररटतहरिसुरभिखारी ॥
 ॥ ५९ ॥ परमपतितकृंशरणहिलीजे ॥ पदरजदानअभय
 तादीजे ॥ ६० ॥ ॥ ॥ इति सूरसाठी संपूर्ण ॥
 ऐसे एक तुक कही जब वा बनियानें हजार रुपैया भेट
 क्ये ऐसे सूरदासजीनें साठतुकको पद गायो ॥ जैसे
 जैसे एक एक तुक सुनतो गयो और एक एक हजार रु-
 पैया भेट करतो गयो ॥ साठतुक सूधीसाठ हजार रुपैया
 भेट करे ॥ सूरदासजीकेवचन वा बनियाके हृदयमें कैसे
 उतरे जैसे सूरजउदय होवे और अंधकार मिटजाय तैसे
 सूरदासजीके वचननतैं वाके हृदयको अंधारी सब मिट-
 गयो और प्रफुल्लितमन होय गयो ॥ और मनमें ऐसो वि-
 चार कियो जो आज मेरो जन्म सफल भयो॥सोवे बनिया
 दुकानपें आयके साठ हजार रुपैया काढके श्रीगुसांईजीके
 उहां पठाय दीने फिर दुकानपर बैठो और कोईके आगे
 फेर शृंगारकी बात करतो नहीं और नित्य श्रीनाथजीके

और श्रीगुसांईजीके दर्शन करके प्रसाद लेतो ॥ पाछे थो-
डेदिन भये तब श्रीनाथजी वा बनियासुं बोलन लगे और
आयके दूध दही लेजाय और दूसरो रूप धरके दाना लेके
वा बनियाकी दुकानपे सौदा ले जाय ॥ और दाना पटक
जाय बिन दानानके हीरा मोती होयजाय तब वे बनिया
हीरा मोती सब वीनके श्रीगुसांईजीके आगे धर आवे ॥
घरमें कछु राखे नहीं ऐसे मनमें समझे जो द्रव्य घरमें
राखुंगो तो प्रभुनमेंसों चित्त निकस जायगो ॥ जासुं नि-
र्वाह जितनो राखतो सो वे बनिया श्रीगुसांईजीको ऐसे
कृपापात्र हतो ॥ वार्ता संपूर्ण ॥ वैष्णव ॥ १६० ॥ ❀ ॥

॥ श्रीगुसांईजीके सेवक एक राजारानीकी ० ॥
सो वे राजा और बिनकी स्त्री दोऊ वैष्णव भये और
भगवत्सेवा करन लगे ॥ फिर वा राजाकी एक बेटी भई
और बड़ी भई ॥ सो राजाके मनमें ऐसी हती जो कोई
राजासों विवाह कन्थो चाहिये ॥ और रानीके मनमें ऐसी
आई जो मैं अन्य मार्गीकुं बेटी नहीं देउंगी ॥ तब वैष्णव
दृढवेके लीये बहुत प्रयत्न करे ॥ सो एक राजा वैष्णव मि-
ल्यो फिर वाकुं बेटी दीनी ॥ तब राजा विवाह करन आ-
यो ॥ सो विवाह करके अपने देशमें लेगयो ॥ फिर रानी-
नके पास वाकुं बैठाय दीनी और वह राजातो भगव-
त्सेवा करे ॥ और कोई स्त्रीकुं सेवाको काम न सोंपे ॥ और
वह जो राजाकी बेटी नवी पणीं हती वाके पतीके पास
सेवा करवेकुं जाय परंतु वो सेवा न करवे देवे ॥ तब वा
राजानें कही जो तेरी सेवा करनकी इच्छा होवे तो अ-

मका शेठके घर जायके जलकी गागर भरलायदे ॥ और वा गागरके पैसा लायके मोड़ु दे ॥ तब तोड़ु सेवा करन देउंगो ॥ फिर वाने जायके वा शेठके घर गागर भरलाई ॥ तब वा शेठने वा गागरके जलसु झारी भरी तब वा राजाकी स्त्रीने कही जो या गागर भरवेके पैसा मोड़ु देवो ॥ तब वा शेठने कही जो या जलकी झारी श्रीठाकुरजी अ-
 रोगेहें सो याकी न्योछावरतो सर्वस्व है ॥ जासुं जितनो मेरे घरमें द्रव्य है सो लेजाओ ॥ फिर वा राजाकी रा-
 नीकुं ज्ञान भयो जो मेरे घर श्रीठाकुरजी बिराजेहें सो एक जलकी गागरकी इतनी कीमत है तो आखो दिन सेवा करे इनकी कहा कीमत होयगी ॥ फिर घर जायके पतीके पावन परी जो अब मैंने तुमारी कृपातें भगवत्से-
 वाको स्वरूप जान्यो है ॥ जासुं अब तो सेवाविना अन्न जल न लेउंगी ॥ तब वह राजा प्रसन्न होयके वा रानीकुं सेवा करवे दीनी ॥ तब दोनो स्त्रीपुरुष सेवा करन लग्यो ॥ सो वे राजारानी ऐसे कृपापात्र हते ॥ जिनने अन्य मा-
 र्गीकुं बेटी न दीनी ॥ और बेटी ऐसी कृपापात्र भई वाने शेठके घर जायके एकदिनमें भगवत्सेवाको स्वरूप जा-
 न्यो ॥ सो वे राजारानी और जमाई और बेटी वे चारो-
 जने श्रीगुसांईजीके ऐसे कृपापात्र भयो ॥ वा० सं० ॥ वै० १६१ ॥ श्रीगुसांईजीके सेवक एक वैष्णव शकुन दे-
 खके चलतो तिनकी वार्ता ॥ सो वे वैष्णव गुजरातमेंसों जायके श्रीगोकुलमें श्रीगुसांईजीको सेवक भयो ॥ वह वैष्णव जो कछ काम करतो सो शकुन देखके करतो ॥

एक दिन शकुनकी बात निकसी तब श्रीगुसांईजीनें आज्ञा करी जो दर्शनके आगे शकुनको कहा काम है ॥ और श्रीगुसांईजीनें बाई समय सूरदासजीको कीर्तन कहा सो पदा ॥ मिल हैं गोपालसोईदिननीको ॥ जोतिषनिगमपुराण बढेठगजानोफांसीजीको ॥ १ ॥ जेबूझेंतोउत्तरदेहुंविनबूझेंमतफीको ॥ कमलमीनदाहुरयुंतरसतसबधनपरतअमीको ॥ २ ॥ भद्राभलीभरणीभवहरणीचलतमेघअरुछीको ॥ अपनेठोरसवेग्रहनीकेहरणभयोक्क्यूसीको ॥ ३ ॥ सुनमूढमधुकरब्रजआयोलेअपयशकोटीको ॥ सूरजहालोंनेमघमैत्रतसोप्रेमीकौडीको ॥ ४ ॥ ये पद श्रीगुसांईजीनें श्रीमुखसों आज्ञा करी तब वा वैष्णवकुं निश्चय भयो ॥ जो आज पीछे सर्वथा शकुन नहीं देखुंगो ॥ सो वा वैष्णवको श्रीगुसांईजीके वचनपर ऐसे विश्वास हतो ॥ वार्ता संपूर्ण ॥ वैष्णव ॥ १६२ ॥ * ॥ ॥ ॥ ॥

॥ श्रीगुसांईजीके सेवक एक बाईकी वार्ता ॥ सो वह बाई गोलवाडमें रहेती हती ॥ तब श्रीगुसांईजी द्वारका पधारे तब गोलवाडमें वा गाममें मुकाम कन्यो ॥ तब वह बाई जल भरवेकुं जाती हती ॥ सो श्रीगुसांईजीके दर्शन किये ॥ तो साक्षात् पूर्णपुरुषोत्तमके दर्शन भये ॥ तब वह बाई श्रीगुसांईजीके शरण आई और श्रीठाकुरजी पंथरायके सेवा करन लगी ॥ फिर वा बाईको बेटा हतो ॥ सो बाट मारतो जो कोई रस्तामें वेपारी मिले विनकुं मारके घन लूट लावतो ॥ तब वा बाईनें अपने बेटासुं कही जो तू कोई दिन वैष्णवकुं मति मारियो ॥ तब

(२८६) दोसीबावन वैष्णवकी वार्ता.

वाके बेटानें कही जो मैं कैसे पेहेचानू ये वैष्णव है ॥ तब वा बाईनें कही जो तूं जाकुं लुटें जब विनकुं इहां पकड लाव मैं पेहेचानुंगी तब वाको बेटा वैसही करतो पकड लावतो ॥ तब वा बाईकुं दिखावतो सो एक दिन ११ वेपारीनकुं पकड लायो तब विनमें एक वैष्णव हतो ॥ सो वाकी मानें देखके कही जो याकुं छोड दे ॥ तब वा वैष्णवनें कही ये १० मनुष्य मेरे भाई हैं सो मैं इनके पाछे प्राण देउंगो तब वा बाईनें वा वैष्णवको आग्रह देखके सबकुं छुडाय दिये और वा वैष्णवसुं कही तुम रसोई करो और महाप्रसाद लेउ तब वा वैष्णवनें रसोई करी ॥ और १० जनेनकुं महाप्रसाद लेवायो फिर वा बाईकुं और वाके बेटानकुं लिवायो और वे बाईके बेटानके संग १५० अस्वार चोरी करवेकुं फिरते हते ॥ सबकुं प्रसाद लिवायो तो हुं महाप्रसाद खट्यो नहीं तब वा बाईके बेटानें पूछी जो तुमनें रसोई तो ११ मनुष्यनकी करी हती परंतु सबकुं महाप्रसाद पूरो कैसे भयो ॥ और अगीयार मनुष्य खावे इतनो बधी पन्यो है ॥ याको कारण कहा ॥ तब वा वैष्णवनें कही जो हकको खावे है और अपनी मेहनतको द्रव्य कमायके खावे है विनको कोई दिन घटे नहीं है ॥ तब वो पटेल बोल्यो हमकुं ऐसो सिखावो तो बड्डत आछो तब वा वैष्णवनें कही तुम चोरी करनो छोड देवो ॥ और खेती करके खावो तो तुमकुं ऐसे होवेगो तब वा बाईके बेटा पटेलनें चोरी करनो छोड दियो और सब गामकुं चोरी करनो छुडाय दियो और खेती करन लगे सो वह बाई श्रीगुसां-

ईजीकी ऐसी कृपा पात्र हती ॥ जिनके संगते आखी
 गाम श्रीगुसांईजीकु पधरायके वैष्णव भयो ॥ वार्ता
 संपूर्ण ॥ वैष्णव ॥ १६३ ॥ ❀ ॥ ॥ ॥ ॥
 ॥ श्रीगुसांईजीके सेवक कुमनदासजीके बेटा
 कृष्णदास तिनकी वार्ता ॥ सो वे कृष्णदास श्रीनाथजीकी
 गायनकी सेवा करते और एकदिन कुमनदासजीकु
 श्रीगुसांईजीने पूछी तुमारे कितने बेटाहैं ॥ तव विनने
 कही हमारे दोढ बेटाहैं ॥ तव आपने आज्ञा करी दोढ
 कैसे होवै आधे बेटाकी समजण पाडौ ॥ तव कुमनदास-
 जीने कही पुष्टिमार्गमें भगवत्सेवा और भगवद्गुणगान
 ये दोनो मुख्यहैं तव दो काम करे सो बेटा आखी और
 एक करे सो आधो ॥ सो चतुर्भुजदास दो काम करेहैं
 सेवा और गुणगान ॥ और कृष्णदास एक सेवा करेहैं
 जासुं आधो बेटाहैं ये सुनके श्रीगुसांईजी मुसकाये और
 आज्ञा करी वैष्णवकुं ऐसेही चाहिये ॥ सो वे कृष्णदास
 दिवसरात गायनकी सेवा करते और गाय बचावके लीये
 कृष्णदासने आपणे प्राण दिये और सिंघकी झपाटसहे
 गये और जब कृष्णदासके प्राण छूटे वाही समय श्रीना-
 थजी खिरकमें गोपीनाथदास ग्वालके पास गाय दोहते
 हते ॥ और कृष्णदास बछरा पकड रहे हते सो गोपीना-
 थदास देखते हते सो ये बात कुमनदासजीकी वार्तामें
 लिखीहै ॥ याते इहां लिख्येनहीहै सो कृष्णदासजी ऐसे
 कृपापात्र भये ॥ वार्ता संपूर्ण ॥ वैष्णव ॥ १६४ ॥ ❀ ॥

॥ श्रीगुसांईजीके सेवक गोकुलभट्ट और गो-
विंदभट्ट कृष्णभट्टजीके बेटा तिनकी वार्ता ॥ सो वे दोनों
भाई बालपणसुं श्रीगुसांईजीके सेवक भये और श्रीगुसां-
ईजीके पास पढ़े हते ॥ सो पुष्टिमार्गके श्रीसुबोधनीजी
आदिक ग्रंथनमें बड़े प्रवीण हते ॥ और शास्त्रार्थमें बड़े
कुशल हते ॥ जब वे बड़े भये तब एक भाई उज्जैनमें रहेते
और एक भाई श्रीजीद्वारमें रहेते ॥ सो वर्षके वर्षमें श्री-
नाथजीकी सेवा और घरके श्रीठाकुरजीकी सेवा करते ॥
जा वर्षमें गोविंदभट्ट श्रीजीद्वार जाते तब गोकुलभट्ट उ-
ज्जैन आवते और गोकुलभट्ट श्रीजीद्वार जाते तब गोविं-
दभट्ट उज्जैन आवते और श्रीगुसांईजीकी कृपातें जिनकी
चित्त श्रीनाथजीविना क्षण एक रही न शक्तो ॥ और
श्रीगोवर्धननाथजी और घरके श्रीठाकुरजी दोनों स्वरू-
पनमें जिनकी एकसारखी प्रीति हती ॥ यातें घरके श्री-
ठाकुरजी और श्रीनाथजी विनके उपर बहुत प्रसन्न रहेते
और शृंगार घरते और मूल जाते तो श्रीनाथजी विनकुं
शिखावते वे दोनों भाई श्रीगुसांईजीके ऐसे कृपा पात्र
हते ॥ वार्ता संपूर्ण ॥ वैष्णव ॥ १६५ ॥ ❀ ॥ ॥

॥ श्रीगुसांईजीके सेवक यादवेंद्रदास आगरेमें
रहेते तिनकी वार्ता ॥ सो वे यादवेंद्रदास श्रीगुसांईजीके
सल्लिधान रहते सो वे यादवेंद्रदास श्रीसुबोधनीजीकी सब
पंगती कंठाग्र राखते और दिवसरात भगवल्लीलाको अ-
वगाहन करते ॥ और भगवद्रसके प्रतापसुं सखी भाव
विनको होय गयो ॥ सब लीलानको दर्शनको अधिकार

भयो ॥ एक दिन श्रीगुसांईजीके दर्शन श्रीगोवर्धननाथ-
जीके संग युगल स्वरूपके भये ॥ जैसे गोपालदासजीने
गायो है आख्यानमें ॥ रूप बैठएक ते भिन्न थई विस्तरे
विविध लीलाकरे भजन सारे ॥ विविधवचनावली नयन-
सेनेंमली सांगना सूचवे निश विहारे ॥ १ ॥ विविध मु-
क्तावली पाठसूत्रे करी गलसरी शोभतां कर सिंगारे ॥
विविधकुसुमावली ग्रथित हाथें करी एकएकनें कंठ आ-
रापें हारे ॥ २ ॥ विविध मेवा भोग मधुर मिष्टान्न रस द-
समस्यां अर्पते बहुप्रकारे ॥ विविध वीढा सुगंध कर्पूरनें
एलची लौंगपूगी पानखेरसारे ॥ ३ ॥ ऐसे दर्शन यादवें-
द्रदासजीहुं भये ॥ ऐसी कृपा यादवेंद्रदास पर श्री-
गुसांईजीनें कीनी और जैसे दर्शन करते तैसे पद नूतन
करके गावते ॥ सो वे यादवेंद्रदास क्षत्री श्रीगुसांईजीके
ऐसे परम कृपापात्र हते ॥ वार्ता संपूर्ण ॥ वैष्णव ॥ १६६ ॥
॥ श्रीगुसांईजीके सेवक मथुरामल और हरजी-
मल दोउ भाईनकी वार्ता ॥ सो जब पुरुषोत्तमदास चो-
पडाक्षत्री वृद्ध भये और श्रीलाडलेशजीकी सेवा न बन-
वेलगी तब श्रीलाडलेशजीनें श्रीगुसांईजीसों आज्ञा करी
जो अब मेरी सेवा मथुरामल और हरजीमलहुं करवेकी
आज्ञा दें तो बहुत आछी है ॥ पुरुषोत्तमदास वृद्ध भये
है ॥ तब श्रीगुसांईजीनें विनके माथे श्रीलाडलेशजी पध-
राय दिये ॥ सो वे दोनो भाई श्रीलाडलेशजीकी सेवा ब-
हुत प्रीतीसुं करन लगे ॥ और श्रीलाडलेशजी विन दोनो
भाईनसुं बालककी सीन्याई झगडा करकरके अनेक प्र-

कारके पदार्थ यागते ॥ और वे दोनो भाई श्रीलाडलेश-
जीकुं प्रसन्न राखते जैसे बालक उदास न होवे वैसे करते ॥
छेला जन्म जिनकुं होवे तिनकी ऐसी वृत्ती होवे सो वे
दोनो भाई श्रीगुसांईजीके ऐसे कृपापात्र हते ॥ जिननें
मनक्रम बचन करके श्रीलाडलेशजीकुं प्रसन्न किये ॥
वार्ता संपूर्ण ॥ वैष्णव ॥ १६७ ॥ * ॥ ॥ ॥
श्रीगुसांईजीके सेवक एक बलाईकी वार्ता ॥
एकसमय श्रीगुसांईजी गुजराततें ब्रजकुं पधारते हते ॥
रस्तामें आवते एक ठेकाणे रस्ता झुलगये सो उहां एक
बलाई मिल्यो ॥ सो वा बलाईसुं वैष्णवनें रस्ता पृच्छ्यो
तब वा बलाईनें कही या रस्तामें तो चोर छंटे हैं ॥ जासुं
तुम चलो मैं दूसरो रस्ता लेजाऊं तब विन वैष्णवनकुं
संगलेके दूसरो रस्ता चल्यो ॥ सो आछो रस्तो ले आयो
और फेर वा बलाईकुं कही जो तेरो गाम कहाहै ॥ तब
बलाईनें कही तुम जावो वही रस्तामें मेरो गाम आवेगो
तब श्रीगुसांईजीके अनुप्यननें कही जो हमारे संग चलें
तो खावेको देवें और खरचीहूं देवेंगे तब वो संग चल्यो
रस्तामें डेरा भये रसोई भई श्रीठाकुरजी अरोगें और
श्रीगुसांईजीनें भोजन किये पाछें सब वैष्णवननें प्रसाद
लिये और सब वैष्णवननें वा बलाईकुं जूठन दीनी सो
जूठन लेत मात्रही वा बलाईको अंतःकरण निर्मल भयो
और श्रीगुसांईजीके दर्शन साक्षात् पूर्णपुरुषोत्तमके भये
और श्रीगुसांईजीकुं बीनती करी जो मोकुं आप शरण
ल्यो तब श्रीगुसांईजीनें कृपा करके नाम सुनायो ॥ तब

वो नित्य श्रीगुसांईजीके संग चले और नित्य वैष्णवनकी जूठन लेवे और दिन दिन वाको भाव बढ़तो जाय ऐसे करते करते वाको गाम आयो वा गाममें श्रीगुसांईजीने डेरा किये और वाकी स्त्रीकुं लायके वैष्णव कराई और जूठन खवाई जूठन लेतमात्रही वा स्त्रीके मनको मेल छूटगयो और दिव्यदृष्टी होयगई ॥ फिर दर्शन करके अपने घर चली वाकुं घरके रस्तामें विरहताप भयो ॥ मूर्छा खायके परी तब वो वलाई उठाय लायो और श्रीगुसांईजीके दर्शन कराये तब वाकुं चेत भयो सो वे स्त्रीपुरुष श्रीगुसांईजीके संग चले और श्रीगोकुल आये ॥ और दूर दूरसुं चले आवे कोई मनुष्यनकुं छीवें नहीं फेर श्रीयमुनाजीके घाटपें श्रीगुसांईजी पधारे और वे स्त्रीपुरुष उहां बैठरहे नावपर कोई बैठवे तौहु बैठे नहीं जो सब छीजाय जासुं वे पार न उतरे दूसरे दिन विनकुं श्रीगुसांईजीके दर्शन न भये तब विनकुं ज्वर चढ आयो और मूर्छा खायके पररहे ॥ या बातकी खबर श्रीगुसांईजीकुं परी तब श्रीगुसांईजीने मनुष्य पठायके वे दोनो मूर्छा खायके पररहे विन दोउनकुं उठायके पार उतराये और मूर्छा तौ खुली नहीं तब श्रीगुसांईजी पधारके दोउनकुं चरणस्पर्श कराये तब विनकी मूर्छा खुली तब विनने श्रीगुसांईजीकुं बिनती करी जो आपके दर्शन बिना हमारे प्राणनहीं रहेंगे तब श्रीगुसांईजीने पादुकाजीकी सेवा विनके माथे पधराय दीनी तब आज्ञा करी तुम इनकी सेवा करो जब तुमारो मनोरथ होवेगो तब मैं इनमेंसुं

रूप धरके तुमकुं दर्शन देउंगो फेर आज्ञा करी फल फूल
मेवा दूधकी सामग्री इनकुं भोग धरियो और एकांतमें
जायके सेवा करो तब वे बलाई एक निर्जनवन हतो जहां
पर्वतकी गुफा हती उहां जायके रहे और पादुकाजी पध-
रायके सेवा करन लगे फेर फल फूल लायके नित्य भोग
धरे और सांजसवारे नित्य श्रीगुसाईंजी विनकुं दर्शन
देते ॥ कोई समय तो पुस्तक वांचते दर्शन देते कोई स-
मय जप करते दर्शन देते कोई समय संध्या वंदन करते
दर्शन देते जैसे विनके मनोरथ होते तैसे दर्शन देते ॥
फेर वा स्त्रीनें कही मेरे मनका वेचके पूणी और चरखा
लाय देवो तब वे बलाईले आयो सो वे लुगाई चरखा
काति और सूत वेचके पूणी लावे ऐसे करत करत रुपैया
पांचसात ऐकठे भये तब एक गाय ले आये और सामग्री
करे और गायके कानमें अष्टाक्षरमंत्र कहिदियो ॥ सो वे
गाय निर्भय होयके वनमें चरे और वे गाय एक
गोबल्लद बिना दूसरेनकुं सिंह जैसी दीसे और निर्भय हो-
यके वनमें चरे ॥ कोई मनुष्य और पशु वाके पास
न आवे और सदा काम धेनुकी सिन्याई दूध देवे
ऐसे वे दोनो स्त्रीपुरुष वा कंदरामें सेवा करते ॥ फेर
एक दिन चार ब्राह्मण मूलके वा निर्जन वनमें आये
तब विन ब्राह्मणको बडो सत्कार कियो और पूछी कहुं
आयेहो ॥ तब विननें कही जो हमारे गामके राजाने सब
ब्राह्मण कैद करेहैं और कहेहैं जो तुम लाखनरुपैया दान-
धर्मके मेरे पिताके पाससूं खायगयेहो अब मेरे पिताके

हाथको पत्र लावो जब मैं साचो मातुंगो नहीं तो सब द्रव्य
पाछें लेउंगो या दुःखसुं हम भाग आयेंहें तब वा स्त्रीनें
कही तुमारे राजाको पितातो नरकमें पन्योहैं मैं इहासुं
बैठी बैठी देखुंहुं तुम कहीतो तुमकुं मिलायदेऊं ॥ तब
ब्राह्मण हाथ जोडके बोले ॥ जैसे बने तैसे मिलायद्यो तो
वद्वत आछो तब वा बलाईकी स्त्रीनें कही तुम आंखे मीच
ल्यो तब वे चार ब्राह्मण आंख मीचके बैठे तब वा स्त्रीनें
भगवत्कृपाके बलतें विनकुं यमलोकमें पहुँचाय दिये ॥
फेर वे चारों ब्राह्मण यमराजासुं कहेके वा राजाके पि-
ताकुं मिले और सब समाचार कहेके वासुं पत्र लिखाय
लियो ॥ सो वा पत्रमें लिख्यो जो जादिनतें ब्राह्मण कैद
पडेहें वा दिनतें मैं नरकमें पन्योहुं और तेरे द्रव्य चहि-
ये तो अमका कोठामें अखूट खजानोहैं वामेसुं तेरे हा-
थनसुं जितनो काढे इतनो द्रव्य मिलेगो ॥ दूसरो मनु-
ष्य काढेगो तो नहीं मिलेगो एसो पत्र लिखायके वे चार
ब्राह्मण आंखे मीचके बैठे ॥ तब वा बलाईकी स्त्रीको ध्यान
कियो तो झट आंखे खोले तो वे पर्वतकी गुफामें जाय प-
होंचे और बलाईकी स्त्रीसों कही हमकुं जीवत दान तुम-
नें दियो ॥ तब वा बलाईनें कही ये सब प्रताप श्रीगुसां-
ईजी श्रीविठ्ठलनाथजीको है ॥ हमतो जातके बलाईहैं ह-
मारी छायासुं तुम छीजावोहो परंतु ये सब श्रीविठ्ठलना-
थजीको प्रतापहैं प्रकटनंद कुमार श्रीगोकुलमें विराजे
हैं तब वे ब्राह्मण श्रीगोकुल गये और श्रीगुसांईजीके सेवक
भये ॥ पाछें वा राजाके पास पत्र लेके गये ॥ वे बलाई

ऐसो श्रीगुसांईजीको कृपापात्र हतो ॥ वार्ता संपूर्ण ॥
 वैष्णव ॥ १६८ ॥ ॐ ॥ ॥ ॥ ॥ ॥
 ॥ श्रीगुसांईजीकेसेवक एक राजाकी वार्ता ॥
 सो वा राजानें सब ब्राह्मण बंदीखाने डारे और राजानें
 कही जो मेरे पिताकेपास तुमनें दान पुण्यके नामसों ला-
 खन रुपैया खायेहैं जासों मेरे पिताको पत्र लाव ॥ तब
 चार ब्राह्मण भाग गये सो पत्र ले आये ये बातें बलाईकी
 वार्तामें लिखीहैं ॥ फेर वा राजाके बेटानें पत्र वांचके अ-
 खूट खजाना वा राजाके बेटानें खोल्यो सो राजाके बे-
 टाकुं विश्वास आयो ॥ और जितनो द्रव्य चाहिये इतनो
 काढ्यो और सब ब्राह्मणनकुं छोडदिये ॥ फेर चार ब्राह्म-
 णनसुं राजानें पूछी ये पत्र कैसे लाये ॥ तब वे चार ब्रा-
 ह्मण बोलि श्रीविठ्ठलनाथजी श्रीगुसांईजी श्रीगोकुलमें नि-
 राजे हैं ॥ विनकी कृपातें लाये और विनकी कृपातें सब
 कारज सिद्ध भयो ॥ तब वे राजा ब्राह्मणनके संग आ-
 यके श्रीगोकुलमें श्रीगुसांईजीको सेवक भयो ॥ और श्री-
 नाथजीके दर्शन किये और ब्रजयात्रा करी ॥ और भग-
 वत्सेवा पधरायके अपने देशमें आयो ॥ और भलीभां-
 तिसों सेवा करन लग्यो ॥ और वैष्णवनको संग करन
 लग्यो ॥ और वैष्णवनके संगतें और भगवत्सेवाके प्रता-
 पतें और श्रीगुसांईजीकी कृपातें वा राजाकी बुद्धी निर्मल
 भई और दिव्यदृष्टी भई ॥ और वाको पिता नरकतें नि-
 कसके वैकुण्ठ गयो और दिव्यदृष्टीसुं देख्यो ॥ तब वे राजा
 भगवत्सेवा छोडके और कछु काममें चित न लगावतो

॥ दिवस रात भगवल्लीलाकी चितवन करतो सो वे राजा
श्रीगुसांईजीको ऐसो कृपापात्र भयो ॥ वार्ता संपूर्ण ॥
वैष्णव ॥ १६९ ॥ ❀ ॥ ॥ ॥ ॥

॥ श्रीगुसांईजीके सेवक सगुणदास ति० ॥

सो सगुणदास रूपसनातनके सेवक हते और ब्रजमें फि-
रते हते ॥ और श्रीगोकुल गये और श्रीगुसांईजी ठुकरानी
घाटपर विराजते हते ॥ तब सगुणदासजीने दर्शन किये
सो साक्षात् पूर्णरूपोत्तमके दर्शन भये ॥ तब श्रीगुसांईजी
बोले सगुणदास आगे आवो ॥ तब सगुणदासने अपने म-
नमें विचार्यो मोकुं कोईदिन आपने देख्यो नहीं ॥ और
जानगयेहैं जासुं ये साक्षात् नंदकुमारहैं इनकी शरण जाऊं
तो ठीक ॥ तब सगुणदासने वीनती करी महाराज मोकुं
शरण लेउ ॥ तब श्रीगुसांईजीने आज्ञा करी न्हाय आवो ॥
तब सगुणदास न्हाय आये तब श्रीगुसांईजीने कृपाकरके
नाम निवेदन कराये तब सगुणदासजीकुं भगवल्लीलाकी
स्फूर्ति भई ॥ सो श्रीमहाप्रभुजीके तथा श्रीगुसांईजीके
तथा श्रीठाकुरजीके सहस्रावधी नये नये पद करके गाये
सो पद ॥ इहां लिखे नहींहैं ॥ सो सगुणदासजीकुं श्रीठा-
कुरजी जैसी लीलाको अनुभव करावते तैसे पद गावते
॥ वार्ता संपूर्ण ॥ वैष्णव ॥ १७० ॥ ❀ ॥ ॥ ॥

॥ श्रीगुसांईजीके सेवक मन्नालाल और गोव-
र्धनदास दोउ भाईनकी वार्ता-सो वे दोनो भाई श्रीगु-
सांईजीके सेवक भये और श्रीगुसांईजीने कृपाकरके विनके
माथे सेवा पधराय दीनी ॥ तब वे दोनो भाई ब्रजमें रहेके

(२९६) दोसीबावन वैष्णवकी वार्ता.

सेवा करन लगे सो श्रीगुसांईजीके इहां दर्शन करके फेर सेवा करके अपने घर आवते ॥ फेर बहुत दिन ब्रजमें रहेके सब रीती शीखे फेर अपने देशकुं आये ॥ सो आयके अपने घरमें सेवा करन लगे फेर इतनेमें खेलके दिन आये तब राजभोग धरके और राजभोग सरायके फेर श्रीठाकुरजीकुं खेलावन लगे तब श्रीठाकुरजीनें कही जो तुम हमकुं पेहेले खिलायके पाछें राजभोग धरो तो बहोत आछोहैं ॥ तब विननें कही याको कारण कहा तब श्रीठाकुरजीनें आज्ञा करी जो जब खेल होवेंहैं तब सखा और ब्रजभक्त मेरे संग खेलन आवेंहैं जब खेल चुकें और राजभोग तुर्त आवे तो ब्रजभक्त जो खेलवे आवेंहैं सो और सखा आये होवे सो मेरे संग भोजन करे तब मोकुं बहोत आनंद होवें और विनकुं देखके मोकुं भोजन बहोत भावे हैं तब वे गुनके दोनो भाईननें ऐसी कही जो हम श्रीगुसांईजीकुं पूछेंगे वे आज्ञा करेंगे तैसे हम करेंगे ॥ काहेतें जो नवरत्नग्रंथमें श्रीमहाप्रभुननें कहाहैं सो वाक्य ॥ सेवाकृतिगुरोराज्ञा ॥ सेवाकी कृती गुरुकी आज्ञा प्रमाणें करणी ॥ तब मन्नालाल श्रीगोकुल जायके श्रीगुसांईजीसों बीनती करी तब श्रीगुसांईजीनें आज्ञा करी जो पुष्टिमार्गमें दोनो क्रमहैं सो श्रीठाकुरजीकुं रुचे ऐंसेही करो तब फेर श्रीगुसांईजीकी आज्ञा लेके मन्नालाल तुर्त आयके राजभोग धरेपुं पेहेले खिलावन लगे ॥ सो वे मन्नालाल तथा गोवर्धनदास श्रीगुसांईजीके ऐंसे कृपापात्र हते ॥ जिनकुं श्रीगुसांईजीकी वाणीपर अति विश्वास हतो और श्रीठाकुरजीकुं तो

बालक समझते होते ॥ ऐसे विनके निर्मल भाव होते ॥ वार्ता
संपूर्ण ॥ वैष्णव ॥ १७१ ॥ ॐ ॥ ॥ ॥ ॥

॥ श्रीगुसांईजीके सेवक भगवानदास भीत-
रियाकी वार्ता ॥ सो वे साचोरा ब्राह्मण होते ॥ सो वे भग-
वानदास गुजरातमें आयके श्रीगोकुलमें श्रीगुसांईजीके
सेवक भये ॥ और श्रीगुसांईजीने कृपा करके श्रीनाथजीकी
सेवामें राखे ॥ तब भगवानदासजी श्रीनाथजीकी सेवा
नीकी भांति सों करन लगे ॥ शुद्ध अंतःकरणसुं राजा जि-
तनो डर राखते और बालक जैसी वात्सल्यता राखते और
सर्वसुं अधिक स्नेह राखते ॥ सो श्रीनाथजी विनके ऊपर
बहोत प्रसन्न रहते ॥ एकदिन भगवानदासके देखते श्रीगु-
सांईजीके संग श्रीनाथजी बातें करते होते तब श्रीगुसांईजीने
पूछी जो श्रीनाथजीने कहा कही ॥ तुम समझे तब भग-
वानदास हाथ जोड़के बोले जो मैं तुच्छजीव कहा स-
मझूं जाहुं आपकी कृपा विना कैसे समझौ जाय ॥ तब
यै सुनके श्रीगुसांईजी बहोत प्रसन्न भये ॥ तब श्रीनाथजी
भगवानदासजीसों बोलन लगे और सब बात जतावन
लगे सो वे भगवानदास श्रीगुसांईजीके ऐसे कृपापात्र होते
॥ वार्ता संपूर्ण ॥ वैष्णव ॥ १७२ ॥ ॐ ॥ ॥ ॥

श्रीगुसांईजीके सेवक एक श्रेष्ठ और विरक्तकी ०
सो वे दोनो श्रीगुसांईजीके संग ब्रजयात्रा चले और सं-
गमें वैष्णव बहोत होते ॥ सो वे विरक्त वैष्णव चुकटी मा-
गके निर्वाह करते ॥ सो एकदिन विरक्त वैष्णवने रसोई
करी हती ॥ सो वा रसोईकी मेंडपर कुत्ता निकस गयो ॥

तब वानें श्रीगुसांईजीसों पूछी ॥ तब श्रीगुसांईजीनें आज्ञा करी तेरी रसोई नहीं छीगई ॥ फेर दूसरे दिन वा शेठकी रसोईकी मेंढपरसुं कुत्ता निकस गयो ॥ तब वा शेठनें श्रीगुसांईजीसों पूछी ॥ तब श्रीगुसांईजीनें आज्ञा करी तेरी रसोई छीगई ॥ तब शेठनें दूसरी सामग्री मंगायके रसोई कराई ॥ फेर दूसरे दिन समयपायके वा शेठनें श्रीगुसांईजीसों वीनती करी जो हे महाराजाधिराज या विरक्त वैष्णवकी रसोई छिवाय न गई और मेरी छिवाय गई ॥ याको कारण कहा ॥ कुत्ता तो दोनोनकी मेंढपर सरखो निकस्यो हतो ॥ तब श्रीगुसांईजीनें आज्ञा करी जो याके पास द्रव्य नहीं है ॥ पचीस घरसुं मागलावे जब निर्वाह करे ॥ और तुमारे पास द्रव्यहै चाहे जासमय जितनी रसोई कराय सको इतनी रसोई होय इतनो तारतम्यहै ॥ जासुं याकी नहीं छिवाई और तुमारी छिवाई ॥ तब वा शेठके मनमें जो द्रव्यको अभिमान हतो सो मिटगयो और ये निश्चय क्यो ॥ जो द्रव्य भगवदर्पण न होवे तो वा द्रव्यसुं अनर्थ उत्पन्न होवे और वा विरक्तके मनमें चिंता हती जो मेरे पास द्रव्य नहीं है सो चिंता मिटगई ॥ जो बहोत द्रव्य होतो तो मेरी कैसी बुद्धी होती तब मनमें बहोत प्रसन्न भयो और सो विरक्त और शेठ श्रीगुसांईजीके ऐसे कृपापात्र हते ॥ जिनकुं तत्काल ज्ञान प्राप्त भयो ॥ वार्ता संपूर्ण ॥ वैष्णव ॥ १७३ ॥ ❀ ॥

॥ श्रीगुसांईजीके सेवक मा बेटीकी वार्ता ॥

सो वे मावेटी राजनगरमें रहेती हती ॥ एकसमय श्री-

गुसांईजी राजनगर पधारे हते ॥ और वे मावेटी श्रीगुसांईजीकी सेवक भई ॥ तब श्रीगुसांईजीने आज्ञा करी तुम सेवा करो ॥ विनने कही हमारे पास द्रव्य नहीं है ॥ तब श्रीगुसांईजीने आज्ञा करी जो तुम घरमें करते होवो ऐंसे ही करो परंतु मार्गकी रीतीसुं भोग धरो ॥ तब विनने बीनती करी जो बंटा भरवेके लीयें और उत्थापन भोग धरवेके लीयें हमारे पास द्रव्य नहीं है ॥ तब श्रीगुसांईजीने आज्ञा करी बाजरी मिजायके सब काम चलावनों ॥ तब श्रीगुसांईजीने विनके साथे सेवा पधराय दीनी ॥ तब वे भली भांतीसुं सेवा करन लगी ॥ एकदिन श्रीगुसांईजी गाममें पधारे ॥ तब रस्तामें घंटानाद भयो ॥ तब आपने पूछी कोनको घरहै ॥ तब वैष्णवनने कही मावेटी इहां रहें ॥ साठ वरसकी वेटी है ॥ और पंचोतर वरसकी मा है सो वे इहां सेवा करें ॥ कछु विनको आचार विचार बराबर नहीं है ॥ ऐंसे वैष्णवनने श्रीगुसांईजीसुं कही ॥ तब श्रीगुसांईजीने कही पहेलेतो विनको घर देखें ॥ तब श्रीगुसांईजी कृपाकरके विन मावेटीके घर पधारे ॥ तब श्रीगुसांईजीकु पधारे देखके बहुत प्रसन्न भई ॥ तब आपने पूछी कहा समयहै तब बाईने कही उत्थापन भोग सरवेकी तैयारीहै एसी बीनती वा डोकरीने करी ॥ तब श्रीगुसांईजी भीतर पधारे देखे तो श्रीठाकुरजी बाजरीके दाणा आरोमेंहें ॥ तब श्रीठाकुरजीने आज्ञा करी जो आप ये प्रसाद लेवो ॥ तब श्रीगुसांईजी भोग सरायके बहार लेआये ॥ तब वे डोकरीकु कहेके आप अरोगन-

लगे ॥ तब बिनको स्नेहसुं हृदय भर आयो और मनमें
समझी श्रीगुसाईंजी कैसे दयालहे ॥ तब दूसरे वैष्णव वा
ढोकरीसुं व्यवहार नहीं करते हते ॥ सो सबनें बाजरीके
दाणा लिये और नित्य बड़े बड़े वैष्णव भगवदीय वा ढो-
करीके घर प्रसादी बाजरीके दाणा नित्य लेवे आवते ॥
जा दिन श्रीगुसाईंजी उहां अरोगे वा दिनतें सब वैष्णव
वा ढोकरीको बहुत मुलाजो राखते ॥ सो वे भाबेटी श्री-
गुसाईंजीकी ऐसी कृपापात्र हती ॥ वार्ता संपूर्ण ॥ वै-
ष्णव ॥ १७४ ॥ * ॥ ॥ ॥ ॥ ॥

॥ श्रीगुसाईंजीके सेवक गोपालदासकी वार्ता ॥

सो वे गोपालदास बडनगरा नागर हते ॥ सो बडनगर-
में रहते हते जब श्रीगुसाईंजी बडनगर पधारे तब
सेवक भये और श्रीठाकुरजीकी सेवा पधरायके सेवा
करन लगे ॥ फेर गुजरातमेंसुं संग गयो तब गोपा-
लदास वा संगके संग श्रीगोकुल गये और नवनीतप्रि-
याजीके दर्शन किये ॥ वा संगमें पांचसो मनुष्य
हते ॥ सबनें राजभोगके दर्शन किये जब हो चुके तब
दर्शन करके और सबनें श्रीगुसाईंजीके दर्शन किये
और श्रीगुसाईंजीनें भोजन करके गोपालदासजीकुं जू-
ठनकी पातर धरी ॥ तब गोपालदासनें बाहर आयके
संगवाले पांचसों वैष्णवनकुं कही ॥ सब महाप्रसाद
लेउ तब वैष्णव लेवे बैठे तब श्रीगुसाईंजीकी जूठनमेंसुं
गोपालदासजीनें पांचसो वैष्णवनकुं पातर धरी और
पांचसेनें प्रसाद लियो तो हुं जूठन घटी नहीं ॥ फेर

गोपालदास आप लेवे बैठे तब जूठन घटे नहीं ॥ और गोपालदास उठे नहीं तब श्रीगुसांईजीने गोपालदासजी सुं पूछी जो कैसे है ॥ तब गोपालदासने वीनती करी जहांसूधी ये जूठन रहेगी तहांसूधी कैसे उठ्यो जाय ॥ तब श्रीगुसांईजी न्हावे पधारे ॥ तब तुरत वह जूठन घट गई तब गोपालदासजी उठे तब श्रीगुसांईजीने कही ॥ श्रीनाथजी तुमारे मनोरथ पूर्ण करेहें तब गोपालदासने कही आखी विश्वकुं पूर्ण तृप्ती आप करेहें सो मेरी कामना आप क्युं पूर्ण नहीं करे आपकी कृपासों मेरे सब काम पूर्ण है ॥ सो वे गोपालदासजी श्रीगुसांईजीके ऐसे कृपापात्र होते ॥ वार्ता संपूर्ण ॥ वैष्णव ॥ १७५ ॥ ❀ ॥

श्रीगुसांईजीकेसेवक रणछोडदास वैष्णवकी ०

सो वे रणछोडदास गुजरातमें रहते होते ॥ द्रव्यपात्र बहुते होते ॥ और श्रीठाकुरजी और वैष्णवकी सेवा भली भांतीसों करते होते ॥ और वैष्णवके ऊपर विश्वास बहुत हतो ॥ फेर एक ठग वैष्णव वनके विनके घरमें उतयो ॥ और विनने बड़ो आदर सत्कार कयो ॥ फेर वा ठगने रणछोडदासको बेटा एकांतमें मार डायो ॥ और गहेनो उतार लियो ॥ और गांठडी बांधके चलयो ॥ रस्तामें वाकुं रणछोडदास मिले ॥ तब वा वैष्णवसों कही प्रसाद लिये विना जायवे नहीं देउंगो ॥ वाकी गांठडी उठाय लीनी और हाथ पकडके लेचले ॥ फेर घरमें आयके वा वैष्णवकुं न्हायके बैठायो ॥ और गांठडी भीतर घरदीनी ॥ ये वैष्णव मिलेविना नजाय ॥

(३०२) दोसोबावन वैष्णवकी वार्ता.

याहुं गांठडी भीतर घरी ॥ फेर वाकी स्त्री बोली छोरो
सवारको गयोहै सो आयो नहींहै ॥ वाहुं दूँढलाव ॥
फेर घरके पाछे एक बगीचो हतो सो बगीचा रणछोड
दासको हतो ॥ सो बगीचामें छोराकुं दूँढवे गयो ॥ सो
छोरातो मिल्यो नहीं ॥ एक माटीको ढगलो देख्यो ॥
मनमें आई ये माटीको ढगलो इहाहुं काढढारुं तो
ठीक ॥ तब माटीके ढगलेमें हाथ डान्यो तो वो छोरो
मन्यो पन्यो हतो ॥ देखके वाके कानमें अष्टाक्षर मंत्र
कह्यो और कही उठउठ घरमें वैष्णव आयेहे विनकुं
जय श्रीकृष्ण कर ॥ तब वह छोरा उठके ठाडो भयो ॥
फेर छोराकुं घरमें लायके न्हावायो और श्रीठाकुरजीके द-
र्शन करवाये ॥ तब वे ठग रणछोडदासके पावनपन्यो और
कही जो मैंने ये दुष्टकर्म कन्यो है सो तुम क्षमा करो ॥
और मोकुं वैष्णव करो ॥ तब वा रणछोडदासनें खर्ची
देके श्रीगोकुल पठायो ॥ और श्रीगुसांईजीके उपर पत्र
लिखदियो ॥ सो वे रणछोडदास श्रीगुसांईजीके ऐसे कु-
पापात्र हते ॥ जिननें बेटा जीवतो कन्यो ॥ वार्ता संपूर्ण ॥
वैष्णव ॥ १७६ ॥ * ॥ ॥ ॥ ॥ ॥
श्रीगुसांईजीके सेवक दोउ ठग जिननें नाराय-
णदासकी स्त्रीकुं फांसी दीनी तिनकी वार्ता ॥ सो फांसीकी
बात सगरी नारायणदासकी वार्तामें लिखीहै ॥ और जब
नारायणदासकी स्त्री जीवती भई तब वे ठग नारायणदा-
सजीके पावन पन्ये ॥ तब कही हमकुं वैष्णव करो ॥ तब
नारायणदासनें श्रीगुसांईजीके उपर पत्र लिख दीनो ॥

वैष्णव (१७८) राजाको बेटा बन्नीस लक्ष्मणो. (३०३)

सो वे पत्रलेके ठग श्रीगोकुलआये ॥ तब श्रीगुसांईजीने
बिनको मन फिन्थो देखके तब झरण लिये ॥ और कृ-
पाकरके बिनकुं पावन किये और भगवत्सेवा पधराय
दीनी ॥ तब वे ठग बड़े वैष्णव भये और अत्यंत कृपा-
पात्र भये और जन्मपर्यंत नारायणदासजीको सत्संग न
छोड्यो ॥ वार्ता संपूर्ण ॥ वैष्णव ॥ १७७ ॥ ❀ ॥ ॥

श्रीगु० सेवक एक राजाको बेटा बन्नीस लक्ष्मणो
तिनकी वार्ता ॥ जब वे राजा वृद्ध भयो तब बाको अंत-
काल आयो ॥ तब वा राजाने अपने बेटाकुं बुलायके
कही वा गाममें श्यामदास वैष्णव रहे हे याको सत्संग
करियो ॥ बाकेऊपर विश्वास राखेगो तो तेरो भलो होवे-
गो ॥ ऐसे कहेके वो राजा भगवच्चरणारविंदकुं पहाँच्यो
तब राजाके बेटाने वा वैष्णवकुं बुलायो और सब बात
कही ॥ फेर एकदिन वा राजाके बेटाको हाथ कट गयो ॥
तब वा श्यामदासने कही प्रभु जो करे सो भली करे ॥
और फेर एकदिन वा राजाके बेटाकी स्त्री मरगई सब
लोक कहे बुरो भयो ॥ तब श्यामदासने कही प्रभु करे सो
भली करे ॥ ये सुनके वा राजाकुं गुस्सो चढ्यो ॥ फेर थो-
डेदिन पीछे वा राजाको बेटा मरगयो ॥ तब सब लोगनने
कही बुरो भयो ॥ तब श्यामदासने कही प्रभु करे सो
भली करे ॥ तब वे राजाकुं बड़ो गुस्सो चढ्यो ॥ तब वे
राजा मनमें ये समझ्यो ये मेरे बुरेमें खुब राजीहै ॥ तब
वा राजाने विचार कियो याको छानो छानो मार डा-
रनो ॥ तब वा राजाके बेटाने नीचनकुं बुलायके कही

जो ये श्यामदास सवारै तीनबजे जलभरवे जाय है तुम याको मारडारो ॥ परंतु कोई औरकुं खबर न पड़ेये सुनके वे नीचलोग रस्तामें बैठरहे ॥ सवारै श्यामदास आवेगो तो मारेंगे ये विचार कर लीयो तब भगवदिछातें श्यामदासके मनमें ऐसी आई जो आज दूसरे कुवापर जलभरन जाउंतो ठीक ॥ तब श्यामदास सवारै उठके जल भरने चलयो ॥ सो रस्तामें ठोकर लगी तब वा श्यामदासको पांव टूट गयो ॥ तब बाकुं उठायके घरमें लाये घरमें आयके परे ॥ फेर वा राजाकुं खबर परी जो जलभरेवेकुं नहीं गयो ॥ और पाव टूट गयोहे ॥ एक दोदिन पीछे वे राजा श्यामदासके घर आयो और आयके कही तुमारा पांव टूट्यो सो बुरो भयो ॥ तब श्यामदासनें कही प्रभुजो करेंहे सो भली करेंहे तब वा राजानें जानी ॥ याके बोलवेको स्वभाव ऐसो है ॥ आपने बुरेमें ये राजी नहींहि ॥ सब बात भली मानेहे ॥ तब नित्य श्यामदासके घर आवे और श्यामदासको सत्संग करे फेर एक और बडो राजा हतो ॥ सो सब राजानके पास खंडणी लेतो हतो ॥ सो वा बडे राजानें वा राजाकुं बुलायो तब वा राजानें श्यामदाससुं पूछी तब श्यामदासनें कही जावो ॥ प्रभु करे सो भली करें ॥ तब वे राजा बडे राजाके पास गयो ॥ तब वा राजानें पंडितनकुं एकट्ठे करके याके लक्षण तपासे ॥ सो शास्त्रमें बत्तीस लक्षण कहेहे और तो सब मिले ॥ एक तीन लक्षण मिले एक तो याकी स्त्री मरगई हती ॥ और बेटा मरगयो हतो और आंगरी कटी हती ये तीन न मिले ॥ तब वा

वैष्णव (१७८) राजाको बेटा बत्तीस लक्ष्मणो. (३०५)

राजाने बाकुं कही तुमारे घर पाला तुमारे राजपर जावो ॥ तब राजाके बेटाने पंडितनसुं पूछी जो मोकुं बढे राजाने काहेकुं बुलायो हतो ॥ तब पंडितनने कही या राजाने पांच करोड रुपैया खरचके एक तलाव खोदा-यो है ॥ सो वा तलावमें जल नहीं निकस्यो ॥ तब पंडितनसुं वा राजाने पूछी हती जो कैसे निकसे तब पंडितनने कही ॥ जो बत्तीस लक्ष्मणो मनुष्य या तलावमें बघ करौ तो पाणी आवे ॥ तब बत्तीस लक्ष्मणो कोई मिल्यो नहीं ॥ तब तुमकुं बत्तीस लक्ष्मणो जानके बुलायो है ॥ जो ये मिलवेको आवेगो याकुं अजानमें तलाव दिखावे जाएंगे ॥ तब याकुं मार डारेंगे तब तलावमें पाणी आवेगो ॥ तब तुमारे लक्षण बत्तीसमें तीन घट गये हैं जासुं मरायवेकी नाही ठैरी है ॥ और तुमकुं घर जावेकी रजा मिली है ॥ ये बात सुनके वे राजा प्रसन्न भयो और विचार कियो जो श्यामदास वैष्णवने कही हती जो श्रीठाकुरजी करेंसो भली करें ॥ जो मेरो बेटा और स्त्री और आंगरी खंडित भई न होती तो आज मेरो जीव जातो ॥ ऐसे कहके वे राजा उहांसुं चल्यो ॥ और गांमके बहार आयके वा खाली तलावकुं देखवे गयो ॥ सब मनुष्यनकुं नीचे ठाढ़े किये और एकलो वा तलावकी पालपर चढ़गयो ॥ और अष्टाक्षर कहेके वा तलावपर दृष्टी करी ॥ तब सब तलाव भरगयो तब सब लोक देखके विस्मय होय गये ॥ और पंडितनकी बुद्धिई विचारमें परी ॥ और कछु सम-जन नहीं परी ॥ कारण जो भगवन्नामको प्रताप तथा

वैष्णवधर्मको प्रताप वे पंडित जानते नहीं होते ॥ तब वा गामको राजा ये बात सुनके तुरंत उहां आयो और देखके बहुत प्रसन्न भयो ॥ तब वा राजाकुं अधिक देश दियो ॥ और राजी करके अपने देशमें पठायो ॥ फेर वह राजा अपने गाममें आयो ॥ और आयके श्यामदासके पावन पन्थो और अपराध क्षमा कराये और फेर वा श्यामदासके सत्संगतें श्रीठाकुरजी पधरायके सेवा करन लयो ॥ सो वा राजाके बेटापर श्रीगुसांईजीने ऐसी कृपा करी हती ॥ वार्ता संपूर्ण ॥ वैष्णव ॥ १७८ ॥ ❀ ॥ श्रीगुसांईजीके सेवक पुरुषोत्तमदास काशीमें रहेते तिनकी वार्ता ॥ एक समय श्रीगुसांईजी काशी पधारे होते ॥ पुरुषोत्तमदास तथा बिनकी स्त्री श्रीगुसांईजीके सेवक भये ॥ फेर श्रीगुसांईजी श्रीजगन्नाथरायजी पधारे तब पुरुषोत्तमदास श्रीगुसांईजीके संग आये ॥ फेर पुरुषोत्तमदासनें सखड़ी महाप्रसाद अरोगवायो ॥ जगन्नाथक्षेत्रमें अबसूधी बल्लभकुलके बालक पुरुषोत्तमक्षेत्रमें सब वैष्णवके हाथको श्रीजगन्नाथरायजीको महाप्रसादसखड़ीको अरोगे हैं ॥ सो पुरुषोत्तमदासकी कृपासुं अबसूधि रीती चले हैं ॥ फेर श्रीगुसांईजी काशी होयके श्रीगोकुल पधारे और सब खटला लेके पुरुषोत्तमदास श्रीगुसांईजीके संग आये और श्रीगोकुलमें रहे ॥ और श्रीगुसांईजीके मुखसुं कथा सुनते ॥ एकदिन पुरुषोत्तमदासनें श्रीगुसांईजीसों पूछयो जो मरियादामार्गमें और पुष्टिमार्गमें भेद कहा ॥ तब श्रीगुसांईजीने आज्ञा करी मरियादा मार्गमें साधन और क्रिया

और कर्मवल और कर्मके फलकी इच्छा और साधनकी मुख्यता जाको नाम मरियादामार्ग है ॥ और पुष्टिमार्गमें स्नेहपूर्वक कृष्णसेवा मुख्यहै और भगवदीयको सत्संग और केवल भगवदनुग्रहको वल और केवल निःसाधनपणो और भगवद्धर्म मुख्य ॥ तब लौकिक वैदिक लोगनके दिखायवेके लीये करेहैं मुख्यता भगवद्धर्मनकोहै सो पुष्टिमार्ग कहिये ॥ ये मुनके पुरुषोत्तमदास वहीत प्रसन्न भये और सिद्धांत रहस्य इत्यादि ग्रंथ अभिप्राय सहित श्रीगुसांईजीके पास सीखे ॥ और श्रीठाकुरजी पधरायके भगवत्सेवा करन लगे ॥ और जो भगवद्रससंबंधी बातें अष्टप्रहर श्रीगुसांईजीसुं मुन्योकरते एकदिवस पुरुषोत्तमदासनें पूछी जो श्रीठाकुरजी पीतांबर काहेकुं धरतहैं और श्रीस्वामिनीजी नीलवस्त्र काहेकुं धरतहैं ॥ तब श्रीगुसांईजीनें आज्ञा करी जो श्रीस्वामिनीजीको गौरवर्ण है कंचन जैसो ॥ ताविना श्रीठाकुरजीसों रह्यो नहीं जायहै ॥ श्लोक ॥ रूपंतवैतदतिमुंदरनीलमेघप्रोद्यत्तडिन्मदहरं व्रजभूषणांगि ॥ एतत्समानमिति पीतवरंदुकूलमुराबुरस्यपि विभर्तिसदासनाथः ॥ १ ॥ यातें पीताम्बर धरेहैं और श्रीठाकुरजीको श्यामवर्ण है ॥ शृंगाररसरूपहैं जामें अगाध रस भन्योहैं ॥ या स्वरूपविना श्रीस्वामिनीजी रही न सके ॥ जासुं यातें श्रीस्वामिनीजी नीलाम्बर धरे हैं ये मुनके पुरुषोत्तमदास या रसमें भग्न होयगये ऐसी कितनी बात पुरुषोत्तमदासकी लिखें ॥ कोई दिन श्रीगुसांईजीके चरणारविंद छोडके

कहं जाते नहीं ॥ सो वे पुरुषोत्तमदास ऐसे कृपापात्र हते ॥
 ॥ वार्ता संपूर्ण ॥ वैष्णव ॥ १७९ ॥ ॐ ॥ ॥ ॥
 ॥ श्रीगुसाईजीके सेवक वेणीदासकी वार्ता ॥
 सो वे वेणीदास पूर्वके संगमें श्रीगोकुल आये और श्री-
 गुसाईजीके दर्शन किये ॥ सो साक्षात्कोटिकंदर्पलावण्य
 पूर्ण पुरुषोत्तम ऐसे स्वरूपके दर्शन भये ॥ तब वेणीदा-
 सनें ऐसो विचार कियो इनके शरण जईये तो बहोत
 आछो ॥ तब श्रीगुसाईजीके सेवक भये ॥ और श्रीनव-
 नीतप्रियाजीके दर्शन किये ॥ तब भगत्स्वरूपको ज्ञान
 भयो ॥ तब श्रीनाथजीके दर्शन किये ॥ तब वेणीदासकुं
 देहातुसंधान रह्यो नहीं ॥ दो घड़ी पाछे स्मृती आई तब
 वेणीदासकुं श्रीगुसाईजीनें आज्ञा करी जो श्रीनाथजीके
 दर्शन किये तब वेणीदासनें वीनती करी ॥ जो आपकी
 कृपातें श्रीनाथजीनें दर्शन दिये ॥ जीवकि कछु समर्थ्य
 नहींहै ॥ श्रीनाथजी आपके वशमें है ॥ आपकी इच्छा
 होवे जिनकुं श्रीनाथजी दर्शन देवें ॥ फेर वेणीदासनें
 वीनती करके श्रीठाकुरजीकी सेवा पधराई ॥ और भग-
 वत्सेवा करन लगे ॥ सो बहोत दिन पर्यंत श्रीगुसाईजीके
 पास रहे ॥ और पुष्टिमार्गकी रीती शीखे ॥ फिर वेणी-
 दास आज्ञा मागके अपने देशकुं चले ॥ सो रस्तामें ए-
 कदिन बरसाद बहोत पड्यो और गाममें जग्या द्वंद्व-
 वेकुं गये सो एक बड़ी जग्या हती उहां वेणीदासजी
 उतरे और श्रीठाकुरजीकी सेवा करी और भहाप्रसाद
 लिये फेर रातकुं वेणीदासजी भगवद्वार्ता कर चुके ॥ तब

देखे तो एक बड़ो प्रेत ठाडो है ॥ तब बाकुं पृथ्वी तुं कोण है ॥ तब वानें कही जो मैं प्रेतहं ॥ इहां जो कोई आयके उतरे है सो पाछे जाय नहीं ॥ सो मैं बहोत बखतको ठाडो हूं ॥ परंतु तेरे ऊपर मेरो दाब चले नहीं है ॥ तब वेणीदासजीकुं दया आई सो बाके ऊपर जल छांटयो ॥ तब वा प्रेतकी प्रेतयोनी छूटी और दिव्य देह होय गई ॥ और वेणीदासजीकुं हाथ जोड़के प्रेतनें कही ॥ जो तुं धन्य है मेरी प्रेतयोनी छुडायके मेरो कल्याण कियो अब मैं तेरी कृपातें बैकुंठकुं जाउंगो और मेरी प्रेतयोनी छुडायवेकुं कोई समर्थ नहीं हतो ॥ ऐसे कहेके और वेणीदासजीकुं दंडवत करके वो प्रेत बैकुंठ गयो ॥ तब वेणीदास अपने देशमें जायके श्रीठाकुरजीकी सेवा भली भातिसों करन लगे ॥ सो वे वेणीदास श्रीगुसाईंजीके ऐसे कृपापात्र भये ॥ वार्ता संपूर्ण ॥ वैष्णव ॥ १८० ॥

श्रीगुसाईंजीके सेवक हंसहंसनीकी वार्ता ॥

एकदिन श्रीगुसाईंजी बद्रिकाश्रम पधारे हते ॥ उहां निर्जन बन हतो और मानससरोवर हतो और हंस बहुत हते ॥ वाईदिन कोई जीव शरण न आयोहतो ॥ यातें श्रीगुसाईंजीनें भोजन न किये ॥ तब चाचाहरिवंशजी पांचदश हंस पकडलाये ॥ और श्रीगुसाईंजीनें विनकुं नाम सुनाये और छोड़दिये और महाप्रसाद धराये ॥ तब तें विन हंसननें महाप्रसाद लिये ॥ जब आगले जन्मकी स्मृती भई ॥ और भगवल्लीलाकी स्फूर्ती भई ॥ फेर श्रीगुसाईंजी उहांतें पधारे जब वा तलावपर कोई वैष्णव आ-

वतो वाके पास हंस आयके बैठते ॥ और दूसरेके पास नहीं आवते ॥ और कोई देशमें एक राजाहतो वाकुं कोढ़ भयो सो बहोत भयो ॥ कोई उपायसुं मिटे नहीं ॥ तब कोई वैद्यनें कही जो हंसनको रुधिर चोपडे सों मिटे-गो ॥ तब राजानें पारधीलोगनकुं बुलायके कही जो हंसलावेगो वाकुं लाखरूपैया इनाम देउंगो ॥ तब पारधी वा देशमें हंस पकडवेके लीयें गये परंतु हंसतो हाथमें आवें नहीं ॥ बहोत प्रयत्न किये और बहोत दिन उहां रहे ॥ एकदिन एक वैष्णव उहां आयो वाकुं देखके हंस वाकेपास आये ॥ सो ये बात पारधीनें देखी तब दूसरे-दिन पारधी वैष्णववनके उहां गयो ॥ तब वे हंस वैष्णव जानके वाकेपास आये तब वानें पकडलिये तब वा राजाकुं लाय दिये और लाखरूपैया इनामके लगयो ॥ तब श्रीठाकुरजीनें विचारी जो मेरे भक्तको दुःख में कैसे सहुं तब श्रीठाकुरजी वैद्य वनके बजारमें आये जे कोई रोगको औषध पूछे तब श्रीठाकुरजी वाकुं औषध देवे तब तत्काल वाको रोग मिटजाय ॥ ऐसैं दोचार घडीमें सैंकडे मनुष्यनके रोग मिटगये ॥ तब वा वैद्यको यश बहो-त फैल्यो फेर वा वैद्यकुं राजाकेपास लगये ॥ तब वैद्यनें कही मैं अबी थोडो औषध देउंगो ॥ थोडो कोढ़ मिटेतो आखो शरीर पर पीछे लगाउंगो ॥ फेर औषध दिये थोडा शरीरपर लगायो तब थोडो शरीर निर्मल भयो ॥ तब राजा उठके पावन पंज्यो ॥ और कही जो सब कोढ़ मिटाओ तो जो मागो सो देउंगो ॥ तब श्रीठाकुरजीनें

कही हंसनकुं छोडदेउ ॥ तव वा राजानें छोड दिये ॥
 तव श्रीठाकुरजीनें औषध लगायके सब कोढ मिटायो ॥
 फेर वा राजानें कही तुम मनुष्य नहींहो देवहो के ईश्व-
 रहो ॥ सो मैं जानत नहींहुं ॥ और कृपा करके जनावो
 तो ठीक ॥ तव श्रीठाकुरजीनें कही तुम श्रीगोकुलमें जा-
 यके वैष्णव होवो तव मोकुं पहचानोगे ॥ तव वह राजा
 श्रीठाकुरजीके वचन सुनके श्रीगोकुल जायके श्रीगुसां-
 ईजीके सेवक भये ॥ और वैष्णवको सत्संग करके श्रीगुसां-
 ईजीकी कृपाते भगवत्सेवा करन लगे ॥ तव धीरे धीरे
 श्रीठाकुरजीनें अपना स्वरूप वा राजाकुं जनायो ॥ सो
 वे हंसहंसनी श्रीगुसांईजीके ऐसे कृपापात्र भगवदीय हते ॥
 जिनकुं श्रीठाकुरजी वैद्य बनके छुडाये ॥ वार्ता संपूर्ण ॥
 वैष्णव ॥ १८१ ॥ ❀ ॥ ॥ ॥ ॥ ॥

॥ श्रीगुसांईजीके सेवक पारधीकी वार्ता ॥

सो वह पारधी राजाके पास लाख रुपैया लगयो ॥ और
 श्रीठाकुरजीनें वैद्य बनके बिन हंसनकुं छुडाये ॥ तव वा
 पारधीनें विचार कियो जो वैष्णवधर्म सबते श्रेष्ठ है ॥ मैंने
 वैष्णवकी वेष पहेंयो तो हंस पकडाये ॥ और हंसनकुं
 श्रीठाकुरजीनें छुटाय दिये ॥ ये विचारकरके वह पारधी
 वैष्णव होयवेके लीयें श्रीगोकुलमें जायके श्रीगुसांईजीके
 शरण गयो ॥ तव श्रीगुसांईजीनें आज्ञा करी तूं कैसे निर्वाह
 करेगो ॥ तव वानें हाथ जोडके वीनती करी जो महाराज
 मैंने वैष्णवको झूठा वेष पहेंयो हतो तो मोकुं लाख रु-
 पैया मिले अव वैष्णवको साची वेष पहेंगो तो श्रीठा-

कुरजी कहा नहीं देंगे ॥ ये सुनके श्रीगुसांईजी बहोत प्र-
 सन्न भये ॥ और वा पारधीकुं शरण लियो और श्रीगोवर्द्ध-
 ननाथजीके दर्शन कराये ॥ और वाके माथे भगवत्सेवा
 पधराई ॥ और कृपा करी तब वह पारधी मार्गकी रीती-
 प्रमाणे सेवा करन लग्यो ॥ तब थोड़े दिन पीछे श्रीठाकुर-
 जी वा पारधीकुं अनुभव जतावन लगे ॥ और तब बहुत
 दिन वा पारधीनें सेवा करी ॥ और द्रव्य जितनो हतो
 सब श्रीगुसांईजीकुं भेटकर दियो ॥ वे पारधी श्रीगुसांई-
 जीको ऐसो कृपापात्र हतो ॥ वार्ता संपूर्ण ॥ वैष्णव ॥ १८२ ॥
 श्रीगुसांईजीके सेवक एक वैष्णव जानें भैर-
 वकुं तुच्छ गण्यो तिनकी वार्ता ॥ सो वे वैष्णव आगरेसुं
 सामग्रीके दोय गाढाभरके गोपालपूर लावतो हतो ॥ र-
 स्तामें भैरवको मंदिर आयो ॥ वाके पास गाढा ठाढे
 रहे ॥ सो गाढावालाने कही जो इहां दो नारियल च-
 ढावो जब गाढा चलेंगो सब लोग चढावेहें ॥ तब वा वै-
 ष्णवने भैरवके मंदिरमें जायके कही तेनें गाढा क्युं अ-
 टकाये हैं गाढाचलनेदे ॥ नहीं तो गाढानके बैलके ठे-
 काणे तोकुं जोडुंगो ॥ तब भैरव उठके हाथ जोडके ठाढो
 भयो और कही जो मेरी सामर्थ्य तुमारे गाढा अटका-
 यवेकी नहींहिं परंतु तुमारे दर्शनकी अभिलाष मोकुं हती
 और श्रीनाथजीके प्रसादकी अभिलाष है ॥ जासुं इहां
 गाढा ठाढे राखेहें नहींतो श्रीनाथजीके गाढा तीनलो-
 कमें अटकायवेको समर्थ कोई नहींहिं ॥ तब वा वैष्णवनें
 श्रीनाथजीको प्रसाद गांठडीमेसुं काढके भैरवकुं दियो ॥

तब भैरवनें प्रसाद लियो फेर भैरव गाढाकी धुरीमें बैठके एक घंटामें गोपालपुर गाढा पहोँचाय दिये ॥ तब वे गाढाके मनुष्यननें ऐसो जाण्यो विननें नारियल दिये होएंगे ॥ ये बात श्रीगुसांईजीनें सुनी तब श्रीगुसांईनें आज्ञा करी जो भैरवकुं नारियल दियो होयतो ये सब सामग्री छीगई ॥ तब वा वैष्णवनें श्रीगुसांईजीके आगेँ आयके यथार्थ वीनती करी ॥ जो महाराज भैरवनें महाप्रसाद माग्यो और मैनें दियो नारियल दिये नहींहैं ॥ और गाढामें जोडके भैरवकुं लायोइं सो अबी वह भैरव बहार ठाडोहै ॥ श्रीनाथजीके मंगलाके दर्शन करके जायगो ॥ ये सुनके श्रीगुसांईजी बहोत प्रसन्न भये और सामग्री भंडारमें धरवेकी आज्ञा दीनी ॥ -सो वे वैष्णव श्रीगुसांईजीको ऐसो कृपापात्र हतो ॥ जिननें भैरवकुं तुच्छ जाण्यो ॥ वार्ता संपूर्ण ॥ वैष्णव ॥ १८३ ॥ ❀ ॥ ॥ ॥

श्रीगुसांईजीके सेवक एक वैष्णव सूरतमें रहेतो तिनकी वार्ता ॥ सो वे वैष्णव प्रतिवर्ष ब्रजयात्रा करवेकुं आवते ॥ और श्रीनाथजीके दर्शन करके और ब्रजयात्रा करके फेर जाते ॥ और ब्रजकी हांडी राखते सो नित्य बेक्किवे राखते रसोई करके धोयके और कामलमें बांधके वृक्षसुं लटकावते ॥ एकदिन श्रीगुसांईजीसों वैष्णवननें कही जो ये वैष्णव अनाचार मिलावेहै ॥ तब वा वैष्णवकुं श्रीगुसांईजीनें पूछी जोये सब कहा कहे है ॥ तब वा वैष्णवनें श्रीगुसांईजीसों वीनती करी हे महाराज ये समरे बाहर दृष्टि है ॥ ब्रजके स्वरूपको नहीं जानें हैं

तो हुं आपकी कृपातें इनकुं ब्रजको स्वरूप दिखाउं ॥
 इतनो कहके वा वैष्णवनें सबनकुं ब्रजको स्वरूप दि-
 खायो ॥ तब सब वैष्णव देखेंतो सब ब्रज सुवर्णमय
 दीखवे लग्यो ॥ तब सब वैष्णवनकुं श्रीगुसांईजी कहने
 लगे ॥ याने ब्रजकी रजको स्वरूप जान्यो है ॥ जासुं
 याकुं कछु दोष नहीं है ॥ ये सामर्थवान हैं ॥ याकुं कछु
 बाधा नहीं है तुम ऐसे मत करो ॥ ये सुनके सब वैष्णव
 बाकुं धन्य धन्य कहनलगे ॥ सो वे वैष्णव श्रीगुसांई-
 जीको ऐसो कृपापात्र हतो ॥ जिननें ब्रज सुवर्णमय दि-
 खाय दीनी ॥ ब्रजकी रजकी हांडी सुवर्णमय जानके
 काढते न हते ॥ ऐसे परम भगवदीय हते ॥ वार्ता संपूर्ण
 वैष्णव ॥ १८४ ॥ ❀ ॥ ॥ ॥ ॥

श्रीगुसांईजीके सेवक एक राजाकी वार्ता ॥
 सो वे राजा श्रीगुसांईजीके सेवक हते ॥ सो वे राजा श्री-
 ठाकुरजीकी सेवा भलीभांति सुं करते ॥ तब वैष्णव बहोत
 आवते ॥ तब वैष्णवनसुं राजा पूछतो जो गृहस्थको धर्म
 आछोके विरक्तको धर्म आछो ॥ तब वे राजा सबकुं
 पूछतो परंतु राजाको संदेह नहीं जातो ॥ जैसे बने तैसें
 वैष्णव उत्तर देजाते हते ॥ परंतु फेर पूछते ॥ एकदिन
 अद्भुतदास भगवदिच्छातें वा राजाके घर आये तब वा
 राजानें अद्भुतदासजीसुं पूछी ॥ तब अद्भुतदासनें कही
 जो दोचार दिनमें इहां रहुंगो और तुमकुं कहूंगो ॥ परंतु
 तुम घोडापर बैठके या गामसुं दूर पांच सातकोश एक
 वैष्णवहैं विनकुं मिल आवो ॥ तब वे राजा घोडापर

बैठके वा वैष्णवकुं मिलखे चलयो ॥ रस्तामें जाते पवन
चलयो ॥ सो घोड़ा कहुंको कहुं चलयो गयो ॥ रात परी
तब वह राजा उहां एक वृक्षके नीचे बनमें रह्यो ॥ तब
वा वृक्षके ऊपर होलाहोली दो पक्षी रहेते हते सो बचा-
नके लीयें फल लाये हते और वा वृक्षपर फल बहोत
हते ॥ फेर वा राजाकुं आयो देखके वा होलानें कही जो
आपने घर पावनो आयो है सो याकुं ये फल देउंगो ॥
और दोनो स्त्री पुरुषननं विचार करके फल दे दिये और
वृक्षके ऊपर जायके सर्व फल पाढडान्ये ॥ तब वा राजानें
फल खाये ॥ और होलाहोली मृखे रहे और सवारो भयो
तब राजा घोड़ापर बैठके चलयो ॥ सो एक नगर
आयो वामें गयो उहां जायके देखे तो सब राजा
येकठे भयेहैं और वा गामके राजाकी बेटीको स्वयंवर
हतो सो तेलकी कढ़ाई चढ़ाई हती ॥ वामेंसुं मुदरी जो
काढे वाकुं कन्या देनी ॥ ऐसे वा राजानें नेम लियो
हतो ॥ सो ताते तेल ठंडो करके अथवा कोई दूसरे उपा-
यसुं उघाडो हात डारके मुदरी काढी चहीय ॥ नीचे
आंच बलती हती ॥ सो तेल ठंडो होय नहीं शकतो ॥
जासुं सब राजा अटकरहे हते ॥ विनमें वो राजाहुं बैठ
रह्यो ॥ इतनेमें अद्भुतदासजी आये और वा तेलकी क-
ढ़ाईमें हाथडारके मुदरी काढलीनी ॥ तब सब लोग देखके
चकित होयगये ॥ और वा गामके राजानें कही तुम मेरी
कन्या परणो ॥ तब वा अद्भुतदासनं कहीजो ये राजा अमके
गामको है याकुं तेरी बेटी परणायदेवो ॥ फेर अद्भुतदास

चले गये ॥ तब वो राजा विवाह करके अपने घर आयो फेर अद्भुतदास मिल्ये तब अद्भुतदासनें वा राजासुं पूछी तुम घोड़ेपर बैठके गये हते सो कहा कहा देखे ॥ तब वा राजानें सब बात कही ॥ तब अद्भुतदासजी बोले जो वो होली होलामें गृहस्थके धर्म हते ॥ गृहस्थको ऐसेही चाहिये ॥ जो घरमें आवे विनकुं सुखे न राखे ॥ आप सुख्यो रहे और विरक्तके धर्म ऐसे हैं जानें तेलमेंसुं सुदरी काढी हती ऐसे चाहिये और तुमको राजाकी कन्या परणाय दीनी ॥ आप दुःखपायके औरकुं सुखी करे सो ये दोनो धर्म तुमकुं दिखाय दिये ॥ तब वे राजा मुनके बहोत प्रसन्न भयो और भली भांति सुं श्रीगुसांईजीकी सेवा करन लग्यो ॥ और श्रीठाकुरजीकी सेवा करन लग्यो ॥ वे राजा श्रीगुसांईजीके ऐसे कृपापात्र हते जाकुं तत्काल विश्वास आय गयो ॥ वार्ता संपूर्ण ॥ वैष्णव ॥ १८५ ॥

॥ श्रीगुसांईजीके सेवक जीवनदास ब्राह्मणकी वार्ता ॥ सो लाहौरमें रहेते हते सो वे जीवनदास हरिद्वारमें श्रीगुसांईजीके सेवक भये हते ॥ तब श्रीठाकुरजीकी सेवा पधरायके लाहौरमें रहेते और भगवत्सेवा करते और कहू बाहार जाते आवतेनहीं ॥ सो वाकी निंदा ज्ञातीके लोग वृथा करते ॥ ऐसे बहुत वर्ष पीछे वा जीवनदासकी देह छूटी ॥ फेर लोगननें वाकुं अग्नि संस्कार कन्यो ॥ सो एक वृक्षके नीचे कन्यो ॥ और वा वृक्षके ऊपर दो प्रेत रहेते हते ॥ सो एक प्रेत तो वाईसमय कहू गयो हतो ॥ और एक प्रेत वा वृक्षपर बैठो हतो ॥

सो वा प्रेतकुं जीवनदासकी चिताको घूवां लख्यो ॥ तब प्रेतयोनिसे छुटके और दिव्य देह पायके वो प्रेत स्वर्गमें गयो ॥ और दूसरो प्रेत आयो और वाने ये बात जानी तब वो रोवन लख्यो और हाय हाय करके पुकारन लख्यो ॥ तब वा रस्ता ऊपर एक पंडित ब्राह्मण जातो हतो ॥ तब वा पंडितने वा प्रेतकुं रोवतो देख्यो तब वा पंडितने पूछी जो तूं कोन है ॥ और क्युं रोवे है तब वा प्रेतनें कही जो ब्राह्मण तूं मेरी बात सुन ॥ मैं प्रेतहूं और एक प्रेतको उद्धार भयो है ॥ सो बात कही ॥ और मेरो उद्धार नहीं भयो यातें दुःखपावुं ॥ तब वा ब्राह्मणनें कही ये बात साची कैसे मानी जाय ॥ तब वा प्रेतनें कही जो तूं या चितामें दोचार लकड़ी डारदे सो वा चितामेंसे घूवां मोकुं लगोगो तो मेरो उद्धार हो जायगो ॥ तब वा ब्राह्मणनें वैसेही कय्यो ॥ तब वो प्रेत जयजय करतो दिव्यदेह धरके वा जीवनदासकी स्तुती करतो स्वर्गमें गयो ॥ तब वा ब्राह्मणनें देख्यो वा ब्राह्मणकुं बडो विस्मय भयो ॥ तब गाममें आयके वा ब्राह्मणनें खबर काढी जो आज कोण मय्यो हतो जब वाकुं खबर परी जीवनदासकी देह छुटी है ॥ तब वा ब्राह्मणनें खबर काढी कोनसे धर्ममें हतो ॥ तब वैष्णव हतो ऐसी खबर परी ॥ तब वह ब्राह्मण अपने कुटुंबसहित श्रीगोकुलमें जायके वैष्णव भयो ॥ सो वे जीवनदास श्रीगुसाईजीके ऐसे कृपापात्र हते ॥ जिनकी चिताके घूवां लागेतें प्रेतनकी दिव्य देह भई ॥ वार्ता संपूर्ण वै० ॥ १८६ ॥

॥ श्रीगुसांईजीके सेवक एक लाहोरको पंडित
 तिनकी ॥ सोवे ब्राह्मण जीवनदासके चरित्र देखके श्री-
 गोकुल आये ॥ और कुटुंबसहित श्रीगुसांईजीके सेवक भ-
 ये ॥ और नवनीतप्रियाजीके दर्शन किये ॥ और श्रीनाथ-
 जीके दर्शन किये ॥ और श्रीगुसांईजीके मुखारविंदतें पु-
 ष्टिमार्गको सिद्धांत समझयो ॥ और श्रीठाकुरजीकी सेवा
 पधरायके और ब्रजयात्रा करके फेर अपने देशमें गये और
 मलीभांतिमुं मार्गकी रीतीप्रमाणें सेवा करन लये ॥ एक
 दिन एक मनुष्य हत्यारो भिक्षा मागवे आयो ॥ सो
 वह ब्राह्मण हतो ॥ तब वानें पुकाऱ्यो राधाकृष्ण रा-
 धाकृष्ण तब वे वा ब्राह्मण वैष्णवने वाहुं बुलायके भो-
 जन करायो ॥ तब वा पंडितको ज्ञातीके लोग और दूसरे
 पंडित सब एकठे होयके वा वैष्णव पंडितकुं कही तुमनें
 हत्यारेको स्पर्श क्युं कऱ्यो ॥ तब वा पंडितनें कही यानें
 कृष्णनाम लियो है ॥ याकी हत्या रही नहीं ॥ तब दिने
 पंडितनें कही जो हम ये बात नहीं मानें तब वा वैष्णव
 पंडितनें कही तुम शास्त्र पढ़े हो ॥ परंतु तुमरो हीयेको
 अंधारो गयो नहींहिं सो वाकुं दूर करो तब साच सा-
 नोंगे ॥ तब पंडितनें कही जो हरिद्वारमें श्रवणनाथ म-
 हादेवजी हैं सो वाको नंदीश्वर याके हातको खावेतो
 साचो मानेंगे ॥ तब वे वैष्णव पंडित और सब दूसरे पं-
 डित मिलके हरिद्वार आये ॥ और नंदीश्वरके आगे वा
 हत्यारेनें प्रसादको थाल धरयो और वैष्णव पंडित बोल्यो
 जो याकी हत्या कृष्णनाम लियेमुं गई होवे तो याके

हाथको भोजन करो तब वह नंदीश्वर महादेवजीको वा-
हनसो महाप्रसाद स्थायवे लगगयो ॥ तब वह सब पंडित
वा वैष्णव पंडितके पावन परे ॥ सो वे ब्राह्मण श्रीगुसांई-
जीको ऐसो कृपापात्र हतो ॥ जिनके कहेतें नंदीश्वरनें तुर्त
भोजन किये ॥ और जिनके दर्शनसुं हत्यारेकी हत्या
गई सो वे पंडित वैष्णव ऐसे श्रीगुसांईजीके कृपापात्र
भये ॥ वार्ता संपूर्ण ॥ वैष्णव ॥ १८७ ॥ ❀ ॥

श्रीगुसांईजीके सेवक विरक्तवैष्णवकी वार्ता ॥
सो वे विरक्त वैष्णव चुकटी मागके निर्वाह करतो ॥ और
नित्य श्रीगिरिराजकी परिक्रमा करतो ॥ फेर बाके पास
दोय वैष्णव दूसरे आयके रहे ॥ सो वे विरक्त वैष्णव चु-
कटी मागके रसोई करके और दोनोनकी पातर धरते ॥
एकदिन वा विरक्त वैष्णवकुं श्रम बहोत भयो और थाक
गयो तब बाकी श्रम श्रीनाथजी सहन न कर सके ॥ तब
बिन दोनो वैष्णवनकुं श्रीनाथजीनें आयकेकही जो तुम
दोनो रसोई करो और ये विरक्त वैष्णव चुकटी माग
लावेगो ॥ तब वे दोनो रसोई करन लागे ॥ और तीनोजने
हिलमिलके महाप्रसाद लेते ॥ सो विरक्तवैष्णव श्रीगुसांई-
जीके ऐसो कृपापात्र हते ॥ जिनको श्रम श्रीनाथजी सहन न
सके ॥ वार्ता संपूर्ण ॥ वैष्णव ॥ १८८ ॥ ❀ ॥

श्रीगुसांईजीके सेवक भीमसेनराजाकी वार्ता ।
सो वे भीमसेनराजाकुं और भीमसेनकी स्त्रीकुं पूर्व ज-
न्मको ज्ञान हतो और भीमसेनराजाकुं श्रीठाकुरजीनें
स्वप्नमें कही जो तुम तीर्थयात्रा जावों ॥ और तुमकुं जो

पूर्वजन्मकी बात कहे दिनके शरण जइयो ॥ ये सुनके
 भीमसेनराजा बड़ो प्रसन्न भयो ॥ तब भीमसेनराजा ती-
 र्थकरनेकुं चलयो ॥ तब जा तीर्थमें जाय उहां कोई पं-
 दित अथवा महापुरुष होवेतो वाकुं तुर्त जायके मिलते ॥
 परंतु पूर्वजन्मकी बात कोई कहेतो नहीं ॥ फेर बहुत तीर्थ
 करके राजा भीमसेन श्रीगोकुल आये और आयके
 श्रीगुसांईजीके दर्शन किये ॥ सो साक्षात् पूर्णपुरुषोत्तमके
 दर्शन भये ॥ तब भीमसेनने दंडवत करी तब श्रीगुसां-
 ईजीने आज्ञा करी जो भीमसेनजी तुम प्रसन्न हो ॥ और
 तुमकुं पूर्वजन्मकी बात पूछनीहै सो हम कहेंगे ॥ तब भी-
 मसेनराजाने श्रीगुसांईजीकुं हाथ जोड़के वीनती करी ॥
 जो महाराज बात कहेवेकी कुछ जरूर नहींहै ॥ आप ह-
 मकुं शरण लेवें ॥ तब श्रीगुसांईजीने श्रीनवनीतप्रियाजीके
 सन्निधान दोनो स्त्रीपुरुषकुं नाम निवेदन कराये ॥
 तब राजा भीमसेन श्रीगुसांईजीकी बैठकमें गये ॥ और
 एकांतमें श्रीगुसांईजीने भीमसेनके पूर्वजन्मकी बात कही ॥
 जो आगले जन्ममें तुम कुणबी हते और खेती करते हते ॥
 और एक बनियाकी स्त्रीको और तुमारो स्नेह हतो ॥ तब वे
 स्त्री तुमारेपास खेतमें आवती हती ॥ सो वा खेतमें खोदतें
 एक भोंयरो निकस्यो ॥ वा भोंयराकुं वा स्त्रीने और तु-
 मने झाड़के सफा कस्यो ॥ वामेसुं एक ठाकुरजीको स्व-
 रूप निकस्यो और वा स्वरूपकी सेवा तुम दोनोमिलके
 करन लगे ॥ फेर एकदिन अकस्मात् भोंयरो पढगयो ॥
 जब तुम दोननकी देह छूटी ॥ तब तुमकुं यमदूत लेवेकुं
 आये फेर विष्णुदूतनने आयके तुमकुं छुड़ाये ॥ तब य-

मदूतननें कही जो यानें व्यभिचार कियो है याकुं यम-
लोकमें ले जाएंगे ॥ तब विष्णुदूतननें कही जो यानें भ-
गवदमंदिर मार्जन कियो है ॥ तब यमदूत तुमकुं छोड-
गये ॥ तब तुमनें राजवंशमें जन्म लियो और यास्त्रीनेहु
राजवंशमें जन्म लियो और फेर स्वकीयत्व भावसुं तु-
मकुं प्राप्त भई ॥ अब तुम भगवत्सेवा करौ ॥ फेर जन्म
नहीं लेने पढ़ेंगे ॥ ये सुनके राजा भीमसेन बहोत प्रसन्न
भयो ॥ और आगले जन्मकी सब बात मिलगई ॥ तब
राजा भीमसेन श्रीठाकुरजीकी सेवा पधरायके और श्री
नाथजीके दर्शन करके और पुष्टिमार्गकी रीती शीखके
फेर अपने देशमें आये ॥ और श्रीठाकुरजीकी सेवा भ-
लीभांतिसुं करन लगे ॥ सो वे भीमसेन श्रीगुसाईंजीके
ऐसे कृपापात्र हते ॥ वार्ता संपूर्ण ॥ वैष्णव ॥ १८९ ॥

श्रीगुसाईंजीके सेवक उत्तमदासकी वार्ता ॥
सो उत्तमदास गुजरातमें रहेते हते ॥ और उत्तमदासके
पास द्रव्य नहीं हतो ॥ भगवदिच्छातें विनके पास थोडो
द्रव्य भयो ॥ तब उत्तमदासनें हजार रुपैयाको परका-
लो लियो और श्रीगोकुल जायके श्रीगुसाईंजीकुं वीनती
करके श्रीनाथजीकुं जरीको परकालो अंगिकार करा-
यो ॥ और श्रीनाथजीके दर्शन करके ॥ फेर गुजरातमें
आये और परकालो लियो जाको करज रद्दो सो छुका-
यो ॥ तब घरमें उत्तमदासकुं श्रीठाकुरजीनें कही जो
मोकुं परकालाकी खोट नहीं हती तूं क्युं इतनो श्रम क-
रके लेगयो ॥ तब उत्तमदासनें वीनती करी जो महाप्रसु

आपकुं सर्व सामर्थ्य है ॥ और सर्वत्र सर्व वस्तु तैयार हैं ॥ जो कछु आप चाहें सो सब ठेकाने होय शके ॥ परंतु दासको धर्म सेवा विना और नहींहैं ॥ जासु हमारो अंगिकार कौनसी रीतिहुं होवें ॥ तब ये सुनके श्रीठाकुरजी बहोत प्रसन्न भये ॥ और परकाला सहित श्रीठाकुरजीनें उत्तमदासकुं घरमें दर्शन दिये ॥ सो वे उत्तमदास ऐसैं कृपापात्र हते ॥ वार्ता संपूर्ण ॥ वैष्णव १९० ॥ ॐ ॥

श्रीगु० सेवक जनभगवानदास गौर रजपूतकी वार्ता ॥ सो वे जनभगवान ब्रजमें फिय्यो करते और श्रीगुसाईंजीकी कथा सुनते और अहर्निश भगवल्लीलाको विचार करते और श्रीगुसाईंजीके सेवक विना दूसरेहुं भाषण नहीं करते ॥ और कोईदिन श्रीजीदार कोईदिन श्रीगोकुल फिय्यो करते ॥ और नये पद बनायके गावते ॥ एकसमय जन्मअष्टमी उपर श्रीनाथजीके दर्शन करवेकू गये ॥ तब एक पद बनायके गायो ॥ सो पद ॥ ॥ राग सारंग ॥ ग्वालवधार्दमागनआये ॥ गोपीगोरससकललीयेसंगसबहि आयसिरनाये ॥ १ ॥ अबयेगर्वगिनत नहिकाहुकरियंतमनकेभाये ॥ जहां नंदवैठेनांदीमुखजहांगहनकोधाये ॥ २ ॥ बरनवरनपायेपटब्रजजनउरआनंदनसमाये ॥ जनभगवानजशोदारानीजगकीजीवनजाये ॥ ३ ॥ सो यह वधार्द जनभगवानदासनें गाई ॥ सो श्रीगुसाईंजी ये पद सुनके बहोत प्रसन्न भये ॥ सो ऐस अनेक पद जनभगवानदासनें गाये ॥ सो वे जनभगवानदास श्रीगुसाईंजीके ऐसैं कृपापात्र हते ॥ वाता संपूर्ण ॥

॥ वैष्णव ॥ १९१ ॥ ॐ ॥ ॥ ॥ ॥

श्रीगुसांईजीके सेवक एक राजाकी वार्ता ॥
 जिनके गाममें साचोराकुं मार डाल्यो सो जीवतो भयो ॥
 सो वे साचोरा दोनो भाईनकुं लेके वह राजा श्रीगोकुल
 गयो ॥ और जायके श्रीगुसांईजीके दर्शन किये ॥ सो
 साक्षात् पूर्णपुरुषोत्तमके दर्शन भये वा राजानें हाथजो-
 डके वीनती करी जो कृपाकरके मोकुं शरणलीजिये ॥ तब
 श्रीगुसांईजीनें आज्ञा करी जो तुम थोड़े दिन श्रीगोकु-
 लमें रहो पाछे तुमकुं विचार करके शरण लेंवेंगे ॥ फेर
 श्रीगुसांईजीनें श्रीनाथजीकुं पूछी जो या राजानें साचोरा
 भक्तकुं मरायो सो याकुं शरण लियो चाहियेके नहीं ॥
 तब श्रीनाथजीनें आज्ञा करी जो भक्तको अपराध भक्त
 क्षमा करे ॥ सो या साचोराको अपराध साचोरानें क्षमा
 कन्यो ॥ तब याकुं शरण लेंवेंमें चिंता नहीं ॥ अब याको
 अपराध रह्यो नहीं ॥ फेर श्रीगुसांईजी श्रीगोकुल पधारे
 और वा राजाकुं शरण लिये ॥ फेर वे राजानें श्रीगुसांई-
 जीकुं वीनती करके और सेवा पधराई और श्रीगुसांई-
 जीसुं वीनती करी जो आप कृपा करके मेरे गाममें पधारे
 और सब गामकुं वैष्णव करें ॥ और ये साचोरा दोनो
 भाई कोईदिन मोकुं त्याग न करें ये कृपा करो ॥ तब
 श्रीगुसांईजीनें वा राजासुं कही ये दोनो भाई तुमकुं त्याग
 नही करेंगे परंतु तुम इनको त्याग मत करियो ॥ ये सु-
 नके वे राजा बहोत प्रसन्न भयो ॥ और श्रीठाकुरजी पध-
 रायके और साचोरा दोउ भाईनकुं संग लेके अपने देश-

में आयो ॥ और आयके भगवत्सेवा करन लगे ॥ जैसे वे दोनो भाई कहे तैसे राजा करतौ ॥ तब वा राजाशु श्रीनाथजी सानुभाव जतावन लगे ॥ सो वे राजा श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १९२ ॥ श्रीगुसांईजीके सेवस रेडाउदंबर बाह्यण ति० सो वे रेडा कपडबनमें रहेते हते ॥ और अबधूतदशामें रहेते हते ॥ सो श्रीगुसांईजी गुजरात पधारे ॥ तब रेडानें नाम निवेदन किये ॥ फेर श्रीठाकुरजी पधरायके रेडा सेवा करन लग्यो ॥ फेर थोडेदिन पीछे रेडा श्रीगोकुल जायके श्रीगुसांईजीकी खवासी करन लग्यो ॥ एक ब्राह्मणी डोकरी रहेती हती ॥ वाके घर रेडानें श्रीठाकुरजी पधराये और उहां प्रसाद लेते हते ॥ एकदिन रमणरेतीमें श्रीठाकुरजीने रेडाकुं दर्शन दिये तब देखके रेडा देहानुसंधान खूलगयो ॥ और श्रीठाकुरजी प्रसादीमाला रेडाकुं पेहेराय गये ॥ सो रेडा तो उहां आखीरात पड़ेरहे ॥ दूसरे दिन खबर परी जो रेडा रमणरेतीमें पन्योहै ॥ तब श्रीगुसांईजी रमणरेतीमें पधारे और रेडाकुं चरणस्पर्श कराये तब रेडाकुं देहानुसंधान भयो ॥ तब श्रीगुसांईजीने आज्ञा करी अवी लीलामें प्रवेश करवेकी ढीलहै ॥ तब रेडा पाछें श्रीगोकुल आयो ॥ एकदिन रेडा श्रीगुसांईजीकुं पंखा करते हते ॥ तब श्रीगुसांईजी जागे और रेडाकुं आज्ञा करी तुम देशमें जायके विवाह करौ ॥ तब रेडानें कही मेरे पास द्रव्य नहींहि ॥ कौन कन्या देवेगो ॥ तब श्रीगुसांईजीने आज्ञा करी श्रीठाकुरजीने सब सिद्ध कर राख्योहै ॥

वाईसमय रेडा आज्ञा लैके चल्यो सो देशमें आयो ॥
 कपडवनपास एक संजाई गाम है ॥ वां गाममें रेडा मु-
 काम कियो ॥ सो वा संजाईमें एक उदंवर ब्राह्मण रहेतो
 हतो ॥ द्रव्यपात्र हतो वाकी एक वारेंवर्षकी बेटी हती ॥
 सो वा बेटीकुं सर्पनें काटी हती सो वे मरवे लगी ॥ तव
 वा ब्राह्मणनें गामके बाहेर खबर काढी कोई आछी कर
 जीवायदेवे तो आछो ॥ तव रेडानें वा ब्राह्मणकुं कही
 मेरे पास एक उपाय है तव वा ब्राह्मणनें कही सो उपाय
 करो ॥ तव रेडानें चरणासृत दियौ और कही तुम याके
 मोढामें डारो तो बचजायगी सो वाके मोढामें तो कछ
 जातो नहीं हतो वाके होठनपर चोपडयो ॥ तव वा छो-
 करीको विष उतरगयो ॥ तव वा छोकरीकी मानें बाधा
 लीनी हती जो ये छोकरी जीवेगी तो कोई निष्कचनकुं
 देउंगी ॥ तव वा ब्राह्मणनें छोकरी जीवती देखके रेडाकुं
 पूछी तुम कोण जातहो ॥ तव रेडानें आपणी जात बता-
 ई ॥ तव वह कन्या रेडाकुं दीनी सो रेडा परण्यो और
 श्रीठाकुरजीकी सेवा करन लग्यो ॥ वा रेडाकुं भगवत्से-
 वा करते देखके सब लोग बहुत राजी होवें ॥ तव रेडाको
 एक पुत्र भयो ॥ फेर कोई दिन वा देशमें श्रीगोकुलना-
 थजी पधारे ॥ तव रेडानें आपनी जातकुं और यजमान
 नीमावनीयनकुं श्रीगोकुल नाथजी के सेवक कराये सो
 अब सुधी श्रीगोकुलनाथजीके सेवक होवें हैं ॥ फेर वह रे-
 डाको बेटा बढो भयो ॥ तव रेडा श्रीठाकुरजी पधरायके
 श्रीगोकुल जाय रहै और श्रीगुसाईंजीकी सेवा करन लगें

(३२६) दोसौबावन वैष्णवकी वार्ता.

॥ फेर वा रेडाकुं रास लीलाके दर्शन होवें ॥ कोई दिन बाललीलाके दर्शन होवें ॥ ऐसे अनेक प्रकारके दर्शन श्रीठकुरजी रमणरेतीमें रेडाकुं देते हते सो रेडा श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १९३ ॥

॥ श्रीगुसांईजीके सेवक पर्वतसेन हते तिनकी वार्ता ॥ सो वे पर्वतदासके मनमें ऐसो हतो जो श्रीगुसांईजी श्रीनाथजीके साक्षात् स्वरूप हैं ॥ परंतु ऐसे दर्शन होवे तो बहुत आछो ॥ एक दिन बैठकमें श्रीगुसांईजी बीराजते हते और पर्वत सेनकु आज्ञा करी जो चंदन लगावो तब वा पर्वतसेननें श्रीगुसांईजीकुं चंदन समर्प्यो तब श्रीगुसांईजीके रोमरोममें पर्वतसेनकुं श्रीनाथजीके दर्शन भये ॥ तब पर्वतसेननें विचार क्यो मोहुं स्वप्नहैं केकहाहै ॥ तब श्रीगुसांईजीनें आज्ञा करी जो पर्वतसेनजी तुमकुं कहा संदेहहै ॥ तब पर्वतसेननें कही जो आपकी कृपाते सब संदेह मिटथौ ॥ तब वा पर्वतसेनके मनके संदेह दूर भये ॥ और लीलाको अनुभव भयो ॥ और नवे पद करके गायवे लगे ॥ सो ऐसे करके नवे पद गाये ॥ सो वे पर्वतसेन श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १९४ ॥ * ॥ ॥

श्रीगुसांईजीके सेवक सासु बहु तिनकी वार्ता ॥ सासुकी नाम जमनाबाई और बडुकी नाम रेवाबाई हतो सो बडु भोरी बहुत हती ॥ एक समय जमनाबाईको बेटा गाम जायवे लग्यो ॥ और मासुं कही जो दोचार दिनमें श्रीगुसांईजी पधारंगे ॥ याकुं नाम निवेदन कर-

वाईयो ॥ ऐसे कहेके वाकी बेटा परदेश गयो ॥ तब श्रीगुसांईजी पधारे ॥ तब वे जमनावाई बहूकु लेके श्रीगुसांईजीके दर्शनकु गई और श्रीगुसांईजीकु वीनती करी ॥ याकुं नाम सुनावो ॥ और बहूसुं कही जो श्रीगुसांईजी कहें सो कहियो ॥ तब श्रीगुसांईजीन आज्ञा करी बहू बैठ तोकुं नाम सुनावें ॥ तब बहू बोली बहू बैठ तोकुं नाम सुनावें ॥ ये सुनके श्रीगुसांईजी हंसे और जान्यो जो ये बहूत भोरी है ॥ तब श्रीगुसांईजी उठके वाके पास आयके तीनैं वेर अष्टाक्षरमंत्र कह्यो ॥ और बहूनें अष्टाक्षरमंत्र कह्यो बहूकु अत्यंत भोरी जानके वाईसमय श्रीगुसांईजीने आज्ञा करी याकुं न्हाय लावो ॥ तब न्हाय लाये तब श्रीगुसांईजीने श्रीठाकुरजीकु शृंगार करके निवेदन कराये ॥ और वाकी सासुकुं कही अब श्रीठाकुरजीकी सेवा याके पास कराईयो ॥ तब सासुनें कही ये तो बहूत वावरी है ॥ कहा सेवामें समझेगी ॥ तब श्रीगुसांईजीने आज्ञा करी जो श्रीठाकुरजी आप सिखाय लेवेंगे फेर दूसरे दिन वा जमनावाईकु अटकाव आयो ॥ तब बहूकुं कही तुम सेवा करियो ॥ और मैं नदीपर जाउंहुं सो बहू सेवामें न्हाई और मंदिरमें गई ॥ सो कछु सेवामें समझे नहीं ॥ तब श्रीठाकुरजीकु जगाये ॥ तब श्रीठाकुरजी कृपाकरके सब रीत सेवाकी सिखावन ल्यो ॥ सो झारी उठावनी और माझनी रसोई करनी भोगधरनो शृंगारकरनो और प्रसादी अणप्रसादी अणप्रसादीको विचार श्रीठाकुरजीने वा बहूकुं सब सिखायो ॥

तब वा बहूनें श्रीठाकुरजीसुं कही जो कसरपहेगी तो मेरी सासु खीजेगी ॥ तब मैं रिसायके पीहर जाउंगी ॥ तब श्रीठाकुरजीनें कही जो नहीं खीजेगी ॥ ऐसे चार दिनपर्यंत वा बहूनें सेवा करी ॥ फेर पांचमेंदिन सासु सेवामें न्हाई तब वा जमनाबाईकुं शृंगार करते नौदको झोको आयो ॥ तब श्रीठाकुरजीनें स्वप्नमें कही जो मौकुं शृंगार बहूके हाथको बहुत आछो लगेहे ॥ तब वा जमनाबाईनें बहूकुं बुलायके शृंगार करवे बैठाई ॥ और आप रसोईकी सेवा करनलगी ॥ तब वा बहूसो श्रीठाकुरजी हास्यविनोद करते और सब बातें जतावते ॥ सो वे सासु बहू श्रीगुसांईजीकी ऐसी कृपापात्र हती ॥ वार्ता संपूर्ण ॥ वैष्णव ॥ १९५ ॥ ❀ ॥ ॥ ॥ ॥ श्रीगुसांईजीके सेवक मानकुंवरबाईकी वार्ता ॥ सो वह शेठकी बेटी दशवरषकी विधवा भई ॥ तब थोड़े-दिन पाछे श्रीगुसांईजी गुजरात पधारे ॥ तब वा शेठकी बेटीकुं ब्रह्मसंबंध करायो ॥ और श्रीमदनमोहनजीकी सेवा पधरायदीनी ॥ सो वह शेठकी बेटी मानकुंवरबाई श्रीमदनमोहनजीकी सेवा करन लगी सो वा मानकुंवरनें श्रीमदनमोहनजीकी जन्मसूची सेवा करी ॥ और जन्मसूची श्रीमदनमोहनजी विना कोई स्वरूपके दर्शन किये नहीं ॥ और घरसों बाहेर सेवा छोडके गई नहीं ॥ और श्रीमदनमोहनजी जैसे सबके ठाकुरजी होवेंगे ऐसे मनमें निश्चय करराख्यो हतो ॥ जब वे मानकुंवरबाई साठवर्षकी भई तब वाको पिता भगवच्चरणारविंदमें प-

होंच गयो ॥ तब मनुष्य राखके सेवा करती ॥ फेर एक-दिन एक विरक्त वैष्णव वा गाममें आयो ॥ सीतकालके दिन हते ॥ सो वा मानकुंवरके घरमें उतऱ्यो ॥ तब वा मानकुंवरकुं श्रीठाकुरजीकी झांपी देके तलावपर न्हावे गयो ॥ तब मानकुंवरवाईनें श्रीठाकुरजी जगाये ॥ सो श्रीठाकुरजी वालकृष्णजी हते ॥ और वानें श्रीमदनमोहनजी बिना और श्रीठाकुरजी देखे नहीं हते ॥ तब मानकुंवरवाई ऐसी समझी जो श्रीठाकुरजी ठंडकेलीयें ऐसे सकुचाय गयेहैं ठंड बहुत पड़ेहैं वा वैष्णवनें कछु यत्न राख्यो नहीं ॥ ऐसे विचार करके वाके नेत्रनमेंसुं जल आयगयो ॥ और बहुत मनमें तापभयो ॥ तब अंगीठी लेके और तेलमें अनेक प्रकारके गरम ओषध ढारके और तेलकुं जरायके तातो करके श्रीठाकुरजीके हाथ-पाव मीडवे लगी और मनमें समझी जो श्रीठाकुरजीकुं व्होत श्रम भयोहैं! आप कृपाकरके अपराध क्षमा करो ॥ ऐसी वाकी प्रार्थना और शुद्धभाव देखके श्रीठाकुरजी मदनमोहनजीको स्वरूप होयगये ॥ तब वा डोकरीनें राजभोग धऱ्यो फेर वा वैष्णवनें आयके दर्शन किये ॥ परंतु श्रीठाकुरजीनें गदल ओढे हते ॥ कछु वाकुं समजण नहीं परी ॥ ऐसे करते दशपंधरादिन वो रह्यो ॥ तब वा मानकुंवरवाईनें कही शीतकालके दिन इहां रहो ॥ श्रीठाकुरजीकुं ठंड व्होत लगेहे फेर थोडे दिन वो रह्यो फेर जब फागणमहिना आयो तब चलैकी तैयारी करी ॥ श्रीठाकुरजी पंधरावैके समय वा मानकुंवरसुं वा बि-

रक्तवैष्णवनें झगडो कियो ॥ कही तुमनें मेरे श्रीठाकुरजी पलटायलीये है ॥ जो मेरे श्रीठाकुरजी न देवेंगी तो तेरे साथे प्राण छोड़ुंगो ॥ जब बाईनें कही मैं तो तेरे श्रीठाकुरजी पलटाये नहींहैं तब बहुत झगडा भयो ॥ फेर दोनोजना श्रीगोकुल गये और श्रीगुसांईजीकुं वीनती करी ॥ तब श्रीगुसांईजीनें दोनोनकी बात सुनके तब झांपी श्रीगुसांईजी लेके खोलके श्रीठाकुरजी देखे ॥ और श्रीठाकुरजीनें श्रीगुसांईजीसों कही जो मैं ढोकरीके भावसुं मदनमोहन भयोहूँ ॥ याने कोईदिन और स्वरूपके दर्शन कीये नहींहैं ॥ जासुं वाको भाव शुद्धहै ॥ तब श्रीगुसांईजीनें झगडो चुकाय दियो ॥ वा वैष्णवकुं आज्ञा करी येही श्रीठाकुरजीहैं ॥ तब वा ढोकरीनें कही जो ऐसे श्रीठाकुरजीकुं ठंड मारे हैं ॥ ऐसेनकुं श्रीठाकुरजी पधराय देने नहीं चाहिये ॥ ये सुनके श्रीगुसांईजी हंसै और विचार कियो जो ढोकरीको कैसे शुद्ध भावहै ॥ तब वो विरक्त वैष्णव ढोकरीके पावन पय्यो और कही जन्म-सुधी तुमारे द्वार पय्यो रहंगो ॥ और तुमारी टेहेल करंगो ॥ तब श्रीयसुनाजी पान करके श्रीनाथजीके दर्शन करके फेर अपने देशमें आयके वह ढोकरी सेवा करन लगी ॥ सो वह मानकुंवरबाई श्रीगुसांईजीकी ऐसी कृपापात्र हती ॥ वार्ता संपूर्ण ॥ वैष्णव ॥ १९६ ॥ ॥ ॥ ॥

॥ श्रीगुसांईजीके सेवक माधवदास बडनगरमें रहेते तिनकी वार्ता ॥ वे माधवदास बडे पंडित हते ॥ और अन्यमार्गीय हते ॥ और वैष्णवनकुं टीलवा कहते ॥

एक समय श्रीगुसांईजी वडनगर पधारे ॥ तब पंडितनकी सभा करी ॥ सब पंडितनमें बडे माधवदास हते ॥ सोवे माधवदास सब पंडितनकुं लेके सभामें आये ॥ तब साकार निराकारको वाद भयो ॥ तब श्रीगुसांईजीनें साकार ब्रह्मको प्रतिपादन कियो ॥ और सभामें बहोत विवाद भयो ॥ माधवदासके मनमें जो हतो पुष्टिमार्ग वेदनिर्मुलकहै ॥ सो संदेह निकस गयो ॥ तब माधवदासजी वाही समय श्रीगुसांईजीके सेवक भये ॥ तब और पंडित कहेनलगे जो सबमें मुख्यतो तुमहते ॥ अब काहेकुं वैष्णव भयेहो ॥ तब माधवदासजीनें कहीजो दुराग्रही होवे सो न समझे ॥ परंतु सारवेत्ता होवे तो तुर्त समझे ॥ यासुं भोळुं सर्वोपर पुष्टिमार्ग वेदमें मालम पन्योहै ॥ जासुं मैंनें दुराग्रह छोड दियोहै ॥ तब पंडित सुनके अपने घर गये ॥ और वे माधवदासजी श्रीठाकुरजी पधरायके सेवा करन लगे ॥ और वैष्णवनकी संग करन लगे ॥ वे माधवदासके ऊपर श्रीठाकुरजी वेग प्रसन्न भये ॥ सो माधवदास श्रीगुसांईजीके ऐसे कृपापात्र भये ॥ जिननें दुराग्रह छोडके सुंदर मार्ग पकन्यो ॥ वार्ता संपूर्ण ॥ वैष्णव ॥ १९७॥

॥ श्रीगुसांईजीके सेवक एक कुनवी पटेलकी वार्ता ॥ सो गुजरातमेसुं एकसाथ श्रीगोकुल जातो हतो ॥ वाके संग कुनवी वैष्णव चल्यो ॥ मेहनत मजुरी करके रस्तामें वैष्णवनके इहां प्रसाद लेतो ॥ जब गोपालपुर आठ कोस रह्यो तब सब वैष्णवननें गांठडीमेसुं भेट काढराखी ॥ तब वा पटेलकुं चिंता भई जो मैं कहा भेट करूँ ॥

तब घासमें शंखावलीकी लता हूती सो वानें देखी ॥ तब
 फूल लेके माला गुंथी ॥ और भीजे वस्त्रमें लपेटी ॥ और
 लेके सबसुं आगे चल्यो ॥ मनमें विचार कियो ये माला
 कुमलाय न जाय तो बहोत आछो ॥ शृंगारको समों श्री-
 नाथजीको भयो ॥ तब श्रीनार्थजीनें श्रीगुसांईजीसुं कही
 एक पटेल माला लेके आवे है ॥ सो वाके अंतःकरणमें
 ताप बहोत है ॥ वे माला आवेगी तब मैं राजभोग
 अरोगुंगो ॥ तब श्रीगुसांईजीनें आपकी अस्वारीको
 घोड़ा एक अस्वार बैठायेके पठायो सो घोड़ा एक घं-
 टामें १२ कोस जातो हतो ॥ सो वे अस्वार जायके वा
 पटेलकुं लायो ॥ और माला श्रीनाथजीनें अंगिकार करी
 और वा पटेलनें राजभोगके दर्शन किये ॥ श्रीनाथजीकी
 ये लीला देखके सूरदासजीनें कीर्तन गायो ॥ सो पद ॥
 श्याम गरीबनहींके गाहक ॥ दीनानाथहमारेठाकुरसा-
 चीप्रीतनिवाहक ॥ १ ॥ कहाविदुरकीजातपातकुल प्रेम-
 प्रीतकेलायक ॥ कहासुदामाकेधनद्वतो ॥ साचीप्रीतकेचाहक
 ॥ २ ॥ कहापांडवघरकीठकुराईअर्जुनरथकेवाहक ॥ सूर-
 दाससठतातेहरिभज आरतदुःखकेदाहक ॥ ३ ॥ ये पद
 सूरदासजीनें गायो ॥ ये सुनके श्रीनाथजी और श्री-
 गुसांईजी बहोत प्रसन्न भये ॥ और वा पटेलनें श्रीनाथ-
 जीकुं माला पेहेरी देखके अपनी हियो सिरायो और
 मननें जानी जो श्रीनाथजीनें मेरी करी माला अंगीकार
 करीहै ॥ सो वे पटेल श्रीगुसांईजीकों ऐसो कृपापात्र हतो ॥
 जिनकी आरति श्रीनाथजी सही न सके ॥ वार्ता संपूर्ण

॥ वैष्णव ॥ १९८ ॥ ॐ ॥ ॥ ॥ ॥
 श्रीगुसांईजीके सेवक लाडवाई तथा धारवाई-
 की वार्ता ॥ सो वे लाडवाई और धारवाई दोनो वेहेन
 हती ॥ मानिकपुर चित्रकूट पास दशकोस है सो उहां
 लाडवाई और धारवाई श्रीगुसांईजीकी सेवक भई ॥ तब
 वे लाडवाई और धारवाई श्रीठाकुरजी पधरायके सेवा
 करन लगी ॥ तब लाडवाई जो कोई वैष्णव आवे तिनकी
 टेहेल भलीभांतिसों करन लगी ॥ और ऐसैं करत करत
 लाडवाई और धारवाई वृद्ध भई सो सब द्रव्य नव लक्ष
 रुपैया एकठे करके श्रीगोकुल गई ॥ और श्रीगुसांईजीसुं
 वीनती करी जो ये द्रव्य अंगिकार करो ॥ तब श्रीगुसां-
 ईजीनें जान्यो ये द्रव्य आसुरी है और दुःख दायक है ॥
 सो अंगिकार नकियो फेर दश पंदर वर्ष पीछे श्रीगोकुल-
 नाथजी भूतलपर विराजत हते ॥ फेर लाडवाईनें श्रीगो-
 कुलनाथजीकुं द्रव्य आसुरी जाणके अंगिकार न कियो ॥
 तब श्रीगोकुलनाथजीके अधिकारीनें श्रीगोकुलनाथजीके
 पूछे विना एक छातमें बिछायके उपर कांकर डरायके
 चूनो लगाय दियो सो वा छातमें द्रव्य रह्यो आयो ॥ फेर
 साठ वर्ष पीछे औरंगजेब बादशहकी छलमीके समयमें
 म्लेच्छलोक लुटवेकुं आये तब श्रीगोकुलमेसुं सब लोग
 भागगये ॥ और मंदिर सब खाली होय गये कोई मनुष्य
 गाममें रह्यो नहीं ॥ तब विन म्लेच्छननें वे छात खोदी ॥
 सो नवलक्ष रुपैयानको द्रव्य निकस्यो ॥ तब गाममें
 जितनें मंदिर हते सब मंदिरनकी छात खुदायदारी ॥ सो

आसुरी द्रव्यके संगतें सब गोकुलको छांत खुदाई सो वे
 लाडवाई धारवाई श्रीगुसांईजीके सेवक ऐसे हते ॥ जिन-
 की बुद्धि आसुरी द्रव्य आसुरी द्रव्यके प्रभावते फिरी नहीं
 और भगवद्धर्म छोडे नहीं और जितने द्रव्यमें अनर्थ हैं
 सो विनकुं बाधा न कर सके ॥ भगत्सेवा करती रही ॥
 भगवच्चरणारविंदमें जिनके चित्त है विनकुं कोई बाधा
 नहीं कर सके ॥ वार्ता संपूर्ण ॥ वैष्णव ॥ १९९ ॥ ❀

श्रीगुसांईजीकेसेवक दोय वैष्णव जिनने ईट-
 पर अक्षर किये तिनकी वार्ता ॥ सो एक वैष्णव एक गाममें
 रहेतो हतो ॥ और दूसरो दूसरे गाममें रहेतो हतो ॥ एकको
 नाम बलभदास हतो और दूसरेको नाम बलदेवदास हतो
 सोवे दोनो रस्तामें एक बावडीऊपर एक दूसरेकुं आपसमें
 मिले भगवद्वार्ता करन लगे ॥ सो बलदेवदासनें पूछयो श्री-
 ठाकुरजी मोरपांखको मुकुट धरे हैं वाको कारण कहा ॥
 और जनावरकी पांख क्युं नहीं धरेहैं ॥ अनेक प्रकारके
 पंखीनकी बहुत सुंदर पांख हैं ॥ तब ये सुनके बलभदास
 बोले जो श्रीठाकुरजीको स्वरूप आनंदरूप है ॥ विषई
 जीवनकुं दुर्लभ है ॥ और विषय रहित जिनके स्नेह है ॥
 तिनके वशहैं जैसे मोर विषय रहितहै सो दृष्टिद्वारा रस-
 दान करेहैं ॥ सो श्रीठाकुरजी अपने दासकुं ऐसी सूचना
 करेहैं जैसे मोर विषय रहितहै ॥ और दृष्टिद्वारा रसदान
 करेहैं सोकोनसी रीतसों ॥ जब मोर नृत्य करेहैं तब अ-
 पनें शरीरकुं देखेहैं ॥ सब शरीरकुं देखके बडो प्रसन्न
 होवेहै ॥ जब आपनें पांव देखेहै तब कारेकारे दीसेहै तब

मोर श्यामतारूपी अपनो दोष देखके रुदन करेहैं ॥ मे-
रेमें इतनो दोष न होतो तो आछो ॥ तब मोरके नेत्रन-
मेंसुं जल पड़ेहे ॥ तब मोरकी स्त्री मुखमें लेहे तब बाकुं
आनंद होवेहैं ॥ और कामनिवृत्त होवेहैं दृष्टिद्वारा बाके
सब मनोरथ पूर्ण होय जायहे ॥ और गर्भस्थिती होवेहैं॥
ऐसे जो वे मोर श्रीठाकुरजीकुं बहुत प्रिय है और जैसे
मोर दृष्टिद्वारा कामनिवृत्त करेहैं ऐसे श्रीठाकुरजी सब
जीवनको दृष्टिद्वारा कामनिवृत्त करेहैं निर्विषयी जो
जीवहैं सो हमकुं बहुत प्रियहैं ॥ मोर पंख श्रीमस्तकपर
धरेहैं ॥ तब बलदेवदासनैं पूछी ॥ काछनी काहेकुं धरेहैं ॥
तब बलभदासनैं कही जो काछनीको घेर होवे सो घेर
बहुत एकछोकरे सो घेर होवे सो ऐसे अनेक भक्तनकुं एकछे
करके एककालावच्छिन्न सबके मनोरथ पूर्ण दृष्टिद्वारा करे
जैसे मोर एकछीको मनोरथ पूर्ण करे ऐसेही सब ब्रजभ-
क्तनके मनोरथ पूर्ण होवेहैं ॥ ये सूचना करवेके लीयें श्रीठा-
कुरजी मुकुट काछनीको शृंगार धरेहैं ॥ ये सुनके बलदेवदा-
स बहुत प्रसन्न भये तब एक ईटपर लिखगये ॥ हम दोघडी
जीवे फेर वो ईट उहां भीतमें लगी हती सो एकराजा फिरतो
आयो सो वानें ईटपर ऐसे अक्षर देखे तब राजाकुं संदेह
भयो ॥ तब राजानें विचार कियो जो लिखवेवालो ऐसे
लिखेहैं ॥ हम दोघडी जीवे ॥ सो ये जन्म्यो कब होवे-
गो और पढ्यो कब होवेगो और इहां बावडीपर आयो
कब होवेगो ॥ और लिख्यो कब होवेगो ॥ दोघडीमें या-
नैं इतनैं काम कैसे करे होयंगे ॥ सो राजाकुं बहुत संदे-

ह भयौ ॥ सो राजा वे ईट अपने घर लगये ॥ जो आवे ताकुं ऐसे पूछे ॥ जो ये लिखवेवालो मनुष्य दोघडी जीवतो रह्यो ॥ दोघडीमें यानें इतनें कारज कैसे करे होएंगे ॥ राजाकुं बडों संदेह भयो तब राजा ये बातमें लग रह्यो ॥ जो आवे जाकुं पूछे इतनेमें भगवदिच्छातें एक वैष्णव आयो ॥ बाकु राजानें पूछी तब वा वैष्णवनें कही जो दो वैष्णव रस्तामें मिले होएंगे ॥ और आपसमें भगवद्वार्ता करी होयगी ॥ तब विन वैष्णवनें चलवेके समय लिख्यो होयगो ॥ तब राजाको संदेह मिटयो सो वे राजाहुं वैष्णवके संगतें वैष्णव भयो सो वे दोनों वैष्णव श्रीगुसांईजीके ऐसे कृपापात्र हते ॥ तिनके अक्षर-नसुं राजा वैष्णव भयो ॥ वार्ता संपूर्ण ॥ वै० ॥ २०० ॥ ❀

श्रीगुसांईजीके सेवक एक राजाकी वार्ता ॥

सो वे राजाके गाममें दो ब्राह्मण रहेते हते ॥ एक ब्राह्मण वैष्णव हतो और एक शैव हतो ॥ वे दोनों पंडित हते और शैव ब्राह्मण राजाके पास बहुत आवते जावते हते ॥ राजानें विनकुं कही हमारे पुत्र होयसो उपाय करौ ॥ सो वानें बहुत उपाय किये परंतु वीसवर्षसूधी पुत्र नहीं भयो ॥ फेर एकदिन वा राजानें वैष्णवब्राह्मणसुं कही जो भेर बेटा होवे तो ठीक ॥ तब वा वैष्णव पंडितनें कही बेटा एकके चार होजायमें परंतु वैष्णव होवेगेतो तब वा राजानें कही मैंहुं वैष्णव होजाउंगो ॥ फेर एक वर्षके भीतर वा राजाकी चार राणीनके चार बेटा भये ॥ तब राजानें वा वैष्णव ब्राह्मणसुं कही हमकुं वैष्णव करौ ॥ तब

वा ब्राह्मणनें कही वैष्णवतो श्रीगुसांईजी करेंहैं ॥ जब श्रीगोकुलमें चलो तब वे राजा और दोनो पंडित श्रीगोकुल गये ॥ जायके श्रीगुसांईजीके दर्शन किये ॥ तो साक्षात् पूर्णपुरुषोत्तमके भयो ॥ तब वह राजा श्रीगुसांईजीको सेवक भयो ॥ और शैव पंडितद्वंद्व श्रीगुसांईजीको सेवक भयो ॥ और श्रीगोकुलमें रहेके पुष्टिमार्गकी रीती शीख्यो और श्रीठाकुरजी पधरायके सेवा करन लग्यो ॥ और जैसी बेटानमें आसक्ती हती वैसी श्रीठाकुरजीमें आसक्ती भई ॥ और सकामबुद्धी हती सो सब मिटके निष्कामबुद्धी होयगई ॥ अंतःकरणसुं सब कामना त्याग दीनी और भगवत्सेवा पधरायके अपने देशमें आयो ॥ और घरमें भगवत्सेवा करनलग्यो ॥ थोड़ेदिन पीछे श्रीगुसांईजीकुं अपने देशमें पधराये ॥ और सब कुंटुबकुं वैष्णव किये और गामके लोगनकुं वैष्णव कराये सो वह राजा ब्राह्मणके संगतें ऐसो वैष्णव भयो ॥ वा० सं० ॥ वै० २०१

श्रीगुसांईजीके सेवक मदनगोपालदास कायस्थ हते तिनकी वार्ता ॥ सो वे मदनगोपालदास महाबनमें रहेतें हते और नित्य सवारे आयके श्रीगुसांईजीके दर्शन करते ॥ और फेर जायके घरमें श्रीठाकुरजीकी सेवा करते ॥ और श्रीठाकुरजी मदनगोपालदाससों हसते बोलते बातें करते जो चाहिये सो मागलेते ॥ और एकदिन मदनगोपालदासके बेटाकुं बहोत ज्वर आयो ॥ तब मदनगोपालदासकी स्त्रीने छानो छानो एकयोगीके पाससुं दोरा करायेके और बेटाकुं बांध्यो ॥ तब मदन-

गोपालदासके श्रीठाकुरजीनें श्रीगुसांईजीसों कही जो मदनगोपालदासकुं अन्याश्रय भयोहै ॥ अब मैं यासुं बोलूंगो नहीं तब श्रीगुसांईजीनें श्रीठाकुरजीसुं वीनती करी जो याकुं थोड़ेदिन दंड देणो ॥ परंतु एकाएक त्याग कन्यो नहीं चाहिये ॥ तब श्रीठाकुरजी चुप कर रहे ॥ फेर मदनगोपालदासनें उत्थापन किये ॥ देखेतो श्रीठाकुरजी उदास बिराजेहैं ॥ तब मदनगोपालदासनें भोगधरे ॥ तब श्रीठाकुरजीनें लातसुं थाल फेंकदियो तब मदनगोपालदास रोवेलगे और प्रणती करवे लगे तोहुं श्रीठाकुरजी माने नहीं ॥ तब मदनगोपालदास श्रीगुसांईजीके पास आये और नेत्रनमेंसुं जल चलवे लगगयो ॥ और गदगद कंठ होयगये और घूजवे लगे ॥ और श्रीगुसांईजीसुं वीनती करी तब श्रीगुसांईजीनें आज्ञा करी तेरी स्त्रीनें अन्याश्रय कन्यो है जासुं श्रीठाकुरजी अप्रसन्नहैं ॥ ये बात सुनके मदनगोपालदास घरमें आये और स्त्रीकुं वाई क्षणमें जुदे घरमें राखी ॥ और श्रीठाकुरजीकी सब टेहेल हाथसुं करन लगे ॥ तब श्रीगुसांईजीके श्रीमुखतें वचनासुत सुने जो अन्याश्रय बहोत बाधकहै विवेक धेरे आश्रयग्रंथमें लिख्योहै ॥ श्लोक ॥ अन्यस्यमजनंतत्रसु-
 तोगमनमेवच ॥ प्रार्थनाकार्यमात्रेपिततोऽन्यत्रविवर्जये-
 त् ॥ याको अर्थ ॥ अन्य देवको मजन अन्यदेवके स्था-
 नपर स्वतः गमन उद्देश करके जानो ॥ और कार्यमात्रमें
 अन्यदेवकी प्रार्थना करणी ॥ ये तीनोबाते वजित हैं ॥
 अन्यसंबंधकीहुं गंध नहीं चाहिये ॥ सो वाक्य ॥ अन्यसं-

वैष्णव (२०३) क्षत्रीवैष्णव गुजरातके वासी. (३३९)

बंध गंधोपिकंदरामेववाध्यते ॥ यारीतीसुं ग्रंथनमें अनेक वचनहै ॥ सो ये सुनके मदनगोपालदासनें दूसरो विवाह कन्यो ॥ वा स्त्रीकुं त्याग दियो तब श्रीठाकुरजी प्रसन्न होयके बोलन लगे ॥ सो वे मदनगोपालदास श्रीगुसांईजीके ऐसे कृपापात्र हते जिननें अन्याश्रय केलीये स्त्रीको त्याग किये ॥ वार्ता संपूर्ण ॥ वैष्णव ॥ २०२ ॥ * ॥ ॥

॥ श्रीगुसांईजीके सेवक क्षत्रीवैष्णव गुजरातके वासी तिनकी वार्ता ॥ सो वे क्षत्री वैष्णव चाचाजीके संग गुजरात जाते हते ॥ सो वे क्षत्रीवैष्णव जब भगवद्दार्ता करते तब भगवद्रसमें मग्न होय जाते ॥ और बिनकी रहस्य वार्ता श्रीगोवर्धननाथजी सुनते ॥ सो वे क्षत्री वैष्णव रस्ता भूलगये और चाचाजीसुं न्यारे पढगये ॥ सो एक गाममें गये सो वा गाममें एक वैष्णव रहेतो हतो सो वे क्षत्रीवैष्णवकुं अपने घरमें लेगयो और उहां भगवद्दार्ता करन बैठे ॥ सो वे रसावेश होयगये कछु देहानुसंधान रह्यो नहीं ॥ और श्रीगोवर्धननाथजी ठाढे ठाढे बिनकी वार्ता सुन्यो करते ॥ तब चाचाबिनकुं द्वंद्वे गये सो जायके चाचाजी बिनकुं मिले तब भगवद्रसमें छक रहे हते ॥ और आखी रात बीतगई हती और श्रीगोवर्धननाथजीकुं उजागरा भयो तो द्वंद्व बाकुं कछु देहानुसंधान न रह्यो ॥ भगवद्दार्ता मुखसुं कन्ये जाते ॥ चाचाजी बिनके पास जायके ठाढे रहे तो द्वंद्व खबर नही रही ॥ तब चाचाजीनें बिनकुं हाथ पकडके उठाये तब देहानुसंधान भयो ॥ तब चाचाजीनें कही तुमको

भगवद्रसमें मग्न होय रहेहो और श्रीगोवर्धननाथजी आखी रात ठाढे रहेहैं ॥ श्रीप्रभुनको श्रम होवेहैं ॥ जासुं संभारके करो ये कहेके चाचाजी विनकुं लेगये सो वेक्षत्री वैष्णव ऐसे कृपापात्र हते जिनके मुखकी वाणी सुनवेकुं श्रीगोवर्धननाथजी आप पधारते ॥ जासुं विनके भाग्यकी कहा बडाई करणी॥वार्ता संपूर्ण॥वैष्णव २०३॥ श्रीगुसांईजीके सेवक कृष्णदासस्वामी मथुरामें रहेते तिनकी वार्ता ॥ सो वे कृष्णदासस्वामी श्रीगोकुल आये तब श्रीगुसांईजीके दर्शन किये सो साक्षात् पूर्णपुरुषोत्तमके भये ॥ तब कृष्णदास स्वामी श्रीगुसांईजीके सेवक भये ॥ तब एक महिना श्रीगोकुलमें रहे सब मार्गकी रीती शीखे और श्रीगोकुलचंद्रमाजीको स्वरूप पधरायके मथुराजीमें आयके भगवत्सेवा करन लगे ॥ फेर एकदिन श्रीगुसांईजी मथुरा पधारे तब कृष्णदासस्वामीके घरमें उतरे तब कृष्णदासस्वामीने श्रीगुसांईजीसुं पूछी जो श्रीगोलचंद्रमाजीको दक्षिणचरणारविंद टेढो क्युं है ॥ तब श्रीगुसांईजीने आज्ञा करी जो श्रीठाकुरजीके वामचरणारविंदमें पुष्टिरस है ॥ और दक्षिणचरणारविंदमें मर्यादा है ॥ तब श्रीठाकुरजी मर्यादाकुं उलंघके और पुष्टिकुं आश्रय करे हैं ॥ और वामचरणारविंदसुं पुष्टिरसकुं स्थापन कियोहै ॥ तब कृष्णदासस्वामीने पूछी जो कटी और ग्रीवा काहेकुं नमैहै ॥ तब श्रीगुसांईजीने आज्ञा करी जो रस मन्योपात्र खालीपात्रमें रस डारेतो मन्योपात्र नमै तब कृष्णदासस्वामीने पूछी जो दक्षिण-

परावृत्त दृष्टि क्युं है ॥ तब श्रीगुसाईजीनें आज्ञा करी जो सन्मुख दृष्टी होवे तो स्थावर जंगम जीवनकुं मोह करे ॥ और नीचे दृष्टि होवे तो पातालके जीवनकुं मोह करे ॥ और वामपरावृत्त दृष्टी होवेतो देवांगनाकुं मोह करे ॥ और उंची दृष्टी होवे तो स्वर्गवासीनकुं मोह करे ॥ और दक्षिण परावृत्त दृष्टी होवे तो स्त्री पुरुषनकुं मोह करे ॥ ये सुनके कृष्णदासस्वामी वहुत प्रसन्न भये ॥ और श्रीगोकुलचंद्रमाजीकी सेवा भलीभांतीसुं करन लगे और जो वैष्णव मथुराजीमें आवे जिनकुं आदर सत्कार वहुत करते ॥ और भगवद्रसमें छके रहते ॥ संसारकी कछु अपेक्षा राखते नहीं ॥ एकदिन चाचा हरिवंशजी कृष्णस्वामीकुं मिले ॥ तब कृष्णस्वामीनें पूछी जो मुरलीके सप्तरंघनको स्वरूप कहो ॥ तब चाचाहरिवंशजीनें कही जो छे धर्म ऐश्वर्य वीर्य यश श्री ज्ञान और वैराग्य और सातमें धर्मी सात प्रकारको भगवत्स्वरूप पुरुषाकार मुधा वेणुते प्रकट होवेहैं ॥ याहीते सप्तरंघनें ॥ श्रीठाकुरजीको स्वरूप श्रीमहाप्रभुजी और वेणुस्थानापन्न श्रीगुसाईजी और सप्तरंघरूपी सात बालकनको प्राकट्य जाणनों पद्मनाभदासजीनें गायो है ॥ सो पद ॥ मधुरब्रजदेशवस मधुरकीनो ॥ मधुरवल्लभनाममधुरगोकुलगाममधुरविठ्ठलमजनदानदीनो ॥ १ ॥ मधुरगिरिधरनआदिसप्ततनुवेणुनादसप्तरंघनमधुररूपलीनो ॥ १ मधुरफलफलितअतिललितपद्मनाभप्रभुमधुरगावतसरसरंगमीनो ॥ २ ॥ यारीतीसुं वेणुको स्वरूप चाचाजीनें कह्यो

(३४२) दोसौवावन वैष्णवकी वार्ता.

सो छुनके कृष्णस्वामी बहोत प्रसन्न भये ॥ और श्रीगो-
कुलचंद्रमाजीमें बहुत आसक्तिवान भये ॥ दिनदिन प्रीती
जिनकी बढ़वे लगी ॥ सो कृष्णस्वामी श्रीगुसांईजीके ऐसे
कृपापात्र हते ॥ वार्ता संपूर्ण ॥ वैष्णव ॥ २०४ ॥ ❀ ॥
श्रीगुसांईजीके सेवक वैष्णव ईश्वरदासकी
वार्ता ॥ सो भगवन्नाम खूब लेते अष्टप्रहर भगवत्सेवा
करते ॥ सो एक दिन रस्तामें जाते अजानमें सर्पके माथे
पाव आयो ॥ सो सर्प मरगयो तब सर्पकी सर्पिणीने वा
वैष्णवके पाछें लगी याके प्राण लेउंगी तब छोड़ंगी ॥ सो
वे वैष्णव अष्टप्रहर भगवन्नाम लेतो ॥ तब ज्यांसूधी वे
वैष्णवजीव्यो कोई दिन भगवन्नाम छोड़यो नहीं सो वे
सर्पिणी जन्मसूधी वाके पीछे फिऱ्या करी परंतु कोईदिन
भगवन्नाम बिना वाकुं देख्यो नहीं ॥ सो वे वैष्णव ऐसो
कृपापात्र हतो ॥ जाने जन्मपर्यंत भगवन्नाम छोड़यो नहीं
जन्मसूधी सर्पिणीके दावमें आयो नहीं ॥ सो वे सर्पिणी
सृष्ट्युपाय गई परंतु वा वैष्णवकुं स्पर्श न कऱ्यो ॥ श्रीगु-
सांईजीकी कृपातें सो वे वैष्णव ऐसो कृपापात्र हतो ॥ वा-
र्ता संपूर्ण ॥ वैष्णव ॥ २०५ ॥ ❀ ॥ ॥ ॥
श्रीगुसांईजीके सेवक स्यामदास आजना कु-
नबीकी वार्ता ॥ सो वे स्यामदास गुजरातमें रहेते ॥ तब
श्रीगुसांईजी द्वारका पधारे ॥ तब स्यामदास श्रीगुसांई-
जीके सेवक भये ॥ फेर स्यामदास बहुत दिन रहेके श्री-
गोकुलगये ॥ और श्रीनवनीतप्रीयाजीके दर्शन किये ॥ फेर
स्यामदास श्रीगुसांईजीके संग गोपालपूर गये ॥ तब स्या-

मदासजीको मन उहां बहुत लग्यो ॥ तब श्रीगुसांईजीकुं
वीनती करी जो मैं जन्मपर्यंत इहां रहूंगो ॥ सो कछु सेवा
मोकुं बतावैं ॥ तब श्रीगुसांईजीनें स्यामदासकुं श्रीनाथ-
जीके फूलधरकी सेवा सौंपी ॥ तब स्यामदासनें श्रीगुसां-
ईजीकुं वीनती करी जो महाराज फूलनको स्वरूप कृपा-
करके मोकुं समझावैं तो बहुत आछो ॥ तब श्रीगुसांई-
जीनें आज्ञाकरी ब्रजभक्त जो गोपी जन तिनके चित्त हैं
सो पुष्प होयके श्रीठाकुरजीके श्रीअंगकुं स्पर्श करेहैं ये
सुनके स्यामदास बहुत प्रसन्न भये ॥ और फूलनकुं ब्रज-
भक्तनको चित्त जानके पाव न लगावते और धोएविना
हाथ न लगावते और कुमलाय न जाय ऐसे प्रयत्नरा-
खते ॥ फेर एकदिन स्यामदासनें श्रीगुसांईजीसुं वीनती
करी जो महाराज फूलनको ऐंसी स्वरूप विनकुं सुईमें
कैसे परीएजाय ॥ तब श्रीगुसांईजीनें आज्ञाकरी जो सुई
है सो सूचीहै ॥ ब्रजभक्तनके चित्तमें भगवत्संबंधकी सू-
चना करेहैं ॥ वा सूचनासुं ब्रजभक्तनके चित्त बहुत प्रस-
न्न होवेंहैं ॥ ऐंसे जाणेहैं जो अब भगवत्संबंध हमकुं सू-
चन भयोहैं ॥ अब तुरंत अंगिकार करेंगे ॥ ये सुनके
स्यामदासको सब संदेह गयो ॥ एक दिन स्यामदासजी
देखे तो ब्रजभक्तनके यूथनके यूथ फूलधरमें देखे ॥ तब
स्यामदासनें पूछीजी मैं तुमकुं पहिचाणुं नहींहुं ॥ तब ब्रजभ-
क्तननें आज्ञा करी जे पुष्पनकी माला तू अंगिकार करा-
वेहैं सो हमारो स्वरूपहै हम तेरेपर प्रसन्न होयके तोकुं द-
र्शन देवेहैं ॥ सो तू कछु मांग ॥ तब स्यामदासनें हाथ

जोड़के वीनती करी जो मेरा चित्त कोईदिन ये सेवा छोड़के और कहुं न जाय ॥ तब ब्रजभक्तननें अस्तु कही ॥ ऐसेहि होयगो ॥ फेर स्यामदासनें ये बात श्रीगुसांईजीकुं वीनती करी ये सुनके श्रीगुसांईजीनें आज्ञा करी जो जिनको छेछो जन्म होवेहें विनसुं श्रीठाकुरजी कछु अंतराय नहीं राखेहें ॥ और ऐसे जीवनके लीयें ये मार्ग प्रगट भयोहे ॥ ये सुनके स्यामदास बहुत प्रसन्न भये ॥ सो वे स्यामदास श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २०६ ॥ ❀ ॥ ॥ ॥ ॥

श्रीगुसांईजीके सेवक वेणीदास छीपाकी वार्ता
 सो वे वेणीदासजी गुजरातमें रहते हते ॥ जब श्रीगुसांईजी गुजरात पधारे तब वेणीदासनें श्रीगुसांईजीके दर्शन किये सो साक्षात् पूर्णपुरुषोत्तमके दर्शन भये तब वेणीदास श्रीगुसांईजीके सेवक भये ॥ और श्रीगुसांईजीकुं वीनती करके श्रीठाकुरजी पधराये ॥ तब वेणीदास सेवा करन लगे ॥ थोड़ेदिन पाछें वेणीदासनें एक हजार रुपैयाको परकाला लियो ॥ सो वेणीदास वांसकी लकड़ीमें भरके श्रीगुसांईजीके पास श्रीगोकुलमें लेआये ॥ और श्रीनवनीतप्रियाजीके दर्शन किये ॥ फेर वेणीदास श्रीगुसांईजी संग श्रीजीद्वार आये ॥ और परकाला श्रीनाथजीकुं धराये ॥ तब वेणीदास छीपानें दर्शन किये और तन्मय होयगये देहालुसंधान मूलंगये ॥ तब उहां मंदिरमें मूर्छा खायके पडरहे ॥ तब श्रीगुसांईजीनें वेणीदासकुं चरणस्पर्श कराये ॥ और चरणोदक दिये ॥ तब वेणीदास

चेत भये ॥ तब श्रीगुसांईजीकुं वीनती करी जो महाराज
 ऐसे आनंदसुं बहार क्युं काढ लिये ॥ तब श्रीगुसांईजीनें
 आज्ञा करी अवी तो तुमकुं कारज बढत करनेहैं ॥ फेर
 वेणीदास ब्रजयात्रा करके श्रीगुसांईजीसों विदा होयके
 आये और श्रीगुसांईजीकुं वीनती करी मेरे घरमें श्रीठा-
 कुरजी विराजेंहैं सो श्रीनाथजीके स्वरूपसों दर्शन देवें
 ऐसी कृपाकरो ॥ तब श्रीगुसांईजीनें आज्ञा करी श्रीठाकुर-
 जी पुष्टिमार्गीयजो जीव है विनके सब मनोरथ पूर्ण क-
 रेहैं ॥ सो तुमारे मनोरथ पूर्ण करेंगे ॥ तब वेणीदास वि-
 दाहोयके गुजरातमें आये ॥ और घरमें श्रीठाकुरजीकी
 सेवा करन लगे ॥ तब वेणीदासके श्रीठाकुरजी वेणीदा-
 सके मनोरथप्रमाणे दर्शन देवे लगे ॥ जैसे मनोरथ क-
 रते तैसे दर्शन देते ॥ सो वेणीदास श्रीगुसांईजीके ऐसे
 कृपापात्र हते ॥ वार्ता संपूर्ण ॥ वेष्णव ॥ २०७ ॥ ❀ ॥ ॥
श्रीगुसांईजीके सेवक साचोरा ब्राह्मणकीबा०
 सो वे पुरुषोत्तमदास गुजरातमें रहेते ॥ फेर एक समय
 श्रीगोकुलगये ॥ तब श्रीगुसांईजीके सेवक भये ॥ और
 श्रीगुसांईजीकी कृपातें ग्रंथनको ज्ञान भयो ॥ फेर पुरुषो-
 त्तमदास ब्रजयात्रा करवेकुं गये ॥ और कदमखंडीमें रसो-
 ई करी ॥ सों दालवाटी करी तब भोगधरे श्रीनाथजी पधार-
 के अरोगे और पुरुषोत्तमदाससुं आज्ञा करी जो तुमकुं
 दालवाटी करते बढत सुंदर आवेहैं ॥ हमारी रसोईमें तुम
 नाहाओ ॥ तब पुरुषोत्तमदासनें वीनती करी जो महा-
 राज ये बात तो श्रीगुसांईजीके हाथ है ॥ तब श्रीनाथ-

जीनें श्रीगुसांईजीकुं आज्ञा करी पुरुषोत्तमदास रसोई-
 दूत सुंदर कर जाने हैं ॥ तब श्रीगुसांईजी पुरुषोत्तमदासकुं
 श्रीनाथजीके भीतरियापनेकी सब सेवा सोंपी ॥ जब पु-
 रुषोत्तमदासजी रसोई करते तब श्रीनाथजी पुरुषोत्तम-
 दासकुं शिखावते ऐसे रोटी ऐसे बाटी करो सो वे पुरु-
 षोत्तमदास जन्मपर्यंत श्रीनाथजीकी सेवा छोड़के कहे
 गये नहीं ॥ और द्रव्यको संग्रह न कियो ॥ वे पुरुषोत्तमदास
 श्रीगुसांईजीके ऐसे कृपापात्र होते ॥ महाप्रसादकी पातर
 लायके वैष्णवनकुं प्रसाद लेवावते ॥ जिनकी श्रीगुसांईजी
 श्रीमुखसुं सराहना करते ॥ वार्तासंपूर्ण ॥ वैष्णव ॥ २०८ ॥
 श्रीगुसांईजीके सेवक लक्ष्मीदास जोशीकी ० ॥
 सो वे लक्ष्मीदास जोसी गुजरातमें रहेते होते ॥ उहां श्री-
 गुसांईजी पधारे तब लक्ष्मीदासनें श्रीगुसांईजीके दर्शन
 किये सो साक्षात् पूर्णपुरुषोत्तमके दर्शन भये ॥ सो ल-
 क्ष्मीदासनें वीनती करी मोकुं शरण लेउ ॥ तब श्रीगुसां-
 ईजीनें कृपा करके नामनिवेदन करायो ॥ फेर एकदिन
 लक्ष्मीदासनें श्रीगुसांईजीसुं पूछी जो गुरुको सूतक लगे
 के न लगे ॥ तब श्रीगुसांईजीनें आज्ञा करी जो गुरुशि-
 ष्यको आपसमें सामान्यसूतक हे ॥ सो गुरु तो एक और
 शिष्यतो अनेक जो ऐसे सूतक पाळेतो गुरु जन्मसूची भग-
 वत्सेवा न कर सके ॥ जासुं ऐसे सूतकको विचार करनो ॥
 शास्त्रके वचन तो अनेक रीतीके हैं परंतु विचारके मानने
 चाहिये ॥ जैसे छाल कोईको नहीं छीजाय हे ऐसे वचन
 निकसंगे परंतु क्षत्री तथा वैश्य तथा शूद्र और असच्छूद्र

वैष्णव (२१०) महीधरजी और फूलबाई. (३४७)

इनके वासनकी और इनके जलकी छाल आपणे कैसे लई जायगी और शास्त्रमें ऐसेहुं कह्यो है जितनी वस्तु ता-कहीमें तुलाय जाय सो सब शुद्ध है परंतु ये वचन सत्य मान के अग्राह्यपदार्थ इन वचननके बलतें ग्रहण नहीं होवें ॥ ऐसे सूतकके वचनहुं अनेक प्रकारके ऋषीनके मतकेहैं सो विचारेविना कैसे लिये जाय ॥ ये सुनके लक्ष्मीदास बोले जो महाराज संन्यास ग्रहण करनो के नहीं ॥ तब श्रीगुसांईजीने आज्ञा करी जो श्रीमहाप्रभूजीने विरहदशामें त्याग कह्यो हैं जहांसुधी भगवद्विरह उत्पन्न न होवे वैसे संन्यास लेवे तो कलियुगमें पश्चात्ताप होवै जासूं अत्यंत विरह उत्पन्न भये विना ग्रहस्तपणो त्याग नहीं करनो ॥ तब लक्ष्मीदासने वीनती करी ॥ जो मेरो चित्त कहुं लगे नहीं है ॥ तब श्रीगुसांईजीने आज्ञा करी भगवत्सेवा करो ॥ तब लक्ष्मीदास श्रीगुसांईजीके संग श्रीगोकुल गये और श्रीनवनीतप्रियाजीके दर्शन किये ॥ और श्रीनाथजीके दर्शन किये ॥ तब भगवत्सेवामें मन बहुत लग्यो ॥ फेर श्रीगुसांईजीसों मार्गकी रीती सीखके और भगवत्सेवा पधरायके गुजरातमें आये ॥ घर आयके श्रीठाकुरजीकी सेवा करन लगे ॥ और वैष्णवनकी सत्संग करन लगे ॥ सो वा लक्ष्मीदासजोसीने या रीतीसुं कालव्यतीत कियो ॥ वार्ता संपूर्ण ॥ वै० ॥ २०९ ॥ श्रीगुसांईजीके सेवक महीधरजी और फूलबाई तिनकी वार्ता ॥ सो वे महीधरजी क्षत्री अलीयाणा गाममें रहेते और फूलबाई विनकी बेहेन हती ॥ और नरहर

जोसीके यजमान हत ॥ और नरहरजोसीके सत्संगतें
वैष्णव भये हते ॥ सो एक दिन अलीयाणामें आग
लागी हती ॥ सो नरहरजोसीने खेराळ गाममें बैठबैठे
बुझाई हती सो ये बात जगन्नाथजोसीकी वार्तामें लि-
खीहि ॥ फेर महीधर जब सरकारके कामदार भये और
श्रीगुसांईजीकुं पधरायलाये ॥ और श्रीगुसांईजी बिनके
घर बहुत दिन बिराजे ॥ जब श्रीगुसांईजी भाईलाकोठा-
रीके इहां पधारते ॥ तब महीधरजीके उहां पधारते ॥ सो
महीधरजीको चित्त श्रीगुसांईजी बिना कहुं लगतो नहीं ॥
अबसूधी श्रीगुसांईजीकी बैठक अलियाणामें प्रसिद्ध है ॥
जिनके घरमें अबसूधी श्रीगुसांईजी दर्शन देंवें ॥ और
महीधरजीकुं श्रीगुसांईजीके दर्शन जा दिन न होते ॥
बाई दिन बिनके पेटमें पीडा होजाती ॥ जाहुं महीधर-
जीकुं श्रीगुसांईजी एकांतमें प्रकट होयके नित्य दर्शन
हैंते ॥ वे महीधरजी ऐसे कृपापात्र हते ॥ वार्ता संपूर्ण ॥
वैष्णव ॥ २१० ॥ * ॥ ॥ ॥ ॥

श्रीगुसांईजीके सेवक एक वैष्णव भूधरदास ०
सो वे वैष्णव बाराहीमें रहेते हते ॥ श्रीगुसांईजी द्वारका
पधारे तब भूधरदास श्रीगुसांईजीके सेवक भये ॥ और श्री-
गुसांईजीके संग द्वारका गये ॥ और श्रीरणछोडजीके द-
र्शन किये ॥ कितनेक दिन रहके श्रीगुसांईजी पीछे पधारे
भूधरदासहुं संग चले ॥ रस्तामें एक मुकाम भयो ॥ उहां
भूधरदासके मनमें ऐसी आई श्रीगुसांईजी कछु माहात्म्य
दिखावे तो ठीक ॥ इतनेमें एक बादल चढयो और सब

घटाछाय गई ॥ रसोई आधी भई हती ॥ तब श्रीगुसांई-
जीनें आज्ञा करी जो तुम इहां मत बरसियो ॥ हमारो
ढेरो छोड़के बरसो तब मेह बरसन लग्यो श्रीगुसांईजीके
ढेरानुं सो सो हाथ दूरसों ऐसो बरस्यो सो बारे बारे म-
हिनाके जल तलावनमें भर गये और नदी सब पूर आ-
य गई ॥ और श्रीगुसांईजीके ढेरानें एक बूंद न परी ॥
और चारो आढी सब ठिकाणें जल फैल गये ॥ सो मा-
हात्म्य शृंखरदासनें देख्यो ॥ तब वा दिनसुं ऐसो नेम
लियो जन्मपर्यंत श्रीगुसांईजीकी टेहेल करुंगो ॥ फेर श्री-
गुसांईजी श्रीगोकुल पधारे ॥ सो शृंखरदासकुं श्रीनाथ-
जीकी सेवासैं राखे सो थोड़े दिन पीछे श्रीनाथजी शृंख-
रदाससुं बोलन लगे ॥ सो वे शृंखरदास श्रीगुसांईजीके
ऐसे कृपापात्र हते ॥ वार्ता संपूर्ण ॥ वैष्णव ॥ २११ ॥ ❀
श्रीगुसांईजीके सेवक मगनभाई खंभातमें रह-
ते तिनकी वार्ता ॥ सो वे मगनभाई बनिया वैष्णव हते ॥
एक समय श्रीगुसांईजी खंभात पधारे हते ॥ तब माधव-
दास दलालके घर उतरे ॥ और उहां बहुत वैष्णव आ-
वते सो वैष्णवनकी भीड़ देखके मगनभाईनें माधवदा-
ससुं पूछी जो श्रीगुसांईजीके सेवक भये सो कहा अधि-
की है ॥ तब माधवदासजीनें कही ॥ इनके सेवक भये तें
नयो जन्म होतहैं और याही देहसुं जन्म पलट जाय हैं
और श्रीठाकुरजीकी कृपा होवे है ॥ और या जीवकुं श्री-
ठाकुरजी अपनो जाने है ये बात सुनके वे मगनभाई
श्रीगुसांईजीके सेवक भये मगनभाईके पास द्रव्य बहुत

हतो ॥ नित्य श्रीगुसाईजीकेपास दर्शनकुं जाते ॥ सो वे मगन भाईनें लाख रुपैया श्रीगुसाईजीकुं भेंट कर दियो ॥ तब थोड़े दिन पीछे वा मगनभाईके मनमें ऐसी आई जो नयो जन्म ब्रह्मसंबंध करेतें होवें ॥ याकी परीक्षा करूं तो ठीक ॥ तब मगनभाई विचार करन लग्यो ॥ जो अमका ब्राह्मण मेरे पास पांच हजार रुपैया धरके तीरथ करन गयो है मैंने वाके गये पीछे ब्रह्मसंबंध कियो है अबके आवेगो वाके रुपैया न कबूल करुंगो तब परीक्षा होय जायगी ॥ ऐसे मगनभाईनें विचार कियो तब वे ब्राह्मण आयो जब वानें मगनभाईसुं रुपैया मागे तब मगनभाईनें कही तुम झूठो बोलोहो ॥ मैंने या जन्ममें तो तेरे पास लिये नहीं है ॥ तब वे ब्राह्मण राजमें पुकार्यो तब राजानें मगन भाईसों कही या ब्राह्मणके रुपैया देउ तब मगनभाईनें कही जो मैंने या जन्ममें रुपैया लिये नहीं है ॥ तब राजानें पांचशेरी लोहकी मंगायके अग्नीमें ताती कराई और मगनभाईके हाथमें धराई ॥ तब मगनभाईनें श्रीगुसाईजीको ध्यान करके कही जो मैंने या जन्ममें रुपैया लिये होंवें तो मेरे हाथ जर जावो ॥ तब मगनभाईके हाथ जर नहीं तब राजानें कही पटक देउ ॥ तब ब्राह्मणनें कही ये बरोबर ताती नहीं भई ॥ सो वा मगनभाईनें पटकी तब ब्राह्मणनें उठाई तब वा ब्राह्मणके दोनो हात जरगये ॥ तब राजानें हुकमकन्यो या ब्राह्मणकुं कैदमें लेजावो ॥ याको घर लूटलेउ ये ब्राह्मण बहोत झूठो है तब मगनभाईनें राजासुं कही ॥ या ब्राह्मणको कछ दोष

नहीं है ॥ ये साचो है याको घर मत छटो मैंने परीक्षा करवेके लीये ये काम क्यो है ॥ तब राजाने कही काहे की परीक्षा करी है ॥ तब मगनभाईने सब बात कही ॥ तब मुनके वा राजाकी सभा सब चकित होयगई ॥ और श्रीगुसांईजीकुं पधरायके वे राजा और ब्राह्मण और दूसरे सभासद सब श्रीगुसांईजीके सेवक भये ॥ और सब मगवत्सेवा करन लगे और वे मगनभाईहुं श्रीठाकुरजी पधरायके मार्गकी रीती प्रमाणे सेवा करन लगे ॥ सो मगनभाईकुं श्रीगुसांईजीके ऊपर ऐसी विश्वास हतो ॥ वार्ता संपूर्ण ॥ वैष्णव ॥ २१२ ॥ ❀ ॥ ॥ ॥

श्रीगुसांईजीके सेवक एक ब्राह्मण जिनने मगनभाईके पास पांचहजार रुपैया धन्येतिनकी वार्ता ॥
 सो वा ब्राह्मणको नाम गोवर्धनभट्ट हतो जब राजाकी कचेरीमें वाके हाथ जरगये और राजाने वा ब्राह्मणके ऊपर दंडको हुकम कीनो और वा मगनभाईने छुड़ायो तादिनते वा गोवर्धनभट्टने ऐसी प्रतिज्ञा लीनी जो मैं श्रीगुसांईजीके शरण जाऊंगो जब अन्न लेऊंगो तहांसुंधी फलहार करूंगो ॥ ऐसो आग्रह वा गोवर्धनभट्टको देखके वा मगनभाईने और वा गामके राजाने श्रीगुसांईजीके ऊपर पत्र लिखदियो तब वे गोवर्धनभट्ट पत्र लेके श्रीगोकुल आये ॥ और श्रीगुसांईजीके दर्शन किये और मगनभाईकी सब बात श्रीगुसांईजीसों कही ॥ ये मुनके श्रीगुसांईजीने आज्ञा करी पुष्टिमार्गमें विश्वास फलीभूत होवेहे पुष्टिमार्गमें भगवान् स्थित है जीवकी लौकिक-

(३५२) दोसौवावन वैष्णवकी वार्ता.

गति नहीं करेंहैं ॥ जीवकुं विश्वास चाहिये जिनके सब
कार्यसिद्ध होवेंहैं ॥ श्रीमहाप्रभुजीने आज्ञा करीहै सो
॥ श्लोक ॥ भगवानपिपुष्टिस्थोनकरिष्यतिलौकिकिचग-
तिम् ॥ और विवेकधैर्यआश्रयग्रंथमें श्रीमहाप्रभुजीने आ-
ज्ञा करीहै सो ॥ श्लोक ॥ अविश्वासीनकर्तव्यः सर्वथा
बाधकस्तुसः ॥ ब्रह्मास्त्रचातकौभाव्यौ प्राप्तसेवेतिनिर्मम
॥ १ ॥ जासुं सर्वथा पुष्टिमार्गमें विश्वास राख्यो चाहिये ॥
ये सुनके गोवर्धनभट्ट बहुत प्रसन्न भये ॥ और श्रीगुसां-
ईजीके सेवक भये ॥ और श्रीनवनीतप्रियाजीके दर्शन
किये ॥ और श्रीगोवर्धननाथजीके दर्शन किये और
ब्रजयात्रा किये बहुत दिन ब्रजमें रहे ॥ फेर श्रीगुसांईजी
गुजरात पधारे तब संग आये ॥ श्रीगुसांईजीकु खंभात-
पधरायलाये और राजाकुं सेवक करायो ॥ फेर एकदिन
गोवर्धनभट्टने श्रीगुसांईजीसों वीनती करी जो महाराज
मेरेपास पंचायतन पूजाहै सो आपकेपास लायोहुँ ॥ तब
श्रीगुसांईजीने आज्ञा करी जो विष्णुको आयतन नहींहै
साक्षात् मृतलपर बिराजेहै ॥ और चारदेवताको आय-
तनहै सो आयतनकी पूजाको काल नहींहै ॥ श्लोक ॥
कलौदशसहस्राणि विष्णुस्तिष्ठतिमेदिनी ॥ तदर्धजान्हवी
तोयंतदर्थसर्वदेवताः ॥ १ ॥ यातें देवता सब पृथ्वीकुं
त्याग करगयेहै ॥ बिनको नित्य पूजनको काल नहींहै
नैमित्त्य पूजनको काल है याही तें आवाहन विसर्जनहै
और विष्णु मृतलपर स्थितहै इनकी साक्षात् पूजनको
कालहै जासुं भगवत्सीवा करो ॥ तब गोवर्धनभट्ट ये सुनके

बहुत प्रसन्न भये ॥ और श्रीगुसांईजीके पासतैं श्रीठाकुरजी पधरायके भगवत्सेवा करन लगे ॥ और घरके सब मनुष्यनकुं नाम निवेदन करायो ॥ और मार्गकी रीती-प्रमाणें भगवत्सेवा करन लगे ॥ और थोड़ेदिन पीछे श्रीठाकुरजी अनुभव जतावन लगे ॥ सो वे गोवर्धनभट्टश्री गुसांईजीके ऐसे कृपापात्र हते ॥ वार्ता संपूर्ण ॥ वै० ॥ २१३ ॥ श्रीगुसांईजीके सेवक मोरारी आचार्य खंभा-तमें रहेते तिनकी वार्ता ॥ सो वे मोरारी आचार्य काशी यात्राकुं गामके पटेलके संग गये ॥ सो रस्तामें श्रीगो-कुल गये ॥ सो मोरारी आचार्य छ शास्त्र पढ़े हते ॥ सो श्रीगोकुलमें श्रीगुसांईजीके दर्शन किये ॥ तब मोरारी आ-चार्यनैं श्रीगुसांईजीसुं पूछयो ॥ जो जगत् सत्य है के अ-सत्य है ॥ तब श्रीगुसांईजीनैं कही जो जगत् सत्य है और संसार जो अहंता ममता सो असत्य है तब मोरारी आ-चार्यनैं कही जो जगत् सत्य होवे तो एकचलेजायहैं ॥ फेर दूसरे उत्पन्न होवेंहैं आगले पदार्थ दीखे नहींहैं ॥ तब श्री-गुसांईजीनैं आज्ञा करी जो प्रभुमें अनंतशक्तीहै सो आ-विर्भाव तिरोभाव शक्तीहुं है ॥ जासुं प्रगट होवे सो दीखे ॥ और तिरोहित होवे सो न दीखे ॥ परंतु जगत् जो असत्य होवें तो ब्राह्मणके जिमायवेको पुण्य क्युं होवे ॥ और सत्कर्म करके सद्गति क्युं होवे ॥ और पापकरके नरकमें क्युं जाय ॥ जगत् झूठी होवे तो कृती झूठी चाहिये ॥ झूठे पदार्थनको फलहुं झूठो चाहिये ऐसे श्रीगुसांईजीके वचन सुनके मोरारी आचार्य श्रीगुसांईजीके सेवक भये ॥ और

माला तिलक धरके अपने संगमें भये ॥ मोरारी आचार्यके संग एक पटेल हतो सो खंभातमें रहेतो हतो और द्रव्यपात्र हतो और शैव हतो ॥ वाकुं देखके गुस्सो आयो ॥ और मोरारी आचार्यसुं कही तुमनें ये कहा काम कन्यो है तब मोरारी आचार्यनें कही मैंनें ठीक काम कन्यो है तब मोरारी आचार्य वा पटेलको संग छोडके श्रीगोकुल रहेगये ॥ और श्रीगुसाँईजीके पास पुष्टिमार्गके ग्रंथ देखे सो विद्वन्मंडन और सुबोधिनीजी इत्यादिक ग्रंथ देखके बहुत प्रसन्न भये ॥ सो मोरारीआचार्य काशीमें जायके कितने पंडितनसुं विवाद करके जीते ॥ फेर मोरारी आचार्य श्रीनाथजीके दर्शन करके और श्रीगुसाँईजीके पास बिदा होयके और श्रीठाकुरजीकी सेवा पधरायके खंभातमें आये आखोदिन भगवत्सेवा करते ॥ और कोईसुं कछु बोलते नहीं ॥ फेर वा गामके पटेलनें मोरारी आचार्यकी आजीविका बंद करदीनी और लोगनकुं पटेल कहेन लगे ॥ जो एकवार मोरारीआचार्य मेरे पास आवे तो ये कहे जैसे करुंगो ॥ सो एक बनियाने मोरारीआचार्यसुं कही जो तुम एकवार पटेलके घर जावो ॥ सो बहुत आग्रह करके पटेलके घर ले गयो तब पटेल उपर बैठो हतो ॥ सो मोरारी आचार्यके आवेकी खबर पडी ॥ तब पटेलनें कही जो मोरारीआचार्य तिलकमुद्रा धोयके आवे तो यासुं बात करुंगो ॥ तब मोरारी आचार्यनें ये बात सुनी ॥ सुनके सो संकल्प कियो या पटेलकी दीनी जितनी वस्तु और जितनी धरती और

घर सो सब कुछ मेरे प्रसुलायक नहीं है ॥ ऐसैं कहैके मोरारी आचार्य अपने घर आये ॥ और श्रीठाकुरजी घरके वहार पधरायके ब्राह्मणनकुं दे दियो ॥ और एक झांपी करके गामसुं वहार जाय रहे ॥ सो वे मोरारी आचार्य ऐसैं टेकके वैष्णव हते ॥ जिननें अन्यमार्गीयकी कुछ वस्तु घरमें राखी नहीं ॥ गामपर्यंत त्याग कर दीनो सो मोरारी आचार्य श्रीगुसांईजीके ऐसैं कृपापात्र हते ॥ वार्ता संपूर्ण ॥ वैष्णव ॥ २१४ ॥ ❀ ॥ ॥ ॥ ॥

श्रीगुसांईजीके सेवक माट बनके एक रजपूतकी वार्ता ॥ सो वे रजपूत माट बनतें श्रीगोवर्धन आयो ॥ तब मानसी गंगामें न्हायो ॥ तब मानसी गंगातें चंदसरोवर गयो ॥ चंदसरोवरपर कुंमनदासजीनें एक मालीके पाससुं आव लिये हते ॥ सो आव पेहेले पेहेले आये हते ॥ सो दस रुपैयामें ठरायके लिये हते ॥ तब कुंडपर धोयके और उहां श्रीनाथजीकुं भोग धरे और श्रीनाथजी उनकी गोदमें बैठके आव अरोगे ॥ फेर टोकरामें धरके मालीके पाससों आव उठवाये और कही चलो दस रुपैया देवें ॥ विचार कियो घरमें तो दस रुपैया नहीं है परंतु मेंस और पाढी वेंचके देउंगो ॥ अबी कोईके पास उधार लेके याकुं देउंगो ॥ ऐसो विचार करके वा मालीकुं संग ले चले ॥ तब रस्तामें रजपूत मिल्यो सो वानें पूछी आवको कहा लैवंगो तब कुंमनदासजीनें कही दस रुपैयामें हमनें ठराये है तुमारे चाहिये तो लेवो ॥ तब वा रजपूतनें दस रुपैया देके लीनें ॥ कुंमनदासजीको मनोरथ पूर्ण

भयो ॥ तब वा रजपूतनें आब खाये सो आब खातमा-
त्रही वाके सब दोष निवृत्त भये और शुद्धचित्त होयगयो
तब कुंमनदासजीसुं पूछयो या संसारमें भगवत्प्राप्ती कैसे
होवे ॥ तब कुंमनदासजीनें कही जो श्रीगुसांईजीके शरण
जावो तो भगवत्प्राप्ती होवेगी ॥ तब वे रजपूत गोपालपु-
रमें जायके श्रीगुसांईजीको सेवक भयो ॥ और श्रीगोव-
र्धननाथजीके दर्शन किये ॥ तब वा रजपूतके मनमें ऐसी
आई जो श्रीनाथजीकुं छोडके कहुं जानो नहीं ॥ तब
श्रीगुसांईजीसुं वीनती करी ॥ जो कृपाकरके मोकुं सेवा
बतावें तब श्रीगुसांईजीनें आज्ञा करी जो तुम हथियार
बांधके और घोडापै अस्वार होयके श्रीनाथजीकी गाय-
नके संग जावो ॥ और गायनमें सिंघ और लियारी आ-
वेहें गायनकुं मार डारेहें विनकी रक्षा करो ॥ और अन-
सखडी महाप्रसाद संग लेजावो ॥ तब वा रजपूतनें वैसे
ही कियो ॥ सो नित्य गायनके संग जाते ॥ फेर
थोडे दिन पीछे गायनके संगवाकुं श्रीनाथजी दर्शन
देवे लगे ॥ कोई समय तो श्रीनाथजी वासुं बोले और
कोई समय श्रीनाथजी वा रजपूतके घोडापर अस्वार
होवे ॥ सो ऐसे श्रीनाथजी विनके संग अनेक प्रकारकी
क्रीडा करन लगे ॥ एकदिन वा रजपूतको बेटा बुलावे
आयो तब वा रजपूतनें कही ॥ जो तू ऐसे जान जो मेरो
बाप मरगयो है मैं ऐसे जाणुंगो मेरो बेटा जन्म्यो नहीं
है ऐसे कहेके वा बेटाकुं पाछो पठायो ॥ परंतु श्रीनाथ-
जीके चरणारविंद छोडके कहुंगये नहीं सो कुंमनदासजी-

की कृपातें वे रजपूत श्रीगुसांईजीको दृढ सेवक भयो ॥
 वार्ता संपूर्ण ॥ वैष्णव ॥ २१५ ॥ ॐ ॥ ॥ ॥
 श्रीगुसांईजीके सेवक एक वैष्णव गुजरातमें
 रहते तिनकी वार्ता ॥ सो एकसमय श्रीगुसांईजी गुजरात
 पधारे ॥ सो वे वैष्णव सेवक भये हते और श्रीठाकुरजी-
 की सेवा पधरायके पुष्टिमागीय परिणालिका प्रमाणसेवा
 करन लगे ॥ और वा वैष्णवके उहां वैष्णव आवते जा-
 वते हते ॥ और एकसमय शीतकालके दिन हते ॥ सो
 वाके घर वैष्णव बहुत आये सो विछोना और ओढवेकुं
 सब दिये और आप आखीरात लंगोट मारके बैठे रहे ॥
 ठंडके मान्ये नींद नहीं आई ॥ और भगवन्नाम लिया
 करे तब श्रीठाकुरजी मंदिरसुं बहार पधारके बाकुं कही
 जो तूं क्युं ठंडमें बैठेहैं ॥ तोकुं ठंड लगेहैं जासुं हमकुं नींद
 नहीं आवेहैं ॥ हमकुं कांपेहैं सो श्रीगुसांईजीनें व्रतच-
 र्यामें कह्यो ॥ हैसो श्लोक ॥ सखिनिर्भरातुरागात्प्राप्तोयन्नि-
 खिलगोपिकैकात्म्यं ॥ तदयंतच्छीतोक्त्यासकंपुलकःस्व-
 यंचासीत् ॥ १ ॥ तब वा वैष्णवनें हाथ जोडके कही जो
 ये आपके दास मेरेघर पधारेहैं इनकुं जो ठंडलगी होती
 तोहूं आपकुं नींद न आवती ॥ जासुं आपके जागवेको
 और श्रमको अपराध मेरेमाथे पड्यो सो मैं मुकुंगो ॥ और
 वैष्णवकुं ठंड लगती तो आपके जागवेको अपराध या वै-
 ण्वनकुं लगतो ॥ जासुं वैष्णवनके बदले मोकुं दुःखहोवेगो
 और अपराध मुकुंगो तो चिंता नहीं है ॥ ये सुनके श्री
 ठाकुरजी हंसे और आज्ञा करी तेरे जैसे वैष्णवनके नाम

लीयेहुं लोगनके अपराध जायंगे तो तोकुं अपराध कैसे
 स्पर्श करेगो ॥ जाहुं में तेरेपर प्रसन्नहुं कछु वर माग ॥
 तब वा वैष्णवनें माग्यो जो मेरो स्नेह वैष्णवनके ऊपर
 दिनदिन अधिकी रहे जिनके प्रतापहुं आप मेरेसंग बोलि
 हैं ॥ तब श्रीठाकुरजीनें आज्ञा करी ऐसेही होयगो ॥ ये
 सुनके वे वैष्णव बहुत प्रसन्न भयो तब जलदी न्हायके
 उत्तम सामग्री करके श्रीठाकुरजीकुं भोग धरी ॥ और
 वैष्णवनकुं महाप्रसाद लिवायो वा दिनतें नित्य श्रीठा-
 कुरजी वा वैष्णवसों बोलते ॥ और जो चाहिये सो मागते
 सो वे गुजराती वैष्णव श्रीगुसाईजीके ऐसे कृपापात्र हते ॥
 वार्ता संपूर्ण ॥ वैष्णव ॥ २१६ ॥ ॐ ॥ ॥ ॥
 श्रीगुसाईजीके सेवक निष्किंचन वैष्णवकी ०
 सो वे निष्किंचन वैष्णव श्रीगुसाईजीको सेवक गुजरातमें
 भयो ॥ तब वा वैष्णवनें ऐसो मनोरथ विचार्यो जो
 मेरे पास द्रव्य होवेतो ब्रजयात्रा जावुं ॥ श्रीनाथजीकुं
 औरसात स्वरूपनकुं सामग्री अरोगावुं ॥ और सब कुंढ-
 नमें ज्ञान करुं ऐसे मनोरथ विचारके लोगनके आगे
 बात करे ॥ तब वा गाममें एक बुन्नीलाल शैठ हतो ॥ सो
 बुन्नीलालशैठके पास द्रव्य बहोत हतो ॥ सो ये बात बु-
 न्नीलालशैठनें जाणी ॥ तब वा निष्किंचन वैष्णवकुं बु-
 लाये और कह्यो ॥ जो तूं मनोरथ विचारैहै सो में तोकुं
 द्रव्य देऊं ॥ तूं मनोरथ कर परंतु पुण्य सब मेरो ॥ वा
 निष्किंचन वैष्णवनें हा कही ॥ और जितनो द्रव्य च-
 हिये इतनो दियो ॥ और द्रव्य लेके ब्रजमें जायके सब

मनोरथ किये ॥ और सब ब्रजयात्रा करी ॥ और एक वर्षपर्यंत गोपालपुरमें रह्यो और श्रीनाथजीकी सेवा दर्शन किये। फेर वा निष्किंचन वैष्णव अपने देशमें आयो तब लोग-ननें कही यानें यात्रा करी तो कहा भयो पुण्यतो सब बुझीलाल श्रेष्ठको है ॥ तब एक वैष्णव बोल्ह्यो ॥ बुझीलाल श्रेष्ठपासे बैठो हतो सुनतो हतो हमारे पुष्टिमार्गमें तो पुण्य चाहिये नहीं ॥ कछु फलकी अपेक्षा नहीं है ॥ फल सब श्रेष्ठ भले लेजाय परंतु या वैष्णवनें या देहसुं टेहेल करी और नेत्रनसुं दर्शनको सुख लियो ॥ ये सुखतो बुझीलाल कैसे ले सकेंगो ॥ ये बात सुनके वा बुझीलाल श्रेष्ठके मनमें ऐसी आई जो मेंहुं वैष्णव होउंतो वहीत आछो ॥ फेर वा निष्किंचन वैष्णवकुं बुलायके और वा वैष्णवके संग ब्रजयात्रा गयो ॥ और श्रीगोकुलमें जायके श्रीगुसांईजीके दर्शन किये ॥ सो साक्षात् पूर्णपुरुषोत्तमके दर्शन भये ॥ तब वा बुझीलाल श्रेष्ठनें वीनती करी महाराज मोकुं शरण ल्यो ॥ तब कृपाकरके श्रीगुसांईजीनें श्रीनवनीतप्रियाजीके संनिधान नामनिवेदन करायो ॥ फेर वा निष्किंचन वैष्णवनें श्रीगुसांईजीसुं वीनती करी ॥ जो महाराज जो कोई आछो काम करे और दूसरेको द्रव्य खर्च याको पुण्य करवेवालेको के द्रव्यखर्चवेवालेको ॥ तब श्रीगुसांईजीनें आज्ञा करी ॥ जो पुष्टिमार्गमें सकामकर्म अनित्य धर्मनमें गणें ॥ और अनित्य धर्मकरे तो वेद-विरुद्ध बाधक होवे ॥ जासुं पुष्टिमार्गमें निष्काम कर्म करे चाहिये और फलकी आशा मनमें राखनी नहीं जो राखे

तो बंदविरुद्ध बाधक होवे ॥ ये मुनके वे निष्किचन वैष्णव प्रसन्न भयो ॥ और चुन्नीलालशेठ बोल्यो जो महाराज मेरे रोमरोम कामनासुं मन्येहैं आप कृपाकरेंगे तो निष्काम अंतःकरण होएंगे ॥ वाको उपाय आप कृपाकरके बतावे तो मेरो कारज सिद्ध होवे ॥ तब श्रीगुसांईजीने आज्ञा करी श्रीठाकुरजीकी सेवा करो तब चुन्नीलालने कही जो मैं सेवाकी रीतीमें समझूं नहींहुं आप कृपाकरें तो समझण पड़े ॥ तब श्रीगुसांईजीने आज्ञा करी या वैष्णवके पास सब मार्गकी विधी सीखो ॥ तब वा चुन्नीलालने वीनती करी जो ये वैष्णव निष्किचन है ॥ याकुं आप आज्ञा करे जो जन्मसुधी मोकुं छोड़के कइ नहीं जाय ॥ तो मैं सेवा पधरावुं और मेरे घरमें सब हुकुम याहीको राखुं ॥ तब श्रीगुसांईजीने वा निष्किचन वैष्णवकुं चुन्नीलालके पास राखदियो ॥ और श्रीठाकुरजी पधराय दिये ॥ और दोनो मिलके सेवा करन लगे ॥ तब श्रीगुसांईजीसुं विदा होवन लगे ॥ तब वा निष्किचन वैष्णवने कही जो मैं याके पास रहूंगो परंतु वर्षमें एक बार ब्रजमें आवुंगो ॥ और श्रीनाथजीकी और श्रीनवनीतप्रियाजीकी झांकी करुंगो ॥ ये चुन्नीलालकुं आप आज्ञा करें मोकुं यामें प्रतिबंध न करें ॥ तब चुन्नीलालने कही सब द्रव्य और घर तुमारोहैं मैं काहेकुं प्रतिबंध करुंगो ॥ तब वे दोनो विदा होयके गुजरातमें आये और हिलमिलके सेवा करन लगे ॥ और जन्मपर्यंत चुन्नीलाल शेठ वा निष्किचन वैष्णवकी आज्ञामें रह्यो ॥ सो वे निष्किचन

वैष्णव श्रीगुसाईजीके ऐसे छपापात्र होते ॥ वार्ता संपूर्ण ॥
 वैष्णव ॥ २१७ ॥ ॐ ॥ ॥ ॥ ॥ ॥
 श्रीगुसाईजीके सेवक रसखान पठाण दिल्ली
 में रहते तिनकी वार्ता ॥ सो वा दिल्लीमें एक साहुकार र-
 हेतो हतो ॥ सो वा साहुकारकी बेटी बहुत सुंदर हतो ॥
 वा छोरासों रसखानको मन बहुत लग गयो ॥ वाहीके
 पाछें फिन्या करे और वाको झूठो खांव और आठ पहर
 वाहीकी नोकरी करे ॥ पगार कुछ लेवे नहीं दिनरात वा-
 हीमें आसक्त रहे ॥ दूसरे बड़ी जातके रसखानकी निंदा
 बहुत करते होते ॥ परंतु रसखान कोईकुं गणते नहीं होते ॥
 और अष्टपहर वा साहुकारके बेटीमें चित्त लग्यो रहेतो ॥
 एकदिन चार वैष्णव मिलके भगवद्वाता करते होते ॥ करते
 करते ऐसी बात निकसी जो प्रभुमें चित्त ऐसी लगावनो ॥
 जैसे रसखानको चित्त साहुकारके बेटीमें लग्योहै ॥
 इतनेमें रसखान ये रस्ता निकस्यो विननें ये बात सुनी
 ॥ तब रसखाननें कही जो तुम मेरी कहा बात करोहो ॥
 तब वैष्णवननें जो बात हती सो बात कही ॥ तब रसखान
 बोले प्रभुको स्वरूप दीखेतो चित्त लगाईये ॥ तब वा वै-
 ण्वननें श्रीनाथजीको चित्र दिखायो ॥ सो देखतहि रस-
 खाननें वो चित्र लेलियो और मनमें ऐसी संकल्प क्यो
 जो ऐसी स्वरूप देखनो जब अन्न खानो उहांसुं घोडा-
 पर बैठके एकरात्रमें हंदावन आयो ॥ और आखोदिन
 सब मंदिरनमें वेष बदलायके फिन्यो ॥ और सब मंदिरनमें
 दर्शन किये और वैसे दर्शन नहीं भये तब गोपालपुरमें

गयो ॥ और वेष बदलायके श्रीनाथजीके दर्शन करवेकुं गयो ॥ तब सिंघपोरियानें भगवदिच्छासुं वाके चिन्ह ब-
 ढीजातवालेके पहेचाण्ये ॥ तब वाकुं धक्का मारके काढ
 दियो ॥ सो जायके गोविंदकुंडपर पडरह्यो ॥ तीनदिन
 सूधी पड रह्यो ॥ खावेपीवेकी कछु अपेक्षा राखी नहीं
 ॥ तब श्रीनाथजीनें जानी ये जीव दैवी है ॥ और शुद्धहै
 और सात्विक है मेरो भक्तहै याकुं दर्शन देउं तो ठीक ॥
 तब श्रीनाथजीनें दर्शन दिये ॥ तबवे उठके श्रीनाथजीकुं
 पकडवे दौन्यो ॥ सो श्रीनाथजी भाग गये फेर श्रीना-
 थजीनें श्रीगुसांईजीसुं कही ये जीव दैवी है ॥ और
 म्लेच्छ योनिकुं पायों है ॥ जासुं याके उपर कृपा करो
 याकुं शरण लेउ ॥ जहांसूधी तुमारो संबंध जीवकुं नहीं
 होवे तहांसूधी में वा जीवकुं स्पर्श नहीं करुं वासुं बोलु
 नहींहुं ॥ और वाके हाथको खावुं नहीं जासुं आप
 याको अंगिकार करो ॥ तब श्रीगुसांईजी श्रीनाथजीके
 वचन सुनके गोविंदकुंडपें पधारे और वाकुं नाम सुना-
 ये ॥ और साक्षात् श्रीनाथजीके दर्शन श्रीगुसांईजीके
 स्वरूपमें वाकुं भये ॥ तब श्रीगुसांईजी विनकुं संग लेके
 पधारे और उत्थापनके दर्शन कराये ॥ महाप्रसाद लि-
 वायो ॥ तब रसखानजी श्रीनाथजीके स्वरूपमें आसक्त
 भये ॥ तब वे रसखाननें अनेक कीर्तन और कवित्त और
 दोहा बहोत प्रकारके बनाये ॥ जैसे जैसे लीलाके दर्शन
 विनकुं भये ॥ वैसेही वर्णन किये ॥ सो वे रसखान श्रीगुसां-
 ईजीके ऐसे कृपापात्र हते ॥ जिनकी चित्रके दर्शन करत-

मात्रहीसंसारमेंहुं चित्त खेंचायके और श्रीनाथजीमें ल-
ग्यो इनके भाग्यकी कहा बडाई करनी ॥ वार्ता संपूर्ण ॥
॥ वेष्णव ॥ २१८ ॥ ॥ ॥ ॥ ॥

॥ श्रीगुसांईजीके सेवक एक रजपूतकी वार्ता ॥

एकसमय श्रीगुसांईजी गुजरात पधारे ॥ मारवाडमें एक
गाममें डेरा किये ॥ उहां एक रजपूत वा देशके राजाकी
तरफहुं हांसल उधरावतो हतो ॥ सो श्रीगुसांईजीके डेरा
देखके उहां आयो सो श्रीगुसांईजीके दर्शन किये ॥ सो
साक्षात् पूर्णगुरुपुत्रमके दर्शन भये ॥ तब साष्टांग दंड-
वत करी ॥ तब वे रजपूत श्रीगुसांईजीको सेवक भयो ॥
और वाको गाम उहांहुं दशकोश दूर हतो ॥ तब उहां
वीनती करके ॥ श्रीगुसांईजीकुं पधराये ॥ और घरके स-
ब सेवक कराये और वीनती करी जो महाराज मेरो मन
बहुत दुष्ट है सो आप कृपा करेतो मेरो मन पवित्र होवे ॥
और कछु पुष्टिमार्गमें लगे ॥ तब श्रीगुसांईजीने वा रज-
पूतकुं श्रीठाकुरजी पधराय दिये और मार्गकी रीती शि-
खाई ॥ तब वे रजपूत सेवा करन लग्यो ॥ सो एकदिन
वा रजपूतनें जुवार हरी शैकके श्रीठाकुरजीकुं धरी ॥ तब
श्रीठाकुरजी प्रसन्न होयके अरोगे ॥ तब श्रीनाथजीनें
श्रीगुसांईजीकुं आज्ञाकरी जो तुमारे सेवक रजपूतनें जु-
वार धरीहै ॥ सो बहुत सुंदर है ॥ और मैं प्रसन्न होयके
अरोग्योहुं ॥ ये बात सुनके श्रीगुसांईजी वा रजपूतके
उपर बहुत प्रसन्न भये ॥ तब चाचाहरिवंशजीकुं बुलायके
श्रीगुसांईजीनें वा रजपूतके गाम पठाये ॥ और आज्ञा करी

जो देखी आवो॥तब चाचाजी कितने एक दिनमें पहुँचे सो वा रजपूतने चाचाजीकुं श्रीगुसाईजीके निजसेवक जानके बहुत आदर क्यो और गदगद कंठ होयगयो ॥ और कहेन लय्यो मेरो बडो भाग्यहै के तुम जैसे भगव दीयनने मेरो घर पवित्र कियो ऐसे कहेके चाचाजीकुं उतरवेको ठेकाणो दियो ॥ तब चाचाजीने कही जो श्रीठाकुरजीको कहा समयहै ॥ तब वा रजपूतने कही हम जैसे जीवनकुं समय पूछवेकी अपेक्षा होवे हे ॥ और आप जैसे भगवदीयतो श्रीठाकुरजीको स्वरूपहै ॥ और हम जैसेनकुं न्यारे न्यारे दीसतहें ॥ जासुं आप भीतर पधारो ॥ तब चाचाजी भीतर जायके टेरा खोल्यो ॥ और बाई समय राजभोग आये हते ॥ तब चाचाजी देखेतो श्रीठाकुरजी अरोगेहैं ॥ चौकीहै सो सिंघासनसुं बहुत बुर धरी हती ॥ और श्रीठाकुरजीकुं नमनमके लेनो पढतो ॥ तब चाचाजीने वा रजपूतकुं कही चौकी सिंघासनके पास धरो ॥ तब वा रजपूतने कपडा पेहेरे हते तब चौकी सरकाई ॥ तब श्रीठाकुरजी आछीरीतीसुं अरोगनलगे ॥ तब चाचाजी टेरा देके बाहेर आये ॥ तब चाचाजीने रसोई करके भोग घरके महाप्रसाद लियो ॥ तब कितनेकदिन रहेके चाचाजी श्रीगोकुल आये ॥ और श्रीगुसाईजीकुं सब समाचार कहे ॥ और कही जो उहां महाप्रसाद मैंने नहीं लियो तब श्रीगुसाईजीने पूछ्यो क्युं नहीं लियो ॥ तब चाचाजीने कही अनाचार बहुत हतो ॥ तब श्रीगुसाईजीने आज्ञा करी जो स्नेहमें आचा-

रको काम नहीं है ॥ जिनके अंतरमें भगवत्स्नेह छाय
गयो है तिनको आचार विचार नहीं रहे ॥ ये सुनके चा-
चाहरिवंशजी वहुत प्रसन्न भये ॥ और वीनती करी जो
आपकी कृपातें ऐसे महत्पुरुषके दर्शन भये ॥ मैं विनको
स्वरूप जान्यो नहीं ॥ सो वे रजपूत श्रीगुसांईजीके ऐसे
कृपापात्र हते ॥ वार्ता संपूर्ण ॥ वैष्णव ॥ २१९ ॥ ॐ ॥
॥ श्रीगुसांईजीके सेवक शैवके बेटाकी वार्ता ॥
सो एक क्षत्री श्रीमहाप्रभुजीको सेवक हतो और नवनी-
तप्रियाजीके जलधरकी सेवा करतो हतो ॥ नवनीतप्रि-
याजी बाहुं अनुभव करावते हते ॥ फेर कोईदिन अपराध
पढ्यो तब बाकी देह छूटी ॥ वानें शैव ब्राह्मणके घर आ-
यके जन्म लियो परंतु कुछ बोले नहीं ॥ रोवे नहीं चुप
करके पढ्यो रहे ॥ जब दूध प्यावे जब पीवे ऐसे करते १२
महिना बीते ॥ जब बाकी वर्षगांठ आई और ज्ञाती भो-
जन भयो तब ज्ञाती भोजनमें वो बोल्यो ॥ श्रीवल्लभा-
चार्यजी इतने अक्षर ॥ फेर दूसरे वर्षमें वर्षगांठको दिन
आयो जब दो नाम लिये ॥ ज्ञातीसभामें वो बोल्यो श्रीव-
ल्लभ श्रीविठ्ठल ॥ ऐसे तीसरे वर्षमें तीन नाम लिये ॥ चोथे
वर्षमें चार नाम लिये ॥ पांचमें वर्षमें पांच नाम लिये ॥
तब बाके पितानें पूछी जो तूं नित्य क्युं नहीं बोलेहैं ॥ तब
वानें कही जो मोकुं श्रीगोकुल लेजावो तब बोलुंगो ॥
तब बाकी पिता श्रीगोकुल ले गयो ॥ तब श्रीगोकुलमें
जायके वा छोरानें बाके पितामुं कही जो तुम श्रीगुसां-
ईजीके सेवक होय जाओ मोकुं सेवक करावो ॥ तब बाको

पिता श्रीगुसांईजीको सेवक भयो ॥ और वा छोराकुं सेवक करायो तब श्रीनवनीतप्रियाजीके दर्शन करते वाके नेत्र भरआये ॥ तब श्रीनवनीतप्रियाजी वा छोराको हाथ पकड़के आपकी लीलामें लगये ॥ तब वाको पिता विद्वान हतो ॥ कह्यो जो याको धन्य भाग्य है याके संगतें भोक्तुं श्रीगुसांईजीके दर्शन भये हैं ॥ और मैं वैष्णव भयोहुं सो वे शैवको बेटा श्रीगुसांईजीको ऐसो कृपापात्र हतो ॥ जाकुं पूर्व जन्मकी बात याद रही हती ॥ और देहसहित भगवल्लीलामें गयो ॥ वार्तासंपूर्ण ॥ वै०॥२२०॥

श्रीगुसांईजीके सेवक तीनवैष्णवकी वार्ता ॥

एक साहुकारको बेटा वाको नाम मोहनदास हतो ॥ और वजीरकी बेटी वाको नाम गोपीबाई हतो ॥ और एक बनिया वाको नाम निहालचंद हतो ॥ सो वे तीनोजनें एक पाठशालामें पढते हते ॥ सो एकसमय श्रीगुसांईजी वा गाममें पधारे ॥ सो वे तीनोजनें श्रीगुसांईजीके सेवक भये ॥ और मोहनदासको और गोपीबाईको स्नेह विशेष भयो ॥ और तीनोजनें श्रीठाकुरजी पधरायके सेवा करनलगे ॥ और वे मोहनदास नित्य गोपीबाईके घर जाय और भगवद्दार्ता वांचते ॥ जादिन न जाय वा दिन गोपीबाई प्रसाद न लेती ॥ एकदिन वा गामके राजाके मनुष्यननें वाकुं गोपीबाईके घर जातो दिख्यो ॥ तब राजाकुं खबर करी ॥ तब राजा वेष बदलायके फिरवे निकस्यो ॥ और दोचार दिन छिपके मोहनदासकी और गोपीबाईकी चेष्टा देखी राजाकुं इतनो तो निश्चय भयो ॥ विनके

स्नेहमें विकार नहीं है परंतु लोगनमें बहुत चर्चा होवेहे सो ये चर्चा बंध करी चाहिये ॥ तब वा राजानें मोहनदासकुं पकन्यो ॥ और कही राज्यसे चलो जब मोहनदासकुं राज्यमें लेगये और कही रातकुं कैदमें रहो नहीं तो जामिन देवो ॥ तब मोहनदासनें मावापसों कही जामिन पडो तब मावापनें कही हम जामिन नहीं पडेंगे तब कोई जामिन भयो नहीं ॥ तब वह निहालचंद जामिन भयो ॥ तब वाकुं छोड्यो ॥ फेर दूसरे दिन राज्यके आदमी वाकुं लेगये ॥ तब राजानें हुकुम कन्यो याकुं गामवहार लेजाओ ॥ और उहां याकुं मारडारो ॥ परंतु मैं आडुंगो हुकुम देउंगो जब मारो ॥ फेर वाकुं गामवहार लेगये ॥ और उहां तमासा देखवेके लीयें बहुत भीड भई ॥ तब वा गोपीवाई पुरुषको वेष पहरेके घोडापर बैठके आई ॥ जब राजा आयो तब वा गोपीवाईनें तलवार खेंचके राजाके मनुष्यनकुं भगायो ॥ मोहनदासकुं घोडापर चढाय लियो ॥ तब राजानें पहचानी ॥ तब मनुष्यनकुं हुकुम दियो ॥ दूर जावो याकुं कछु मति रहो ॥ और प्रधानकुं कही ये तेरी बेटी है याकुं छुडाय लेजाय है ॥ मैंनें परीक्षालीनी है यामें कछु विकार नहीं है भगवन्नाम लेवे हैं ॥ जासुं इनकी आपसमें विवाह करे तो ठीक ॥ ये बात प्रधाननें कबूल करी ॥ घरमें जायके ऐसो ठराव कन्यो या मोहनदासकुं विवाह देनी तब वा मोहनदासनें और गोपीनें प्रधानसुं कही जो हमारो बहेनभाईको संबंध है ॥ और हम एक दूसरेकुं भाईबहेन बोले हैं ॥ जासुं

हमारी विवाह नहीं होवेगो ॥ ये सुनके प्रधान बहुतप्रसन्न भयो और कही जो अब विवाह तुमारो इनसुं नहीं करुंगो ॥ और तुम एक दूसरेके घर जावो आवो यामें प्रतिबंध नहीं करुंगो ॥ और कोई निंदा करेगो तो मैं जवाब देउंगो ॥ वे तीनोंजनें ऐसे टेकके वैष्णव हते ॥ जिननें शीघ्र देनो कबूल कियो ॥ परंतु स्नेह नहीं छोड्यो ॥ वार्ता संपूर्ण ॥ वैष्णव ॥ २२१ ॥ ❀ ॥ ॥ ॥

श्रीगुसांईजीके सेवक एक ब्रजवासी रावलमें रहते तिनकी वार्ता ॥ सो वे ब्रजवासी गाय चरावतो हतो ॥ सो एकदिन श्रीगोकुलमें जायके श्रीगुसांईजीकुं वीनती कीनी जो महाराज मोकुं शरण लेउ ॥ तब श्रीगुसांईजीनें कृपा करके नामनिवेदन करवायो ॥ तब वह ब्रजवासी गाय चरावन गयो ॥ सो एकदिन चिताहरणघाटसूधी गयो उहां जायके देखे तो अवीर गुलाल चौबार्चंदन केशर बूको गौरो मृगमद जखकरदम घनसार जवाह शाख ऐसे अनेक सुगंधीनकी वर्षा होय रही हती ॥ सबमेंसुं थोडो थोडो लेके जूदी जूदी गांठ बांधके श्रीगोकुल श्रीगुसांईजीकुं दिखावे आयो ॥ तब श्रीगुसांईजीनें कृपाकरके सब देख्यो ॥ और वाकुं कही ये कहांसुं लायो ॥ जब वानें सब समाचार कहे ॥ तब श्रीगुसांईजी पधारै सो वानें जायके जगा देखाई ॥ तब श्रीगुसांईजीने निश्चय कियो जो श्रीठाकुरजी होरी खेलते इहांसुं आगें पधारै है ॥ तब श्रीगुसांईजी आगें जायके देखें तो श्रीठाकुरजी होरी खेलेहैं ॥ और अनेक यूथ ब्रजभक्तनकेहैं ॥ तब श्रीगु-

साईजी दूर ठाढ़े रहे ॥ तब श्रीठाकुरजी हाथ पकड़के भी-
तर लेगये ॥ और अपने संग खिलाये ॥ ब्रजवासी दूरसुं
देखत रह्यो फेर श्रीगुसाईजी खेलके पधारे ॥ तब वा ब्रज-
वासीनें पूछी जो महाराज ये कोन हते और ये हजारें
लुगाई कहांसुं आई हती ॥ मोकुं कछु समझण पड़ी नही ॥
तब श्रीगुसाईजीनें कृपाकरके वा ब्रजवासीकुं दिव्य नेत्र
दिये ॥ तब श्रीठाकुरजीके दर्शन सब लीला सहित होवे
लगे ॥ ऐसे दोघड़ी पर्यंत वा ब्रजवासीकुं दर्शन भये ॥
फेर वा ब्रजवासीकुं संगलेके श्रीगुसाईजी गोकुल पधारे
सो वे ब्रजवासी श्रीगुसाईजीके ऐसे कृपापात्र हते जिनकुं
याही देहें लीलाको अनुभव भयो ॥ वार्ता संपूर्ण ॥ वै-
ष्णव ॥ २२२ ॥ ॥ ॥ ॥ ॥

श्रीगुसाईजीके सेवक एक वैष्णव जम्हेरचंद
गुजरातमें रहेते तिनकी वार्ता—सो जम्हेरचंद श्रीगोकुल
गये ॥ और श्रीनवनीतप्रियाजीके दर्शन किये ॥ और सा-
तस्वरूपनके मनोरथ किये ॥ और श्रीनाथजीके वागा-
वखनको सामग्रीको मनोरथ कियो ॥ और बालक तथा
बद्ध बेटीनको मनोरथ कियो ॥ फेर श्रीगुसाईजीसुं वीनती
कीनी जो मेरे हजार वैष्णवनकुं भोजन करावनकीइच्छा
है ॥ तब श्रीगुसाईजीनें आज्ञा करी एक मरियादीकुं क-
राय द्यो तो हजार आय गये ॥ तब जम्हेरचंदनें वीनती
कीनी ॥ जो हजार मरियादीकुं भोजन कराउंगो तब
श्रीगुसाईजीनें आज्ञा करी एक स्नेही जाकुं भगवद और
भगवदीयमें स्नेह होवे ऐसे एककुं करायदे तो हजार म-

रियादी होजायेंगे ॥ तब वानें कही हजार प्रेमीकुं लेवाउं तो कैसे ॥ तब आपनैं कही एक आसक्तीवानकुं करावे ॥ तो हजार प्रेमी आय जायेंगे ॥ तब वानें कही हजार आसक्तीवानकुं लीवाउं तो कैसे तब आपनैं आज्ञा करी एक व्यसनवानकुं करावे तो सब आयजायेंगे तब वानें कही जो हजार व्यसनवानकुं भोजन करावुं तो कैसे तब श्रीगुसाईजीनैं आज्ञा करी जो व्यसनवान हजार कहायुं मिलेंगे ॥ व्यसन अवस्थातो गजनघावनकुं सिद्ध भईहै ॥ और आसक्ती कुंमनदासजीकुं सिद्ध भईहै और कहायुं लावेंगो तब वा जव्हेरचंदने पूछी जो व्यसन अवस्थाको स्वरूप कहा है और आसक्तीवानको स्वरूप कहा ॥ तब श्रीगुसाईजीनैं आज्ञा करी खेहीके देखेविना ज्वर चढ़ आवे ॥ व्याकुल मन होजाय ग्लानी होवे उद्वेग होवे उन्माद होवे शोचहोवे ॥ हर्ष होवे रुदन करे ॥ ऐसे अनेक प्रकार क्षणक्षणमें होयाकरें ॥ जिनकुं बुद्धिमान व्यभिचारीभाव कहेहैं ॥ सो विप्रयोगमें होवेंहैं ॥ याको नाम व्यसन अवस्था हैं और आसक्तीवानकुं ग्रहके कार्यमात्रमें अरुची होवेंहैं अष्टपहेर देखवेंमें मन रहेहैं व्यसन अवस्थायुं ये उतरती अवस्थाहै जायुं पीछे व्यसन सिद्ध होवेंहैं श्रीमहाप्रभुजीनैं आज्ञा करीहै भक्तिवर्धिनी ग्रंथमें ॥ ॥ सो श्लोक ॥ स्नेहाद्रागविनाशस्यादासक्त्यास्याद्ग्रहारुचिः ॥ गृहस्थानां बाधकत्वमनात्मत्वं च भासते ॥ यदास्याद्वचसनंकृष्णकृतार्थस्यात्तदैव हि ॥ १ ॥ यारीतसु श्रीमहाप्रभुजीनैं आज्ञा करीहै जायुं ऐसी अवस्थावालेतो

वैष्णव (२२४) दामोदरदास और विनकीदोय स्त्री. (३७१)

नहीं मिलेंगे परंतु हजारको नेम छोड़दे त्यागीनकुं लीवा
 वो तो तेरो कल्याण होवेगो ॥ और श्रीठाकुरजी प्रसन्न
 होवेंगे ॥ ये सुनके जव्हेरचंदनैं वैसेही कियो ॥ सो वे
 जव्हेरचंद श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २२३ ॥ ❀ ॥ ॥ ॥

श्रीगुसांईजीके सेवक दामोदरदास और वि-
 नकी दोय स्त्रीनकी वार्ता ॥ सो वे दामोदरदास जे कोई
 वैष्णव घरमें आवते तिनकुं बड़े आदरसुं प्रसाद लेवावते
 और चाहे जैसो वैष्णव आवतो विनके ऊपर अभाव नहीं
 लावते ॥ ये बात एक ईश्वरदास वैष्णव हतो वानैं सुनी ॥
 तब वे दामोदरदासकी परीक्षा करवेके लीयें वा गाममें
 आये ॥ और आयके बावडीपर सोय रहे ॥ तब दामो-
 दरदास नित्य बावडीपर आये गये वैष्णवकी खबर का-
 ठवेकुं जाते हते ॥ सो देखेंतो वैष्णव सूतोंहैं बाके गलामे
 कंठी देखके बाकुं जगाये ॥ तब वो ईश्वरदास गारी देन
 लग्यो ॥ तब बाकी हाथ पकरके घरमें लाये ॥ और न्हा-
 वाये और महाप्रसाद लेवेकी वीनती कीनी ॥ तब ईश्व-
 रदासनैं कही हम महाप्रसाद नहीं लेवेंगे ॥ तब दामोद-
 रदासनैं हाथ जोड़के कही तुम क्यों नहीं ल्यो ॥ तब
 ईश्वरदासनैं कही तुमारो घर और द्रव्य और स्त्री
 सब हमकुं देवें तो लेवेंगे ॥ तब दामोदरदासनैं कही
 तुमकुं दियो ॥ तोइ लेवे न बैठो ॥ तब ईश्वरदासनैं
 कही तुम घरमेंसुं निकस जावो तब दामोदरदासजी
 श्रीठाकुरजी पधरायके निकसवेको विचार कियो जब

न्हायके श्रीठाकुरजीकी झांपी करन लगे तब श्रीठाकुरजी
 बोले जो वे वैष्णव प्रसाद नहीं लेवे तो इनकी मर्जी ॥ प-
 रंतु तूं मोकुं काहेकुं पधरावैहैं ॥ तब दामोदरदास बोले
 हे प्रभु हे दीनबंदु इतने दिन आप कोईदिन बोले नहींहो
 जब वैष्णव कुपित भयोहे तब आप बोलेहो जिनके को-
 पको फल इतनो भयो तो विनकी प्रसन्नताको फल तो
 अनिर्वचनीय होवेगो ॥ जासुं मैंतो इहांसुं जाउंगो और
 ये प्रसन्न होयके प्रसाद लेंगें ॥ तब मेरोचित्त प्रसन्न हो-
 वेगो तब श्रीठाकुरजी प्रसन्न होयके बोले जो ये वैष्णव
 तेरेपर प्रसन्नहैं और हमहुं प्रसन्नहैं जासुं तुम कछु मागो ॥
 तब दामोदरदासनें माग्यो जो मेरे ऊपर कोईदिन वैष्णव
 अप्रसन्न न होवें ॥ और मोकुं अभाव न आवे ये मागहुं
 ॥ तब श्रीठाकुरजीनें आज्ञा करी जो ऐसेही होयगो तब
 दोनो वैष्णवननें मिलके महाप्रसाद लियो तब ईश्वरदासनें
 कही मैं तुमारी परीक्षा लेवेके लीयें आयोहुं ॥ सो मेरे अप-
 राध क्षमा करो ॥ सो वे दामोदरदास ऐसे कृपापात्र हते ॥
 जिनकुं कोईदिन वैष्णवके ऊपर अभाव नहीं आवतो ॥
 विनसो श्रीठाकुरजी बोलते चालते बातें करते विनकी
 कहा बढाई करें ॥ वार्ता संपूर्ण ॥ वैष्णव ॥ २२४ ॥ ❀ ॥
 श्रीगुसांईजीके सेवक कबूतर कबूतरीकी वार्ता
 एकसमय श्रीगुसांईजी गुजरात पधारे हते ॥ तब महीनदी
 पूर आई हती ॥ उहां श्रीगुसांईजीके डेरा भये ॥ जंगल
 हतो ॥ उहां सामग्री भई ॥ तब भोजनको समय भयो ॥
 तब श्रीगुसांईजीनें भोजन न करे ॥ तब चाचाहरिवंशजी

नैं वीनती करी जो भोजन क्युं नहीं करे तब श्रीगुसाई-
जीनें आज्ञा करी आज कोईजीव शरण नहीं आयो है ॥
कमतीसो कमती दो जीव नित्य शरण आये चहीये ॥ ह-
मकुं श्रीठाकुरजीकी आज्ञाहै ॥ यातें भोजन नहीं करेंगे ॥
तब चाचाजी जायके एक वृक्षपेंसुं कबूतर कबूतरीकी जोड़
लाये ॥ तब श्रीगुसाईजीनें कृपाकरके विनकुं नाम सुना-
यो ॥ तब वे उहां बैठ रहे और श्रीगुसाईजीनें भोजन
किये ॥ और विनकुं जूठन धरी विन कबूतर कबूतरीनकुं
ज्ञान भयो ॥ फेर वे कबूतर कबूतरनी उहांसुं उड़के जहां
वैष्णव रहेते हते वा गाममें एक वृक्षके ऊपर घोंसला बां-
धके दोनो रहे ॥ जहां भगवद्वार्ता होवे तहां सुनवे जाएं ॥
वैष्णवनकी गोदमें बैठते ॥ वैष्णवके पास फिन्थो करे ॥
और भगवद्वार्ता होयचुके तब उड़के ठेकाणे जाते ॥ वा
गामको एक राजा हतो ॥ सो बाकुं कोढ़ भयो तब उपाय
वहुत कन्ये ॥ कोढ़ मिटे नहीं ॥ सो वा राजाकुं एक स-
र्पनें वरदान दियो हतो ॥ जो पशु पक्षी आपसमें बात क-
रेंगे सो तूं समझैगो सो राजा समझतौ हतो ॥ तब एक
वैद्यनें कही जो कबूतरनकी रुधिर लावे तो मैं औषध दे-
ऊंगो तो मिट जायगो ॥ तब राजानें हुकुम कन्यो ॥
कबूतर पकड़ले आवो तब एक मनुष्य भगवन्मंडलीमें
कबूतर आवेंहैं ऐसे जाणतौ हतो सो कंठी तिलक करके
वा कबूतर कबूतरीकुं पकड़ लायो ॥ और राजाकुं दिये ॥
तब राजानें पीजरामें रखाये ॥ और आपनें पास पीजरो
रखायो ॥ तब कबूतरी बोली कबूतरसुं हमकुं क्युं पकड़

राखेहे तब कबूतरनें कही जो राजाकुं कोठ भयोहै सो आपणेकुं मारके आपणी लोही लगावेगो तब कोठ मिटेगो ॥ ऐसे वैद्यनें राजासुं कहीहै ॥ तब कबूतरनी बोली जो वैद्य बडो सुखहै हमारी विठ लगावे तो कोठ तुर्त मिटजाय और लोही लगावें तो महिना दो महिनामें मिटेगो ॥ सो ये बात राजानें सुनी ॥ राजाकुं बोली समझवेको वरदान हतो ॥ जासुं झट समझ गयो ॥ तब राजानें अपने हाथनसुं विनकी विठ लगाई ॥ तब तुर्त कोठ मिट गयो ॥ तब राजानें वाही घड़ी विनकुं छोड दियो ॥ तब वे कबूतर कबूतरनी जायके भगवद्वार्ता सुने ॥ सो वे कबूतर कबूतरनी ऐसे कृपापात्र हते ॥ जिनके लीयें श्रीठाकुरजीनें राजाकुं पेहेली वरदान दिवायो हतो जिनके भाग्यको पार नहीं ॥ वार्ता संपूर्ण ॥ वैष्णव ॥ २२५ ॥

श्रीगुसाईजीके सेवक विठलदासकी वार्ता ॥

सो वे विठलदास आगरेमें रहेते हते ॥ और जरीको वेपार करते हते ॥ सो जरीके बहुत वस्त्र एकठे कस्ये ॥ वालक और बड्ड बेटीनके लायक सो गांठ बांधके श्रीगोकुलमें लेगये ॥ और श्रीगुसाईजीकुं वीनती कीनी ये अंगिकार करें ॥ तब श्रीगुसाईजीनें वे सब वस्त्र यमुनाजीमें पधराय दिये ॥ तब वे विठलदास बहुत उदास भयो तब श्रीगुसाईजीनें विठलदासके मनकी जानी ॥ सो विठलदासकुं आप संग लेके रमणरेती पधारे उहां दिव्य नेत्र दिये ॥ तब रासके दर्शन भये ॥ रासमें श्रीठाकुरजी और ब्रजभक्त और श्रीस्वामिनीजी वही जरीके वस्त्र पेहेरे हते ॥

सो विठ्ठलदास दर्शन करके बहुत प्रसन्न भये ॥ और मनमें जान्यो जो मेरो बड़ो भाग्य है ॥ और श्रीगुसांईजीकी कृपा बिना ऐसे दर्शन कौन करावे ॥ दर्शन करके अपनी जन्म सुफल मान्यो ॥ फेर श्रीगोकुल आयके श्रीनवनीतप्रियाजीके दर्शन क्ये ॥ उहां जरीके वस्त्रनके दर्शन भये ॥ फेर श्रीनाथजीके दर्शन करे ॥ उहांहुं वाही जरीके दर्शन भये ॥ तब विठ्ठलदासनं मनमें विचार कियो ॥ जो जरी तो थोड़ी हती सब ठेकाणे वाही जरीके वस्त्रनके दर्शन होवे हैं ॥ जासुं श्रीगुसांईजी और यमुनाजी और श्रीठाकुरजी तीनो स्वरूप एक है ॥ सो ऐसो अनुभव विठ्ठलदासजीकुं भयो ॥ सो श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २२६ ॥ ❀ ॥

श्रीगुसांईजीके सेवक रत्नावती राणीकी वार्ता
 सो रत्नावती आमेरमें रहेती हती ॥ मानसिंगराजाके भाई माधोसिंघकी राणी हती ॥ सो वा रत्नावतीके पास खवासनी रहेती ॥ सो खवासनी श्रीगुसांईजीकी सेवक हती ॥ अनन्य वैष्णव हती जब वा खवासनीकुं जंभाई आवती छीक आवती जो कछु विस्मय जैसो होतो ॥ तब वे खवासनी श्रीकृष्णसंबंधी भगवानके नाम लेती ॥ कबहुं नंदकिशोर कबहुं नंदकुमार कबहुं वृंदावनचंद कबहुं गोकुलचंद कबहुं यशोदानंद ऐसे नाम लेके खवासनीके नेत्रमें जल मरी आवते ॥ ऐसे क्षणक्षणमें होयाकरे तब खवासनीकुं रत्नावतीराणीनें देखी ॥ तब रत्नावतीराणी बोली जो तुम घड़ीघड़ी कहा नाम लेउ हो ॥ और

क्युं तुमारे नेत्र भर आवेंहं ॥ और शरीरकी शुद्धी मूल-
 जाओही ॥ तब वा खवासनीनें कही ये मार्गतो ताप
 क्लेशको है ॥ तुम मुखीलोक यामें काहेकुं पडोहो ॥ तब
 वा राणीनें बहुत आग्रह कियो ॥ तब वा खवासनीनें कही
 जो परमभगवदीय जो स्नेहीहैं विनकी कृपा हीवे तब विरह
 उत्पन्न होवेहे ॥ तब ये शरीरये दुःख सहिश्के विरह दुःख
 तब सह्यो जाय ॥ तब राणीनें कह्यो जो तुम मोकुं
 समझावो तो तुम कहो तैसे करूंगी ॥ तब वा खवास-
 नीनें पुष्टिमार्गकी रीती बताई ॥ तब वा राणीनें वा ख-
 वासनीसुं टेहेल छुडायके भगवन्नाम सुनायवेकरी ऐसो
 ठराव करदियो ॥ तब वो खवासनी आखो दिवस वा
 राणीकुं पुष्टिमार्गीय भगवत्स्वरूप और गुरुको स्वरूप
 और वैष्णवको स्वरूप समझायो करे ॥ फेर कोईदिन
 श्रीगुसाईंजी उहां पधारे ॥ तब रत्नावतीराणी सेवक
 भई ॥ तब रत्नावतीको बेटा प्रेमसिंघ हतो वाकुं सेवक
 करायो ॥ तब इंद्रनीलमणीको श्यामस्वरूप सिद्ध करा-
 यके पुष्टिकरायके सेवा करन लगी ॥ तब धीरेधीरे भाव-
 बढवे लग्यो ॥ अनेक प्रकारकी सामग्री और पकवान
 भोग धरे ॥ और श्रीठाकुरजीकुं लाढलडावे और शृंगार
 करते भगवत्स्वरूपमें निमग्न होयजाय अंग अंगमें माधुर्य-
 र्यता भरायगई ॥ तब वा खवासनीसुं पूछो जो प्रगट स्व-
 रूप कैसे मिले तब वा खवासनीनें कही जो ये मेहेलके
 पास एक दूसरो मेहेल बनाओ और वामें वैष्णव आयके
 उतरे तब वैष्णवनकुं आप प्रसाद लेवावे ॥ तब श्रीठाकु-

रजी प्रगट होयके दर्शन दें ॥ तब भगवत्कृपा संपूर्ण होवे ॥ तब दूसरो मेहेल करायो और गाम बहार चौकी बैठाई और जो वैष्णव ब्रजजात्रा जाय बिनकुं लायके मेहेलमें उतारे और महाप्रसाद सब अनसखड़ीको वैष्णवनके लीयें पठाय देवे ॥ और वैष्णव लेवे तब राणी चिक डारके पडदामें बैठके वैष्णवनके दर्शन करती ॥ एकदिन वैष्णवकीमंडलीमें श्रीठाकुरजीके दर्शन वाकुं भये ॥ तब खवासनीसुं कहेके राणी पडदा छोडके बहार निकसके मंडलीमें जाय बैठी ॥ और हाथ जोडके वैष्णवनकुं भगवत्स्मरण करे और वीनती करी जो मेरे मनमें बहुत दिनसुं अभिलाष लागरहीहै ॥ जो तुम प्रसन्न होयके आज्ञा द्यो तो मैं हाथनसुं वैष्णवनकुं प्रसाद धरुं ॥ तब वैष्णवननें हा कही ॥ तब सोनाको थार लेके सब वैष्णवनकुं परोसके और महाप्रसाद लिवायो ॥ और चंदन लगायो ॥ और वीडी खवाई ॥ तब भगवद्भार्ता करन लगी ॥ सो बहुत आनंद भयो तब गाममें खबर परी राणी पडदा छोडके बहार आईहै ॥ तब आखो गाम देखवे आयो ॥ और गाममें खूब धामधुम मची ॥ तब राजा कहूं दूसरे गाम गयो हतो ॥ तब राजाके दिवाननें पत्र लिखके मनुष्य पठायो ॥ तब वा मनुष्यनें राजाकुं जायके पत्र दियो ॥ सो पत्र वांचके राजाकुं क्रोध भयो ॥ वाई समय वा राणीको बेटा प्रेमसिंघ काका मानसिंघराजाकुं तिलक माला करके सलाम करवे आये ॥ तब राजा बोल्यो आवो मोडीके ॥ ये सुनके प्रेमसिंघ ठाडो रह्यो ॥ और

(३७८) दोसौबावन वैष्णवकी वार्ता.

राजा क्रोध करके उठके भीतर गयो ॥ तब प्रेमसिंघनें लोगनसुं पुंछो जो काकानें मोकुं कहा कही है ॥ तब सब लोगननें वाकी माके सब समाचार कहे ॥ तब अपने डेरामें आयके विचार कियो ॥ सभामें काकानें मोडीको कह्यो ॥ जासुं ये बातको स्वांग पूरो करनो चहीये ॥ तब माजीकुं पत्र लिख्यो जो सभाके बीच मोकुं काकानें मोडीको कह्यो है ॥ जासुं अब तुम ये स्वांग पूरोकर दिखावो ॥ अब मैं मोडीको रहुं तो ठीक ॥ प्राणतो एकवार जायंगे ॥ सो पत्र मनुष्यनें प्रेमसिंघकी माता रत्नावती राणीकुं जायके दियो ॥ जो पढदासुंवाहर निकसी हती वाहीकुं दियो तब राणी पत्र वांचके बहुत प्रसन्न भई ॥ और श्रीठाकुरजीकी और वैष्णवनकी आज्ञा लेके माथो मुंडाय डान्यो ॥ घणी जीवतो हतो तो पण भगवद्धर्मनकुं मुख्य मानके संसारमें असत्की छोडवेके लीयें माथो मुंडाय डान्यो तब श्रीठाकुरजी वैष्णव उतरते हते ॥ वाही मेहेलमें पधराय लाई और कीर्तन करे ॥ नाचे और गावे आनंद करन लगी ॥ और श्रीठाकुरजीकुं लाडलडावन लगी ॥ फेर पुत्रकुं पत्र लिख्यो ॥ तब मनुष्यननें जायके वाको पुत्र प्रेमसिंघ हतो वाकुं पत्र दियो ॥ तब प्रेमसिंघको ऐसो नेम हतो ॥ जहांसूधी मोडीको नहोउं तहांसूधी अब नहीं खाउंगो फलाहार करुंगो ॥ जब वाकुं पत्र पहींच्यो तब माथेपर चढायलियो ॥ और नोबत बैठाई ॥ और वधाई बांटवे लग्यो ॥ बडी खुशी करी ॥ तब राजा मानसिंघजीकुं ख-

वर भई ॥ तब मानसिंघजीकुं लोगननें कही ॥ जो तुमनें सभामें कही हती सो स्वांग प्रेमसिंघजीनें कर दिखायो है ॥ मोडीको वन गयो है ॥ ये सुनके राजा मानसिंघ बहुत उदास भयो और ऐसो विचार कियो ॥ जो भाईकी बड़ुंको मराय डारनो परंतु लोगनमें निंदा न होवे और पृथ्वीपतीकुं ऐसी खबर न परे ॥ जो मानसिंघ राजानें स्त्री मराई है ॥ ऐसी नाम बदनाम न होवे ऐसी रीतीसुं मराई डारनी ॥ ये विचार करके राजानें तैयारी करी ॥ ये खबर प्रेमसिंघजीकुं भई तब प्रेमसिंघ बोल्यो ॥ जो राजालोग घरतीके लीयें माथों कटावे हैं तो भक्तीपर माथो कटावे यामें कहा चिंता है ॥ तब राजा घर गयो और गामके बड़े बड़े आदमी मिलवेकुं आये ॥ तब राजानें बिनसुं कही जैसे अपनी निंदा न होवें और कारज सिद्ध होवें वैसो उपाय करो जैसे वने तैसे वा रत्नावतीकुं मराय डारो ॥ परंतु अपनो नाम न होवे ॥ तब एक मनुष्यनें ऐसो विचार बतायो ॥ जो ऐसी बंदोबस्ती करो पींजरामें सिंघहै सो छोड देवो सब मनुष्यनकुं बहार काढ देवें और कमाडलगाय देवें ॥ भीतर जायके रत्नावतीकुं सिंघ मार डारेगो और फेर सिंघ पकड लेंवेंगे ॥ तब बात दब जायंगी ॥ ऐसो विचार सबकों आछो लग्यो ॥ वैसे सिंघ छोड दिये रत्नावतीके पास सिंघ गयो ॥ तब वो खवासनी बैठी हती और राणी श्रीठाकुरजीकुं श्रृंगार करती हती ॥ तब वा खवासनीनें सिंघकुं देखके जयजयकरके ठाढी भई ॥ श्रीचसिंहजी पधारे है मेरे भा-

ग्यहै ऐंसे कहेनलगी ॥ और जायके सिंघपर हाथ फेरन
 लगी और तिलक कन्यो और फूलनकी माला पहेंरई
 और हाथ जोडके ठाडी रही ॥ तब वाकी भावनाकी स-
 चाई देखके श्रीठाकुरजी वा सिंघमें प्रवेश करके वा खवा-
 सनीकुं चाटन लगे ॥ जैसे नृसिंहजीनें प्रल्हादजीकुं चा-
 टयो हतो ॥ सो श्रीमहाप्रभुजीनें पुरुषोत्तम सहस्रनाममें
 लिख्योहै ॥ सो नामा ॥ भक्तांगलेहनोद्योतक्रोधपुंजःप्रशांत-
 धीः ॥ फेर सिंघ पीछे फिरके मेहेलनसुं बहार कूद पडयो
 और बहिर्मुख लोग ठाडे हते ॥ राजाकी फोज सैकडनकुं
 मारडारे गाममें हाहाकार पडगयो ॥ और बहोत त्रास
 पडगयो बडो हाहाकार भयो ॥ तब राजा मानसिंघ
 बहोत डरप्यो और तुरत दौडके भाईकी बडुके पावन
 पन्यो ॥ और साष्टांग दंडवत करके पडरह्यो ॥ कह्यो
 उठवेको भान रह्यो नहीं तब रत्नावती बोली ॥ उठो
 उठो श्रीठाकुरजीके दर्शन करो ॥ अब श्रीठाकुरजीनें
 सिंघरूप मिटायके दूसरे रूपसुं दर्शन देंवेंहैं ॥ अब तो
 उठो तब राजानें उठके दर्शन कियो ॥ फेर राणीसुं कही जो
 तुम हमारी रक्षा करो ॥ हम तुमारी शरण आयेहैं ॥
 ये सब राज्य और धन तुमारोहै ॥ तुमनें संसारको लोभ
 छोडके माथो मुंढायोहै जैसे तुमारी इच्छा होवे तैसे
 तुम करतो ॥ तब मानसिंघराजा घरगयो और खजा-
 नचीकुं डुकुम कियो ॥ महिनेके महिने दशहजार रुयेया
 वा राणीकुं पहुँचायद्यो ॥ और अवकी रुपैया जितनें
 मागे इतनें मोकुं पूछके देणे ॥ एकदिनकी ढील करनी

नहीं ॥ तब वो खजानची महिनेके महिने दशहजार रुपैया पहाँचावती ॥ सो सब रुपैया सासग्रीमें खर्च डारती सो वे रत्नावतीराणी श्रीगुसाईंजीकी टेककी कृपापात्र होती ॥ और मानसिंघराजा वा रत्नावतीके श्रीठाकुरजीके दर्शन कन्ये बिना जल नही लेती वे राणी और खवासनी श्रीगुसाईंजीकी ऐसी कृपापात्र होती ॥ वार्ता संपूर्ण ॥
वैष्णव ॥ २२७ ॥ ॐ ॥ ॥ ॥ ॥ ॥

श्रीगुसाईंजीके सेवक दक्षणको राजा तिन ० सो वा राजाके एकसौ आठ राणी होती ॥ परंतु कोई राणीकुं संतान न भई ॥ जासुं वा राजाको मन बद्धत उदास रहैतो हतो ॥ तब वा दुःखसुं राजा यात्रा करवे गयो ॥ और श्रीजगन्नाथरायजीके दर्शनकुं गयो ॥ उहां श्रीगुसाईंजीके दर्शन भये ॥ सो साक्षात् पूर्णपुरुषोत्तमके दर्शन भये ॥ तब वो राजा श्रीगुसाईंजीको सेवक भयो ॥ तब श्रीगुसाईंजीसुं वीनती कीनी जो महाराज मेरे संतान नहीं है ॥ जासुं मेरो चित्त लौकिकमें बद्धत लग्यो है ॥ तब श्रीगुसाईंजीने आज्ञा करी तुम भगवत्सेवा करो ॥ तब वह राजा श्रीठाकुरजी पधरायके भगवत्सेवा करन लग्यो ॥ अपने देशमें आयो ॥ फेर राजानें एक और राणी करी ॥ सो तेलीकी बेटी होती ॥ सो वा राणीने राजासुं कही जो मोकुं भगवत्सेवा करन द्यो ॥ तब राजानें कही तुम श्रीगोकुल जायके श्रीगुसाईंजीके सेवक होय आवो मनुष्यनकुं संग लेके श्रीगोकुल गई ॥ और जायके श्रीगुसाईंजीकी सेवक भई ॥ और श्रीनवनीत-

प्रियाजीके दर्शन किये ॥ और श्रीनाथजीके दर्शन किये ॥
 फिर अपने देशमें आई ॥ और राजासुं सब समाचार कहे
 ॥ तब वह राणी सेवामें न्हायवे लगी ॥ सो अनेक प्रकारकी
 सामग्री करे ॥ और अनेक प्रकारके वागा बन्न करे ॥
 और श्रीठाकुरजीकुं प्रसन्न करे ॥ ऐसी भाव देखके राजा
 वा राणीके ऊपर बहुत प्रसन्न भयो ॥ और नित्य वाराणीके पास
 राजा आवे ॥ भगवद्वार्ता कहे ॥ सेवाकी रीती समझावे और
 समझे तब वा राजाके एक बेटा भयो सो बहुत गुणवान भयो ॥
 तब राजानें श्रीगोकुलमें वीनती पत्र लिखके श्रीगुसांईजीकुं
 पधरायके वीनती करी ॥ जो महाराज या बेटाकुं सेवक करो ॥
 तब श्रीगुसांईजीनें बाकुं नाम निवेदन करायो ॥ तब वा राजानें
 श्रीगुसांईजीसुं वीनती कीनी ॥ जो निवेदनतो तादृशी भगवदीयके
 संग मिलके विचार्यो चाहिये ॥ सो कोई इहां मिले नहीं हैं ॥
 जब मैं कोनको सत्संग करूं ॥ तब श्रीगुसांईजीनें आज्ञा करी
 जो इहां अद्भुतदास आवेंगे विनको सत्संग करो ॥ तब वे राजा
 अद्भुतदासको सत्संग करन लगे ॥ तब श्रीठाकुरजीन वा राजाकुं
 अद्भुतभव जतायो ॥ राजा की बुद्धि निष्काम भई सो वह राजा
 श्रीगुसांईजीको ऐसी कृपापात्र भयो ॥ वार्ता संपूर्ण ॥ वैष्णव ॥ २२८ ॥ ❀ ॥
 श्रीगुसांईजीके सेवक खुशालदासकी वार्ता ॥ वैष्णव खुशालदासनें
 बहुत द्रव्य कमायो और सब द्रव्य श्रीगुसांईजीके पास लेगयो ॥
 वाई समय श्रीगुसांईजीकुं खबर कराई ॥ वाई समय श्रीगुसांईजी
 श्रीनाथजीको श्रु-

गार करत हते ॥ तब मुनके छुप कर रहे ॥ और आप
सेवासुं पहुँचके राजभोग पीछे बहार पधारे ॥ तब वा
खुशालदासनं श्रीगुसांईजीके दर्शन किये और तीनलाख
रुपैयाकी द्रव्यसामग्री सामान लायो हतो ॥ सो सब
श्रीगुसांईजीके आगे धन्यो ॥ तब श्रीगुसांईजीने आज्ञा
करी ये द्रव्य कामकी नहीं है ॥ तुम पीछे ले जावो ॥
इच्छा आवे सो करो ॥ तब वा खुशालदासनं पूछोजो
मेरो कहा अपराध है ॥ तब श्रीगुसांईजीने आज्ञा करी
तेरी अपराध नहीं है ॥ येद्रव्य ऐसोही है ॥ हम शृंगार
करत हते ॥ वाई समय या द्रव्यकी खबर भई ॥ तब दो
चित्त हमारे होयगये ॥ याद्रव्यने आवतमात्रही सेवा-
मेसुं चित्त काढ डायो ॥ सो द्रव्य भंडारमें रहेगो तो
कहा नहीं करेगो ॥ यासुं ये द्रव्य हमारे नहीं चाहिये
तब वा खुशालदासनं मनमें ऐसो विचार कियो ॥ येद्रव्य
मेरे उपयोग आवेगौ तो मेरी बुद्धीको भ्रष्ट करेगो ॥ तब
खुशालदासनं वह द्रव्य उठायके सब लुटाय दियो सो वा
खुशालदासकुं श्रीगुसांईजीके वचनपर ऐसीदृढ़ता हती ॥
और संपूर्ण विश्वास हतो ॥ एक पैसाहुं राख्यो नहीं ॥
सो वे खुशालदास श्रीगुसांईजीके ऐसे कृपापात्र हते ॥
वार्ता संपूर्ण ॥ वैष्णव ॥ २२९ ॥

श्रीगुसांईजीके सेवक एक वैष्णव गोकुलदास
हतो जानें गुप्तभेद करी तिनकी वार्ता ॥ सो गोकुलदासके
पास द्रव्य बहुत हतो ॥ एकलाख रुपैयाकी हुंडी लिखायके
श्रीगोकुल गयो ॥ और वैष्णव संग बहुत हते ॥ सो सबनें

श्रीगुसांईजीके दर्शन किये ॥ सब वैष्णवननें भेट करी ॥ और गोकुलदासनं कछु भेट नहीं करी ॥ और सब लोग निंदाकरन लगे ॥ गोकुलदास पैसावालो होयके कछु भेट नहीं करी ॥ खाली दंडवत करी ॥ तब गोकुलदासनं छाने छाने गादीके नीचे कागद धर दियो ॥ सो धरत खवासनं देख्यो सब वैष्णव गये ॥ तब खवासनं श्रीगुसांईजीसुं वीनती कीनी ॥ जो एक वैष्णव छानो-छानो कागद धरगयोहै ॥ तब श्रीगुसांईजीनं वे कागद भंडारमें पठायदियो ॥ सो बहुत दिन सूधी वे संग श्रीगोकुल और श्रीजीद्वारमें रह्यो ॥ सो कोईदिन ये बात गोकुलदासनं प्रगट करी नहीं ॥ आपकी निंदा करायो कस्ये सो वे गोकुलदास श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २३० ॥ ❀ ॥ ॥

श्रीगुसांईजीके सेवक नरसिंहदासकी वार्ता ॥
 सो वह नरसिंहदास रस्तामें जातो हतो ॥ औररस्तामें भील मिल्यो ॥ सो वा भीलको ऐसो नियम हतो ॥ मनुष्यनकुं मारढारके गांठडी लेतो ॥ तब वा नरसिंहदासकुं भील मारवेकुं दौड्यो ॥ तब नरसिंहदासको स्वरूप सिंह जैसो दीखवे लग्यो ॥ तब वो भील डरप्यो तब नरसिंहदास बोले क्युं डरपे हैं आव मेरे पास ॥ तब वो भील बोल्यो तुम मनुष्य होके सिंहहो ॥ मोकुं खबर नहीं पडे है ॥ तब वानें कही तेरे जैसेनकुं शिक्षा करनेके लीयें मैं सिंघट्टे अब तोकुं नहीं छोडुंगो ॥ ऐसे कहके वा भीलकुं थपड मारके हथियार खोस लिये ॥ तब भील बोल्यो मेरे

हथीयार देउ ॥ अब तुमकुं नहीं मारुंगो ॥ तब वो नर-
सिंहदासनें कही जो तेरे घरमें पूछ जो मैंने जितनी
हत्या करी हैं सो पाप कौनके ऊपर है तब वो भील घ-
रमें पूछवे गयो ॥ तब घरके मनुष्यननें कही हमारे माथे
हत्या नहीं है हमनें ऐसी कही नहीं ॥ जो मनुष्य मा-
रके खबाव ॥ तब वा भीलनें आयके नरसिंहदासकुं कही
जो मेरे घरके आदमी तो हत्यामेंसुं पाती नहीं राखे हैं ॥
तब नरसिंहदासनें कही तूं क्युं पापमें पड़े हैं ॥ चल मेरे
संग तेरो कल्याण श्रीप्रभुजी करेंगे ॥ तब वो भील वा
नरसिंहदासके संग चल्यो ॥ सो जायके श्रीगुसांईजीको
सेवक भयो और कृपापात्र भयो ॥ सो वे श्रीगुसांईजीके
सेवक नरसिंहदास ऐसे कृपापात्र हते ॥ जिनके संगसुं
भील वैष्णव भयो ॥ वार्ता संपूर्ण ॥ वैष्णव ॥ २३१ ॥
श्रीगुसांईजीके सेवक रूपमंजरीकी वार्ता ॥
सो वे रूपमंजरी पृथ्वीपतीकी दासी हती हिंदुराजाकी
बेटी हती ॥ पृथ्वीपतीकुं परणी हती ॥ पादशाहको स्पर्श
नहीं करती हती ॥ वो कहेती हती जो मेरो स्पर्श करोंगे
तो मेरे प्राण छोड़ देउंगी ॥ बिनको रूपवद्धत सुंदर हतो ॥
सो पृथ्वीपती वाको रूप देखके राजी रहेतो हतो ॥ सो
वे बाई रातकुं आकाशमें उडके नित्य नंददासके पास
आवती हती ॥ वाके पास एक गुटका हतो सो वा गुट-
कामें इतनी सामर्थ्य हती जे कोई मनुष्य मोठामें राखे
सो जहां कहे उहां पहीचायदेवे सो वा रूपमंजरीके पास
गुटका हतो ॥ सो नित्य गुटकाके बल्लें उडके नंददास-

जीके पास आवती हती ॥ ऐसे करते बहुत वर्ष बीते॥एक दिन पृथ्वीपतीके आगे कोई मनुष्यने पद गायो सो पद देखोदेखोनागरनट ॥ निरततकालिदीकेतट ॥ यापदकी छेलीतुकमें आवेहे नंददास गावे तहां निपटनिकट ॥ सो ये पद पृथ्वीपतीने सुन्यो ॥ और कही जो ऐसेहते परमेश्वरके पास बैठके गाते तब वाईसमय कोईने कही जो जिनने यह पद बनायोहै वे तो अवहीं हाजर हैं ॥ गोपालपुरमें रहेहे ॥ श्रीगुसाईजीके सेवकहै ॥ तब पृथ्वीपतीने विचार कियो जो आपणे ब्रजमें जानो और नंददासजीकुं मिलनो तब पृथ्वीपती सहकुंटुब ब्रजमें आये गोवर्धनमें डेरा किये और नंददासजीके पास वीरवलकुं पठाये और कही जो नंददासजीकुं पूछआवो ॥ अब हम तुमकुं मिलवे आवें के तुम हमकुं मिलवे आवोगे ॥ तब नंददासजीने कही हम परसूके दिन मानसीगंगास्नान करवेकुं आवेंगे सो उहां पादशाहकुं मिलेंगे ॥ तब नंददासजी दूसरे दिन विलछकुंडपें नाहायवे गये ॥ उहां रूपमंजरीको डेरा हतो ॥ और रूपमंजरीने राजभोग धन्यो हतो ॥ और श्रीगोवर्धननाथजी साक्षात् अरोगते हते ॥ तब नंददासजीने देख्यो तब वृक्षकी ओटके पास ठाढे रहे ॥ तब श्रीनाथजीने रूपमंजरीसुं कही ॥ जो नंददासजी वृक्षकी ओटमें ठाढे हैं विनकुं बुलावो तब नंददासजीकुं बुलाये तब नंददासजीने गोवर्धननाथजीके दर्शन किये तब श्रीगोवर्धननाथजीने आज्ञा दीनी ॥ जो तुमये महाप्रसाद लेउ तब नंददासजीने महाप्रसाद लियो॥और

रूपमंजरीसुं विदा होयके नंददासजी गोपालपुर गये ॥
 फेर दूसरे दिन मानसीगंगा नाहायवेकुं गये उहां पृथ्वी-
 पतीकुं मिले ॥ तब नंददासजीकुं एकांतमें लेजायके पूछी
 जो तुमनें ये पद गायो सो कैसे ये बात सुनके नंददास-
 जीनें विचार कियो जो अन्यमार्गीयसुं कैसे बात करी
 जाय सो नंददासजीनें उंचो देखके देह छोड दीनी ॥ पा-
 दशाहूतो विस्मय होयगयो ॥ बहूत उदास भयो सो पृ-
 थ्वीपतीकी रीत हती ॥ जब उदास होय तब रूपमंज-
 रीकी मुख देखवेकुं आवे सो भीतर जायके रूपमंजरीके
 सन्मुख ठाडोरह्यो ॥ और रूपमंजरीसुं बात करी ॥ जो परम
 भगवदीय नंददासजीसुं मैंनें ऐसे पूछ्यो तब नंददासजीनें
 कुछ कही नहीं ॥ और विनकी देह छूट गई यातें मेरो
 चित्त बहूत उदास है ॥ ऐसे पृथ्वीपतीकी वाणी रूपमंज-
 रीनें सुनी तब रूपमंजरीकुं विप्रयोग उत्पन्न भयो ॥ ऐसे
 विरहते रूपमंजरीनें देह छोड दीनी ॥ सो देखके पृथ्वी-
 पती बहूत उदास होय गयो ॥ सो वे रूपमंजरी श्रीगुसां-
 ईजीकी ऐसी कृपापात्र हती ॥ जिनसों विप्रयोग घडीएक
 सह्यो न गयो ॥ वार्ता संपूर्ण ॥ वैष्णव ॥ २३२ ॥ ❀ ॥
श्रीगुसांईजीके सेवक कल्याणभट्ट खंभाळी-
 यामें रहते तिनकी वार्ता ॥ एकसमय श्रीगुसांईजी द्वार-
 काते खंभाळियामें पधारि ॥ तब कल्याणभट्टजी श्रीगुसां-
 ईजीके सेवक भये ॥ और श्रीगुसांईजीके पास ग्रंथ पढ़े
 और ग्रंथ सब हृदयारूढ भये और संसारमेंसुं आसक्ती
 निकस गई ॥ तब कल्याणभट्टजीके चित्तमें ऐसी आई ॥

जो श्रीगोवर्धननाथजीके दर्शन करूं तो ठीक ॥ सो कल्याणभट्ट श्रीगुसांईजीके संग गये ॥ और श्रीगोकुलमें श्रीनवनीतप्रियाजीके दर्शन किये ॥ फेर श्रीगोवर्धननाथजीके दर्शन किये ॥ तब विचार कियो जन्मपर्यंत इहां रहेनो तब आन्योरमें रहेवेको घर कियो ॥ सो वे कल्याणभट्टजी श्रीगुसांईजीके ऐसे कृपापात्र हते ॥ प्रसंग ॥ १॥ सो एकसमय श्रीगोवर्धननाथजीके दूध घरीयानें दोय कसेड़ी दूध कमती लियो ॥ जब रातकुं श्रीगोवर्धननाथजी उठे ॥ और सोनाको कटोरा लेके आन्योरमें गये ॥ सो दश पंदर वर्षको छोराको रूप धरके गये ॥ सो कल्याणभट्टजीकी बेटी देवका हती ॥ सो घरमें दूध बद्धत होतो हतो सो बेच देती हती तब श्रीगोवर्धननाथजीनें पूछी तेरेपास दूध है ॥ तब वा देवकानें कही जों है साढाचारपैसा शेरके लेऊंगी तब श्रीनाथजीनें साढाचार पैसा कबूल फरे ॥ और कटोरामें वे देवकासों दूध लियो ॥ और शेरभरके कटोरामें डान्यो तब श्रीनाथजी दूध पीवे लगे ॥ तब फीको लय्यो तब श्रीनाथजीनें पूछी तेरे घर खांड है वानें हा कही ॥ तब वासुं चार आनाकी खांड लीनी ॥ और चारशेर दूध लियो ॥ और खांड ढारके पान कियो तब वा देवकानें पैसा मागे ॥ तब श्रीनाथजीनें कही मेरो कटोरो घरमे धरराख ॥ काल्ह कटोरा लेजाउंगो और पैसा दे जाउंगो तब श्रीगोवर्धननाथजी पोढे फेर सवारे श्रीगुसांईजी शृंगार करत हते ॥ जब देखे तो कटोरा नहीहि ॥ तब सब भीतरीयां डूढवे लगे ॥ तब श्रीगोवर्धन-

नाथजीनें श्रीगुसांईजीसुं कही जो दूधघरीयानें दूध ओछो राख्यो हतो तव मैं देवकाके पास दूध और खांडवे-चाती लेके पी आयोहुं ॥ और कटोरा गहने राख आयो हुं तव ये बात श्रीगुसांईजीनें कल्याणभट्टसुं कही ॥ तव कल्याणभट्ट सुनके बहुत प्रसन्न भये ॥ तव घरजायके देवकासुं पूछी जो काल तेरे पास कोई कटोरा धरके दूध लेगयो है ॥ तव देवकानें कही एक छोरा लेगयो है ॥ और कटोरा धरगयोहै तव कल्याणभट्टजीनें कही ये तो श्रीनाथजी हते ॥ तव कटोरा देखे तो सोनाको है ॥ तव कल्याणभट्टजी लेके श्रीगुसांईजीकुं दियो ॥ तव श्रीगुसांईजी देवकाकी सराहना करन लगे ॥ और कही जो याके भाग्यकी कहा बढाई करनी और दूध घरीयाकुं बुलायके उराहनो दियो ॥ और आज्ञा करी जो कोई-दिन दूध कमती राखेगो तो तेरी सेवा छुडाय देउंगो ॥ और जब श्रीनाथजीकी इच्छा होवे तव देवकाके पास दूध दही लेके अरोगते ॥ सो कल्याणभट्टजी श्रीगुसांईजीके ऐसे कृपापात्र हते ॥ प्रसंग ॥ २ ॥ एकदिन कल्याणभट्टजीनें श्रीगुसांईजीसों वीनती करी जो आपके निकट-वर्ती सेवक सेवा करेंहें ॥ कोई जल लावेहें कोई जलधरे हैं ॥ कोई बुहारी करेंहें ॥ कोई तेल लगावेहें ॥ कोई भंडार करेंहें ॥ कोई रसोई करेंहें ॥ सब ऐसे कहेंहें ॥ हमारो इत-नो अंगीकार करेंगे ॥ तव श्रीगुसांईजीनें आज्ञा करी ये सबकी मूल है ॥ हमारो सब अंगीकार कियो है ॥ हमारो कछु नहीं है ॥ ऐसे समझो चाहिये सो नहीं समझो है ॥

और अंगीकार करेंगे ऐसी समझें हैं इनहुं विश्वास संपूर्ण नहीं है ॥ विश्वास होवे तो काहेहुं ऐसे कहे ॥ वस्तु साक्षात् प्रभुनें अंगीकार करी है यामें संदेह काहेहुं चाहिये ॥ ये सुनके कल्याणभट्टजी बहुत प्रसन्न भये ॥ प्रसंग ॥ ३॥ और एकसमय कल्याणभट्टनें श्रीगुसांईजीसों वीनती कीनी ॥ जो महाराजाधिराज श्रीप्रभुजीके श्रीपुराणपुर-
 पोत्तमके उत्तम भगवदीय कृपापात्र होय ॥ सो तिनके लक्षण कैसे है ॥ सो आप कृपाकरके कहिये ॥ तब श्री-
 गुसांईजीनें कल्याणभट्टसों कही जो उत्तम भगवदीय तिनके लक्षण तो यह है ॥ जो सबके ऊपर सदा कृपा राखे ॥ जो कोई भगवदीय वैष्णवके ऊपर क्रोध नहीं कर-
 नो ॥ और तिनको अपराध सहै नो ॥ दुर्वचन बोले तो अपनो कहालेवे ॥ ऐसे समझके बिनको अपराध नहीं माननो परंतु तिनके वचन सुनके मन डुलावे नहीं जो करे सो क्षमाही करे तिनको दोऊहाथ जोड़ीके मधुरे व-
 चनसुं बोले ॥ क्षमा राखे जो भगवदीय वैष्णवसों साचो बोले और श्रीप्रभुजीनमें चित्तदेके निर्मल बुद्धि राखे ॥ और सदा सर्वदा उपकारही करे और श्रीप्रभुजीके ऊपर तथा भगवदीय वैष्णवनके ऊपरतें मन बिगाडे नहीं और इन्द्रिय जीत रहे ॥ और अपने मनकी विचार कोइके जा-
 नवेमें नहीं आवे श्रीप्रभुनकी सामग्री करे वामें चित च-
 लायमान न करे आप महाप्रसाद लेवे और अपने अर्थ उद्यम नहीं करनो ॥ और महाप्रसाद न्यून लेनो ॥ और बहुत महाप्रसाद लेवे तो निद्रा आवे ॥ भगवद्भजन न

होवे ॥ तातें न्यून महाप्रसाद लेनो ॥ और रोगादिक होय
तब श्रीठाकुरजीकी सेवामें अंतराय होय और मनकुं
जीतके वश करे तब श्रीप्रभुजीके भजनमें स्थिर होय रहें
हैं ॥ मन वश होय ॥ सदासर्वदा प्रभुके कार्यमें रहे ॥ और
इंद्रियनको जीते ॥ विषयमें लगावे नहीं ॥ और कहे जो
हम तो श्रीप्रभुजीनके दास हैं ॥ शरण हैं सो ऐसे समझतो
रहें ॥ और जहां बहिर्मुख लोग चर्चा करे तो मौनगहिरहे
और श्रीप्रभुजीकी सेवामें सदा सावधान रहे ॥ और अ-
सावधान नहीं होनो ॥ जो श्रीप्रभुनकी भगवदीय वैष्णव-
विना रहस्य वार्ता प्रगट नहीं करनी ॥ और धीरज क-
बहुं नहीं छोड़नो सुखतें प्यासतें निद्रातें शीततें उद्यमतें
शोकतें लोभतें इतने दोषरूप हैं ॥ सो इनतें डरपते रहें इ-
नके वश नहीं होय ॥ इनको जीतके रहनो ॥ और अभि-
मान नहीं करे और सब भगवदीय वैष्णवनको आदर
करत रहें जो श्रीप्रभुजीको स्वरूप हैं और श्रीप्रभुजीकी
लीलाहैं सो भगवदीय वैष्णवके हृदयमें रहे भगवत्स्वरूप
हैं ऐसे वैष्णवको रूप है अनेक नामरूपतें श्रीप्रभुजी लीला
करत हैं ऐसे विचार करत रहनो जो मैं पहले कोन हतो ॥
और श्रीमहाप्रभुजीकी कृपातें कहा मोकों मिल्योहैं अ-
पने स्वरूपको विचार करत रहे जिनके ऐसे लक्षण होय
तिनको उत्तम भगवदीय जाननो ॥ ऐसे श्रीगुसाईंजीके
वचन सुनके कल्याणभट्ट बहुत प्रसन्न भये ॥ तब कहेजो
वैष्णवको स्वरूप तो ऐसोहीहैं ॥ सो वे कल्याणभट्ट श्री-
गुसाईंजीके ऐसे कृपापात्र भगवदीय हते ॥ तातें इनकी

वार्ताको पार नहीं तातें इनकी वार्ता कहा कहिये ॥ वार्ता
 संपूर्ण ॥ वैष्णव ॥ २३३ ॥ ॐ ॥ ॥ ॥ ॥
 श्रीगुसाईजीके सेवक एक कायस्थ सूरतमें रहेते
 तिनकी वार्ता ॥ सो वह कायस्थको नाम मोतीराम हतो
 और सूरतके सूबाके पास नोकर हतो ॥ और राजनग-
 रमें कोईकामके लीयें आयो हतो ॥ उहां श्रीगुसाईजीको
 सेवक भयो हतो ॥ फेर कोईदिन सूरतके सूबाके संग आ-
 गये गयो हतो ॥ सो पृथ्वीपतीकुं मिल्यो फेर वा सूबानें
 आवती वखत गोवर्धनमें सुकाम कन्यो ॥ तब वह मो-
 तीराम गोपालपुरमें श्रीनाथजीके दर्शनकुं गयो ॥ वही
 समय श्रीनाथजीके राजभोग होयचुके हते ॥ तब वा का-
 यस्थनें श्रीगुसाईजीके दर्शन किये और मनमें विचार
 कियो जो सूबाको तो जलदी कूचहै और श्रीनाथजीके द-
 र्शन नहीं होवेंगे ॥ तब भंडारीकुं मिल्यो और मिलके
 कही जो मैं साठहजार रुपैया सेवा करुंगो जो दोघडी
 उत्थापन वेग होवें तो ये बात भंडारीनें श्रीगुसाईजीसों
 वीनती करी तब श्रीगुसाईजीनें दोघडी अवार उत्थापन
 कराये ॥ सो मोतीराम दर्शनविना सूबाके संग कूचकर-
 गयो तब जायके कुवेरमें डेरा किये फेर दूसरे दिन वा
 मोतीरामको मोटो उतर गयो सो वा सूबानें देख्यो ॥
 तब वा सूबानें पूछी जो मोतीराम उदास क्योंहैं ॥ जब मो-
 तीरामनें सब समाचार कहे ॥ तब सूबानें कही जो तूं द-
 र्शनके लीयें साठहजार रुपैया खर्चतो हतो सो मैं तेरेपर
 प्रसन्न हूं ॥ सो तुम जायके श्रीनाथजीके दर्शन करआवो

वैष्णव (२३५) जीवापारेख तथा सहजपालडोशी. (३९३)

॥ तब वे मोतीरामनें सवारे राजभोगके दर्शन आयके कन्ये ॥ श्रीनाथजीके दर्शन करके बहुत प्रसन्न भये ॥ और महाप्रसाद लियो अत्यंत भाग्यमाने और लाख-रुपैयाकी हीरा लेके श्रीनाथजीकुं चिबुक आभरण करायो ॥ सो वे मोतीराम वैष्णव श्रीगुसांईजीके ऐसे कृपापात्र हते ॥ जिनकी आरति श्रीनाथजीसहि न शके ॥ और धनसुं कारज सिद्ध नहीं होवे ये बात दिखाई ॥ केवल भगवत्कृपासुं सब कारज सिद्ध होवेंहे ये बात दिखाई ॥ सो मोतीराम श्रीगुसांईजीके ऐसे कृपापात्र हते ॥ वार्ता संपूर्ण ॥ २३४ ॥ ❀ ॥ ॥ ॥ श्रीगुसांईजीके सेवक जीवा पारेख तथा सहजपाल डोशी तथा दलाल माधवदास तिनकी वार्ता ॥ सो वे तीनों जने आपसमें मित्र हते और चाचाहरिवंशजीके पास नाम पाये हते और जब श्रीगुसांईजी राजनगर पधारे ॥ तब वे तीनों जने जायके खंभात पधराय लाये ॥ और कुटुंबसहित श्रीगुसांईजीके सेवक भये ॥ और श्रीठाकुरजी पधरायके सेवा करन लगे ॥ फेर एक-दिन माधवदास दलालनें और सहजपालडोशीनें वीनती करी जो महाराज हम बेपारमें झूठ बोलें हैं ॥ जो दोष लगेंहे के नहीं ॥ तब श्रीगुसांईजीनें आज्ञा करी “नोचिता-त्पातकंपरं” इति ॥ झूठ समान पाप नहीं ॥ तब माधवदासनें वीनती करी जो मैं दलाली करुंहुं आज पीछे झूठ नहीं बोलुंगो ॥ मेरे गाहकनकुं आछी रीतीसुं माल देवाउंगो ॥ तब सहजपाल डोशीनें कही मैं एक आना नफा

खारुं अधकी नहीं खारुंगो ॥ ऐसी इच्छा होवे तो ल्यो ॥
 सो वे तीनोजने सत्यवादी हते ॥ और कोईदिन झूठ न-
 हीं बोलते तब विनको सत्यपणो देखके श्रीठाकुरजी बहुत
 प्रसन्न भये ॥ और भगवद्गुणगान करते विनके गदगद
 कंठ होय जाते ॥ और किर्तनके अनेक प्रकारके अर्थ
 करते ॥ एकदिन माधवदास दलालनें जीवापारेखसुं पूछी
 जो अन्याश्रय कहा होवे हैं तब जीवापारेखनें कही जो
 श्रीकृष्णविना अंशावतारके भजनपर्यंत अन्याश्रय होवे
 है ॥ और सर्वत्र व्यापक मानके जो दूसरे देवकी पूजा
 करे तोहुं बाधकहै कारण जो अनेक देवरूपी भगवान भ-
 ये हैं ॥ एक एक देवकी पूजा विधी प्रमाणें करे तोहुं पार
 नहीं आवे ॥ तेतीस कोटी देवता हैं सो इतने तो आव-
 रदा मनुष्यकी नहीं है जो सब देवतानकी पूजा करिसके
 जाहुं सर्व देवके मूल जो पुरुषोत्तम विनकी सेवा करे तें
 सब देवकी सेवा होजाय ॥ और कोई वाकुं प्रतिबंध नहीं
 करेके ॥ जैसे एक वृक्षके अनेक पत्रहैं और फूलहैं और
 डारहैं विनकुं पोषण मूलसींचनतें होतहैं ॥ ऐसे सब देव-
 को पूजन श्रीपूर्णपुरुषोत्तमकी सेवातें होवे है ॥ ये सुनके
 माधवदास दलाल बहुत प्रसन्न भये ॥ फेर एकदिन चाचा
 हरिवंशजी खंभात आये ॥ तब वे सहेजपाल ढोशीनें
 पूछी जो श्रीठाकुरजीनें सात दिनपर्यंत गिरिराजजी कसुं
 धारण कियो ॥ वाको कारण कहो तब चाचाहरिवंशजी
 बोले ॥ जो नंदरायजीकुं सात प्रकारको अन्याश्रय हतो ॥
 सो गिरिराज पूजनतें सात प्रकारको अन्याश्रय मिटयो ॥

सो एकतो मतुष्यमात्रपर देव ऋण होवेहे ॥ और दूसरो ऋषिऋण होवेहे ॥ और तीसरो पितृऋण होवेहे ॥ और चौथो देहके बलको अभिमान होवेहे ॥ और पांचमो सगानके बलको अभिमान होवेहे ॥ और छहो या लोगमें जो ये काम नहीं करूंगो तो मेरी निंदा होवेगी ॥ ये अहंकार होवेहे ॥ और सातमो ये तीनों ऋण मेरे ऊपर रहेंगे तो मेरो परलोक बिगडेगो ऐसी रीतीसुं जीवमें सात प्रकारके अन्याश्रय रहेंगे ये छुटायवेके लीये और मनमें निश्चायन होयके भगवदाश्रय दृढ करनो ये बात नंदरायजीकुं जतावेके लीये श्रीठाकुरजीनें सात दिवससुधी श्रीगिरिराज ध्यान्योहे ॥ ये बात पुष्टिप्रवाह मर्यादा ग्रंथकी टीकामें लिखी हे ॥ ये मुनके सहेजपाल ढोशी बहुत प्रसन्न भये और फेर जो चाचाहरिवंशजीके संग दर्शन करवेकुं गये ॥ वे तीनों जने श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ २३५ ॥ ॐ ॥ ॥

श्रीगुसाईंजीके सेवक चांपाभाई अधिकारी ०
 सो वे चांपाभाई गुजरातमें सेवक भये हते ॥ तब श्रीगुसाईंजीनें चांपाभाईकुं आपके पास राखे ॥ फेर नित्य कथा श्रवण करावते ॥ जब चांपाभाईकुं श्रीगुसाईंजीविषे संपूर्ण भाव उत्पन्न भयो और चांपाभाईकी ऐसी वृत्ती भई जो श्रीगुसाईंजीके ऊपर दोषबुद्धी न आवे ॥ तब श्रीगुसाईंजीनें चांपाभाईकी ऐसी दशा देखके अधिकार सांप्यो तब चांपाभाई अधिकार करन लगे ॥ फेर श्रीगुसाईंजीनें बीचार कियो ॥ जो हमारे घरको जो अधिकार

करे तो बाकी बुद्धी फिरविना रहे नहीं ॥ परंतु चांपाभा-
ईकी बुद्धी जो फिरेगी तो याकी बुद्धीकुं आपण फेर ठेकाणे
लावेंगे ॥ ये विचारके आपने अधिकार सोंप्यो ॥ सो ए-
कसमय श्रीगुसांईजी गुजरात पधारे ॥ रस्तामें बीरबल
मिले तब बीरबलने चांपाभाईसुं पूछी जो श्रीगुसांईजी
शीतकालमें क्युं परदेश पधारेहैं ॥ तब चांपाभाईने कही
जो करज बहुत है तब बीरबलने कही जितनो द्रव्य चाहिये
इतनो तैयार है ॥ श्रीगुसांईजीकुं पाछे श्रीगोकुल पधराय
लेजावो ॥ तब चांपाभाईने श्रीगुसांईजीसों वीनती करी
तब श्रीगुसांईजीने ऐसो विचार्यो जो चांपाभाईकी बुद्धी
फिरगई है हम द्रव्यकेलीयें परदेश पधारे हैं ऐसो समजो
है ॥ और हमारे पधारवेको कारण तो दैवी जीवके उद्धार
करवेको है ॥ तब श्रीगुसांईजीने अर्धरात्रीकुं कूच क्यो ॥
बीरबलकुं खबर न करी फेर दूसरे दिन चांपाभंडारीकुं
आपने आज्ञा करी जो तुमारी बुद्धी फिरगई है अब तुम
चरणोदक लेउ ॥ और श्रीसर्वोत्तमजीको पाठ करो तब
चांपाभंडारीने वीनती करी जो मैंने तो आपकी सेवाके
लीयें बीरबलकुं बात कीनी हती ॥ तब श्रीगुसांईजीने
आज्ञा करी ॥ जो इतने प्रकारके द्रव्य श्रीठाकुरजी अं-
गिकार नहीं करें है ॥ एक तो राज्यको द्रव्य एक वेश्या-
को द्रव्य एक कृपणको द्रव्य और एक हिंसाको द्रव्य एक
ठगईको द्रव्य एक चोरीको द्रव्य एक विश्वासघातको
द्रव्य एक कन्याविक्रयको द्रव्य ॥ इतने प्रकारको द्रव्य
श्रीठाकुरजी अंगिकार नहीं करेंहैं ॥ जासुं तुम कोईकुं

द्रव्य संबंधी सेवाकी बात करोमती ॥ जिनको अंगिकार प्रभुकन्थो चाहेंगे विनको स्वतः सिद्ध होवेगो ॥ महा-
त्यागी होवे ॥ और भगवत्पदवीकुं प्राप्त भयो होवे तोहुं
दुष्ट अन्न खाय तैं वाकी बुद्धी फिरे ॥ ये बात श्रीमहाप्रभु-
जीनें भक्तिवर्धिनी ग्रंथमें आज्ञा करीहैं सो ॥ श्लोक ॥ लभ
तेसुदृढांभक्तिसर्वतोप्यधिकांपराम् ॥ त्यागेबाधकभूयस्त्वं
दुःसंसर्गात्तथाऽन्नतः ॥ १ ॥ सो अन्न जो कह्योहैं सो अन्न
तो कछु दुष्ट होवेही नहींहैं ॥ परंतु वह अन्न जैसे द्रव्यसुं
खरीद भयो होवे ॥ वैंसी अन्नमें दुष्ट पदवी आय जायगी ॥
जासुं दुष्ट अन्नको और दुःसंगको बहुत वचाव राखनो ॥
ये बात सुनके चांपाभाई बहुत प्रसन्न भये ॥ और ऐसो
नेम राख्यो ॥ जो कोईको द्रव्यसंबंधी सेवाकी बात कर-
णी नहीं ॥ सो वे चांपाभाई श्रीगुसांईजीके ऐसे कृपापात्र
हते ॥ वार्ता संपूर्ण ॥ वैष्णव ॥ २३६ ॥ ॥ ॥
श्रीगुसांईजीके सेवक तानसेनकी वार्ता ॥
सो तानसेन बड़ीजातवाले हते ॥ और गानविद्याको अ-
भ्यास बहुत सुंदर हतो ॥ सो दिल्लीमें पृथ्वीपतीके पास
रहते हते ॥ और सब गवय्यानमें तानसेनजी मुख्य हते ॥
और पृथ्वीपर जे कोई राजा और बडे आदमी हते ॥
विनके पास तानसेनजी गावे जाते हते ॥ सो लाखन
रुपैया इनाम लावते ॥ पृथ्वीपतीके कलावत जानके सब
ढरपते ॥ एकदिन तानसेन श्रीगुसांईजीके पास गायवेकुं
आये ॥ सो गाये तब तानसेनकुं श्रीगुसांईजीनें दशह-
जार रुपैया इनामके दिये ॥ और एक कौडीदीनी ॥ तब

तानसेननें पूछ्यो जो दशहजार रुपैयातो ठीक परंतु कौडी कैसी है ॥ तब श्रीगुसांईजीनें आज्ञा करी जो तुम पादशाहके कलावत हो जाके दशहजार रुपैया है और तुमारे गावेकी कीमत हमारे गवयनके आगे कौडी है ॥ तब तानसेननें कही जो ये बात मैं कैसेमानुं तब श्रीगुसांईजीनें गोविंदस्वामीकुं आपके पास बुलाये ॥ और आज्ञा करी एक पद गावो ॥ तब गोविंदस्वामीनें एक सारंग रागमें गायो ॥ सो पद ॥ श्रीवल्लभनंदनरूपअनूपस्वरूपकह्योनहिजाई ॥ सो ये पद सुनके तानसेन चकित होयगये और गोविंदस्वामीको गान सुनके विचार क्यो जो मेरोगान इनके आगे ऐसेहैं जैसे मखमलके आगे टाटहैं ऐसे है ॥ सो ये कौडीकी इनाम खरी ॥ तब गोविंदस्वामीसुं तानसेनने कही जो बाबासाहेब मोकुं गान सिखावो ॥ तब गोविंदस्वामीनें कही हमतो अन्यमार्गीयसुं भाषणई नहीं करें ॥ तब तानसेन श्रीगुसांईजीके सेवक भये ॥ और पचीसहजार रुपैया भेट करे ॥ और गोविंदस्वामीकेपास गायनविद्या सीखे ॥ और श्रीनाथजीके पास कीर्तन गायवे लगे ॥ जब तानसेन महिनामें एकवार पादशाहके पास जाते और बड़घा करके महावनमें रहते ॥ फेर राजा आसकरणकुं मिले सो बात आसकरणजीकी वार्तामें लिखीहै ॥ फेर एकदिन तानसेनजी श्रीनाथजीकेपास कीर्तन करत हते ॥ तब श्रीनाथजी सुनके मुसकाये ॥ तब वा दिनतैं तानसेननें पादशाहके इहांसुं जायवो आयवो छोडदियो ॥ और श्रीगुसांईजीके पास रहे आये ॥ जि-

वैष्णव (२३८) एक ब्राह्मण और बाकी स्त्री. (३९९)

नसुं श्रीनाथजी बोलते हंसते श्रीगुसांईजीकी कानतें तान-
सेनकुं श्रीनाथजी सब अनुभव करावते ॥ सोवे तानसे-
नजी ऐसे कृपापात्र हते ॥ वार्ता संपूर्ण ॥ वैष्णव ॥ २३७ ॥

श्रीगुसांईजीके सेवक एक ब्राह्मण और बा-
की स्त्री तिनकी वार्ता ॥ सो वे ब्राह्मण पूर्वमें रहेतो हतो ॥
सो श्रीगुसांईजी पूर्वदेशमें पधारे तब वे सेवक भये और
श्रीठाकुरजी पधरायके दोनों जने सेवा करन लगे ॥ तब
वे दोनोको भगवत्सेवामें मन बहुत लग्यो ॥ दिवसकुं
भगवत्सेवा करते और रात्रकुं भगवद्वाता करते ॥ सोसे-
वाके प्रतापतें विनदोनोनकुं विषयनकी वृत्ती मूलगई दि-
वसरात्र भगवत्स्वरूपको विचार क्यो करते ॥ ऐसे करते
बहुत दिन बीते ॥ फेर ऐसो विचार कियो जो अब मैं
श्रीनाथजीके दर्शन जाउं तो ठीक ॥ सो उहांतें चले सो
थोड़े दिननमें श्रीजीद्वार आय पहांचे सो श्रीनाथजीको
संध्या आरतीको समय हतो ॥ तब भीड़ बहुत हती और
वे स्त्री दुर्बल बहुत हती सो भीड़में वाकुं दर्शन न भये ॥
तब वाकुं बहुत विरह भयो ॥ और नेत्रनमेंसुं जल आवे
लग्यो बाकी ये दशा देखके श्रीनाथजी वाकुं हाथ पक-
ड़के निजमंदिरमें लेगये ॥ तब देहसहित लीलामें प्रवेश
भई ॥ तब वो ब्राह्मण अपनीस्त्रीकुं ढूंढवे लग्यो ॥ बहुत
ढूंढी पण कहुं मिली नहीं ॥ तब वो ब्राह्मणनें श्रीगुसां-
ईजीसुं वीनती कीनी जो मेरी स्त्री दीखत नहींहि मैं बहुत
ढूंढीहे ॥ तब श्रीगुसांईजीनें सुनके आज्ञा कीनी जो तेरी
स्त्री भगवल्लीलामें गईहै तब वानें वीनती कीनी जो भग-

(४००) दोसौबावन वैष्णवकी वार्ता.

वल्लीलामें तो लोग देह छोड़के जायहैं ऐसे ग्रंथनमें लिखेहैं ॥ तब श्रीगुसांईजीने आज्ञा करी प्रेममें कछु नेम नहींहै ॥ श्रीठाकुरजी प्रेमके वशहैं और प्रेम कछु निर्वल वस्तु नहींहै ॥ जहां लाज कान अभिमान सब छूट जायहैं ॥ ये बात सुनके वा ब्राह्मणनें वीनती कीनी जो मैं एकवार बाकुं देखुं तब अन्न जल लेउं ॥ तब श्रीगुसांईजी वा ब्राह्मणकुं संग लेके परासोली पधारे ॥ उहां रासको चोतरा हतो सो उहां श्रीगोवर्द्धननाथजी रास करत हते ॥ सो वा ब्राह्मणकुं श्रीगुसांईजीने कृपा करके दिव्यदृष्टि दीनी तब रासके दर्शन भये ॥ और रासमें बाकी स्त्री दिखाई तब वह देखके मनमें बहुत प्रसन्न भयो ॥ और विचार कियो याके भाग्य ऐसे उदय भये ॥ और मेरे न भये ऐसे करके मनमें बहुत पश्चात्ताप करन लग्यो ॥ फेर देखे तो कछु नहीं हतो ॥ फेर श्रीगुसांईजीके पास आयके दंडवत करी और महाप्रसाद लियो तब वा ब्राह्मणकुं अत्यंत विरह भयो ॥ और सुखमें तैं ज्वाळा निकसी तब वा ब्राह्मणकी देह छूट गई सो तत्काल भगवल्लीलामें प्राप्त भयो सो वे ब्राह्मण स्त्रीपुरुष श्रीगुसांईजीके ऐसे कृपापात्र हते ॥ जिनकुं भगवल्लीलामें जातें विलंब न लगी ॥ वार्ता संपूर्ण ॥ वैष्णव ॥ २३८ ॥ * ॥ ॥ ॥ ॥ श्रीगुसांईजीके सेवक ध्यानदास तथा जगन्नाथदासकी वार्ता ॥ सो वे ध्यानदास श्रीगुसांईजीके पास रहेते हते ॥ और जगन्नाथदास श्रीगुसांईजीके पास आयके रहे ॥ सो वे जगन्नाथदासके हाथमें पद्मकी चिन्ह हतो ॥

सो जा वस्तुमेंसुं एक काढते और एक बढजाती ॥ और दोय काढते सो दोय बढजाती ॥ परंतु घटती नहीं हति जगन्नाथदास भोरे बहुत हते विनकुं या बातकी खबर नहीं पडती ॥ एकदिन श्रीगुसांईजीकी भेटके पैसा जगन्नाथदासकेपास हते ॥ तब बहुत भिखारी मागवेकुं आये ॥ तब जगन्नाथदास काढ काढके सबकुं एक पैसा दो पैसा देते गये ॥ तब ध्यानदासनें श्रीगुसांईजीसुं वीनती करी जो जगन्नाथदास सबकुं देवेहें सो कहांसुं काढहें ॥ तब ध्यानदासकुं श्रीगुसांईजीनें उत्तर दियो जो जे कोई सत्कर्म करवेकुं मन करेहें ॥ ताकी सहायता प्रभु आप करेहें ॥ और विनके लीयें सब पेहेलेसुं बनाय राखेहें ॥ विनकुं कछु कार्य करवे नहीं परेहें ॥ विनके कारज श्रीठाकुरजी स्वतःसिद्ध पहिलेसुं बनाय राखे हैं जासुं तुमकुं कोईको अभाव नहीं लायो चाहिये ॥ वैष्णवतो निर्दोष है और निर्दोष वस्तुमें जो दोषारोपण करेहें ॥ सो आप दूषित होवेहें ॥ जासुं तुम तो वैष्णव हो और दोषरहित हो काहेकुं कोईके उपर दोषारोपण करोहो ॥ ये सुनके ध्यानदास बहुत प्रसन्न भये ॥ और ऐसो नेम लियो आज पीछे भगवद्दयान छोडके कोईके दोष नहीं देखूंगो ॥ जन्मपर्यंत विननें कोईके दोष देखे नहीं ॥ भगवद्दयानहीं करत रहे ॥ सो वे ध्यानदास तथा जगन्नाथदास श्रीगुसांईजीके ऐसे कृपापात्र हते ॥ जिनकुं तुर्त निर्दोष ज्ञान होयगयो ॥ सो वे ऐसे वैष्णव हते ॥ वार्ता सं० ॥ वै० ॥ २३९ ॥

श्रीगुसांईजीके सेवक गोपालदासकी वार्ता ॥

सो वे गोपालदासकुं नामनिवेदन भयो ॥ तब गोपाल-
 दासनें श्रीगुसाईजीसों वीनती करी ॥ जो महाराज अब
 मेरेकुं कहा करणो ॥ तब श्रीगुसाईजीनें आज्ञा करी ॥ तुम
 गोपीनाथको सत्संग करो ॥ तब गोपालदास गोपीना-
 थके पास जायके रहे ॥ और विश्वास ऐसो राख्यो जो
 गोपीनाथविना विचान्यो कछु काम करे नहीं हे ॥ और
 गोपीनाथ कैसे हते साक्षात् पूर्णपुरुषोत्तम श्रीनाथजी
 जिनके पाछें फिन्योही करते ॥ सो कोईदिन गोपीनाथ
 कछु कार्यार्थ ब्रजमेसुं दिल्लीगये ॥ तब गोपालदासहुं संग
 गये ॥ रस्तामें जंगलमें रातपडी ॥ जहां कोई मनुष्य नहीं
 हतो सो एक वृक्षके नीचे डेरा कन्यो ॥ सो गोपालदा-
 सतो थाके हते सो सोयगये ॥ और गोपीनाथतो श्रीस-
 र्वोत्तमजीको जप करवकों बैठगये ॥ जब रात सवापहर
 गई तब एक सर्प आयो ॥ सो गोपालदासके गलामें का-
 टवे लग्यो ॥ तब गोपीनाथनें लकड़ीसों उठायके सर्पकुं
 दूर कन्यो ॥ फेर सर्प आयो फेर गोपीनाथनें फेंक्यो ॥
 ऐसे करके १०० सो बार फेंक्यो और १०० बार आयो ॥
 तब वो सर्व बोल्यो जो तुमोकुं कहां सूधी फेंकेगो ॥ याको
 और मेरो रिणालुबंध ऐसोही लिख्यो है एक जन्ममें ये
 मेरे गलाको लोही पीवेहे और एक जन्ममें याके गलाकी
 लोही में पियुंहुं सो यामें तुम क्युं आडे आवोहो ॥ गोपी-
 नाथ बोल्यो अब तो गोपालदासको छेलो जन्म है मैं
 याकु काटवे नहीं देउंगो ॥ तब सर्प बोल्यो याकी लोही
 पिये विना नहीं रहूंगो ॥ तब गोपीनाथनें कही तूं बैठ

याके गलेकी लोही तोड़ुं प्यायदेउंगो तव सर्प बैठ रह्यो॥
 तव गोपीनाथनें छुरी और कटोरि काढी नीचे कटोरी
 धरके और वाके गलामेंतें लोही काढवे बैठयो तव गोपा-
 लदासकी नीद खुली तव बोले कौन है ॥ तव गोपीनाथ
 बोल्ये मैंहुं तव गोपालदासकुं सर्पकी खबर नहीं हती ॥
 तो हुं मनमें ऐसी आई जो गोपीनाथ करते होयंगे सो
 ठीकही करते होएंगे ॥ ऐसे समझके चुप कर रहे ऐसी म-
 नमें न आई जो जंगलमें लायके मोड़ुं मारेहैं ॥ और
 कुछ जानतेही न हते और कुछ पूछीहुं नहीं ॥ तव गोपी-
 नाथनें वा सर्पकुं लोही प्यायके विदाक्यो ॥ और गो-
 पालदासकुं मलमपट्टी लगायके फेर गोपीनाथ सोयगये
 सवारे उठके दोनो चले फेर गोपीनाथनें सव वात गोपा-
 लदासकुं कही तव दोनोजणे श्रीगोकुल आये तव गोपी-
 नाथनें श्रीगुसाईंजीसों वीनती करी जो गोपालदासको
 मैंनें गला काटयो तोहुं कुछ नहि बोले तव श्रीगुसाईंजीनें
 आज्ञा करी जो गोपालदासनें विश्वास राख्यो तो याको
 सव कार्य भयो और मृत्युसों बचे और वैष्णवके संगते
 जन्म जन्मके संकटसों छूटे ऐसो विश्वास चाहिये सो वे
 गोपालदास श्रीगुसाईंजीके ऐसे कृपापात्र हते ॥ जिनके
 विश्वासकी सराहना श्रीगुसाईंजी घडिघडि करते ॥ वार्ता
 संपूर्ण ॥ वैष्णव ॥ २४० ॥ * ॥ ॥ ॥ ॥
श्रीगुसाईंजीके सेवक पृथ्वीसिंघजी बीकाने-
रके राजा कल्याणसिंहजीके बेदाकी वार्ता ॥ सो वे पृथ्वी-
 सिंघजी कविता बहुत करते और कवित्त सवेया छंद दोहा

चौपाई ऐसे अनेक प्रकारकी कविता रचि हती ॥ और रुक्मिणीविल और स्यामलता इत्यादिक भाषाके बहुत ग्रंथ जिनने बनाये ॥ और दिवसरात्र श्रीठाकुरजीकीसेवा करते जिनको चित्त श्रीठाकुरजीके चरणारविंद छोडके और ठिकाणें लागतो नहीं हतो ॥ और विनको संसारके विषयमें चित्त लागतो नहीं हतो ॥ और वे ऐसे हते ॥ जब आपनी राणीकुं देखते तब पहेचानते न हते ॥ जो ये कौनहै ऐसो चित्त विनको श्रीठाकुरजीमें हतो ॥ और पृथ्वीसिंघजी परदेश गये तब मानसी सेवा करते ॥ एकदिन बीकानेर ऊपर शत्रु चढआये ॥ तब तीन दिन सूधी लडाई भई और दूसरे शत्रु दूसरी आडी आये ॥ तब श्रीठाकुरजीने तीन दिन सूधी लडाई करी और राजको काम चलायो और मंदिरमें दर्शन कोईको दिये नहीं ॥ और मंदिरके कमाड भीतरसु बंद होय गये ॥ कोईसों खुले नहीं ॥ चौथे दिन कमाड खुले जब पृथ्वीसिंघजी परदेशमें मानसि सेवा करते ॥ जब उहां खबर पढी जो तीन दिन सूधी श्रीठाकुरजीने दर्शन नहीं दिये ॥ सो पृथ्वीसिंघजीके मनमें ऐसे दर्शन भये ॥ तब ये बात बीकानेरमें लिख पठाई सो साची निकसी सो पृथ्वीसिंघजी ऐसे कृपापात्र हते ॥ प्रसंग ॥ १ ॥ फेर पृथ्वीसिंघजीने ऐसो नेम लियो जो ब्रजमें वास करनो ब्रजमें देह छोडनी या बातकी खबर पृथ्वीसिंघजीके शत्रुनकुं पढी सो विननें दिल्लीपतीकुं सिखायो ॥ याकुं कहुं दूर पठावें तो ठीक तब दिल्लीपतीनें पृथ्वीसिंघजीकुं काबलकी मुहिमपर

पठायो सो उहां बहुत मुलुक जीते ॥ तब उहां पृथ्वीसिं-
घजीको काल आयो तब पृथ्वीसिंघजीनें कालतें कहीमें
ब्रजमें देह छोड़ुंगो तब काल हट गयो ॥ तब पृथ्वीसिं-
घजी सांडनीपिं बैठकर उहांसों चले ॥ सो दो दिनमें म-
थुरा आवे और बीचमें नदी और पर्वत बहुत हते परंतु
कोई ठिकाणे पृथ्वीसिंघजीकुं प्रतिबंध न भयो ॥ और
काबुल ६०० कोस मथुराजीसों है सो दोय दिनमें आय
गये ॥ ब्रजमें आयके श्रीनाथजीके दर्शन करके यमुना
पान करके देह छोड दीनी ॥ सो वे पृथ्वीसिंघजी श्रीगु-
साईजीके ऐसे कृपापात्र हते ॥ जिनकुं कालनें प्रतिबंध न
कन्यो ॥ वार्ता संपूर्ण ॥ वैष्णव ॥ २४१ ॥ ❀ ॥

श्रीगुसाईजीके सेवक दुर्गावती राणी तिनकी
वार्ता ॥ एकसमय श्रीगुसाईजी दक्षिण पधारे हते ॥ दक्षि-
णतें तैलंग ब्राह्मणजातिके या देशमें रहेवेके लीयें लाये
सो रस्तामें घडा गाममें नर्मदा किनारे मुकाम कियो ॥
और उहां एक आदमी आंच लेवे गयो सो दक्षिणी हतो
सब ठिकाणे इस्तु इस्तु पूछे सो वा देशमें कोई इस्तु सम-
झतो नहीं हतो ॥ सो बहुत ठिकाणें फिरके पाछें आयो
तब श्रीगुसाईजीसों कही जो इहां आंच नहीं मिले ॥ तब
श्रीठाकुरजीकुं बहुत अवार होयगई हती ॥ जासुं श्रीगुसां-
ईजीनें खीजके कहि या गाममें सब आंच बुझ जाउ ॥
तब श्रीठाकुरजीनें श्रीगुसाईजीकी वाणी सत्य करवेके
लिये वा गाममें सब ठिकाणे आंच बुझाय दीनी तब गा-
ममें बहुत पुकार भई तब गामके लोगननें दुर्गावतीरा-

णीको राज हतो ॥ सो वारुं खबर दीनी ॥ तब आखा
 गाम रसोई विना सूखन मरेहे गाममें हाहाकार होय
 रह्योहे दक्षिणके ब्राह्मण आयेंहे विनने सब ठिकाणे आंच
 बुझाय दीनीहे ये पुनके दुर्गावती राणी श्रीगुसांईजीके
 डेरापर गई ॥ और जायके श्रीगुसांईजीसों वीनती करी ॥
 और महिना पेहेले एक सूरजग्रहण गयो हतो ॥ तब दुर्गा-
 वती राणीनें एकसों आठ गामको संकल्प कन्यो हतो ॥
 सो वे गाम श्रीगुसांईजीकी भेट करे ॥ तब श्रीगुसांईजीनें
 आज्ञा करी हमतो कोईको दान नहीं लेवें हैं ॥ तब दुर्गा-
 वती राणीनें कही अब मैं दान कन्या पीछे कैसे लेउं ॥
 आपकी इच्छा आवे सो करो ॥ तब श्रीगुसांईजीनें दुर्गा-
 वतीके हाथनयन विन तैलंग ब्राह्मणनकुं गाम बटवाय दीये
 ॥ सो अबसुधि वे गाम खावेंहे फेर श्रीगुसांईजीकी ऐसि
 सामर्थ देखके दुर्गावती राणी श्रीगुसांईजीकी सेवक भई ॥
 और श्रीगुसांईजीसों वीनती करी जो सदैव आप मोको
 दर्शन देवो तब तलावकेपास पर्वत उपर श्रीगुसांईजीके
 डेरा हते सो उहां बैठक कराई और उहां श्रीगुसांईजीनें
 सप्ताहपारायणकरी और उह दुर्गावती राणीकुं नित्य द-
 र्शन होते फेर श्रीगुसांईजी श्रीगोकुलपधारे और दुर्गाव-
 तीराणी उहां नित्य श्रीगुसांईजीके दर्शन करती ॥ साक्षात्
 श्रीमद्भागवतको पाठ करते ॥ ऐसे दर्शन होते सो वे दुर्गा-
 वती राणी श्रीगुसांईजीकी ऐसि कृपापात्र हती ॥ वार्ता
 संपूर्ण ॥ वैष्णव ॥ २४२ ॥ ॥ ॥ ॥ ॥
 श्रीगुसांईजीके सेवक भगवानदास तिनकी

वार्ता ॥ सो वे भगवानदासजी सारस्वत ब्राह्मण रामरा-
यजी श्रीमहाप्रभुजीके सेवक हते ॥ सो विनके यजमान
हते ॥ विनके सत्संगतें भगवानदासजीकी बुद्धि निर्मल
भई हती ॥ एक दिन भगवानदासजी वृंदावनमेंसुं चले
सो रामरायके संग गोपालपूरमें जन्माष्टमीके दर्शन कर-
ने गये ॥ श्रीगुसांईजीके दर्शन किये ॥ सो साक्षात् पूर्ण
पुरुषोत्तमके दर्शन भये ॥ तब भगवानदासजीनें राम-
रायजीसुं कही मोकुं श्रीगुसांईजीके सेवक करावो तब
रामरायजीनें कही तुम गोविंददेवजीके सेवक भये हो ॥
तब भगवानदासजीनें कही इनमें और गोविंददेवजीमें
कछ भेद नही है गोविंददेवजीकी कृपातें तुम मिलेहो और
तुमारी कृपातें श्रीगुसांईजीके दर्शन भयेहैं ॥ जासुं मोकुं
अबीके अबी वीनती करके सेवक करावो ॥ तब रामरा-
यजीनें श्रीगुसांईजीसुं वीनती करके भगवानदासजीकुं
नामनिवेदन करायी ॥ तब भगवानदासजी श्रीगोवर्ध-
ननाथजीके दर्शन करे सो भगवानदासके हृदयमें भग-
वल्लीलाकी स्फूर्ती भई ॥ सो जन्माष्टमीके दिन सांझको
समय हतो ॥ वाईदिन भूखे हते ॥ जासुं सांझकुं नाम-
निवेदन भयो ॥ फेर वाईसमय श्रीनाथजीके सन्निधान
एक नयो पद करके गायो ॥ सो पद ॥ श्रवणसुतुसजनी-
वाजेमंदिलराआजनिसलागतपरमसुहाई ॥ अतिआवे-
शहोततनमनमें श्रीगोकुलवज्रतवघाई ॥ १ ॥ देदेकान-
सुनतअरुफूलतरावलकैनरनारी ॥ नंदरानीढोटाजायो
हेहोतकुलाहलमारी ॥ अतिउंचेचढिटेरमुनावतपसरि-

उठेजेगवाल ॥ गैयांवगदावोरेभैयांमयो नंदकेलाल ॥ ३ ॥
 आनंदभरिअकुलायचलीसबसहजसुंदरीगोपी ॥ प्राहु-
 र्भावजसोदासुतकोतामेंतनमन ओपी ॥ ४ ॥ चंचलसा-
 जशृंगारचंदसुखिचंचलकुंडलहारा ॥ हाथनकंचनथारवि-
 राजतपदनूपुरझनकारा ॥ ५ ॥ वरखतचकुसुमन शोभि-
 तगलिदरसचोंपजियभाई ॥ गावतगीतपुनीतकरतजगज-
 सुमतिमंदिरआई ॥ ६ ॥ धन्यदिवसधन्यरात्रआजकीध-
 न्यधन्ययहसबगोरी ॥ स्यामसुंदरचंदेलिखतमानोअ-
 खियात्रिषितचकोरी ॥ ७ ॥ शोभायुतआईकीरतिअप-
 नेगृहमानिवधाये ॥ जाचकजनधनघनजौवरखतभा-
 नगोपतहांआये ॥ ८ ॥ आयजुरेसबगोपओपसोंभयो
 जोमनकोभयो ॥ पंचासुतसीसनतेंद्वारतनाचतनंदन-
 चायो ॥ ९ ॥ नाचतगवालबालरसभीनेहरददहींभररा-
 जे ॥ इतनिसानउतभेरिहुंदुभीहरखिपरस्परवाजे ॥ १० ॥
 खगखगहुमदिशदिशभवननमेंदेखियतहेंसरसानें ॥ प्रान-
 नकेआयेईद्रीजोयो ब्रजजनहुलसानें ॥ ११ ॥ ध्वजा-
 वंदनमालालंकृतनंदभवनमेंसोंहैं ॥ व्योमविमाननभी-
 रभाईलखअमरनकोमनमोंहैं ॥ १२ ॥ महाराजब्रज-
 राजनंदपेंजोमाग्योसोपायो ॥ जाकेऐंसोपूतभयोताको-
 न्यायजगतजसछायो ॥ १३ ॥ जिनकोसुखस्मरतब्रह्मा-
 दिकयोंहुलसेब्रजगेही ॥ कहिभगवानहितरामरायप्रभुप्र-
 कटेप्राणसनेही ॥ १४ ॥ ये पद भगवानदासजीनें गायो
 वामेंछाप धरी कहेभगवानहितरामरायप्रभु प्रकटेप्रा-
 णसनेही ॥ ये पद सुनके श्रीगुसाईजी बहूत प्रसन्न भये ॥

और रामरायजीहुं प्रसन्न भये ॥ और भगवानदासजीनें रामरायजीकी कृपा मुख्य मानी जिननें हजारन पद बनाये ॥ परंतु सबमें रामरायजीको नाम बतावते गये वे भगवानदासजी श्रीगुसांईजीके ऐसे कृपापात्र हते ॥ प्रसंग ॥ १ ॥ फेर भगवानदासजी वृंदावनमें रहेते हते सो गोपालपुरतें वृंदावन गये ॥ तब गोविंददेवजीके अधिकारीनें सुनी जो भगवानदास श्रीगुसांईजीके सेवक भये हैं ॥ तब गोविंददेवजीके दर्शनकुं न आवे दिये ॥ दर्शन बंद किये तब गोविंददेवजीके शयनभोगमें दूधभात धन्यो तब गोविंददेवजीने आज्ञा करी जो भगवानदास श्रीगुसांईजीके सेवक होयके आयेहैं वे दूधभात धरेंगे तब अरो-गुंगो ये सुनके हरिदास अधिकारी भगवानदासके घर आयके पावन पडके बुलाय लगयो ॥ तब श्रीगोविंददेवजीने दूधभात माग लियो वे भगवानदासजी श्रीगुसांईजीके ऐसे कृपापात्र हते ॥ प्रसंग ॥ २ ॥ और वृंदावनमें कोई वैष्णव और ब्रजवासि आवतो विनकुं भगवानदासजी बहुत आदर करके महाप्रसाद लिवावते ॥ और द्रव्य देते जैसे बनें तैसे वैष्णवनकुं प्रसन्न करते ॥ फेर एकदिन भगवानदासजीनें सुनी जो श्रीगुसांईजी इहां पधारहैं तब स्त्रीसों प्रीति जो श्रीगुसांईजी पधारे हैं आपणे कहा भेट करेंगे तब स्त्रीनें कही जो एक घोती तुम पेहेरो और एक घोती मैं पेहेरुंगी ॥ और सब भेट करेंगे ॥ अपने दोनो घरसुं बहार चले जाएंगी ॥ ये बात सुनके भगवानदासजी बहुत प्रसन्न भये और स्त्रीकी सराहना करन लगे ॥ यामें

मोसों अधकी धर्महैं ये धन्यहैं ये कहेंगी जैसे करुंगो ऐसे
 कहेके ब्रजवासीके संग यमुनापार श्रीगुसांईजीके डेरा
 हते जहां गये दंडवत करके वृंदावनमें पधरायवेकी वीनती
 करी तब श्रीगुसांईजीकुं खबर पड़ी जो ये सर्वस्व भेंट क-
 रेंगे ॥ तब श्रीगुसांईजी वृंदावन न पधारे पीछें श्रीगोकुल
 पधारे ॥ फेर भगवानदासजी उदास होयके पाछें वृंदावन
 गये ॥ फेर भगवानदासजीके घरमें चोरी भई तब द्रव्य
 गयो ॥ सो भगवानदासजीकुं द्रव्य गयो वाकी उदासी
 तो न भई ॥ और श्रीगुसांईजी न पधारे वाकी उदासी र-
 हिआई ॥ फेर भगवानदासजी आगरे जायके रहे ॥ प्रसंग
 ॥ ३ ॥ फेर आगरामें भगवानदास रहते ॥ नये नये पद
 बनावते कबहु महिना पंद्रिदिन श्रीगोकुल आयके रहते ॥
 कबहु गोपालपुरमें जायके रहते ॥ और कबहु अपने घर
 में श्रीठाकुरजीकी सेवा करते ऐसे करके भगवानदास-
 जीने हजारन पद बनाये ॥ और सब पदनमें ॥ कहत भ-
 गवानद्वितरामरायप्रभु ॥ या रीतीके कीर्तन विननैं बहुत
 बनाये ॥ और सूजाकी दिवानगिरी करते हते ॥ और
 श्रीगुसांईजीके चरणारविंदमें जिनको चित्त दिवस रात
 रहतो सो भगवानदासको अंतसमय आयो तब अचेत
 होयगये ॥ तब विनके मनुष्यननैं पालकीमें बैठायेके वि-
 नकुं ब्रजमें लेचले ॥ जब आवे रस्तामें गये तब विनकुं
 चेत आयो ॥ तब विननैं कही हमकुं पाछें लेजावो ये श-
 रीर ब्रजके लायक नहीं है ॥ कारण जो ब्रजमें वृक्षवृक्षमें
 वैष्णुधारीहैं और पत्रपत्रमें चतुर्भुजहैं ॥ ऐसे ठिकानें ये देह

जैरगी तो श्रीठाकुरजीकुं वास आवेगी ॥ तब उहां पाछें
लेगये ॥ सो आगरामें भगवानदासजीकी देह छूटी तब
बाही क्षणमें भगवल्लीलामें प्रवेश भये ॥ सो वे भगवान-
दासजी श्रीगुसांईजीके ऐसे कृपापात्र हते ॥ वार्ता संपूर्ण॥
वैष्णव ॥ २४३ ॥ ❀ ॥ ॥ ॥ ॥ ॥

श्रीगुसांईजीके सेवक एक चूहडो हतो तिनकी
वार्ता ॥ सो गोवर्धनमें रहेतो हतो सो विलछकुंडपर नित्य
घास खोदवे जातो हतो ॥ और विलछकुंडकेसामें श्री-
नाथजीको मंदिर हतो श्रीनाथजी नित्य विलछकुंड दे-
खते पीछे एकदिन अधिकारीजीनें भीत कराई तब श्रीना-
थजीकुं विलछ देखवेमें आढी भीत आई तब श्रीनाथजीकुं
विलछ देखवे विना सुहाय नहीं तब श्रीनाथजीनें वा चूहडा-
को स्वप्नमें आज्ञा करी ॥ श्रीगोकुलमें जायके श्रीवल्लभजी-
सों कहो जो ये भीत पढाय दारे तो मैं विलछकुंडकी सैल-
करूं तब वा चूहडानें कही वे कैसे मानेंगे श्रीनाथजीनें कही
जो तु मारो नाम श्रीगोकुलनाथजीहे ऐसे श्रीनाथजीनें
कह्यो है ॥ तब वानें सवारे विचार कन्यो जो जाऊंके नहीं
जाऊं तब तीन दिनसुधी नित्य वाकुं स्वप्नमें आज्ञा करि वे
तीसरे दिन गयो तब जायके पौरीयासों कही श्रीवल्लभजी-
सों वीनती करो जो चूहडो वीनती करवे आयोहै तब वा
पौरीयानें कही हम ऐसी वीनती नहीं करें तब वा बहार-
वालानें कही जरूर कामहे ॥ तब पौरिया वाकुं हेलो क-
रवे लग्यो लोग एकट्ठे होयके दूरदूर करवे लगें ॥ तब ये
बातकी श्रीवल्लभजीकुं खबर पडी तब आपनें वाकु बुलायो

और सब बात पूछी तब वानें कही एकांतमें कहुंगो तब श्रीवल्लभजीनें एकांत करी तब वानें कही स्वप्नमें श्रीनाथजीनें मोसों ऐसैं कहीहे तब श्रीवल्लभजीनें तीनवार पूछी श्रीनाथजीनें मेरो कहा नाम लियो तब वानें तीनवार श्रीगोकुलनाथजी ऐसो नाम बतायो ॥ तब आपके नामकि पहचान मिली तब आपनें उठके वा भंगीकुं गलेसुं लगायो ॥ और मोटो उत्सव मान्यो ॥ और फेर गोपालपुर आयके वे भीत पढाय डारी ॥ श्रीनाथजीकुं सामे विलख कुंड दीखवे लग्यो ॥ सो वह चूहढो श्रीगुसाईजीको ऐसो कृपापात्र हतो ॥ जाके कहेतें श्रीवल्लभजीको नाम श्रीगोकुलनाथजी प्रसिद्ध भयो वार्ता सं० वै० २४४ श्रीगुसाईजीके सेवक मधुकरसाहराजाकी ० सो वह मधुकरसाह ओढछानगरको राजा हतो ॥ सो श्रीगुसाईजी कोईएक समय ओढछापधारें हते ॥ सो वह राजा सेवक भयो ॥ और श्रीठाकुरजीकी सेवा करन लगे ॥ और जे कोई वैष्णव आवतो वाको बहुत सत्कार करते और जो कोई कंठी बंध आवतो वाके चरणस्पर्श करते ॥ और पाव घोवते ये बात देखके वाके भाईवंद मस्करी करते फेर एकदिन वा राजाके काकानें एक गधा पगायके वाकुं दस बीस कंठी पेहेरायके और तिलक करके वा राजाके पास पठायो ॥ तब वा राजानें वा गर्दभके चरणस्पर्श करे और पगघोयके चरणामृत लियो ॥ वा राजाको शुद्धभाव देखके वाईसमय श्रीठाकुरजी प्रगट होयके और राजाकुं दर्शन दिये और आज्ञा करी जो

वैष्णव(२४६) तुलसीदासजी सारस्वत ब्राह्मण.(४१३)

कछु मागो तव मधुकरसाहनें मागयो ॥ जो मेरो भाव
वैष्णवनमें ऐसोही रहे जिनकी कृपातें आपनें मोकुं दर्शन
दियेहें तव श्रीठाकुरजी प्रसन्न होयके कही ऐसोही तेरो
भाव रहेगो सो वे मधुकरसाह श्रीगुसांईजीके ऐसे कृपा-
पात्र हते ॥ वार्ता संपूर्ण ॥ वैष्णव ॥ २४५ ॥ ॐ ॥ ॥
श्रीगुसांईजीके सेवक तुलसीदासजी सारस्वत
ब्राह्मण तिनकी वार्ता ॥ सो वे तुलसीदासके पिता श्रीगु-
सांईजीके जलघरिया हते और तुलसीदास छोटे हते ॥
तब श्रीगिरिधरजी आदि छे बालक हते तिनके संग खेलवे
जाते और श्रीगुसांईजी जब लालजीनकुं बुलावते तब छ-
लालजी उठके दौडके श्रीगुसांईजीपास जाते तब तुलसीदा-
सहुं संग जाते॥तब श्रीगुसांईजी विनकुं बालक जानके ल-
लजी कहते॥ और विनके मातापिता छोटी अवस्थामें भग
वच्छरण भये हते ॥ तब वे तुलसीदासको पालनपोषण श्री-
गुसांईजी करते और तुलसीदास अपने मनमें यूं जानते जो
में इनकी बालकहुं जब तुलसीदास बडे भये ॥ और श्री-
गुसांईजीके बालकहुं बडे भये ॥ तब श्रीगुसांईजीनें सब
बालकनके माथे सेवा पधराय दीनी तब तुलसीदास-
जीके मनमें ऐसी आई जो मोकुं श्रीगुसांईजीनें कछु से-
वा दीनी नहीं ॥ तब श्रीठाकुरजीनें श्रीगुसांईजीसुं आज्ञा
करी जो वे तुलसीदासकुं सेवा पधराय दें ॥ इन द्वारा
कितनेक जीवनको उद्धार होवेगो ॥ ये बालकपनामें अप-
नें मनमें मैं श्रीगुसांईजीको लालजीहुं ऐसे जानते हते ॥
तब श्रीगुसांईजी विनकुं बुलायके और श्रीगोपिनाथजी

ठाकुरजी पधराय दिये ॥ और आज्ञा करी जो तुम सिं-
 धदेशमें जायके जीवनकुं भक्तिमार्गको उपदेश करो॥और
 सबकुं अष्टाक्षरमंत्र सुनावो तब वे लालजी नाम धरायके
 और श्रीठाकुरजी पधरायके उहांसुं चले फेर रस्तामें आय-
 के विननैं रसोई करी॥और भोग धन्यो फेर श्रीठाकुरजीसुं
 वीनती करी जो तुम ये रूखीरोटी अरोगो ॥ और जो नहीं
 आरोगोगे तो मैं श्रीगुसांईजीसुं कहि देऊंगो॥ तब श्रीठा-
 कुरजी प्रसन्न भये और अरोगे और बासुं कही जो तूं
 कोई दिन हमारी कोई बात श्रीगुसांईजीसुं मति कहियो
 हम श्रीगुसांईजीसुं बहुत डरपैं हैं ॥ तब वे श्रीठाकुरजी
 पधरायके सिंधदेशमें आये ॥ और ऐसे भोले हते जो म-
 नमें यूं जानते जो श्रीगुसांईजीसुं श्रीठाकुरजी बहुत डरपैं
 हैं जासुं जन्म सूधी श्रीठाकुरजीकुं श्रीगुसांईजीको डर
 बतायो करते ॥ और श्रीठाकुरजी इनसुं सदैव ऐसे वर्तते
 जोमें श्रीगुसांईजीसुं बहुत डरपुंइं सो वे तुलसीदास श्रीगु-
 सांईजीके ऐसे कृपापात्र हते ॥ और श्रीठाकुरजीहुं विनकुं
 लालजी कहते ॥ और विनके मनमें लालजीपनेकी बुद्धि
 सदैव रहेती जासुं विनकुं कितनैंक लालमति कहते॥और
 श्रीगिरिराजजी और श्रीयमुनाजी और श्रीगोकुल और
 ब्रजभूमी विनमें विनकी दृढ़ बुद्धि हती ॥दुर्लभ मनुष्यदे-
 हको लाभ विननैं भगवत्सेवा करके लियो ॥ अबिसूधी
 सिंधुदेशमें विनके बंशकेहैं ॥ सो लालजी वाले कहे जा-
 यहैं ॥ सो वे श्रीगुसांईजीके ऐसे कृपापात्र हते ॥ वार्ता
 संपूर्ण ॥ वैष्णव ॥ २४६ ॥ * ॥ ॥ ॥ ॥

श्रीगुसाईजीके सेवक एक सौदागर तिनकी ०

वह सौदागर आगरामें रहेतो हतो ॥ और गोपालपुरमें श्रीनाथजीके दर्शन करनकुं आये तब श्रीनाथजीके दर्शन करके श्रीगुसाईजीके दर्शन किये ॥ सो साक्षात् पूर्णपुरुषोत्तमके दर्शन भयो ॥ तब वह सौदागर कुटुंबसहित श्रीगुसाईजीके सेवक भये ॥ तब श्रीठाकुरजी पधरायके सेवा करन लगे ॥ ऐसे सेवा करते ॥ एकदिन जन्माष्टमीको उत्सव आयो ॥ तब वा सौदागरके परोसमें एक बनिया रहेतो हतो सो वा बनियाको बेटा परदेशमें जहाज लेके वेपार करवे गयो हतो ॥ सो जहाज बूढ़ गयो ॥ ऐसी खबर वा बनियाकुं आई हती ॥ तब वे रोवन लय्यो ॥ तब वा सौदागरनें वा बनियाकुं कही जो आज जन्माष्टमीको दिन है रोवो मति तब वानें कही जो बेटा जैसी वस्तु गई ॥ कैसे न रोउं ॥ तब वा सौदागरनें कही तेरो बेटी नहीं मरेगी ॥ तब बनियानें कही जो तीनदिनसूधी नहीं रोउंगो ॥ तुम वेष्णव साचे होवोंगे तो मेरो बेटा आवेगो ॥ तब श्रीठाकुरजीनें वा सौदागरकी बात सत्य करवेंके लीयें जहाज बुढ़ती बखत एक पाटियापर जीवतो राख्यो हतो ॥ सो दो दिनमें पाटिया किनारे लय्यो ॥ तब वानें देशमें कागद लिख्यो तब जन्माष्टमीके दूसरे दिन वाको कागद आयो ॥ तब वो बनिया जायके सौदागरके पावन पय्यो ॥ और कही जो तुमारी बात सत्य भईहै ॥ तब वा बनियाकुं सौदागरनें कही ॥ ये सब श्रीगुसाईजीको प्रतापहै ॥ तब वो बनिया बेटाकुं संग लेके और वा सौदा-

(४१६) दौसाँचावन वैष्णवकी वार्ता.

गरकुं संग लेके गोपालपुरमें आयो ॥ तब वो बानया
 सौदागरके संगसुं सेवक भयो ॥ और फेर वा सौदागरने
 श्रीगुसांईजीसुं पूछी जो श्रीनाथजीके चरणारविंद खेलके
 दिननमें काहेकुं ठांकेहे ॥ तब श्रीगुसांईजीने आज्ञा करी
 जो ब्रजभक्त खेलवेकुं आवेहैं ॥ तब चरणारविंदके दर्शन
 करेहैं ॥ तब चरणारविंदमें दास्यभक्ती है सो ब्रजभक्त-
 नकुं स्फुरित होवेहैं ॥ तब दासत्व हृदयमें लायके श्री-
 ठाकुरजी सन्मुख हाथ जोडके ठाढ़े रहेहैं और श्रीठाकुर-
 जी खेले हैं ॥ और श्रीठाकुरजीके सन्मुख ब्रजभक्त हाथ
 जोडके नीची दृष्टी करके ठाढ़े रहेहैं तब श्रीठाकुरजीकुं
 खेलवेको मुख नहीं परेहैं ॥ तब श्रीठाकुरजी चरणा-
 रविंद ठांकेके दास्यभक्तीकुं छिपायके सख्यभक्तीकुं
 प्रगट करेहैं ॥ तब ब्रजभक्तनकुं सख्यभक्ती उत्पन्न हो-
 वेहैं ॥ तब श्रीठाकुरजीके सन्मुख खेलेहैं तब श्रीठाकुर-
 जीकुं खेलको आनंद होवेहैं ॥ याही तै खेलके समय श्री-
 नाथजीके चरणारविंद बससुं ठांकेहैं ॥ ये मुनके वे सौ-
 दागर और वैष्णव बहुत प्रसन्न भये ॥ तबतें वा सौदाग-
 रने श्रीठाकुरजीके चरणारविंद निशदिन हृदयमें राखे ॥
 इनको ध्यान चुकुंगो तो दासपणो सिद्ध नहीं होवैयो ॥
 याहीतें चरणारविंदको ध्यान दृढराख्यो ॥ वे सौदागर
 श्रीगुसांईजीके ऐसे कृपापात्र हते ॥ वार्ता संपूर्ण ॥ वै-
 ण्व ॥ २४७ ॥ ॥ ॥ ॥ ॥ ॥
 श्रीगुसांईजीके सेवक हृषीकेश क्षत्रीकी वार्ता
 सोवे हृषीकेश आगरमें रहते हते ॥ जब श्रीगुसांईजी आ-

गरे पधारे तव हृषीकेशजी श्रीगुसांईजीके सेवक भये ॥
 सो वे हृषीकेशजी घोडानकी दलाली करते हते ॥ एक
 सौदागर बहुत घोडा लायो ॥ हृषीकेशनें विनके घोडा
 बेचाय दिये ॥ सो वा सौदागरकेपास एक सरस घोडा
 हतो ॥ वाके चिन्ह हृषीकेशजी पेहेचानते हते ॥ और कोई
 पेहेचानतो नहीं हतो ॥ तव वे हृषीकेशनें सौदागरकेपास
 घोडा माग्यो ॥ तव वा सौदागरनें दलालीमें वह घोडा
 दियो ॥ तव हृषीकेशनें घोडो श्रीगुसांईजीकुं भेट कन्यो ॥
 सो वह घोडा देखके श्रीगुसांईजी बहोत प्रसन्न भये ॥ फेर
 हृषीकेशनें श्रीगुसांईजीसों वीनती करी जो श्रीमहाप्रभु-
 जीको स्वरूप कृपाकरके मोकुं समझावें ॥ तव श्रीगुसां-
 ईजीनें आज्ञा करी सो ॥ २८० ॥ सौंदर्यनिजहृदतंप्रक-
 टितंस्त्रीगुहभावात्मकंरूपंचणुंस्तदंतरगतंप्रावीविश
 त्स्वप्रिये ॥ संश्लिष्टाबुभयोर्वभौरसमयः कृष्णोदितत्सा-
 क्षिकंरूपंतत्तृत्यात्मकंपरममिध्येयं सदावल्लभं ॥ १ ॥ ये
 ग्रंथ श्रीगुसांईजीनें आज्ञा करी तव कृष्णभट्टजी उहां बैठे
 हते ॥ फेर श्रीगुसांईजी सेवामें पधारे तव हृषीकेशनें कृ-
 ष्णभट्टजीसुं कही जो ये ग्रंथ मोकुं आछीरीतीसुं सम-
 झावो ॥ तव कृष्णभट्टजीनें कही जो श्रीठाकुरजीके हृद-
 यमें श्रीस्वामिनीजी विराजेहें और श्रीस्वामिनीजीकेहृ-
 दयमें श्रीठाकुरजी विराजेहें ॥ जब विप्रयोग उत्पन्न भयो
 तव दोनोके हृदयतें वे स्वरूप प्रगट भये ॥ तव श्रीठा-
 कुरजीनें ऐसे मान्यो मैं स्वामिनीजीहुं ॥ और श्रीस्वा-
 मिनीजीनें ऐसे मान्यो ॥ हम श्रीठाकुरजीहें ॥ ऐसो अ-

त्यंत विरह दोनोंनकुं उत्पन्न भयो ॥ तब दोनोंनके मुखें विरहाग्नीकी ज्वाला बहार प्रगट भई ॥ तब श्रीठाकुरजीनें दोनो अग्नी संयोगरसमें प्रवेश कराई ॥ तब तृतीय स्वरूप प्रगट भयो ॥ सो स्वरूप दोनोंनके विरहकी अग्नी और दोननको संयोगरस ऐसो तृतीयात्मक भयो ॥ ऐसो स्वरूप श्रीठाकुरजीकुं सदा बल्लभ परमोत्कृष्ट वा स्वरूपको सदा ध्यान करवे योग्यहै ऐसो स्वरूप श्रीमहाप्रभुजीको है ॥ विनकी कृपाविना संयोगरस और विप्रयोगरसको अनुभव न होनि ॥ ये बात सुनके हृषीकेशजी ये स्वरूप हृदयमें राख्यो ॥ और भगवत्स्वरूपको दर्शन लीलासहित हृदयमें होवे लग्यो ॥ जैसीलीलासहित दर्शन करते तैसे पद करके गावते ॥ सो एक दिन चाचाहरिवंशजी हृषीकेशके घर आये ॥ तब श्रीगुसांईजीकेपास श्रीमहाप्रभुजीके स्वरूपको ग्रंथ शीखे हते ॥ सो चाचाजीसुं कह्यो तब चाचाजीनें श्रीमहाप्रभुजीको स्वरूप नामात्मक श्रीसर्वोत्तमजीमें है ॥ और रूपात्मक बल्लभाष्टकमें है ॥ और गुणात्मक स्फुरितकृष्ण प्रेमासुतमें है ॥ इन ग्रंथनमें वर्णन है ॥ सो तीनोंग्रंथनको समावेश वा एक श्लोकमें कर दिखायो ॥ तब हृषीकेशके हृदयमें श्रीमहाप्रभुजीको स्वरूप स्थिर भयो ॥ क्षणक्षणमें विचार करन लगे कोईसमय तो श्रीकृष्णास्यं कृपानिधी ॥ ऐंसे स्वरूपको विचार करें और कोईसमय वैश्वानर ऐंसे स्वरूपको विचार करें ॥ और कोईसमय ॥ तत्सारमृत-रासखी भावपूरितविग्रहः ॥ ऐंसे स्वरूपको विचार करें ॥

और कोईसमय ॥ वस्तुतः कृष्णएव ॥ ऐसे स्वरूपको विचार करें ॥ और कोईसमय श्रीभागवतप्रतिपदमणिवरभावांशुभूपितामृतिः ॥ ऐसे स्वरूपको विचार करें ॥ सो हृषीकेशकुं श्रीमहाप्रभुजीके स्वरूपको ऐसी अनुभव होवे लय्यो ॥ तब हृषीकेशकुं श्रीमहाप्रभुजीको ऐसी स्वरूप दृढ़ भयो ॥ सो वे हृषीकेश श्रीगुसांईजीके ऐसे कृपा पात्र हते ॥ वार्ता संपूर्ण ॥ वेष्णव ॥ २४८ ॥ ❀ ॥

श्रीगुसांईजीके सेवक कान्हदास राजनगरमें रहेते तिनकी वार्ता ॥ एकसमय श्रीगुसांईजी राजनगर पधारे हते ॥ तब कान्हदास श्रीगुसांईजीके सेवक भये ॥ और श्रीठाकुरजी पधरायके सेवा करन लगे ॥ तब कान्हदासकी स्त्री और बेटा सब सेवामें नाहाते हते ॥ और कान्हदासके बेटाकी बड़ हती ॥ सो भोली बड़त हती ॥ और कछु आचार विचारमें नहीं समझती हती ॥ तब बाकुं सेवामें नहीं नाहावे देतेहते ॥ तब वो बड़ जो वेष्णव आवतो बाकी जूठन उठावती और पीतना करती और वेष्णवके पांव दावती और पंखा करती और नव्हावती और घरमें बुहारीकरती ॥ ऐसे काममें वा बड़कुं लगाय राखी हती ॥ परंतु बाकुं भोळी जाणके श्रीठाकुरजी बाहुं आयके बातें करते ॥ और सबप्रकारकी लीला जतावते ॥ एकदिन कान्हदास श्रीठाकुरजीकुं शृंगार करते हते ॥ और मनमें ऐसी आई जो आज जोडा लावनो है और मोचीके घर जानो है ऐसी मनमें विचार करन लगे ॥ तब कोईएक मनुष्य कान्हदासकुं बुलायवे आयो ॥ तबवाने

बेटाकी वहुसुं पूछी तुमरो सुसरो कहहि ॥ तब वहुनैं कही
 सोचीके घर जोडा लेवे गये हैं ॥ सो ये बात सुनके कान्-
 हदास बहार आयके वहुके पावन परे ॥ और कहेन लगेवै-
 ण्णवनकी सेवाके प्रतापतें तेरे हृदयमें भगवत्स्वरूप उदय
 भयो है ॥ जासुं तुं मेरे मनकी सब बात जान गई है ॥ और
 श्रीठाकुरजी तेरे ऊपर प्रसन्न है ॥ और मैं बहुत खूब
 हुं सो तेरो स्वरूप मैंने जाण्यो नहीं ॥ अब नित्य सेवा
 तुम करो ॥ और शृंगार तेरी इच्छा आवे सो ठाकुरजी-
 कुं धरावो ॥ और सामग्री तेरी इच्छा आवें सो धरावो ॥
 तब वा दिनतें वहु सेवामें नाहावे लगी ॥ और घरके स-
 तुष्य सब वहुकुं पूछके सेवा करन लगे ॥ सो वे कान्द-
 दास और कान्ददासके बेटाकी वहु ऐसे कृपापात्र भग-
 वदीय हते ॥ वार्ता संपूर्ण ॥ वैष्णव ॥ २४९ ॥ ❀

श्रीगुसाईंजीके सेवक एक मथुरादास तिनकी
 वार्ता ॥ सो वे वैष्णव गोपालपुरमें रहते हते ॥ एकदिन मथु-
 रादासनें श्रीगुसाईंजीसों पूछयो जो आपकी सृष्टीमें और
 श्रीमहाप्रभुजीकी सृष्टीमें कितनो तारतम्य है ॥ तब श्री-
 गुसाईंजीनें आज्ञा करी हमनें तेरो त्याग कियो है ॥ उहां
 दशपंदरें वैष्णव बैठेहते ॥ विननें त्यागकरवेकी बात साची
 मानके मथुरादाससों भगवत्स्मरण करनो छोडदियो ॥
 और सब गाममें बात फैलायदीनी कोई वासुं भगवत्स्म-
 रण न करे ॥ और कोई वाके पासहुं न बैठे ॥ तब मथु-
 रादासनें ऐसो विचार्यो जो जंगलमें जायके कोईकुं खबर
 न पडे ऐसे ठेकाणे देह छोडदेनी और अन्नजल त्याग

दियो ॥ ऐसे तीन दिन बीतगये ॥ चौथे दिन वे मथुरा-
दास बहासु जंगलमें देह छोड़वेके लीये चलयो तब रस्तामें
दोकोसपर एक गाम हतो ॥ उहां श्रीमहाप्रभुजीकी सेवक
एक डोकरी रहेती हती जमनावाई वाको नाम हतो ॥ तब
मथुरादासनें विचार्यो जो जमनावाईकुं मेरे त्याग कर-
वेकी खबर न होयगी ॥ यासुं याकुं भगवत्स्मरण करतो
जाउं तब मथुरादास जमनावाईके घर गये और जायके
भगवत्स्मरण किये ॥ तब जमुनावाईनें कही तुम इहां
प्रसाद लेके जावो ॥ तब मथुरादासनें कही मोकुं श्रीगु-
साईजीनें त्याग क्यो है ॥ और वैष्णवननेहुं त्याग
कियो है मैं देह छोड़वे जाउंहुं ॥ तब जमनावाईनें कही
तुम बावरी बात करोहो ॥ श्रीगुसाईजी कोईकुं त्याग करे
नहींहि ॥ और श्रीठाकुरजीनें श्रीमहाप्रभुजीकुं ऐसो वचन
दियोहै जिनकुं तुम ब्रह्मसंबंध करावोगे हम बिनकुं त्या-
ग नहीं करेंगे ॥ और बिनके दोष रहेंगे नहीं ॥ सिद्धांत-
रहस्यग्रंथमें कह्योहै सो ॥ २० लोक ॥ ब्रह्मसंबंधकरणात्सर्वे-
षादिहजीवयोः ॥ सर्वदोषनिवृत्तिर्हिदोषाः पंचविधाः स्मृताः
॥ १ ॥ और अंतःकरणप्रबोध ग्रंथमें कह्योहै ॥ सोवाक्य ॥
सत्यसंकल्पतोविष्णुर्नान्यथातुकरिष्यति ॥ अन्यच्च ॥
लौकिकप्रभुवत्कृष्णोनद्रष्टव्यः कदाचन ॥ और श्रीमहा-
प्रभुजीनेहुं निबंधमें कह्योहै जो हमारे मार्गमें आवेंगे और
अधर्म करेंगे और वेदनिंदा करेंगे तोहुं नरकमें न जाएंगे
और हीन योनीमें जन्म लेंगे ॥ २० लोक ॥ अत्रापि वेद-
निंदायामधर्मकरणात्तथा ॥ नरकेन भवेत्पातः किंतुहीने-

(४२२) दोसीबावन वैष्णवकी वार्ता.

पुजायते ॥ १ ॥ और श्रीठाकुरजीनें श्रीगीताजीमें कह्यो है सो ॥ श्लोक ॥ सर्वधर्मान्परित्यज्य मामेकं शरणं व्रज ॥ अहं त्वा सर्वपापेभ्यो मोक्षयिष्यामि मा शुचः ॥ १ ॥ ऐसे अनेक ठेकाणे कह्यो है सो श्रीगुसांईजी कैसे त्याग करेंगे तेरी बात में साची नहीं मानुं ॥ तुम इहां बैठा दर्शन करो महाप्रसाद ले मैहं प्रसाद लेके तुमारे संग श्रीगुसांईजीके पास चलुंगी ॥ तब मथुरादासनें न्हायके महाप्रसाद लियो ॥ फेर वे जमनाबाई मथुरादासकुं संगलेके श्रीगुसांईजीके पास आई ॥ तब वा मथुरादासकुं देखके श्रीगुसांईजीनें कह्यो वैष्णव तूं चार दिनसुं कहां गयो हतो ॥ तब जमनाबाईकी बात सत्य करवेके लीयें और मार्गकी स्थिरता राखवेके लीयें और सृष्टिको तारतम्य जणायवेके लीयें श्रीगुसांईजीनें मथुरादासकुं ऐसी लीला दिखाई सो वे मथुरादास श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २५० ॥ ❀ ॥ ॥ श्रीगुसांईजीके सेवक माधवेंद्रपुरीकी वार्ता ॥ सो वे माधवेंद्रपुरी मध्व संप्रदायके संन्यासी हते और अडेलमें रहेते हते ॥ बिनकेपास श्रीगुसांईजी पढवे जाते हते ॥ और नित्य पुस्तक श्रीगुसांईजी बिनकेपास धरी आवते ॥ और घरमें आयके भगवत्सेवा करते ॥ फेर एकदिन माधवेंद्रपुरीनें श्रीगुसांईजीसुं कही जो तुम पुस्तक इहां घर जावोहो और कछ गोखो नहींहो ॥ तब श्रीगुसांईजीनें आज्ञा करी तुम कहो सो बताऊं ॥ तब माधवेंद्रपुरीनें जो स्थल पूछ्यो सो सब श्रीगुसांईजीनें स्पष्ट

करके बतायो ॥ सो ऐसो बतायो जैसे माधवेंद्रपूरीकुं आवतो ॥ जासुं दशगुणो विशेष बतायो ॥ तब माधवेंद्रपूरीकुं बड़ो विचार भयो ॥ जो ये कहा कारण होयगो ॥ इतनो कहांसो शीखे होयंगे तब अनेक प्रकारको विचार करन लगे ॥ सो बहुत मनमें विस्मय जैसे होय गयो ॥ तब विचार करते रातकुं सुते तब श्रीठाकुरजीनें माधवेंद्रपूरीकुं स्वप्नमें कह्यो ॥ जो मैं श्रीगिरिराजजीमें प्रगट भयोहूँ ॥ और मेरी सेवा भरेविना कोई जाने नहीं है ॥ जासुं मेरी सेवा शिखायवेकेलीयें मैं दूसरो रूप धरके श्रीचिह्नलनाथजी प्रगट भयोहूँ ॥ सो तेरे मोकुं प्राप्त होवेकी इच्छा होवेतो इनकी शरण जाओ ॥ तब माधवेंद्रपूरीकी नींद उठगई ॥ फेर आखीरात विचार क्यो कब दिन होवेगो और कब श्रीगुसाईंजी पढवे आवेंगे ॥ फेर दूसरे दिन श्रीगुसाईंजी पढवे पधारे तब माधवेंद्रपूरीनें श्रीगुसाईंजीसुं कही जो आप पूर्णपुरुषोत्तम होयके हमजैसेनकुं मोह करवेकेलीयें पढोहो अब मोकुं गुरुदक्षणा द्यो ॥ आपके माये श्रीनाथजी विराजे हैं ॥ जासुं मोकुं थोडे दिन सेवा करवेकी आज्ञा देठ और आप मोकुं सेवक करो ॥ तब श्रीगुसाईंजीनें माधवेंद्रपूरीकुं कही हम तुमारेपास विद्या पढे हैं हम तुमकुं सेवक नहीं करेंगे ॥ तुमकुं हम उपदेश कैसे दें ॥ तब माधवेंद्रपूरी बहुत उदास भये ॥ फेर श्रीगुसाईंजीकुं उत्थापनके समय श्रीनवनीतप्रीयाजीनें आज्ञा कीनीं जो माधवेंद्रपूरीकुं आप सेवक करो ॥ तब श्रीगुसाईंजीनें माधवेंद्रपूरीकुं मान निवेदन करायो ॥

और ब्रजमें संग लेपघारे और श्रीनाथजीकी सेवामें राखे और बंगाली लोग माधवेंद्रपूरीकेपास राख दिये ॥ तब माधवेंद्रपूरी श्रीनाथजीकी सेवा करन लगे परंतु माधवेंद्रपूरी संन्यासी हते ॥ जो कछु श्रीनाथजीकी भेट आवती सो सबबंगाली ब्राह्मणनकुं दे देते कछु राखते नहीं ॥ और श्रीगुसांईजी उनकुं कछु कहते नहीं ॥ तब बहूतदिन ऐसे बीतगये फेर श्रीनाथजीकी इच्छा वैभव बढ़ायवेकी भई ॥ तब श्रीनाथजीनें माधवेंद्रपूरीसुं कही तुम दक्षिणमें जायके मलयागरपर्वतमेंसुं चंदन लावो ॥ तब माधवेंद्रपूरी चंदन लेवेकुं गये ॥ तब पाछेसुं कृष्णदासजीनें बंगालीनकुं काढे ॥ ये बात श्रीनाथजीके प्राकट्यमें लिखीहै जासुं इहां नहीं लिखी ॥ फेर माधवेंद्रपूरी मलयागर चंदन लेवेकुं गये ॥ तब हिमगोपालजीके दर्शन कय्यो ॥ तब हिमगोपालजीनें आज्ञा करी जो तुम हमकुं इहां चंदन लगावो ब्रजमें मत जावो ॥ तब माधवेंद्रपूरीनें उहां चंदन समर्प्यो ॥ और उहां भगवल्लीलाकुं प्राप्त भये ॥ सो वे माधवेंद्रपूरी श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २५१ ॥ ❀ ॥ ॥ ॥ ॥ श्रीगुसांईजीके सेवक जाडा कृष्णदासकी वार्ता ॥ सो बिनकुं सब ब्रजवासी चाचा जाडा कहते और बडे चतुर हते ॥ और सब संतमहंतनकी परीक्षा लेंते फिरते हते ॥ एकदिन श्रीगोकुलमें श्रीगुसांईजीकी परीक्षा लेवेकुं आयें ॥ वाई समय श्रीगुसांईजी श्रीनवनीत प्रियाजीकुं पालना झुलावते हते ॥ तब जाडा कृष्णदासने

दर्शन करे कोई समय तो श्रीगुसांईजी झुलावे और श्रीनवनीतप्रियाजी झुलें॥ और कोई समय श्रीगुसांईजी झुलें॥ और श्रीनवनीतप्रियाजी झुलावें ॥ तब जाड़ाकृष्णदास देखके चकित भये ॥ और मनमें संदेह भयो ॥ जो ये श्रीठाकुरजी होयंगे केये श्रीठाकुरजी होयंगे ॥ अत्यंत संदेह भयो ॥ तब श्रीगुसांईजी राजभोग धरके बहार पधारे ॥ तब जाड़ाकृष्णदासकुं श्रीगुसांईजीके रोमरोममें श्रीनवनीतप्रियाजीके दर्शन भये ॥ तब श्रीगुसांईजीकुं दंडवत करके और वीनती करी ॥ जो मैं बहुत दुष्ट हूँ आपकी परीक्षा लेंगेकुं आयोहूँ ॥ परंतु आपने मेरी परीक्षा लीनी और कृपाकरके आपने मेरो संदेह मिटायो ॥ जायुं आप मौकुं शरण लेवे ॥ तब श्रीगुसांईजीने कृपाकरके विनकुं नामनिवेदन करायो ॥ प्रसंग ॥ १ ॥ फेर थोड़े दिवस उहां रहेके वृंदावनमें आये और रूपसनातनजीकुं मिले तब रूपसनातनजीसुं कही जो श्रीठाकुरजीकहा करेहैं ॥ तब रूपसनातनजीने कही जो श्रीठाकुरजी भोजन करेहैं तब जाड़ाकृष्णदासजीने कही जो श्रीठाकुरजीकी तो सब लीला नित्यहै ॥ एककालावच्छिन्न सब लीला करेहैं और तुमने भोजन करेहैं ॥ ऐसी कही सो कारण कहा ॥ जब रूपसनातनजीने कही ऐसेदर्शन तो श्रीगोकुलमे श्रीगुसांईजीके इहां होवे हैं ॥ और श्रीगुसांईजी जिनकुं करावें विनकुं होवेंहैं ॥ ये बात सुनके जाड़ा कृष्णदास बहुत प्रसन्न भये पाछे जाड़ाकृष्णदास सब ब्रजमें फिन्थो करते सो भगवद्गुणानुवाद गायो करते ॥

सो इंद्रकोपको चरित्र बनायो ॥ और रासपंचाध्याई बनाई ॥ और भाववरुक्मिणीकेलीगाई ॥ और सुंदर रीतसुं भोजनके पद नये बनायके गाये ॥ और जिनजिनसों विनको प्रसंग पढ्यो विनके अंतःकरणकी जहता मिट गई ॥ प्रसंग ॥ २ ॥ एकदिन जाडाकृष्णदास द्वारका जात्रा करवेकुं गये ॥ सो रस्तामें एक गाम आयो ॥ सो उहां देवीको देवल हतो सो देवीके देवलमें जायके सूते सवारके समय एक मनुष्य बकरालेके देवीपर चढायवे आयो ॥ तब जाडाकृष्णदासनें कही सब लोग बकरा चढावेहैं ॥ कोई सिंघ नहीं चढावेहैं ॥ तब वो मनुष्य बोल्यो जो सिंघ कैसे पकड़े जाय ॥ तब जाडाकृष्णदासनें कही मैं तोकुं सिंघ पकड़ेउंढ ॥ तब तुम बकरी छोडद्यो ॥ तब वानें छोड दीनी ॥ फेर जाडाकृष्णदास जंगलमें जायके सिंघ पकडलाये ॥ वा सिंघकुं देखके सब मनुष्य भागगये ॥ और जाडाकृष्णदासके पावन पडवे लगे ॥ तब जाडाकृष्णदासनें विनकुं ऐसे कह्यो तुमारे आज पीछें जीवहिंसा नहीं करनी ॥ सो वे ऐसे पराक्रमी हते जिनकी कीर्ती आखा जगतमें फैली हती ॥ सो वे जाडाकृष्णदास ऐसैं पराक्रमी हते ॥ प्रसंग ॥ ३ ॥ फेर एकदिन जाडाकृष्णदासजी चाचाहरिवंशजीकुं मिले ॥ तब जाडाकृष्णदासनें पूछी जो या पुष्टिमार्गमें कोनसे शास्त्रके वचन प्रमाण है ॥ तब चाचाहरिवंशजनिं कही जो वेद और श्रीकृष्णके वाक्य और व्याससूत्र और श्रीमद्भागवतमें तीन भाषा है एक

लौकिक भाषा ॥ और दूसरी स्मृति भाषा ॥ और तीसरी समाधी भाषा ॥ सो वेद और श्रीकृष्णके वाक्य और व्याससूत्र और समाधीभाषा और धर्मशास्त्र ये प्रमाण हैं ॥ इनसुं मिलते पुराणके वाक्य और स्मृतीके वाक्यइ प्रमाणहे इनसुं विरुद्ध हैं सो प्रमाण नहीं हैं ॥ सो श्रीमहाप्रभुजीनें निबंधमें कह्यो हैं सो ॥ श्लोक ॥ वेदाःश्रीकृष्णवाक्यानिव्याससूत्राणिचैवहि ॥ समाधिभाषाव्यासस्यप्रमाणंतच्चतुष्टयं ॥ १ ॥ उत्तरपूर्वसंदेहवारकंपरिकीर्तितं ॥ अवरुद्धंतुयत्त्वस्यप्रमाणंतच्चनान्यथा ॥ एतद्विरुद्धंयत्सर्वनतन्मानंकथंचन ॥ फेर जाड़ाकृष्णदासनें पूछी जो अनेकप्रकारके देवपूजन और अनेकप्रकारके व्रत और अनेकप्रकारके शास्त्र बहुत दिनसुं प्रमाण चले आवे हैं ॥ सो विनको विचार कहा करनो ॥ तब चाचाहेरिवंशजीनें कही ये निर्णयतो श्रीमहाप्रभुजीनें निबंधशास्त्रार्थमें लिख्यो हैं सो ॥ श्लोक ॥ बुद्धावतारेत्वधुनाहरौतद्वशगाःभुराः ॥ नानामतानिविप्रेषुत्वाकुर्वतिमोहनं ॥ १ ॥ अयमेवमहामोहोहीदमेवप्रतारणं ॥ यत्कृष्णंभजेत्प्राज्ञःशास्त्राभ्यासपरःकृती ॥ तेषांकर्मवशानां हिभवएवफलप्यति ॥ २ ॥ याको अर्थ जब श्रीठाकुरजीनें जीवनकुं मोह करवेके लिये और आपको भजन छुटायवेकेलीये विचार क्यो तब बुद्धावतार लियो ॥ तब श्रीठाकुरजीकी ऐसी विपरीत इच्छा जानके सब देवता श्रीठाकुरजीके वश रहेहैं ॥ सो ब्राह्मणनके घर आयके जन्म लिये ॥ और अनेक मत चलायवेके लीये अनेक शास्त्र

वर्णन करे ॥ और ये बातको कछु विचार न क्यो ॥ जो ये श्रीठाकुरजी मोह करेहैं ॥ और ठगाई करेहैं ॥ ऐसे बुद्धिबानननें विचार न क्यो ॥ ऐसे वचन सुनके लोगननें श्रीठाकुरजीकी सेवा छोड़दीनी ॥ पंडितहतेतोहूँकर्मवश होय गये ॥ ऐसे कर्मवशनकुं संसारही फलहोवें हैं ॥ और फल नहीं होवें हैं ॥ ये सुनके जाडाकृष्णदासबहुत प्रसन्न भये और कहेन लगे ॥ जो तुमारेविना कोईमेरो संदिह भागायवेकुं समर्थ नहींहैं ॥ और सब लोग, मनमें ऐसे जाने हैं जो श्रद्धा अनेक प्रकारकी लोगनमें होवेंहैं ॥ परंतु खरी श्रद्धा कहा होवेंहैं ॥ तब चाचाजीनें निबंधको श्लोक कह्यो सो ॥ श्लोक ॥ ज्ञाननिष्ठातदाज्ञेयासर्वज्ञो-
 ह्यिदामवेत् ॥ कर्मनिष्ठातदाज्ञेयायदाचित्तप्रसीदति ॥ १ ॥ भक्तिनिष्ठातदाज्ञेयायदाकृष्णः प्रसीदति ॥ निष्ठाभावेफलंतस्मान्नास्त्येवेतिविनिश्चयः ॥ २ ॥ याको अर्थ ॥ ज्ञान-
 निष्ठा साची कब जाननी जब जीव सर्वज्ञ होवे ॥ कर्म-
 निष्ठा साची कब जाननी जब अनेकप्रकारको कष्ट पड़े
 दुःख होवे तोहूँ चित्त प्रसन्न रहे ॥ चित्तप्रसन्न न होवे तो
 सब करे कर्म व्यर्थ जाएं ॥ और भक्तिनिष्ठा साची कब
 जाननी जब श्रीठाकुरजी प्रसन्न होवें ॥ और निष्ठाविना
 कछु फल नहीं होवेंहैं ॥ ये सुनके जाडाकृष्णदासजी बहुत
 प्रसन्न भये ॥ और गोपालपुरमें गये ॥ जन्मपर्यंत श्रीना-
 थजीकी सेवा करतरहे ॥ वे जाडाकृष्णदास श्रीगुसांईजीके
 ऐसे कृपापात्र हते ॥ वार्ता संपूर्ण ॥ वैष्णव ॥ २५२ ॥

॥ इति श्रीगुसांईजीके सेवक दोसौबावन वैष्णवकी वार्ता संपूर्ण ॥

॥ श्रीकृष्णायनमः ॥
॥ अथ श्रीपुष्टिद्वयोलिख्यते ॥

जाकों पुष्टिअंगीकार होयगो सो जानेंगो ॥ जीवकों उद्यम करनों ॥ उत्तमभगवदीयकी संगती मिलनों ॥ अरु वाके करेको विश्वास राखनों ॥ जव विश्वास उपजे ॥ तव जानियें जो श्रीजीने कृपाकरी ॥ अपनो कियो उत्तम भगवदीयकी संगतीतें श्रीजी प्रसन्न होयके अंगीकार कियो ॥ अपनो आनंद देवेके लीयें तव स्वरूपनेष्टा उपजे ॥ तव जानीये जो श्रीप्रभुजीने अपनों आनंद दियो वैष्णव तासों कहिये ॥ जाकों स्वरूप ऊपर अनन्यता उपजे ॥ तव तासों वैष्णव कहिये ॥ जीवकों विवेकविचार करनों ॥ जीवको चौरासीलाख योनी मिले तामें मनुष्यदेह उत्तम है ॥ सबगुण जानेंहैं सत्कर्म तथा दुरेकर्म करवेकों जीवको सामर्थ्य है ॥ जीवको और सामर्थ्य कोऊ नहीं है ॥ तातें जीमसों भगवद्गुण गावैं और हाथनसों सेवा करे ॥ काननसों भगवद्गुण सुनें ॥ नेत्रनसों दर्शन करे ॥ अग्यारह इंद्रिय भगवदर्थ लगावे ॥ जो सत्संग होय तो ऐसे करे ॥ कदाचित् लौकिककी संगती होय तो तातें तैसोही होवैं ॥ संगतिके वश मन हैं ॥ मनके वश देह है ॥ ज्यों चलावे त्योंही चले ॥ ज्यों बुलावैं त्योंही बोले ॥ हाथ पांव सब मनके दास हैं ॥ ज्यों कहें त्योंही करें ॥ परि वचन फेर नहीं ॥ देहको राजा सो मन है ॥ राजासों ऊंच संगति होवैं तो राजबडे ॥ अरु नीच संगति होवैं तो राज्य

जाय ॥ तातें मनकों ऊंचसंगति मिलावनों ॥ वैष्णवकों पहिले तो पढ़नों ॥ पढ़िके श्रीमत् भागवत सुननों ॥ ता मार्ग चलनों ॥ श्रीवल्लभाचार्यजीनें टीका करीहै ॥ टीका करिके भाव लिख्यो है ॥ सो सुनियें तो श्रीठाकुरजी हृदयमें तें दूर न होंवै ॥ और श्रीआचार्यजीनें वेद तथा शास्त्रमथिकें दोहन करके ताको नवरत्नग्रंथ कियो है ॥ जो आपके अंगीकृत हैं ॥ तिनकुं मार्ग दिखाववेको कीनो हैं ॥ पहिले श्रीप्रभुजीके सदासर्वदा अंगीकृत हैं ॥ तिनको जनम जनम छोड़त नहींहैं ॥ आप श्रीवल्लभराय अब अवतार लेके अपने दासनकुं जुदे किये संसाररूपी समुद्रमें सब बूडत हते ॥ सो भगवत्स्वरूपरूपी नावमें बैठायेके पार उतारे हैं ॥ ताको नामरूपी नावमें बैठे हैं ॥ परि जाकों पूर्व जैसी दशा हती ॥ तैसीही पावेंगे ॥ सो श्रीठाकुरजी कलियुगमें प्रकट प्रमाण हंसते खेलते बोलते चालते सो श्रीवल्लभाचार्यजीके घर दर्शन देत हैं ॥ परि पूर्व जो अंगीकृत जीवहैं सो जानत हैं ॥ और हैं सो आसुरी हैं ॥ देखेंगे परि विश्वास न आवेगो जैसैं आंधरो सूर्य उगे परि देखे नहीं ॥ परि वे वैष्णव हृदयकी आंखिनसों देखैं तो देखे ॥ अब विन आंखनको बल क्यों कर होइ ॥ अब सो उपाय कहतहैं ॥ जो तादृशी वैष्णवनकी संगति करे तो आंखिनको पड़दो खुल जाय ॥ तब श्रीब्रजमंगल ब्रजाधिपती ब्रजके ईश्वर दृष्टि परें ॥ तब वा स्वरूपकी अनन्यता राखे ॥ जैसैं हनुमानजीनें श्रीरामचंद्रजीको स्वरूप हृदयमें राख्यो ॥ शरीरमें भगवदावेशतें

समुद्र उलंघ्यो ॥ सो सीताजीकी शुष लाये ॥ वाग उ-
 खारि डान्यो ॥ अरु लंका जराय राख करी ॥ अरुपर्वत
 उठाय लाये ॥ सो सब भगवदावेशतें करे और असम-
 र्पित नखाय तो सुबुद्धि होवे ॥ प्रथम नामग्रहण करिये ॥
 उपरांत तादृशी वैष्णवसों मिलिये ॥ तो स्मरण उपजे ॥
 तब स्मरण किये उपरांत श्रीजुगलकिशोरकों लाडलडा-
 ईये ॥ उत्तम सामग्री करके समर्पिये ॥ सो महाप्रसाद
 वैष्णवनों ल्वाइये ॥ जब वैष्णव लेंही तब यों जानि-
 ये ॥ जो श्रीजी प्रेमछुं अरोगेहैं ॥ श्रीजी प्रसन्न भए पाछें
 अपनों कर बुलावें ॥ जब कहें ये जीव हमारो हैं तब जी-
 वकों कहा चाहिये ॥ सब मनोरथ सिद्ध भये ॥ परि यह
 जीव अन्याश्रयछोडे तब अपनों करें ॥ अन्याश्रयहौंनदे
 नहीं ॥ जैसे स्त्री अन्यपुरुषको संग करे वाके पतीको मृ-
 त्युप्राय दुःख होवे तब सामर्थ्य होवे तो पत्नीको त्याग
 करे ता पुरुषकों वा स्त्रीको सुख देख्यो भावे नहीं तैसे
 वैष्णवकों अन्याश्रय हौनों नहीं और अन्याश्रय करे तो
 विमुख जानियें ॥ तातें अन्याश्रय सर्वथा न करनों ॥
 और असमर्पित न लेनों असमर्पित और अन्यसमर्पित
 लेवे तो दुर्बुद्धि आवे ॥ श्रीजी हृदयमें न पधारे ॥ तातें
 प्रथम अपना हृदय शुद्धकरिये ॥ तब हृदयकी आंखि-
 नसों देखिये ॥ जो मेरेमें कितनो दोष है ॥ खरी दृष्टिसों
 देखिये तो दीसे ॥ एक तो जीवमें अभिमान है ॥ सो तो
 चांडाल है यूं जानत है जो मैं करतहूं मलीही करतहूं और
 सब सुख हैं ॥ मोमें कछु विषय नहीं ॥ और सब विषयी

हैं तातें श्रीठाकुरजी उनको अंगिकार कबहुं न करें ॥ एक मनमें अभिमान आवतहे ॥ तातें सबनकी निंदा करत हैं ॥ ताकों चांडाल जाननों ॥ श्रीजीकी लीला अतिबड़ी अरु महा आनंदरूप है ॥ तैसो आनंदरूप हृदयमें राखनों तो महालीलाको सुख देखिये ॥ सो देखिके दोष उपजे तो महापतित होई और जो स्नेह उपजे तो श्रीठाकुरजी अपने रसात्मक स्वरूपको दर्शन देहिं ॥ अरु दास करि राखें ॥ तातें सखीभाव राखनो ॥ जैसे पुरुषकी पतिव्रता टेक राखे ॥ तासों कहा कहिये ॥ पुरुषतो एक पुरुषोत्तम है अरु तिनके ऊपर जे रसिकहैं तिनकों स्त्रीही जाननैं ॥ प्रसंग ॥ १ ॥ संपूर्ण ॥ अथ द्वितीय प्रसंग ॥ जो भगवदीय है सो श्रीजीको स्वरूप है ॥ भगवदीयके वचन सो श्रीजीके वचन जाननैं भगवदीयके हृदयमें आयके प्रभुजी बोलतहैं ॥ भगवदीयहुं ऐसो जाननो सो तो भाव ऊंडो है विचार देखिये तब जानिये ॥ ऐसे वैष्णव क्योंकरि पहिचानिये ॥ ताऊपर कहत हैं एक तो चिंता न करे ॥ दूसरे असमर्पित न खाय ॥ तीसरे विषयमें लीन न होई ॥ चौथे जो कछु होयसो भगवदिच्छा करमानें ॥ पांचमें अभिमान न करे ॥ छठे तो वैष्णवनके दासनको दास ब्रह्म रहे ॥ सातवें तो भगवद्गुण गान करें ॥ आठवें तो मनमें प्रसन्न रहें ॥ नवमें तो भगवदीय वैष्णव देखके मन प्रफुल्लित होवे ॥ दशमें तो लौकिकसंग छोडि वैष्णवनको संग करे ॥ ऐसो भगवदीय होई ॥ तापर भरभाव घणो राखिये ॥ भगवदीयके मनकी बात जाननी ॥

वाकी देखादेखी न करनी भगवदीयके मनकी बात तो श्रीजी जाने ॥ परि वैष्णवके वचनको विश्वास राख-
नो ॥ ऐसे भगवदीयको मन प्रसन्न करिये तो श्रीजी प्रसन्न
होवें ॥ यह तो भाव ऊँडोहैं ॥ तादृशी होयगो सो जानें-
गो ॥ तातें तादृशीको संग करनो ॥ जो कदाचित् स्वार्थ
करे तो महा पतित होय ताके लीयें विवेक धैर्याश्रय ग्रंथ
श्रीआचार्यजीने कियो है सो विचारनों ॥ और जीवहुं
अंगीकार अदृष्ट है दीखवेंमें नहीं आवेहैं ॥ दुःखरूपहै ॥
परि श्रीआचार्यजीके मार्गमें चले तो सुखरूप होय जीव
ज्ञानत है ॥ जो मैं करत हुं सो कोई जानत नहीं है ॥ परि
श्रीजी मनकी वार्ता जानतहैं ॥ तिनतें कछु छिपी नहीं
है ॥ जो जीव ऐसे जाने हे सो देखेहैं ॥ और जीव हैं सो
विपईहैं ॥ उनको मन रातदिन विषयमें रहत हैं ॥ ताको
वह गुण करि मानेंहैं ॥ वाकों कोउ बुरो कहे ॥ तापर क्रोध
करेंहैं ॥ ऐसी प्यारी वस्तुहै ॥ तातें ऐसो प्यार जो वैष्ण-
वपर होई तो कृतार्थ होय ॥ परि जीवकों विषयरूपी जो
चोर तापेंडेंमें मिलतहैं सो पापी आगें होतहैं ॥ वा चोर
उपर बहार करिये ॥ तो चोर भाग जाय ॥ अरु सुखसों
ठिकाणें पोहोंचिये ॥ ताउपर फेर कोउ कहेगो जो बहार
क्युंकर करिये ॥ ताउपर कहतहैं ज्ञान करके मन राखिये
तो मन रहे ॥ कारण सबको मनहै ॥ कोउ एक कहेगो
जो नामग्रहण कियो होई ॥ फेर अनन्यताको संबंध बरा-
बरहै के अधकी ओछो है ॥ ताउपर कहतहैं ॥ श्रीकृष्णा-
वतारमें जो गोपिकानको सुख भयो ॥ सो तो औरनको

न देहि ॥ ताऊपर कहतहैं ॥ जो औरको नाम ग्रहण करावेंहैं ॥ सो पूर्व अपने न होएंगे ॥ ताऊपर कहतहैं ॥ पूर्व-जाको जैसे संबंध हैं ॥ तैसेही ताको सुख पावतहैं ॥ जो श्रीकृष्णचंद्रने रासलीला करी ॥ तहां वृक्षन ऊपर पक्षी बैठे होते ॥ तिनने देख्यो परि मनमें सुख न पायो ॥ स-वारो भयो तब उडगये ॥ तैसे श्रीकृष्णचंद्रजीके दर्शनको सुख देख्यो ॥ या दृष्टांततें येनिश्चयभयो जाको स्वरूपमें नेष्टा उपजे ताको श्रीजीने आनंदको सुख दीनो ॥ ताको दृष्टांत ॥ जब श्रीप्रभुजी हृदयमें आवें तब आनंद उपजे ॥ अरु भगवदावेश आवे ॥ फिर कौऊ कहेगो जो श्रीकृष्णावतारमें एक स्वरूपसों दर्शन देत होते ॥ अब अनेक स्वरूपनसों दर्शन देतहैं ॥ सो कोनसे स्वरूपको भजिये ॥ ताऊपर कहतहैं ॥ श्रीवल्लभकुल सब पुरुषोत्तम स्वरूपहैं ॥ परि जा स्वरूपको स्मरण कियो होय ॥ ता स्वरूपको भजिये अरु बाकी अनन्यता राखनी ॥ जैसे हनुमानजीने मुक्ताफलको हार फोरढान्यो ॥ जो श्रीरामचंद्रजीको वामें नाम नहीं हतो ॥ तातें हार डारदीनो ॥ तैसे अपने श्रीप्रभुजीके गुणानुवाद गान न होत होवें ॥ तहांतें उठिजैये ॥ ऐसो पतिव्रताको धर्म है ॥ तैसे वैष्णवनों पतिव्रताकी न्याईटक राखनी ॥ जैसे मीराबाईके घर कीर्त्तन होत होते ॥ तहां श्रीआचार्यजीके पद गावत होते ॥ तब मीराबाई बोली ॥ जो अब श्रीठाकुरजीके पद गावो तब रामदास वैष्णवनें कही जो दारीरांड ये कोनके पद गावतहैं ॥ जा तेरोमुख न देइंगो ॥ तब सब

अपनी कुटुंब लेके और गांमगयो ॥ फेर भीरावाईको
सुख न देख्यो ॥ वैष्णवकुं ऐसी टेकराखनी ॥ परि वैष्ण-
वकुं फेर हंसको गुण लेनो ॥ सुक्ताफलविना चांच भरे
नहीं ॥ ताते वैष्णवकुं अपने प्रभुविना मन धरनो नहीं ॥
जैसे नरसिंघ मेहेतानें अपनी टेक न छोडी ॥ मरण आ-
द-यो ॥ जब राजामंडलीक तरवार लेके सन्मुख ठाडो
रह्यो ॥ कहि जो श्रीकृष्ण हार देंगे नहीं तो मैं तोकुं मा-
रुंगो ॥ तोहं नरसिंघमेहेतानें अपनी टेक न छोडी मरण
आद-यो ॥ तब श्रीठाकुरजीनें हार दियो ॥ नरसिंघमे-
हेतापर कृपा करी ॥ राजामंडलीक म्लेच्छ भयो ॥ वैष्ण-
वनें अपनी टेक पतिव्रताकीसी राखनी ॥ अपने श्रीप्रभु-
जीकुं हृदयमें राखें ॥ ताकुं वैष्णव कहिये ॥ दृष्टांत ज्या
स्त्रीको अपनो धनी होवे सो होवे ॥ और लौकिक स्वार्थ-
मेंहुं अपने खसमकुं छोडिके औरको भजन नहीं करे ॥
जो कोउ कछु कहे ताको गारी देन लगे ॥ जासों एक
जन्मको संवंधहै ॥ और इहांतो अनेक जन्मके धनी है ॥
तो इन ऊपर घणो स्नेह क्यों न राखिये ॥ यह ऐसी बात
है अरु वैष्णव सो कोन ॥ अरु स्मार्त सो कोन ॥ ता ऊ-
पर कहत हैं ॥ जाको स्वरूपनेष्टा आई नहीं ॥ सो स्मार्त
जाननो जब स्वरूपनेष्टा आवे तब वैष्णव होय ॥ तब
वैष्णवको कहां करनो ॥ सो कहतहैं ॥ के तो जुगलकि-
शोर श्रीप्रभुजीको भजिये ॥ के अपने श्रीप्रभुजी दर्शन
देतहैं ॥ वै सो स्वरूप अपने मनमें धरकें सेवा करनी ॥
जो निवेदनी वैष्णव समर्पे सो सर्वथा श्रीजी अरोगें ॥ फिर

कोई कहेगो ॥ जो श्रीगुसांईजी द्विजरूप प्रगट भएहैं ॥ सो
 शुद्धके हाथको कैसे अरोगत होएंगे ॥ ताउपर कहतहैं जो
 समर्पण देके द्विजरूप करतहैं ॥ ब्राह्मणकों जनेऊको अ-
 धिकार है ॥ जनेऊ सूतकी त्रिसरी करेंहैं तैसे वैष्णवके ग-
 रमें त्रिसरी माला लेके घालतहैं ॥ ऐसे करके ब्राह्मण कर-
 तहैं ॥ तब वाके हाथको आप अरोगतहैं ॥ पाछें सो प्रसाद
 लीजिये तो आत्मा शुद्ध होई ॥ अरु वैष्णवता आवे ॥
 पाछें वैष्णवकों पथ्थरकी टेक राखनी ॥ अरु संसाररूपी
 समुद्रमें पाषाण प्रगट होतहैं ॥ संसाररूपी जल भज्यो
 है ॥ तामें ये पथ्थर होके रहें ॥ तो भीतर जल स्पर्श न
 करे तो भीतरकी अग्नीको बचाव होवे ॥ परि पूर्व वैष्णव
 है ॥ तातें जल भेदत नहीं है ॥ हृदयमें श्रीआचार्यजी
 बसतहैं ॥ श्रीआचार्यजी अग्निरूपहैं सो वैष्णव हृदयमें
 राखतहैं ॥ ताकों श्रीआचार्यजीको खरो भरोसो है ॥ ऐसे
 उत्तम वैष्णवको संग कीजे तो सुगम पड़े ॥ सो श्रीआ-
 चार्यजी अग्निरूप हैं सो अग्नि उंचो है ॥ तापर धारिये
 तो परिपक्व करे ॥ अरु नवनीत जैसे स्वभाव कौमलहै ॥
 श्रीआचार्यजी अग्निरूपहैं ॥ तातें उनको आसरो होई
 तो माखन मिटके घी होई आपनो रूप फिर तैसे लौकिक
 मिटके वैष्णव होई ॥ जैसे एक बिगरी वस्तु सबको स्वाद
 बिगारे ॥ तैसे लौकिक है तामें स्वाद कछु नहीं ॥ फिर
 वैष्णवको तक्रको गुण लेनो ॥ जैसे मथिये तैसे नवनीत
 देई ॥ अरु आपमें जल मिले ताकों मिटायके तक्र करे ॥
 अरु आप जल न होई ॥ तैसे लौकिक छोड़े ताको वैष्णव

करें ॥ तैसे तादृशीकों मिले तो दोऊनके मन एक होंवें
 और प्रवाहि मिले तो एक मन न होंवें काहू कारण एक
 होंवें तो मन एक करे नहीं ॥ ताको दृष्टांत ॥ जैसे कुंद-
 नमें कुंदन मिल जाय ॥ और वाको वहुत रीण देई तो
 मिल जाय ॥ और ताप आकरो दीजिये तो जुदो होय
 जाय ॥ सो फिर मिले नहीं ॥ तैसे मनको अग्निको स्व-
 भाव है ॥ तातें मनकों भगवत्स्वरूपके विषे लगावे ॥
 भगवत्स्वरूप कैसो है ॥ महा आनंदरूप है ॥ द्वापरयुगमें
 श्रीवसुदेवदेवकीजीके उदरमें तें प्रकट भयेहैं ॥ तब ब्रज-
 भक्तनकुं प्राकट्य प्रमाण लीला दिखाई ॥ वहुत चरित्र
 दिखाए ॥ पाछें कलियुगमें श्रीवल्लभाचार्यजीके घर प्रकट
 होयके अक्काजीके उदरतें वहुत स्वरूपनकरिके दर्शन देत
 हैं ॥ जैसे कृष्णावतारमें ब्रजभक्तनकुं सुख दीनो ॥ तातें
 अधकी सुख देतहैं ॥ दोनो अवतारनको सुख देत हैं ॥
 पहिलें श्रीकृष्णावतारमें मन होंवें तो श्रीनाथजीकुं देखि-
 ये ॥ ये स्वरूप सो साक्षात् श्रीकृष्णजी है ॥ और श्रीवि-
 ष्णवेश तो प्रकट प्रमाण है ॥ बोलत चालत हंसत खेलत
 दर्शन देतहैं ॥ और पूर्व विमुख असुर हैं ॥ तिनकुं विश्वा-
 स नहीं आवत हैं ॥ वैष्णवकी काहूकुं चटक लागे तो
 वैष्णव होवे ॥ जैसे कीटकों भ्रमरीके काटेको ध्यान रह-
 तहैं ॥ सो कीटपणो मिटके भ्रमरी होंवें ॥ तैसे तादृशी
 वैष्णव भगवद्भार्ता करे ते एकचित्तसुं वाको ध्यान करे तो
 वैष्णव होय ॥ फिरि वैष्णवकों वैष्णवपनेकी टेक राखनी ॥
 पपैयाकी तन्हें जैसे धनबूंदतो तो लेई परिभूमिको पन्यो

नलेई ॥ और साँप समुद्रमें रहतहै ॥ परि स्वातीबूंद लेई ॥
 परि समुद्रके जलको पान न करे ऐसी टेक राखी चाहिये ॥
 जीवकी आस श्रीजी पूरे हैं ॥ तैसेही जगदीश उपर टेक
 राखें तो जगदीश कहा न पूरे ॥ परि मनुष्यकेविषे दोष
 अन्याश्रयको हैं ॥ जो करेहैं सो प्रतिष्ठाके लीयें करतहैं ॥
 वैष्णवको धन लेके लौकिक राखेहैं ॥ प्रतिष्ठाके काजें
 करत हैं ॥ परि मन स्थिर नहीं राखे हैं ॥ वैष्णवकोधन
 है सो श्रीजीको है ॥ सो श्रीजीकोही जाननो ॥ मन स्थिर
 देखेंतो श्रीजी याको मनोरथ पूरणकरें ॥ मन तो स्थिर
 रहे जो तादृशी वैष्णवको संग करे ॥ जो वह अपने उपर
 रीसकरें तो शिक्षा करके मानें ॥ जो मेरे भलेकुं कहतहैं ॥
 ताकी वैष्णवता दृढ होई ॥ ताको दृष्टांत जानियें ॥ जैसे
 दूध है सो तो वैष्णव है अरु जमावन हैं सो तादृशी वैष्णव
 है ॥ सो दोऊ इकठोरें होवें ॥ तो भीतर तें नवनीत उपजो ॥
 नहीं तो दूध बिगडे ॥ अरु रीसरूपी रईके घमरके उलटे
 सुलटे सहे तो नवनीत जुदो होई ॥ तब नवनीत अग्निसों
 तावे तो धी होई बिगरे नहीं ॥ संगति बिना दूध बिगरे
 तैसे भगवद्वाक्ता बिना वैष्णवता बढे नहीं ॥ परि पूर्व-
 जाको जैसे संबंध होवे तैसेही होवे ॥ तैसेही संगति
 मिलेहैं एक तो यों कहतहैं ॥ जो नरसिंह मेहतानें बिहार
 गायो ॥ अरु परमानंदजीनें बाललीला गाई ॥ ताको का-
 रण कहा ॥ ता उपर कहत हैं ॥ जो श्रीकृष्णजीनें बिहा-
 रलीला खेल कियो ॥ श्रीवृंदावनमें ब्रजभक्तनसों मिलके
 जब उनकों बहुत बिरह भयो ॥ तब श्रीकृष्णजीनें कही

उद्धवजी तुम श्रीगोकुल जाइ ॥ पाछें उद्धवजी श्रीगोकुल आए ॥ नंदजूके घर जायके उतरे ॥ तब गोपीजननें नंदजूके घर रथ देख्यो ॥ तब वे देखवेकों आई ॥ तब उद्धवजीकुं एकांत बुलायके पूछयो ॥ जो हमकुं श्रीकृष्णजी कबहुं संभारतहैं ॥ तब उद्धवजीनें कह्यो जो मोकों तो तुमारे पास पठायो है ॥ पाछें गोपीजननें श्रीठाकुरजीके संग जे जे खेल किये हते ॥ ते ते उद्धवजीकुं सब कहे ॥ कछु गुप्त न राख्यो ॥ तब उद्धवजीनें सब विहारको प्रकार जान्यो सो हृदयमें राख्यो ॥ सो उद्धवजीनें विदुरके आगें सब बात कही ॥ सो विदुर नरसिंहमेहेता होयके अवतार लियो ॥ नरसिंहमेहेतानें महादेवकी उपासना करी ॥ पाछें महादेवजी प्रसन्न भए ॥ तब कहे जो मागो ॥ तब नरसिंहमेहेतानें कही तुमकों जो प्यारी वस्तु होई सो मोकुं देहु ॥ तब महादेवजी नरसिंहमेहेताकों श्रीहंदावन लेआए ॥ सब रमणलीला दिखाई ॥ सो नरसिंहमेहेतानें जैसी लीला देखी तैसी गाई ॥ और श्रीदामा ग्वालको अवतार परमानंद स्वामी भए ॥ तिननें बाललीलागाई ॥ तातें जैसेकुं मिलिये तैसेही दिखावे जैसे देखिये तैसीही बुद्धि आवे ॥ तातें यत्न करनों ॥ तब यत्नकरतमें कोई दुर्बुद्धि उपजे तो चरणामृत लेइतो दुर्बुद्धि न आवे ॥ चरणामृतकी महिमा काहुसों लिखि न जाय ॥ श्रीशुकदेवजीनें राजा परीक्षितसों कहीहे ॥ जा पात्रमें चरणामृत धन्यो होई सो पात्र सातवेर जलसों धोवे ॥ सातही वेरको जल गंगोदक समानहै ॥ ताके

लीयें चरणाशृतकी महिमाको पार नहीं ॥ फेर कौऊ कहे
ज्यो क्यों करि राखिये ॥ ता उपर कहतहैं ॥ ब्रजसूमी-
की सृत्तिका अरु श्रीयसुनाजीको जल अरु अपने श्री-
ठाकुरजी श्रीप्रसूजीको चरणाशृत ॥ ये तीनों एकत्र करि
राखिये ॥ देश परदेशनमें लीजिये ॥ तातें अधिक महि-
मा जानियें ॥ एक तो श्रीयसुनाजीको जल ॥ दूसरें च-
रणाशृत ॥ तीसरो श्रीब्रजसूमिको दर्शन कीजिये ॥ तातें
सर्वथा चरणाशृत लीयेंविना जल न लीजिये ॥ जैसे श्री-
आचार्यजीके सेवक त्रिपुरदास कायथ नें चरणाशृत प्र-
साद विना जल न लीनो ॥ पाछें श्रीठाकुरजीनें जानी
याकी देह गिरेगी ॥ परि यह जल न लेगो ॥ तब श्री-
ठाकुरजी बरस दशके बालकको रूप धरकें थेली दीय
एक तो चरणाशृतकी ॥ एक महाप्रसादकी देगए ॥ र-
सोईयासों कही जो ये थेली त्रिपुरदासनें दीनी है ॥ पा-
छें रसोईयानें रसोई करी भोग सरायके त्रिपुरदासकों
बुलायवे पठायो ॥ तब त्रिपुरदासनें कहि जो मैं चरणा-
शृत विना प्रसाद न लेऊंगो ॥ तब रसोईयानें कही जो
थेली दीय ॥ बरस दशको लरिका देगयो है ॥ वे कहेन
लग्यो ॥ जो ये थेली त्रिपुरदासनें पठाई है ॥ पाछें त्रि-
पुरदासनें चरणाशृत प्रसाद लियो ॥ परि अपने मनमें
बहुत खेद पाए ॥ मैं बहुत बुरि करी जो मैंने हठकियो ॥
जो श्रीठाकुरजीकों बहुत श्रम भयो ॥ तातें अब चरणा-
शृत घटे तो बढाल लीजिये ॥ तातें चरणाशृत प्रसादको
माहात्म्य त्रिपुरदासनें जान्यो ॥ और वैष्णव तो वैष्णव-

को भाव लीजिये ॥ ताको दृष्टांत ॥ जैसे गंगाजीमें और जल मिले ॥ तो गंगोदक समान होवे ॥ तैसे वैष्णवके मिलापतें वैष्णव होय ॥ जुदो रहे तो वैष्णव नहीं ॥ तामे वैष्णव कारणरूपहे ॥ सो श्रीकृष्णजीको चरणामृत माथें चढ़ावत हे ॥ जानियो अक्षरको भेद हे ॥ श्रीकृष्णजीसो पुष्टिनाम हैं ॥ जो श्रीकृष्ण है सो दोय अक्षरको नामहैं ॥ श्रीकृष्ण नाम तहां माथे चढ़ावत हैं ॥ इतने वैष्णव भये ॥ पाछें श्रीवल्लभाचार्यजीनें अपने मनको एक अक्षर आगे कीनो तब वैष्णव भयो ॥ तातें वैष्णव ऐसो नाम है ॥ सो भगवन्नाम है ॥ खरी दृष्टसों जो देखेंगो सो समझेगो ॥ वैष्णवनने वैष्णवको द्रोह न करनो ॥ वैष्णवहै सो भगवत्स्वरूपहै ॥ जो श्रीठाकुरजीको अपराध कियो होई तो कदाचित छूटिये ॥ परि वैष्णवके अपराध तें क्योंहैं न छूटिये ॥ वैष्णवसो लोहको गोलाहै ॥ जैसे अग्निके बलतें गोला तप्त होय ॥ सो अग्निहूतें तातो होई ॥ कदाचित अग्नि हाथमें लियोजाय ॥ परी वह गोला हाथमें न लियो जाय ॥ तैसे वैष्णवको अपराध न छूटे ॥ फेर जो प्यारी वस्तु होई ताकी हानी होई ॥ और श्रीठाकुरजी हृदयमें न आवे ॥ जो स्त्री प्यारी होई तो स्त्रीकी हानी होई ॥ जो लक्ष्मी प्यारी होई तो लक्ष्मीकी हानि होई ॥ जो पुत्र प्यारो होय तो पुत्रकी हानि होय ॥ ताको दृष्टांत जैसे दुर्योधनने पांडवपर द्रोह कीनो ॥ तातें कौरवकुल नाश भयो ॥ धन गयो ॥ राज्य गयो ॥ तातें वैष्णवको द्रोह न करनो ॥ वैष्णवको द्रोह करे ताको सर्वस्व नाश होय

जाय ॥ तातें वैष्णवकों वैष्णवसों स्नेह राखनो यों जानिये ॥ जो हमसों जुदे मति होवे ॥ ताको दृष्टांत जैसे मोहनदास और हरिदास वे श्री आचार्यजीके सेवक हते ॥ तातें उनमें जैसी प्रीति होती तैसीही राखनी ॥ एकसमय-हरिदासके घर मोहनदास पाइने आये ॥ सो दिन एक तथा दोय रहे ॥ पाछें मोहनदास कहन लगे ॥ जो सवारें में चलुंगो ॥ तब हरिदासने मोहनदाससों कही जो प्यारेजी अबहीतों रहो ऐसे करिके फेर दिन तीनताई राखे ॥ तब हरिदासने अपनी स्त्रीसों कह्यो ॥ जो मोहनदास तो सवारे जाएंगे ॥ तब वा स्त्रीने कही जो दिन एक तथा दोय औरहुं राखिये तो भलों हैं ॥ तब हरिदासने अपनी स्त्रीसों कही जो कुछ उपाय करिये तो रहे तो रहे ॥ तब हरिदासने कही जो अपने वरस सातको यह बेटा है ॥ ताको विष दीजिये ॥ अरु यह भरे तब हमारो शोक देखिके दिन एक रहें तो रहें ॥ तब स्त्रीने कही जो भलें ॥ ऐसेही दिन एक रहेतो राखिये ॥ तब हरिदासने वा बालकको विष दीनो ॥ तब वह बालक मरगयो ॥ तब मोहनदासने जानी ॥ जो रातिको तो नीको हतो अरु अबही मरगयो सो कहा जानिये ॥ न जानिये ॥ जो कहूं सांपनें खायो होयगो ॥ तब दीपक लेके देह देखी परि सांपकी डाढ़तो कहूं देखी नहीं ॥ तब मोहनदासने जानी जो भरे राखिवेके लीये इननें बालककुं विष दीनोहि ॥ तब मोहनदासने तो वा बालकके मुखमें श्रीजीको चरणामृत दीनो ॥ तब वह उठि बैठी ॥ तब हरिदास बहुत रोवन

लाग्यो ॥ मेरे घरतें वैष्णव जायगो ॥ तब मोहनदास कहन लागे ॥ जो मैं तुझारे पास निरंतर रहूंगो ॥ पाछें अपना गांव छोड़िके हरिदास पास आय रहे ॥ तातें वैष्णवपर ऐसो प्यार राखनो ॥ फेर वैष्णवको भेख लेके एक ठग आयो ॥ तब वह ठग दोऊ हाथ जोड़िके जय श्रीकृष्ण कथ्यो ॥ तब वा वैष्णवनें बहुतही बाकी आगत-स्वागत करी ॥ तब वैष्णवनें कही जो तुमनें हम ऊपर बहुतही कृपाकरी ॥ जो दर्शन दीनें ॥ अब तुम कोईक-दिन इहां रहो तो गोष्ठी वार्त्ता करिये ॥ तब उन ठगनें कही जो भलें ॥ तुझारी इच्छा होयगी तो महिनादोयचार रहेंगे ॥ पाछें वा वैष्णवके घर ठग रह्यो सो कितनेक दिन रहतें रहतें भये ॥ तब एकदिन वा वैष्णवके लरिकानें गहनो बहुत पेहेच्यो हतो ॥ तब वा ठग वा वैष्णवकी स्त्रीसों बोल्यो ॥ तब बहुत रसोई करत हती ॥ वासों कही जो मैं तुझारे लरिकाकों वागमें खिलाय लाऊं ॥ तब वा स्त्रीनें कही जो भलें ॥ तब ठगनें लरिकाकों वागमें लेजायके फासी दीनी ॥ तब गहनो लेके भाग्यो ॥ तब इन वैष्णवनें जान्यो ॥ तब इननें कही जो ये हमकों मिले तो धन बहुत दें ॥ मति याको हमारो डर लाग्यो होई ॥ यह हमारे घरतें भूल्यो क्यों गयो ॥ तामें हमकों बुरी लाग-तहे तब वह वैष्णव वा ठगकों खोजन चलयो ॥ सो थो-रीसी दूर जायके पहुँचो ॥ तब ठगसों कही ॥ जो तुम हमारे घरतें भूखे गए सो क्यों ॥ हमारो अपराध कहा है हमारे अपराधकी और देखो मति ॥ तातें आवोप्रसाद

लीजिये तब ठग मनमें डरप्यो ॥ जो अपने घर लेजाय-
 के मोकों मारेगो ॥ तब बाकों वैष्णव अपने घर लग्यो ॥
 तातो पानी करिके बाकुं न्हायो ॥ तब स्त्रीने वैष्णवसों
 कही जो वा लरिकाकुं बुलाय लावो ॥ तब वा वैष्णवनें
 कही जो लरिकाकों तो निद्रा आईहै ॥ तब वा वैष्णवकुं
 प्रसाद लिवायो ॥ तब वा वैष्णवनें ठगसों कही जो तुम
 लरिकाको पुकारो तब वा ठगनें लरिकाकों पुकार्यो ॥
 तब वह लरिका आलस्य मोरिके उठि ठाढ़ो भयो ॥ तब
 वह लरिका कहन लाग्यो ॥ जो मोकों तो निद्रा आई
 हती ॥ तब ठग उठिके वा वैष्णवके पावन प्यो ॥ तब
 कहन लाग्यो जो मैंने तो तुम्हारे बालककों फांसी दीनी
 हती ॥ मारिके गहनो उतार लीनो हतो ॥ परि तुमनें
 बड़ो धीरज राख्यो तो श्रीठाकुरजीनें तुम्हारे लरिका
 जिवाय दीनो ॥ ताते अब मोकों वैष्णव करो ॥ तब उन
 वैष्णवनें बाकों भलो वैष्णव कियो ॥ ताते उत्तम भगव-
 दीयको वचन माननों ॥ ताकी दृष्टांत कहतहैं ॥ एक
 राजा हतो सो वह मरन लाग्यो ॥ तब अपने बेटाकुं वा
 राजाने राज दियो अरु बेटासों कही जो अपने घर एक
 वैष्णव आवेहे ॥ सो बाको तुम वचन मानियो ॥ तब
 बेटाने कही जो भलें मांनुगो ॥ तब राजातो मर गयो
 बेटा राज करन लाग्यो ॥ तब एकदिन राजा सांटी छी-
 लत हतो ॥ सो छुरिसों बाकी अंगुरिया कटि गई ॥ तब
 वा राजाने वा वैष्णवसों कही जो मेरी अंगुरिया कटि
 गई ॥ तब वा वैष्णवनें कही जो भली भई ॥ तब कित-

नेक दिन पीछे वाकी राणी मरि गई ॥ तब वा वैष्णवसों
 कही जो मेरी राणी मरि गई ॥ तबहुं वानें कही जो भली
 भई ॥ तब वा राजाके मनमें बहुत क्रोध भयो ॥ जो ये
 तो मेरो बुरो बांछित है ॥ तब राजा कहन लाग्यो जो
 याकों ठौर मारो ॥ तब चांडाल बुलाए ॥ तब कहे जो
 वह वैष्णव पाछली राति पानी भरनको जातहे ॥ सो तूं
 याको मारि डारियो ॥ तब दूसरे दिन चांडाल तरवार
 लेके बाटबांधि करि बैठे ॥ तब वैष्णव जलभरन निक-
 स्यो ॥ इतनेहि मनमें आई ॥ जो आज दूसरे कृपाते जल
 लाऊं तो श्रीठाकुरजी प्रेमसों अरोगे ॥ तब वह दूसरी बाट
 चल्या ॥ तब वाके पांव उपर एक डेल टूटपड्यो ॥ ताते
 वाको पांव टूट्यो ॥ सो खाटमें डारिके घर लेआए ॥
 तब राजानें समाचार वैष्णवकुं पूछे ॥ जो वैष्णव तुझारो
 पांव टूट्यो ॥ सो बुरी भयी ॥ तब वैष्णवनें कही जो
 बहुत भली भई ॥ श्रीठाकुरजी बुरी करेंहुं नहीं तब राजा
 अपने मनमें सोच्यो ॥ तब कहन लाग्यो ॥ जो मैं तु-
 झारे मारनके लीयें चांडाल राखे हते ॥ और तुम और-
 कृपापें गये ॥ ताते तुझारे पांव टूट्यो ॥ पांवतो फेरहुं
 नीको होयगो ॥ परि मरिजाते तो फेर न जोवते ॥ पाछें
 राजा वा वैष्णवके पांवन परके अपने घर गयो ॥ यह
 राजा वत्तीस लक्षणो हतो ॥ और एक राजा उनतें बडो
 हतो ॥ ताते एक तलाव खुदायो हतो ॥ परि वा भीतर
 जल रहे नहीं ॥ तब पंडित बुलायके पूछे ॥ जो या तला-
 वमें पानी क्यों नहीं रहत है ॥ तब उन पंडितननें कही

जो या भीतर बत्तीस लक्षणी राजाको वध करे तो पानी रहे ॥ तलाव तब भरे इतनेही एक ब्राह्मण बोल्यो ॥ जो वह राजा बत्तीस लक्षणी है ॥ तब वा राजाने कही जो वाकुं बुलावो ॥ सो कटक वा बत्तील लक्षणेके गांव पर चढ़ि गयो ॥ तब वा बत्तीस लक्षणेने वा वैष्णवसों पूछी ॥ जो अब कहा करनो ॥ तब वा वैष्णवने कही जो जैसे बैठहो तैसेही उठ जावो ॥ तब वह तैसी उठी गयो ॥ सो बड़े राजाके पास जायके वाकी सभामें ठाढ़ी भयो ॥ तब वा बड़े राजाने पंडितनसों कही जो तुम कहत हते सो आयो है ॥ तब पंडितनने वाको शरीर देख्यो ॥ तब पंडितनने कही जो याकी तो अंगुरिया खंडित है ॥ तब वा बत्तीस लक्षणेसों पूछी जो तेरे बैहारलरिका कहा है ॥ तब इनने कही जो बैहार लडका हते सो सब मरगये ॥ तब पंडितनने वा बड़े राजासों कही जो यहतो अपुत्रिक है ॥ और याके स्त्री नहीं ॥ याकी अंगुरिया खंडित है ॥ ताते याको वध किये ते तलाव भरेगो नहीं ॥ तब बड़े राजाने वाको बिदा दीनी ॥ तब वह बत्तीस लक्षणी बोल्यो जो मोहूँको वह तलाव दिखाओ ॥ सो जब इनने तलावकी ओर देख्यो ॥ तबही तलाव भरगयो ॥ तब वा बड़े राजाने वाको अपनी बेटी देके व्याह करदियो ॥ वाकुं जवाई कियो ॥ तब वाको बहुत धन देके बिदा कियो ॥ तब वह बत्तीस लक्षणी गाजत बजावत अपने घर आयो ॥ सो आयके प्रथम वा वैष्णवके पावन पज्यो ॥ तब वा वैष्णवसों कही जो श्रीठाकुरजी करत होएंगे सो भलोई

करत होएंगे ॥ अंगुरिया कटीसो भलो भयो ॥ और बै-
हार मरिसो भलो भयो ॥ नहीं तो मेरो तलावमें वध
करते ॥ तातें अब वा राजानें अपनी बेटी व्याहीहे सो
बहु तेरे पुत्र होएंगे ॥ तातें वैष्णवके वचन श्रीठाकुरजीके
वचनकरि जाननैं ॥ उत्तम वैष्णव होई तो मानिये तह कह-
तहैं ॥ जो उत्तम और कपटी कैसे जानिये ॥ जाको वैष्णव
प्यारो न होई तासों न मिलियें ॥ उत्तम भगवदीयमें स्नेह
होय तासों मिलिये ॥ तातें बडो कोई नहीं ॥ ताको दृष्टांत
कहत हैं ॥ सवनते बडी धरतीजामें सब समायो है ॥ तातें
बडो समुद्र जो सगरी धरतीसों लपटानोहे ॥ तातें बडे अ-
गस्त्यमुनी जिननैं समुद्र एकअंजुलीमें पियो हे ॥ तातें बडो
ब्रह्मांड जामें अगस्त्यको तारो उदेहूं दीसि नहींहे ॥ ता ब्रह्मा-
ंडतें श्रीप्रभुजी बडे ॥ जिन सगरो ब्रह्मांड एक पांव कियो ॥
तिनतें बडे वैष्णव जिननैं ऐसैं जगदीश अपने हृदयमें
राखे ॥ तातें वैष्णवतें बडो कोई नहीं ॥ तातें वैष्णवनके
दासनको दास होय रहिये ॥ परि वैष्णवकी बरावरी न
करिये ॥ जो बरावरी करे तो नीच होवें ॥ श्रीमद्भागव-
तमें षष्ठ स्कंधमें लिख्योहे ॥ तामें चित्रकेत राजा चक्र-
वर्ती हतो तिननैं विचार्यो ॥ जो महादेवजी वैष्णवहैं
तिनके दर्शनकुं कैलास जाऊ ॥ सो तब कैलास गयो ॥
सो तहां श्रीमहादेवजीके उत्संगमें पार्वतीजी बैठे हते ॥
और महादेवजीतो ध्यानमें मग्न हते ॥ सो देखिके राजा
चित्रकेतकों रीस चढी ॥ तब पार्वतीनैं शाप दीनो ॥ जातुं
राजा राक्षस होहु ॥ तब श्रीमहादेवजी सावधान भए

पायलागे ॥ तब पार्वतीसों कहेके स्वीजे ॥ कहेजो पहिलें
 तो मेरोही अपराध हतो ॥ तैं शापक्यों दीनों ॥ तब फेर
 जायके चित्रकेत वृत्रासुरको अवतार भयो ॥ सो मरती-
 बेर श्रीभगवान प्रसन्न भए ॥ तब कहेजो मांग ॥ सो
 श्लोक ॥ कहेके मांगे ॥ वासुदेवस्ययेभक्ताःशांतास्तद्गत
 मानसाः ॥ तेषांदासस्यदासोहंभवेजन्मनिजन्मनि ॥१॥
 जो भगवदीयके घर दास होई ॥ ताके दासनको दास
 होई ॥ ताके घर जन्मजन्मदासपनो पाऊं ॥ भगवदीयपनो
 हतो तो महादेवजीकी बरोवरी करी ॥ दासपनो विचा-
 न्यो नहीं ॥ तो राक्षस भयो ॥ तातें दासपनों मागतहूं ॥
 दासकों रीस न घटे पहिलें जीव श्रीपुरुषोत्तमकुं भजे
 तब जीव सर्वथा मुक्त होई ॥ श्रीपुरुषोत्तमकी आज्ञा
 श्रीमहादेवजीनें शंकराचार्यजीको अवतार धन्यो ॥ ति-
 ननें जीवको आसुरभाव भांतिभांतिके मार्ग दिखाये ॥
 नवीन मत करिके जीवकों हरितें विमुख कीनें ॥ वाम-
 मार्गीय असुर सारिले भए ॥ जीवकों कलियुगकी संगती
 करी ॥ अष्ट करे वें पतित भये ॥ अरु पतितपावन श्रीपु-
 रुषोत्तमहैं ॥ तातें अपनें जीवनके उद्धार निमित्त प्रगट
 भएहैं श्रीवल्लभाचार्यजीनें आपनें जीवकों करुणादृष्टि
 देखके सब जीवनकों अपने करे ॥ श्रीविठ्ठलनाथजी रूप
 श्रीगुसांईजी प्रगटे ॥ महारसात्मक जो मार्ग जाको नाम
 पुष्टिमार्ग ॥ श्रीप्रभुजीनें महावाक्य कह्यो हे ॥ जीवकों
 वरण करेहैं ॥ ते वाणी निश्चय कियो ॥ जीवके कानमें
 कहतहैं ॥ महावाक्य जाके लीयें ॥ जीवको पुरुष भागहे ॥

तहां कृपाकरके श्रीपुरुषोत्तम अंगिकार करतहैं ॥ और निवेदनमें तुलसी हाथमें लेके अपने जीवके हाथपर मेल-
तहैं ॥ देके फिरि पाछीलैतहैं ॥ जो नवरत्नके तथा एका-
दशके श्लोक श्रीठाकुरजी अपने मुखसों कहत हैं ॥
तैंसोई नवरत्नमें कह्योहै ॥ श्लोक ॥ चिंताकापिनकार्या
निवेदितात्मभिः कदापीति ॥ भगवानपिपुष्टिस्थानक-
रिष्यतिलौकिकिचगति ॥ १ ॥ ऐसे कहिके जाने निवे-
दन लीनो ताकुं चिंता न करनी ॥ चिंतासो सकल दोष
की माताहै ॥ जहां जाकी माता होई ॥ तहां सकल दोष-
होई ॥ और तुलसी देके फिर पाछे लैतहैं ॥ तुलसीसों वर-
णकरतहैं सो वृंदाको स्वरूपहै ॥ वृंदासो महापतिव्रताहै
॥ सो कैसेही जो पुरुषभावरूप होई ताको मुख न देखे ॥
या वृंदाको अंगिकार श्रीपुरुषोत्तमनें सब अंगनसु की-
नोंहै ॥ ऐसे भावसों तुम रहियो ॥ अरु अन्य पुरुषको संग
मत करियो ॥ पति जो धनी ताको व्रत आचरण करे सो
पतिव्रतासो कहा ॥ सो पुरुषोत्तमसंबंधी सकल सुख पा-
वेंगे ॥ तुलसीदलको यह भावहै ॥ जब जीव नाम पावे ॥
तब वैष्णव होई ॥ वैष्णवसो कहा ॥ जो विष्णुकीसेवा
जोग्य भयो होई सो वैष्णवसो कहावे ॥ ऐसे वैष्णव सुख
देहैं ॥ श्रीनारायण सो श्रीपुरुषोत्तमके नीचे रहतहैं ॥ ता-
के भजनयोग्य भयो ॥ ताको नाम वैष्णव ॥ फेर वा वैष्णव
को भाव हृदयमें भक्ति आवे श्रवण कीर्तन नामिकमल-
में प्यारो लागे ॥ तब जानिये जो वैष्णवता आई ॥ फेर
उत्तम वैष्णवको मिलाप रहे ॥ दीनतापूर्वक दासवैरहे ॥
तब जानिये जो वैष्णवता आई ॥ नारायण भजन योग्य

भयो ताको नाम दास अब नारायणकोनसे ॥ जलना-
 रायण १ सत्यनारायण २ धर्मनारायण ३ नरनारायण
 ४ लक्ष्मीनारायण ५ आदिनारायण ६ ये श्रीगुरुषोत्तम-
 के पायतरे रहैंहैं ॥ ताके भजन योम्य भयो ॥ ताको नाम
 दास दाससो कहा ॥ दाससो कहा दूर ठाढो रहे ॥ घणो
 सुखपावे ॥ तब दास सो सर्वदा श्रीठाकुरजीको कामकरे
 कीर्तन करे ॥ सदा प्रसन्न रहे ॥ और कछु सुहाए नहीं ॥
 तब दासत्व आवे ॥ तब सेवक भयो ॥ सेवकसो कहा जो
 धनीकेपास रहे ॥ अंगछु सेवा करे ॥ सेवाचोर न होई ॥
 जो करे सो श्रीठाकुरजीसो पूछके करे ॥ ताको नाम से-
 वक ॥ अब सो सेवक ॥ श्रीठाकुरजीके गुणानुवाद विचा-
 रिकें गावें ॥ हरख पावें ॥ रोमांचित होई ॥ अरु नयनतें
 आँसु आवें ॥ साधु होई ॥ साधुसो सुधो ॥ जाकें कप-
 टको नाम नहीं ॥ मनमें तनकहूँ कपट नहीं ॥ तासों
 साधु कहिये ॥ ऐसो होई तब सेवक भाव आवे ॥ तब भ-
 गवदीय होई ॥ भगवदीय सो कहा ॥ भगवदीयसो श्री-
 जीको कृपापात्र होवे ॥ भगवदीय सो भगवत्स्वरूपहै ॥
 अब फेर पात्रको गुण लेनो ॥ तहां दृष्टांत ॥ जैसे सोनेको
 पात्र है अरु विष भन्यो ॥ सो उत्तम पात्र जानिके लीजिये
 तो विनाश होई ॥ अरु माटीको पात्र होई ॥ अरु उत्तम
 सामग्री होई ॥ सो लीजिये तो परम सुख होय ॥ तातें
 भीतरको गुण देखके संग करणो ॥ ॥ इति श्रीपुष्टिदाव
 ग्रंथ संपूर्ण ॥

पुस्तक मिलनेका ठिकाना—

वैष्णव रामदासजी गुरु श्रीगोकुलदासजी

(रणहर पुस्तकशाला) हाकीर.

दोसोबावन वैष्णवनकी वार्ता और चौरासी वैष्णव- नकी वार्ता यह दोनों ग्रंथनको प्रथमसे आश्रय देनेवाले आश्रयदाताओंकी नामावली

- १०९ श्रीमान रोठजी खेमराज श्रीकृष्णदास श्रीवैकटेश्वर स्तिवनेस ...मुंबई.
- १०० श्रीमान रोठजी गंगाविष्णु श्रीकृष्णदास लक्ष्मीवैकटेश्वरप्रेस कल्याण.
- १०० श्रीपंडित ज्येष्ठाराम मुकुंदजी संस्कृत पुस्तकालय कालकादेवी मुंबई.
- १०० श्रीपुत पंडित दत्तराम चौबे मानिकचौक पुस्तकालयमथुरा.
- १०० श्रीपुत पंडित श्रीधरशिवलालजी ज्ञानसागर छापखानामुंबई.
- १० श्रीपुत पंडित नारायण मूलजी संस्कृत पुस्तकालय झवेरवागमुंबई.
- ५ श्रीमान बाबू रंगनाथजी खेमराजजी श्रीवैकटेश्वर प्रेसमुंबई.
- ५ रा. रा. जनार्दन महादेव गुर्जर बुकसेलर कालकादेवीरोड रामबाहीमुंबई.
- ५ रा. रा. नारायण चितामण आठबले बुकसेलर लीमडीचौक बडोदा.
- ५ श्रीमहंतजी गोपालदासजी गुरुश्री भगवानदासजी
जालेश्वर श्रीरणछोरजीके मंदिरके मालकमुंबई.
- ५ श्रीमहंतजी रघुवीरदासजी गुरुश्रीजयधरामदासजी तपोवन गु० नाशिक.
- ५ श्रीमहंतजी किशनदासजी गुरुश्री खेमदासजी भागदेवी...मुंबई.
- ५ विद्याभूषण कंपनी भारत मार्निङ पुस्तकालय कालकादेवीरोड...मुंबई.
- ५ रोठ माधवदास गोकुलदास वास्ता कोट बजारगेट मुंबई.
- ५ रोठ गोकुलदास नेणसी कोट बजारगेटमुंबई.
- ५ रोठ बीरजी वालजी कोट मोदीखानामुंबई.
- ५ श्रीमतीबाई नाथीबाईते रोठ रामोवर ठाकरसीनी धर्मपत्नी महालक्ष्मीमुंबई.
- ५ स्वर्गवासी धनुराम जीवनराम वेदधर्म सज्जाना स्थापकमुंबई.
- ५ बुकसेलर झवेरभाई उमदेभाई पटेल रीचीरोडअमदावाद.
- ५ पंडित श्रीकृष्ण मोहनं रामा कालंतिक पुस्तकालय मुंबई.
- २ ठाकर बसनजी परमानंद बाह्यपाला बुकसेलर कालकादेवीरोड ...मुंबई.
- १ स्वामी विश्वस्वरुपाचार्य गुरुश्रीपरमानंदजीवद्विनारायणका मंदिर
दरीयावरअमदावाद.

- १ महंतजी मधुरादासजी आत्मारामदासजी बिश्वामीचीना मोटापुलपर स्वस्थान श्रीरामजी मंदिर बडोदा.
- १ शा. चुनीलाल बापुजी रामजी वेदिरनीसेरीगां रेवडा.
- १ परी. रंगलदास गोरधनदास. वजारगां रेवडा.
- १ महाराज श्रीहंसदासजी गोपालदासजी लेनसर सामें जावनगर.
- १ महंत श्रीगोकलदासजी कुहानदासजीराघोरामजीनु मंदिर ... जावनगर.
- १ देसाई गोरधन पीतांबर सावली नेवास.
- १ पुरंदरे आणि कंपनी ब्रह्मसेलर माधवबाग मुंबई.
- १ वैष्णव हीरालाल गोकलदास मंदसोरवाला मंदसोर.
- १ चोकसी चुनीलाल ब्रजचूपाणदास खाराकुवा मुंबई.
- १ लक्ष्मीपाई लक्ष्मीनारायणनु मंदिर, बचलो जोईवाडो मुंबई.
- १ ठक्कर जमनादास भीमजी मल्हाराव लेन नं० ८ मुंबई.
- १ श्रीमानरोठजी हीरानंदजी कान्हेतसरवाले पंजाब अन्तसर.
- १ ठक्कर बीठलदास हरीदास जिला सातारा बडगांमवाघमारा.
- १ वै०महुलाल आत्माराम तुलेश्वर बीजो जोईवाडो मुंबई.
- १ वै० मोहनलाल इलमदास तुलेश्वर बीजो, जोईवाडो मुंबई.
- १ देवीदास बन्दावनदास ५५ गोरधन ठिकाना, महालक्ष्मी मुंबई.
- १ श्रीपरमहंसजी माधवदासजी खास्य चौक श्रीसत्यनारायणका मंदीर पोष्ट सिणोर, मालसर.
- १ पोष्टमास्तर हरिलाल भाई नडीवादा हाळ मु०पोष्ट हाफीस ... डाकोर.
- १ वैद्यराज मुरारजी भाई नथुंजी कोट होलीचकला मुंबई.
- १ श्रीमहंतरापोदासजी गुरुश्री बजरंगदासजी श्रीरामजीमंदिर सुरला.



